

# Nihánj me se-nanā Jesucristó nana sa' cachrón síí cu'naj Lucas rihaan yanj a

Nanā nihánj taj xna'anj se vaa qui'yaj síí cu'naj Lucas yanj nihánj ca'nej so' rihaan síí cu'naj Teófilo a

**1** Dan me se que'ee uxrá yuvij guun rá cachrón nicā nana rihaan yanj che'é nu' se vaa qui'yaj Jesucristó sca'núj ní' asij rque doj a. <sup>2</sup>Dan me se cachrón nij so' nana cataj xna'anj nij síí quene'en cunudanj se vaa qui'yaj Jesucristó asij guun che'e so' cayáán so' rihaan chumií nihánj, ne nij síí quene'en ro', me síí atā suun nata' nana yo' rihaan nu' yuvij a. <sup>3</sup>Ne 'unj nihánj me síí tucu'yón uxrá, don ca'vee narij cunudanj rasuun yo', ne che'é dan vaa che'é cachrón nicā 'unj cunudanj se vaa qui'yaj Jesucristó rihaan yanj nihánj nayāa so' sij cu'naj Teófilo sij sa' ndo'o, raj adonj. <sup>4</sup>Nanj qui'yáj, gaa ne ca'vee guun ya rá so' se vaa ya vaa nu' nana cataj xna'anj nii rihaan so' che'é Jesucristó adonj.

Nanā nihánj taj xna'anj se vaa cataj xna'anj se-mozó Diose se vaa ca'ngaa

Juan síí cuta' ne man yuvij a

<sup>5</sup>Gaa cayáán síí cu'naj Herodes síí nicaj suun rey uun chij rihaan

estadó Judea, gaa ne 'o xrej canicun' rihaan yuvij israelitá me 'o síí cu'naj Zacarías, ne cachéé so' ga 'o ta'aj nij xrej, ne ta'níí ta'nij si'no Abías me nij so' a. Ne nicā Zacarías me chana cu'naj Elisabet, ne ta'nij 'o xrej me no', <sup>6</sup>ne síí yanj sa' rihaan Diose me roj nicā roj so', ne sa' uxrá cuno roj so' nu' nij nana me rá Diose cuno ní', ne nuvi' cacun' tumé roj so' a doj a ma'. <sup>7</sup>Tzaj ne taj vaj ta'níí roj so', che'é se chana ituun me Elisabet adonj. Ne aj cachén ndo'o yo' ne roj nicā roj so' nanj á.

<sup>8</sup>Dan me se gaa natúj nij ta'níí ta'nij si'no Abías qui'yaj suun nij so' se-suun Diose, <sup>9</sup>ne 'o güii quirí' ni'yaj Zacarías catuú so' nuvií nocoo caraa so' squíí xlá rihaan ya'an a. 'O se tucuáán nocoo' nij xrej me se daj a güii tico tixaj nij so' se-chuvií nij so', se vaa quene'en nij so' a me síí quirí' ni'yaj caraa squíí rihaan ya'an a. <sup>10</sup>Dan me se catúj Zacarías rque nuvií nocoo, ne xe' nicun' 'o x'ne' yuvij, cachíín ni'yaj nij so' rihaan Diose gaa caraa Zacarías squíí rihaan ya'an a. <sup>11</sup>Dan me se naqui'yaa 'o se-mozó Diose rihaan Zacarías, ne nicun' so' rej nuva' mesá altar acaa squíí a. <sup>12</sup>Dan

me se gaa quene'en Zacarías man se-mozó Diose, gaa ne cuchu'vi' ndo'o so' a. <sup>13</sup>Tzaj ne cataj se-mozó Diose rihaan so', ne:

—Se cuchu'ví' so', man Zacarías. 'O se aj cuno Diose nana cachíin ni'yáá so' rihaan so', ne che'é dan cuchruj nica so' Elisabet ta'nij sno'o so' adonj. <sup>14</sup>Juan tucu'náj so' man so' á. Guun niha' ndo'o rá so', ne guun niha' rá que'ee yuvi asa' ca'ngaa so' adonj. <sup>15</sup>'O se ta'níi so' me síi guun síi sa' ndo'o rihaan Diose nanj adonj. Se co'o so' tzi' se co'o so' rinté se co'o so' ma'. Asij güii ataa ca'ngaa so', ne guun che'e Nimán Diose yo'o cayáán Nimán Diose ga so' nanj á. <sup>16</sup>Ne que'ee síi israelitá canicaj nimán canoco' uún man Diose síi 'nij ra'a man nij so', qui'yaj ta'níi so' adonj. <sup>17</sup>Dan me se guun so' síi ca'anj suun rihaan Diose adonj. Asino ta'níi so' guun che'e ca'mii natáj rihaan yuvi, gaa ne ca'mii síi ca'nej Diose man a. Daj se qui'yaj Nimán Diose, racuíj Nimán Diose man síi cu'naj Elías gaa naá ro', danj qui'yaj guee Nimán Diose, racuíj ndo'o so' man ta'níi so' a. Ca'mii luj yuvi ga ta'níi yuvi, qui'yaj so', natuna nimán nij síi chi'ii cuno nij so' rihaan Diose, qui'yaj so' nanj á. Juan me síi qui'yaj, ne caraya'anj nu' yuvi che'é se ca'na' síi qui'nij ra'a man ní' adonj. —Nu' nana nihánj cataj xna'anj se-mozó Diose rihaan Zacarías a.

<sup>18</sup>Gaa ne cataj Zacarías rihaan se-mozó Diose a:

—Asa' ca'vee cuchuman raj se vaa ya ca'mii so' ga. Chii nga mé 'unj nihánj, ne chana chij me nica 'unj

nihánj nanj á —taj Zacarías rihaan se-mozó Diose yo' a.

<sup>19</sup>Gaa ne cataj se-mozó Diose rihaan Zacarías a:

—Gabriel síi nicun' rihaan Diose mé 'unj adonj. Ma'an Diose me síi ca'née manj ca'naj ca'mij ga so' adonj. Ca'ne' so' suun rihanj se vaa cataj xna'anj 'unj nana sa' nihánj rihaan so', <sup>20</sup>tzaj ne ne cuchuman rá so' nana nihánj, ne che'é dan me guun ya'mii so' adonj. A 'ó nana se ca'vee ca'mii so' ndaa quisij güii quisij ya nu' nana nihánj ndaa vaa cataj xna'anj 'unj rihaan so' adonj. Ne ya quisij nana nihánj güii aj cachrón Diose adonj. —Danj cataj se-mozó Diose rihaan Zacarías a.

<sup>21</sup>Dan me se xe' mán nij yuvi, na'vij nij yuvi a me orá curihanj Zacarías rque nuvií, ne caraya'anj nij so' se vaa guun raan so' rque nuvií a. <sup>22</sup>Dan me se gaa curihanj so' rque nuvií, gaa ne ne ca'vee ca'mii so' ga nij so' a ma'. Che'é dan xcaj nij so' cuentá se vaa naqui'yaa 'o rasuun rihaan Zacarías, qui'yaj Diose, gaa nuu so' rque nuvií a. Daj doj ra'a so' tucunó so' che'é se yo'o guun ya'mii so' a.

<sup>23</sup>Gaa cachén Zacarías se-suun Diose, gaa ne quinan' so' tucua' so' a.

<sup>24</sup>Cachén doj güii, gaa ne nari' nica so' Elisabet 'o ne'ej a. 'Un' yavii cayáán no' tucua' no', <sup>25</sup>ne nuchruj raá no' nana nihánj a: “Ga naá guun na'aj uxraj rihaan yuvi che'é se chana ituun mej, tzaj ne ndaa yaj racuíj Diose manj á”. Danj guun rá no' a.

**Nana nihánj taj xna'anj se vaa  
cataj xna'anj se-mozó Diose se  
vaa ca'ngaa Jesucristó a**

<sup>26</sup>Gaa quisíj vatan' yavii cunuú rque Elisabet, gaa ne ca'née Diose man

se-mozó so' sí cu'naj Gabriel ca'anj so' ndaa 'o chuman' naj rihaan estadó Galilea chuman' cu'naj Nazaret a. <sup>27</sup>Ne ca'anj cataj xna'anj so' 'o nana rihaan 'o chana yaan cu'naj Mariá a. Aj guun ya xcaj 'o sí cu'naj José man no', ne 'o ta'ní ta'nij si'no sí guun chij ndo'o gaa naá sí cu'naj David me so' a.

<sup>28</sup>Gaa ne dan me se cuhi' se-mozó Diose rihaan Mariá, ne cataj so':

—Racuáj Diose man so' á. 'O se qui'yaj ndo'o Diose se luj che'é so', ne yo'o yáan Diose ga so' á. Sa' doj cavii uruún so' rihaan cunudanj nij chana, qui'yaj Diose a. —Danj cataj se-mozó Diose rihaan Mariá a.

<sup>29</sup>Tzaj ne caráya'anj Mariá nana ca'mii se-mozó Diose, ne ne quene'en no' me che'é ca'mii so' nana vaa danj ma'. <sup>30</sup>Gaa ne cataj uún se-mozó Diose rihaan no' a:

—Se cuchu'ví' so', man Mariá.

Aran' rá Diose qui'yaj Diose se luj che'é so' á. <sup>31</sup>Nari' so' 'o ne'ej, ne cuchruj so' 'o ne'ej sno'o adonj. Jesús tucu'náj so' man so' á. <sup>32-33</sup>Sí sa' ndo'o guun so', ne ta'ní Diose sí sa' ndo'o me so' adonj. Guun so' sí guun chij rihaan ní', qui'yaj Diose sí 'nij ra'a man ní' a. Ase vaa guun chij xii so' sí cu'naj David rihaan soj sij israelitá gaa naá ro', danj qui'yaj ma'an so' guun chij so' rihaan soj nu' cavii nu' ca'anj adonj. —Danj cataj Gabriel rihaan Mariá a.

<sup>34</sup>Ne cataj Mariá rihaan se-mozó Diose, ne:

—Chana yaan mej á. Asa' ca'vee cuchruj 'unj ne'ej, rá so' ga —taj Mariá, xná'anj no' man se-mozó Diose a.

<sup>35</sup>Gaa ne cataj se-mozó Diose rihaan Mariá a:

—Cayáan Nimán Diose ga so', ne racuáj Diose sí nucuaj ndo'o man so', ne che'é dan cuchruj so' ne'ej sa' rihaan Diose, ne ta'ní Diose me ne'ej cuchruj so' a. <sup>36</sup>Ne xcaj so' cuentá che'é tuvi' chana so' Elisabet se vaa nda' se chana ituun me no', taj nii, ne nda' se chana chij me no', tzaj ne aj quisíj vatan' yavii nuú rque no' cuano nanj á. <sup>37</sup>Diose me sí a'vee 'yaj cunudanj a —taj se-mozó Diose rihaan Mariá a.

<sup>38</sup>Ne cataj Mariá rihaan se-mozó Diose a:

—Dan me se nanj chana 'yaj suun che'é sí 'nij ra'a man ní' mej, ne ca'vee qui'yaj so' ndaa vaa cataj so' rihanj á —taj Mariá rihaan se-mozó Diose yo' a.

Gaa ne naxuun se-mozó Diose man so' a.

**Nana nihánj taj xna'anj se vaa ca'anj Mariá ca'mii no' ga Elisabet a**

<sup>39</sup>Cachén doj güii, gaa ne qui'yaj chuvii Mariá si'yaj no', ne yoo ndo'o ca'anj no' 'o chuman' naj estadó Judea, 'o chuman' naj rej xraj a. <sup>40</sup>Ne ca'anj no' tucua' Zacarías, ne catúj no' rá ve', ne cataj no': “Vaa nucuáa so' na'”, taj no' rihaan Elisabet a.

<sup>41</sup>Nu' cuno Elisabet nana ca'mii Mariá, ne nu' güéj ne'ej rque no' a. Dan me se catúj Nimán Diose nimán Elisabet, <sup>42</sup>ne nucuaj ca'mii no' ga Mariá, cataj no':

—Rqué Diose xna'anj ni'yaj uruún so' rihaan cunu' danj chana a. Ne uxrá rque Diose xna'anj ni'yaj ne'ej cuchruj so' a. <sup>43</sup>Ve'é ndo'o quirán' 'unj se vaa ca'na' roj nii sí qui'nij ra'a man ní' tucua' a. <sup>44</sup>Nu'

cunoj nana cataj so' rihanj, ne nu' guun niha' rá ne'ej, ne nu' güéj ne'ej rquej a. <sup>45</sup>Cavii sa' so' che'é se amán rá so' se-nana Diose, se vaa quisij ya nu' nana ca'mii Diose rihaan so' adonj —taj Elisabet rihaan Mariá a.

<sup>46-48</sup>Gaa ne cataj Mariá nana nihánj a:

—Nda' se chana yanj rma'an mé 'unj, tzaj ne cunu 'ee rá Diose ni'yaj so' manj a. Che'é dan me daj cataj ma'an Diose, ne ca'vee qui'yáj a. Nanuj rá Diose manj, ne che'é dan sa' vaa Diose, rá nimanj, ne guun niha' ndo'o rá nimanj ni'yaj nimanj man Diose síi tinanii manj rihaan sayuun nanj adonj. Ne yaj cataj cunudanj yuvii se vaa chana quiri' ndo'o xna'anj ni'yaj mej a. <sup>49</sup>Danj cataj nij so' che'é se sa' qui'yaj Diose síi nucuaj ndo'o che'ej a. Ne síi vaa sa' inanj me so' adonj. <sup>50</sup>O 'ee rá so' man taran' nij síi uno rihaan so' a. <sup>51</sup>Qui'yaj Diose suun nocoo uxrá a. Nu' nij síi xtá' nimán ro', qui'yaj canaán Diose rihaan nij so', ne quinavij se-nana nij so' nanj adonj. <sup>52</sup>Nu' nij síi rii ta'nga' ro', ca'nee Diose suun ra'a nij so', ne guun nij so' síi noco' nanj adonj. Ne nu' nij síi noco' ro', guun nij so' síi quirii ta'nga' naca, qui'yaj Diose nanj á. <sup>53</sup>Nu' nij síi na'aan rque ro', rque Diose chraa cha nij so', ne nu' nij ru'vee ro', cunu nique nij so', qui'yaj Diose a. <sup>54</sup>Quisij ya nu' nana ca'mii Diose rihaan xii ní' nij síi man gaa naá a. Racuíj so' man ní' sij israelitá, che'é se sij noco' man so' me ní' adonj. <sup>55</sup>Nanuj rá so' ndaa vaa cataj so' rihaan xii ní' síi cu'naj Abraham,

ne che'é dan 'ee rá so' man ní' sij israelitá, che'é se ta'níi ta'nij si'no Abraham me ní' a. —Nu' nana nihánj me nana cataj Mariá a.

<sup>56</sup>Gaa ne va'nuj yavii cayáán Mariá tucúa Elisabet, gaa ne quinán' no' tucúa no' a.

Nana nihánj taj xna'anj se vaa ca'ngaa Juan síi cuta' ne man yuvií a

<sup>57</sup>Gaa quisij güii ca'ngaa ta'níi Elisabet, gaa ne dan me se cuchruj no' 'o ne'ej sno'o cunii a. <sup>58</sup>Cuno nij tuvi' no' se vaa ve'é uxrá qui'yaj Diose ga no', ne guun niha' uxrá rá nij so' che'é no' a. <sup>59</sup>Gaa quisij ne'ej tunj güii, gaa ne dan me se chuchi' nij síi cuta' ta'nga' nee man ne'ej ve' a. Ne nij so' me rá tucu'náj Zacarías man ne'ej che'é se Zacarías cu'naj rej ne'ej, <sup>60</sup>tzaj ne ne ca'vej rá nii ne'ej cu'naj ne'ej danj ma'. 'O se cataj no':

—Juan cu'naj se-chuvii ta'níj á —taj no' rihaan nij so' a.

<sup>61</sup>Tzaj ne cataj nij síi ca'na' rihaan no' a:

—Tzaj ne a 'ó tuvi' soj ne cu'naj Juan ma' —taj nij so' rihaan no' a.

<sup>62</sup>Che'é dan xná'anj nij so' man rej ne'ej, daj doj ra'a nij so' tucunó nij so' a. Guun rá nij so' quene'en nij so' daj quinaj se-chuvii ne'ej, qui'yaj rej ne'ej, rá nij so' a.

<sup>63</sup>Cachín Zacarías yanj ga ra'a so', ne cachrón so' letrá rihaan yanj yo', ne: “Juan cu'naj se-chuvii ne'ej”, taj letrá cachrón so' rihaan yanj, ne che'é dan caráya'anj ndo'o nij síi ca'na' a. <sup>64</sup>Nu' cachrón Zacarías letrá, ne nu' ca'vee ca'mii uún so' nanj adonj. Gaa ne guun che'e so' cataj so' se vaa ve'é uxrá qui'yaj

Diose a. <sup>65</sup>Ne caráya'anj nij síf yanj nichrun' se vaa quiran' Zacarías se vaa guun ya'mii so', ne ndaa taran' nij síf yanj quij nicun' estadó Judea ro', cuno ndaa vaa quiran' so' a.

<sup>66</sup>Taran' nij síf cuno ro', nuchruj raa, ne xná'anj nij so' man tuvi' nij so' me suun cata Juan asa' cachij so' a. Danj tu'va nij so' che'é se quene'en nij so' se vaa rqué ndo'o Diose xna'anj ni'yaj Juan a.

**Nana nihánj taj xna'anj se vaa cataj xna'anj Zacarías se vaa racuíj ndo'o Diose man nij yuvií israelitá a**

<sup>67</sup>Racuíj Nimán Diose man rej Juan síf cu'naj Zacarías, ne cataj so':

<sup>68</sup>—Ca'mii sa' ní' che'é Diose síf noco' ní' sij israelitá a. Ése racuíj so' man ní' sij noco' man so', ne tinanii so' man ní' rihaan sayuun a.

<sup>69</sup>Ca'na' 'o síf nucuaj guun so' síf tīnanii sa' man ní' rihaan sayuun, quiyaj Diose a. 'O ta'níí ta'nij si'nó síf guun chij gaa naá síf cu'naj David guun so', <sup>70</sup>ndaa vaa cataj nij síf nata' se-nana Diose, quiyaj Diose gaa naá, <sup>71</sup>ne dan me se ca'na' síf nucuaj tīnanii so' man ní' rihaan nij síf taj ri'yunj man ní', taj nij so', ne se guun nucuaj nij síf taj ri'yunj man ní' quiyaj chi'ii nij so' man ní' ma', taj nij so' a. <sup>72</sup>Dan me se cunuu 'ee rá so' man ní' ndaa vaa cata' tu'va so' rihaan xii ní', ne yo'o nuú rá so' nu' se vaa cataj xna'anj so' se vaa quiyaj so' che'é ní' do' a.

<sup>73-74</sup>”Dan me se cataj so' rihaan xii ní' síf cu'naj Abraham se vaa ya ya tīnanii so' man ní' rihaan nij síf taj ri'yunj man ní', gaa ne se cuhu'vi' ní' quiyaj suun ní' che'é so' a. <sup>75</sup>Ne gaa nica nimán ní'

rihaan Diose nu' güii gaa i'na' ní' adonj —taj Zacarías, gaa ne ca'mii uún Zacarías rihaan ma'an ta'níí so'— <sup>76</sup>Ne xa' ma'an so', tzaj ne guún so' síf nata' se-nana Diose, ne Diose me síf sa' ndo'o, rej. Asino so' guun che'e ca'mii natáj, gaa ne ca'na' síf quí'nij ra'a man ní' ei. Dan me se cunuu nica nimán yuvií, quiyáá so', ne caráya'anj yuvií man síf ca'na' quí'nij ra'a man ní', quiyáá so', <sup>77</sup>ne so' quiyaj xcaj nij síf canoco' man Diose cuentá se vaa ca'vee quinavij cacun' tumé nij so' quiyaj síf ca'na', ne ca'vee quinanii nij so' rihaan sayuun a. <sup>78</sup>Danj quiyaj Diose che'é nij so' che'é se 'ee uxrá rá Diose man nij so', ne che'é dan ca'nej so' man síf quí'nij ra'a man nij so' asa' quisíj güii ca'vee cavii sa' ní' quiyaj Diose adonj. <sup>79</sup>Gaa ne xa' tuvi' ní' síf ne acaj cuentá do', xa' tuvi' ní' síf chu'vi' ndo'o se vaa caví' nij so' do', tzaj ne cuchuguun rihaan nimán nij so', gaa ne xcaj nij so' cuentá, gaa ne nari' taran' ní' daj quiyaj ní', ne cunuu xej nimán ní' adonj —taj Zacarías rihaan ta'níí so' a.

<sup>80</sup>Dan me se cachij xnii cu'naj Juan, ne guun so' síf nucuaj nimán, ne inanj rej tacaan yáan so' ndaa se quisíj güii guun che'e so' nata' so' se-nana Diose rihaan nij síf israelitá a.

**Nana nihánj taj xna'anj se vaa ca'ngaa Jesucristó a**

**2** Maan yo' ca'ngaa Juan ro', cayáan síf cu'naj Augusto síf nicaj suun emperador, ne ca'neé so' nana rihaan nij síf man taran' nij chuman' rii ta'nga' so' rihaan

se vaa me rá so' naxcaj so' 'o yanj documento no se-chuvii 'o 'o nij yuvii a. <sup>2</sup>Ne cayáán síi cu'naj Cirenio síi nicaj suun gobernador uun chij rihaan estadó Siria gaa naxagaa yanj yo' a. <sup>3</sup>Dan me se ca'anj cunudanj nij yuvii chuman' chiháán xii nij so', gaa ne naxagaa yanj no se-chuvii nij yuvii yo' a.

<sup>4</sup>Cavii síi cu'naj José chuman' Nazaret chuman' naj estadó Galilea, ne ca'anj so' chuman' Belén chuman' naj estadó Judea a. Chuman' ca'ngaa xii so' síi guun chij gaa naá síi cu'naj David me Belén, ne che'é dan ca'anj José ndaa Belén, che'é se 'o ta'níi ta'nij si'no David me so' a. <sup>5</sup>Nicaj so' chana cu'naj Mariá chana aj guun ya xcaj so' man, ca'anj so' cano se-chuvii roj so' rihaan yanj a. Nuú rque Mariá, <sup>6</sup>ne gaa caran' roj so' Belén, ne quisij güiii ca'ngaa ne'ej a. <sup>7</sup>Taj yan vaa ya'núj caran' roj so' ca'ngaa ne'ej a ma'. Dan me se daj doj rej man scúj vaa ya'núj caran' roj so' a. Ne cuchruj no' 'o ne'ej sno'o cunii ta'níi no' síi chava' a. Qui'yaj yanú' no' man ne'ej, ne ca'née no' man ne'ej rá rihoo yan nuú co'yoó chá scúj a.

**Nana nihánj taj xna'anj se vaa curuvi' se-mozó Diose rihaan nij síi tumé matzinj a**

<sup>8</sup>Dan me se mán síi tumé matzinj rej tacaan nichrun' yáj tu'va chuman' Belén, ne nicun' ta'aj nij so' xe' tumé nij so' daán nij so' rej nij a. <sup>9</sup>Gaa ne dan me se naqui'yaa 'o se-mozó Diose rihaan nij so', ne cuchuguun uxrá rihaan nij so', qui'yaj Diose, gaa ne cuchu'vi'

ndo'o nij so' a. <sup>10</sup>Gaa ne cataj se-mozó Diose rihaan nij so' a:

—Se cuchu'vi' soj ma'. 'O se ca'ná' 'unj nata' 'unj 'o nana sa' rihaan soj che'é rasuun qui'yaj guun niha' rá taran' nij yuvii ei. <sup>11</sup>'O se cuan' me se ca'ngaa 'o ne'ej chuman' chiháán David, ne ne'ej yo' ro', me síi ca'née Diose tinanii man yuvii rihaan sayuun, ne síi qui'nij ra'a man ní' me so' ei. <sup>12</sup>Nanj vaa quene'en soj se vaa ya ca'mij rihaan soj a. Ca'anj nij soj chuman' Belén, ne nari' soj 'o ne'ej guun yanú', ne nuú so' rá rihoo chá xcuu co'yoó, ne so' me síi qui'nij ra'a man ní' a. —Danj cataj se-mozó Diose rihaan nij síi tumé matzinj a.

<sup>13</sup>Dan me se nu' navij ca'mii se-mozó Diose ga nij so', gaa ne veé maan orá dan curuvi' que'ee doj nij se-mozó Diose uún, ne ve'é uxrá ca'mii nij so' che'é Diose, cataj nij so':

<sup>14</sup>—Sa' uxrá vaa Diose, síi nicun' xta', ne gaa xej nimán nij yuvii sij sa' nimán a —taj nij se-mozó Diose rihaan nij síi tumé matzinj a.

<sup>15</sup>Dan me se quinani' nij se-mozó Diose xta', gaa ne cataj nij síi tumé matzinj rihaan tuvi' nij so' a:

—Ca'anj ní' Belén quene'en ní' daj guun se vaa cataj xna'anj Diose rihaan ní' ei —taj nij so' rihaan tuvi' nij so' a.

<sup>16</sup>Yoo ca'anj nij so', ne dan me se nu' cuchi' nij so', ne nu' quinari' nij so' man Mariá ga José, ne dan me se quinari' nij so' man ne'ej, nuú ne'ej rá rihoo a. <sup>17</sup>Dan me se gaa quene'en nij síi tumé matzinj man ne'ej, gaa ne cataj xna'anj nij so' nana ca'née Diose rihaan nij so'

che'é ne'ej rihaan Mariá ga José do', rihaan nij síi man nichrun' do' a. <sup>18</sup>Gaa ne caráya'anj cunudanj yuvií cuno nana ca'mii nij síi tumé matzinj yo' a. <sup>19</sup>Ne Mariá me se ca'née no' cunudanj nana yo' cúu yave no', ne nuchruj raa no' che'é nana yo' a. <sup>20</sup>Dan me se quinan' nij síi tumé matzinj, gaa ne guun niha' uxrá rá nij so' che'é nu' nana cuno nij so' do', che'é nu' se vaa quene'en nij so' do', ne: "Sa' uxrá qui'yaj Diose á", taj nij so' a. 'O se ase vaa cataj xna'anj se-mozó Diose rihaan nij so' ro', veé danj vaa guun a.

**Nana nihánj taj xna'anj se vaa caxrífj roj nica José ne'ej ston Diose a**

<sup>21</sup>Cachén 'o tunj güii gaa ne cuta' nii ta'nga' nee man ne'ej, ne Jesús cu'naj ne'ej, qui'yaj nii, ndaa vaa cataj xna'anj se-mozó Diose gaa ataa nayon so' rque Mariá a.

<sup>22</sup>Cachén vij chihaa güii, gaa ne quisíj güii cunuu sa' Mariá rihaan Diose a. Che'é dan nicaj roj so' man ne'ej ca'anj roj so' nuvií nocoo yanj chuman' Jerusalén, ne caxrífj roj so' ne'ej ston Diose a. <sup>23</sup>'O se danj Diose taj se vaa daj a ta'níi nij yuvií israelitá síi chava' guun si'yaj Diose, ne che'é dan qui'yaj roj so' danj a. <sup>24</sup>Dan me se ca'anj roj so' ca'anj go' roj so' xcuu rihaan Diose ndaa vaa taj danj Diose a. Ca'vee go' yuvií vij cha'aan ca'vee go' yuvií vij culuj ca'vee, taj danj Diose a.

<sup>25</sup>Dan me se cayáan 'o chii nga cu'naj Simeón chuman' Jerusalén a. Sij vaa nica nimán me so', ne sij nocoo' uxrá man Diose me uún so', ne quisíj que'ee yo' na'vij uxrá so' se vaa tinanii Diose man nij yuvií

israelitá rihaan sayuun a. Cayáan Nimán Diose ga so', <sup>26</sup>ne aj cataj xna'anj Nimán Diose rihaan so' se vaa se cavi' so' ndaa se aj quene'en ya so' man síi ca'nej Diose a. <sup>27</sup>Dan me se güii cuchil' roj nica José chuman' Jerusalén me se cataj xna'anj Nimán Diose rihaan Simeón se vaa ca'anj so' nuvií nocoo, ne che'é dan ca'anj so' catúj so' rque nuvií a. Gaa ne catúj roj nica José rque nuvií ga ne'ej che'é se guun rá roj so' qui'yaj roj so' ndaa vaa taj danj Diose a. <sup>28</sup>Gaa ne tára'a síi cu'naj Simeón ne'ej, ne nago' so' graciá rihaan Diose che'é ne'ej a. Ne nihánj me nana ca'mii so' a:

<sup>29</sup>—Quisíj ya nu' ndaa vaa cataj so' rihanj, ne che'é dan ca'vee cavij yaj, ne gaa xej nimanj, Ataj Chij. <sup>30</sup>Quene'en rihanj man síi ca'née so' man tinanii man núj rihaan sayuun, <sup>31</sup>ne quene'en cunudanj yuvií se vaa ca'na' so' qui'yáa so' nanj á. <sup>32</sup>Ase vaa ya'an chuguun gaa so' tihaan so' se-tucuanj so' rihaan nij yuvií yaníj, ne ca'mii sa' nii che'é núj sij israelitá, qui'yaj uún so', ese síi nocoo' man so' me núj nanj adonj —taj Simeón rihaan Diose a.

<sup>33</sup>Caráya'anj roj nica José se-nana síi cu'naj Simeón se vaa ca'mii so' che'é ne'ej, <sup>34</sup>ne cachín ni'yaj Simeón rihaan Diose se vaa rque Diose xna'anj ni'yaj roj nica José a. Gaa ne cataj so' rihaan Mariá a: —Cune' Diose man ne'ej nihánj qui'yaj suun so' rihaan Diose, ne dan me se cavii sa' uxrá que'ee tuvi' ní' sij israelitá, qui'yaj so', tzaj ne que'ee tuvi' ní' tuna, qui'yaj uún so' adonj. Dan me se ca'née Diose man so' che'é rej xcaj yuvií cuentá che'é Diose, tzaj ne ca'mii chí'ii nii ni'yaj

nii man so' adonj. <sup>35</sup>Ne xa' so', tzaj ne quinano ndo'o rá ma'an so' che'é so' vaa güii nanj á. Dan me se ca'vee xcaj ní' cuentá daj vaa nimán que'ee yuvií, qui'yaj so' adonj —taj Simeón rihaan Mariá a.

<sup>36</sup>Ne yáan 'o chana hij cu'naj Ana, ne ní' nata' se-nana Diose me no', ne ta'níí síí cu'naj Fanuel me no', ne ta'níí ta'nij si'no síí cu'naj Aser me roj rej roj no' a. Xcaj chii man no' gaa naá, ne nicaj tuvi' roj so' hij yo', gaa ne cavi' nica no', <sup>37</sup>ne quináj no' ne ma'an no', ne quisíj no' ndaa ca'anj chihaa ca'anj yo' gaa ca'ngaa ne'ej cu'naj Jesús a. Chana noco' uxrá man Diose me no', ne che'é dan yo'o cayáan no' nuvíí nocoo, ne niganj yaj a'yuj caráj guee no', ne cachín ni'yaj no' rihaan Diose a. <sup>38</sup>Maan orá ca'mii Simeón che'é ne'ej roj, veé maan orá dan vaj chana hij cu'naj Ana, ne catúj no' rque nuvíí, gaa ne nago' no' graciá rihaan Diose che'é ne'ej, ne cataj xna'anj no' che'é ne'ej rihaan nij yuvií man na'vij güii tinanii Diose man nij síí man Jerusalén rihaan sayuun a.

**Nana nihánj taj xna'anj se vaa canicaj roj nica José quinán roj so' tucua roj so' a**

<sup>39</sup>Dan me se gaa quisíj qui'yaj roj nica José se vaa taj se-tucuanj Moisés, gaa ne quinán roj so' estadó Galilea a. Quinán roj so' chiháan roj so' chuman' Nazaret a. <sup>40</sup>Cachij ne'ej guun so' síí nucuaj a. Xnii vaa hij rá me so', ne rqué uxrá Diose xna'anj ni'yaj so' a.

**Nana nihánj taj xna'anj se vaa ca'mii Jesucristó rihaan nij síí naqui'yaj cuu se-tucuanj Moisés gaa me Jesucristó xnii a**

<sup>41</sup>Daj a yo' ca'anj roj nica José chuman' Jerusalén gaa canuú

cha'anj pascuá, <sup>42</sup>ése danj vaa tucuaán noco' nij síí israelitá a. Dan me se gaa quisíj Jesucristó chuvij yo', gaa ne ca'anj roj nij so' cha'anj ga rej so' a. <sup>43</sup>Cachén cha'anj, gaa ne quinán roj nica roj so', tzaj ne xnii ro', quináj Jerusalén, ne ne quene'en roj nica roj so' se vaa quináj xnii a ma'. <sup>44</sup>Quinán xnii ga tuvi' roj so', rá roj so', ne che'é dan ca'anj roj so' a. Gaa ne rej ti'nuu guun che'e roj so' nano' roj so' man xnii rihaan tuvi' roj so', <sup>45</sup>tzaj ne nuvi' yan vaj xnii a ma'. Che'é dan nanicaj uún roj so' ca'anj uún roj so' Jerusalén, ne nano' uxrá roj so' man xnii a. <sup>46</sup>Quisíj va'nuj güii nano' roj so' man xnii, gaa ne ca'anj roj so' rque nuvíí nocoo man nij síí naqui'yaj cuu se-tucuanj Moisés, ne maan dan ne xnii nanó xrej xnii nana a'mii nij so', ne achín na'anj xnii nana cuu man nij so', <sup>47</sup>ne caráya'anj daj a nij síí cuno nana ca'mii xnii, ése sij nicaj uxrá cuentá me xnii, ne sa' uxrá ca'mii xnii, rá nij so' a. <sup>48</sup>Ne caráya'anj roj nica roj so' gaa quene'en roj so' se vaa ne xnii sca'núj nij sij a. Gaa ne cataj nii so' rihaan so' a:

—Ne chihán' qui'yáa di' man núj, man rej. Nanó ndo'o rá rée di' do', nanó ndo'o rá 'unj do', qui'yáa di', che'é se nuvíí nano' núj mán di', rej —taj nii so' rihaan so' a.

<sup>49</sup>Tzaj ne cataj Jesucristó rihaan roj so' a:

—Taj che'é nano' roj soj manj ma'. Me che'é ne ne'en roj soj se vaa no xcuún 'unj qui'yaj suun 'unj se-tucuanj Réj ga —taj xnii rihaan roj nica roj so' a.



<sup>50</sup>Tzaj ne ne cunō roj so' se-nana xnii se vaa nō xcúún so' qui'yaj suun so' se-chrej Rej so' Diose a.

<sup>51</sup>Dan me se quinan' Jesucristó chuman' Nazaret ga roj so', ne yo'lo yanj uno sa' so' rihaan roj so' a. Ne yo'lo nuú rá Mariá nu' ndaa vaa guun che'é so' gaa ca'ngaa so' do', nu' nana cūu sa' a'mii so' do' a. <sup>52</sup>Dan me se cachij Jesucristó guun so' síi cūu raq, ne caran' rá Diose ni'yaj Diose man so', ne caran' rá yuvii uún ni'yaj yuvii man so' nanj adonj.

Nana nihánj taj xna'anj se vaa ca'anj Juan síi cuta' ne man yuvii tacaan, ca'mii natáj so' a

**3** <sup>1-2</sup>Yo' xnu' cayáán síi cu'naj Tiberio síi nicaj suun emperador ro', maan yo' dan me rqué Diose se-nana Diose rihaan síi cu'naj Juan ta'níi Zacarías gaa cachéé so' tacaan a. Veé maan yo' ca'mii Diose rihaan Juan, dan me cayáán síi cu'naj Poncio Pilato síi nicaj suun gobernador uun chij rihaan estadó cu'naj Judea a. Ne veé maan yo' dan cayáán síi cu'naj Herodes síi nicaj suun tetrarca uun chij rihaan estadó cu'naj Galilea, ne cayáán tinúu so' síi cu'naj Felipé síi nicaj suun tetrarca uun chij rihaan roj estadó cu'naj Iturea ga Traconite a. Ne veé maan yo' dan cayáán síi cu'naj Lisanas síi nicaj suun tetrarca uun chij rihaan estadó cu'naj Abilinia, ne cayáán roj síi cu'naj Anás ga Caifás xrej atā suun nocōo doj rihaan nij yuvii israelitá a. Taran' nij so' me síi uun chij gaa cuchi' se-nana Diose rihaan Juan gaa cachéé so' tacaan a.

<sup>3</sup>Dan me se cachéé Juan nu' rej naj nichrun' tu'va chráá cu'naj Jordán, ne guun che'e so' ca'mii natáj so' rihaan yuvii se vaa nuchran' nimán nij yuvii, ne tanáj nij yuvii chrej chi'lii, ne ca'vee tinavij Diose cacun' tumé nij yuvii, taj Juan adonj.

<sup>4</sup>Dan me se qui'yaj Juan nu' ndaa vaa taj nana cachrón síi cu'naj Isaías síi nata' se-nana Diose gaa naá rihaan yanj, ne nihánj me nana cachrón so' a: “Nucuj ndo'o ca'mii natáj 'o so' rej tacaan, ne cataj so' se vaa nuchran' nimán yuvii, ne ve'é ca'mii nij yuvii ga síi 'nij ra'a man ní' asa' ca'na' so' adonj.

<sup>5</sup>Dan me se se ca'vee quinaj a doj se chi'lii nimán ní' caráán chrej rihaan síi 'nij ra'a man ní' ca'na' so' ma'. Maan se quirii ní' nu' se chi'lii, ne caraa ní' nu' se sa' cachjin man nimán ní', ne ve'é inanj cunuu nica nimán ní', qui'yaj ní' ei. <sup>6</sup>Gaa ne quene'en nu' nij síi man daj a chuman' se vaa ca'vee tinanii Diose man yuvii rihaan sayuun nanj á”. Dan me nana cachrón síi cu'naj Isaías rihaan yanj gaa naá nana taj xna'anj che'é síi cu'naj Juan a.

<sup>7</sup>Dan me se cuchi' que'ee ndo'o yuvii rihaan Juan che'é se guun rá nij so' cutā' ne Juan man nij so' a. Gaa ne caxrj yuvaa Juan man nij so', cataj so':

—Ase vaa xcuáá yuvaa vaa soj á. Me síi cataj xna'anj rihaan soj cunanj soj, ne quinanii soj rihaan sayuun qui'yaj Diose ga. Asa' ca'vee quinanii soj rihaan sayuun, qui'yaj nanj na cata' ne soj, rá soj ga. <sup>8</sup>Sese ya cunuu sa' nimán soj, ne ca'anj soj qui'yaj soj ndaa

vaa 'yaj yuvīi cunuū sa' nímán ei. Nē tādó soj sese guun che'ē soj cataj soj se vaa ta'níí ta'nij si'no sítí cu'naj Abraham sítí cane gaa naá me soj, ne ne tumé soj cacun', cataj soj á. Se ca'mii soj daj chihaa m̄ij danj ma'. Maan se cataj xna'anj 'unj rihaan soj se vaa nuveé se ya'anj tiha' ta'níí ta'nij si'no sítí cu'naj Abraham me soj a ma'. Maan se sese Diose rá, ne ca'vee nicaj Diose naá guun yahij naj rihaan yo'óo nihánj, ne qui'yaj Diose man 'o ta'níí ta'nij si'no sítí cu'naj Abraham adonj. Che'é dan canoco' ya soj man Diose ei. <sup>9</sup>O se nichrun' qui'yaj Diose sayuun man nij sítí na'vej rá cunō rihaan so' nanj á. Ase vaa sítí oro' aga' a'ne' chruun, ne oro' so' aga' ca'ne' so' chruun ro', danj vaa Diose cuano ei. Che'é dan ase vaa 'yaj nii man chruun ro', ta'nga' danj qui'yaj Diose man nij sítí ne uno rihaan so' a. Dan me se a'ne' nii chruun nuvi' chruj sa' raa, ne araa nii man chruun yo' rihaan ya'an a. Ta'nga' danj qui'yaj Diose man nij sítí na'vej rá canoco' chrej sa' adonj. —Danj cataj Juan rihaan nij yuvīi a.

<sup>10</sup>Gaa nē xná'anj nij yuvīi man Juan, cataj nij yuvīi:

—Daj qui'yaj núj, rá so' ga —taj nij so' rihaan Juan a.

<sup>11</sup>Gaa nē cataj Juan rihaan nij so' a:

—Sítí vaa vij se-cotoó ro', caxrii uun so' 'o cotoó ston sítí nuvi' se-cotoó á. Nē sítí vaa se chá rihaan ro', go' so' doj se chá man nij sítí nuvi' se chá rihaan á. —Danj cataj Juan rihaan nij so' a.

<sup>12</sup>Doj tuvi' nij sítí a'néj puextó ro', ca'na' rihaan Juan che'é se guun rá

nij so' cuta' ne Juan man nij so' a. Nē xná'anj nij so' man Juan, cataj nij so':

—Daj qui'yaj núj, rá so', ga maestro' —taj nij so' rihaan Juan a.

<sup>13</sup>Nē cataj Juan rihaan nij so' a:

—Inanj sa'anj nō xcúun soj ca'nee soj man yuvīi ro', ca'vee ca'nee soj á. Se ca'néj soj doj sa'anj man yuvīi ma' —taj Juan rihaan nij so' a.

<sup>14</sup>Gaa nē xná'anj doj tanuu man Juan a:

—Daj qui'yaj núj, rá so' ga —taj nij so' rihaan Juan a.

Nē cataj Juan rihaan nij so' a:

—Se qui'yaj soj fuerzá rque yuvīi sa'anj rihaan soj a ma'. Se ca'mii ne soj che'é yuvīi ne ca'nee soj sa'anj man nij yuvīi a ma'. Veé doj sa'anj vaa tu'vee soj ro', guun niha' rá soj nicaj soj nanj á. —Danj cataj Juan rihaan nij tanuu a.

<sup>15</sup>Dan me se nuchruj nij yuvīi cuentá sese sij ca'neé Diose tinanii man yuvīi rihaan sayuun me Juan, ne che'é dan na'vij ndo'o nij yuvīi cataj xna'anj ma'an sítí cu'naj Juan daj sij me ma'an so' a. <sup>16</sup>Ne che'é dan cataj Juan rihaan nij so' a:

—Sítí uta' ne na uun man soj mej, tzaj ne ca'na' yo'óo sítí guun sca' doj rihanj a. Che'é dan me aj ne nó xcúnj nachej nuj correá 'nij tacanj so' ma'. Ne ca'na' so', ne ca'na' Nímán Diose ga so', ne caxrii ya'an so' man soj sij na'vej rá cunō rihaan Diose, ne cacaa soj adonj. <sup>17</sup>Dan me se ase vaa sítí oro' chruun palá vaa so' cuano adonj. Dan me se sítí nicaj chruun palá ro', rii nu' 'núú trigó naj rihaan yo'óo, ne naqui'yaj chre' so' man 'núú trigó sa', ne araa so' man 'núú trigó sa' rá ve', ne

anicaj so' araa so' squíj ni'ya xráá trigó rihaan ya'an a. Ne ase vaa síí nicaj palá man cuano ro', danj qui'yaj síí ca'na', ne naquiyaj chre' so' man cunudanj nij síí cunu sa' nimán, ne caraa so' man nij síí chi'ii rihaan ya'an, ne cacaa nij so' nu' cavii nu' ca'anj, ne daj chihaa míj se quina'áj ya'an yo' a man adonj. —Danj ca'mii síí cu'naj Juan rihaan nij yuvi yo' a.

<sup>18</sup>Ne vaa uxrá doj chrej sa' nago' so' man nij yuvi, ne ve'é nata' so' se-nana Diose nana sa' rihaan nij so' a.

<sup>19</sup>Dan me se cataj Juan se vaa ne chihan' qui'yaj síí nicaj suun rey síí cu'naj Herodes che'é se ca'néj so' nica tinúu so' chana cu'naj Herodías ne xcaj so' man no' do', che'é que'ee ndo'o doj se chi'ii qui'yaj Herodes do' a. <sup>20</sup>Che'é se nij ndo'o qui'yaj Herodes ca'néj so' nica tinúu so' cataj Juan, ne ca'maan ndo'o rá Herodes ni'yaj so' man Juan, ne caxríj so' taga' man Juan nanj á. Maan ta'nga' doj vaa cacun' tumé so' gaa ataa caxrii so' taga' man Juan, tzaj ne yaj caxríj so' taga' man Juan, ne doj a tumé so' cacun' adonj.

**Nana nihánj taj xna'anj se vaa cuta' ne Juan man Jesucristó a**

<sup>21</sup>Dan me se gaa ataa catuu Juan taga', ne cata' ne taran' nij yuvi, qui'yaj Juan, gaa ne cata' ne Jesucristó, ne nu' nago' Jesucristó graciá rihaan Diose, gaa ne naxra' rej xta' a. <sup>22</sup>Gaa ne nanij Nimán Diose raá Jesucristó, ne ase vaa ruvi' 'o cha'aan ro', danj vaa curuvi' Nimán Diose a. Gaa ne ca'mii Diose síí nicun' xta', cataj Diose:

—Ta'níí 'unj síí 'ee ndo'o raj man mé so', ne niha' ndo'o raj ni'yaj 'unj mán so' adonj —taj Diose síí nicun' xta' a.

**Nana nihánj taj xna'anj che'é taran' nij xii Jesucristó a**

<sup>23</sup>Ndaa quisíj Jesucristó icó chi' yo' ta' asuun, gaa ne guun che'e so' qui'yaj suun so' se-suun so' a. Dan me se guun rej Jesucristó man síí cu'naj José, ne ta'nij José me Jesucristó, rá nij yuvi a. Ne ta'níí Elí me José a. <sup>24</sup>Ta'níí Matat me Elí, ne ta'níí Leví me Matat, ne ta'níí Melqui me Leví, ne ta'níí Jana me Melqui, ne ta'níí José me Jana a. <sup>25</sup>Ta'níí Matatías me José, ne ta'níí Amós me Matatías, ne ta'níí Nahum me Amós, ne ta'níí Esli me Nahum, ne ta'níí Nagai me Esli a. <sup>26</sup>Ta'níí Maat me Nagai, ne ta'níí Matatías me Maat, ne ta'níí Semei me Matatías, ne ta'níí José me Semei, ne ta'níí Judá me José a. <sup>27</sup>Ta'níí Joana me Judá, ne ta'níí Resa me Joana, ne ta'níí Zorobabel me Resa, ne ta'níí Salatiel me Zorobabel, ne ta'níí Neri me Salatiel a.

<sup>28</sup>Ta'níí Melqui me Neri, ne ta'níí Adi me Melqui, ne ta'níí Cosam me Adi, ne ta'níí Elmodam me Cosam, ne ta'níí Er me Elmodam a. <sup>29</sup>Ta'níí Josué me Er, ne ta'níí Eliezer me Josué, ne ta'níí Jorim me Eliezer, ne ta'níí Matat me Jorim a. <sup>30</sup>Ta'níí Leví me Matat, ne ta'níí Simeón me Leví, ne ta'níí Judá me Simeón, ne ta'níí José me Judá, ne ta'níí Jonán me José, ne ta'níí Eliaquim me Jonán a. <sup>31</sup>Ta'níí Melea me Eliaquim, ne ta'níí Mainán me Melea, ne ta'níí Matata me Mainán,

ne ta'níí Natán me Matata a.

<sup>32</sup>Ta'níí David me Natán, ne ta'níí Isaí me David, ne ta'níí Obed me Isaí, ne ta'níí Booz me Obed, ne ta'níí Salmón me Booz, ne ta'níí Naasón me Salmón a.

<sup>33</sup>Ta'níí Aminadab me Naasón, ne ta'níí Aram me Aminadab, ne ta'níí Esrom me Aram, ne ta'níí Fares me Esrom, ne ta'níí Judá me Fares a. <sup>34</sup>Ta'níí Jacob me Judá, ne ta'níí Isaac me Jacob, ne ta'níí Abraham me Isaac, ne ta'níí Taré me Abraham, ne ta'níí Nacor me Taré a. <sup>35</sup>Ta'níí Serug me Nacor, ne ta'níí Ragau me Serug, ne ta'níí Peleg me Ragau, ne ta'níí Heber me Peleg, ne ta'níí Sala me Heber a. <sup>36</sup>Ta'níí Cainán me Sala, ne ta'níí Arfaxad me Cainán, ne ta'níí Sem me Arfaxad, ne ta'níí Noé me Sem, ne ta'níí Lamec me Noé a. <sup>37</sup>Ta'níí Matusalén me Lamec, ne ta'níí Enoc me Matusalén, ne ta'níí Jared me Enoc, ne ta'níí Mahalaleel me Jared, ne ta'níí Cainán me Mahalaleel a. <sup>38</sup>Ta'níí Enós me Cainán, ne ta'níí Set me Enós, ne ta'níí Adán me Set a. Ne Adán ro', me síí qui'yaj ma'ǵn Dioso man a. Nu' nij so' me xii Jesucristó cumán gaa naá a.

**Nana nihánj taj xna'anj se vaa guun ndo'o rá síí chree tihaj' yu'unj so' man Jesucristó a**

**4** Dan me se naraa Nimán Dioso nu' nimán Jesucristó, gaa ne cavii Jesucristó tu'va chráá cu'naj Jordán, ne ca'anj so', vaj so' rej tacaan, qui'yaj Nimán Dioso a. <sup>2</sup>Ne vij chihaa ya güii guun rá síí chree tihaj' yu'unj síí chree man Jesucristó, che'é rej guun rá so'

canoco' Jesucristó man so' a. Ne a 'ó xco' chraa ne cha Jesucristó cunu' vij chihaa güii ma'. Gaa quisj nu' vij chihaa güii, gaa ne quina'aan ndo'o rque Jesucristó a. <sup>3</sup>Gaa ne dan me se cataj síí chree rihaan Jesucristó, ne:

—Sese ya ya ta'nij Dioso mé so', ne cataj so' rihaan yahij nihánj se vaa guun yo' rachrúun cha so' á —taj síí chree rihaan Jesucristó a.

<sup>4</sup>Gaa ne cataj Jesucristó rihaan so', ne:

—Danj Dioso taj: “Nuveé inanj se chá me se achiin rihaan yuvii, ne ca'vee cayáán sa' yuvii ma'”. Inanj danj taj danj Dioso —taj Jesucristó rihaan síí chree yo' a.

<sup>5</sup>Gaa ne dan me se nicaj síí chree man Jesucristó cavii so' 'o rej xtaj' ndo'o, gaa ne tihaan so' man cunudanj nij chuman' naj rihaan chumij rihaan Jesucristó rque orún' orá nii a. <sup>6</sup>Gaa ne cataj so' rihaan Jesucristó, ne:

—Rque 'unj nu' chuman' nihánj do', nu' se sa' man nij chuman' nihánj do', mán so' a. 'O se aj ca'vej Dioso guun chij 'unj rihaan nij chuman' yo', ne che'é dan ca'vee qui'yáj guun chij naá guun yuvii rihaan chuman' yo' adonj. <sup>7</sup>Che'é dan sese canicun' ruj so' rihanj, ne guun si'yáá so' man nu' nihánj, qui'yáj adonj. —Danj cataj síí chree rihaan Jesucristó a.

<sup>8</sup>Ne canicaj Jesucristó cataj Jesucristó rihaan síí chree:

—Daj chihaa míj se canicun' ruj 'unj rihaan so' a ma'. 'O se danj Dioso taj nana nihánj, se vaa: “Rihaan orún' Dioso síí 'nij ra'a man ní' canicun' ruj so', ne a 'ó rihaan

tuví so' se ca'vee na'vij so' ma'". Danj taj danj Diose adonj —taj Jesucristó rihaan síi chree yo' a.

<sup>9</sup>Gaa ne nicaj síi chree man Jesucristó ca'anj so' chuman' Jerusalén, ne tacavii so' man Jesucristó raq nuvií nocoo, <sup>10</sup>ne cataj so' rihaan so', ne:

—Sese ya ta'nij Diose mé so', ne güej so', ne nanij guee so' rihaan yo'óo á. 'Q se danj Diose taj: “Ca'ne' Diose suun rihaan nij se-mozó so' se vaa cütumé nij so' mán so' a”, taj danj Diose, ne taj uún yo': <sup>11</sup>“Caráan ra'a nij so' mán so', se gaa nanj cano che'é so' yahij ma'”. Danj a'mii danj Diose —taj síi chree rihaan Jesucristó adonj.

<sup>12</sup>Gaa ne cataj Jesucristó rihaan síi chree a:

—Tzaj ne ne nó xcúnj qui'yáj danj ma'. 'Q se taj uún danj Diose a: “Se guun qui'ri'yunj so' man Diose síi 'nij ra'a man ní', ne tihá' so' man so' ma'”. Inanj danj a'mii danj Diose rihaan ní' adonj —taj Jesucristó rihaan síi chree a.

<sup>13</sup>Danj qui'yaj síi chree, tzaj ne a doj ne cuchuman rá Jesucristó a man adonj. Gaa ne ca'ne' rá síi chree doj güii ga Jesucristó a.

**Nana nihánj taj xna'anj se vaa guun che'e Jesucristó tucu'yón so' se-nana Diose man nij yuvií man estadó Galilea a**

<sup>14</sup>Dan me se nan' Jesucristó estadó Galilea, ne yo'o racuíj ndo'o Nimán Diose man so', ne cuchi' nana che'é so' rihaan nij yuvií man nu' nij chuman' naj estadó Galilea a. <sup>15</sup>Ca'anj Jesucristó daj a nij ve' tucu'yón nij yuvií israelitá

se-tucuanj Moisés, ne tucu'yón so' se-nana Diose man nij yuvií, ne ve'é uxrá ca'mii taran' nij yuvií che'é so' a.

**Nana nihánj taj xna'anj se vaa nucui' Jesucristó chiháán so', ne ca'mii natáj so' a**

<sup>16</sup>Gaa ne dan me se nucui' uún Jesucristó chiháán so' chuman' Nazaret rej cachij so' a. Gaa quisíj güii naránj rá nij yuvií israelitá, ne catúj so' rá ve' tucu'yón nij so' se-tucuanj Moisés, ése danj inanj cu'yón so' qui'yaj so' a. Gaa ne canicun' caya so' nayaa so' danj Diose rihaan nij yuvií a. <sup>17</sup>Síi tumé yanj quirii yanj no nana cachrón síi cu'naj Isaías síi nata' se-nana Diose gaa naá, ne caxrj so' ston Jesucristó a. Nacuchra' Jesucristó yanj, ne nari' so' rej no nana nihánj a: <sup>18</sup>“Yanj Nimán Diose ga 'unj, ne che'é dan narii Diose manj ca'anj ca'mii natáj 'unj nana sa' rihaan nij síi nique a. Ca'neé Diose manj ca'mii natáj 'unj rihaan nij síi 'nij taga' cataj 'unj se vaa curihanj nij so' cachee yuun nij so' a. Ne ca'neé Diose manj racuíj 'unj man nij síi tuchrii naxra' rihaan nij so', ne ca'neé Diose manj racuíj 'unj man nij síi ran' sayuun uún nanj á. <sup>19</sup>Ca'neé Diose manj cataj xna'anj 'unj se vaa yaj ro', me rá Diose cavii sa' nij síi nocó' man so' qui'yaj so' adonj.” <sup>20</sup>Nu' nihánj me nana nayaa Jesucristó, gaa ne nacué uún so' yanj ne nago' uún so' man síi tumé yanj, gaa ne ca'anj quitaj so' chruun xlá a. Tzaj ne ni'yaj uxrá cunudanj nij yuvií man rque ve' yo' man so', <sup>21</sup>ne che'é dan ca'mii uún so', cataj so':

—Veé cuano nihánj me se aj quisíj ya nu' nana nihánj, ne 'unj sij nayaa nana nihánj cuno soj me síi qui'yaj nu' se vaa taj nana nihánj adonj — taj Jesucristó rihaan nij so' a.

<sup>22</sup>Sa' uxrá ca'mii Jesucristó, cataj nij yuvii, ne caráya'anj nij so' cuno nij so' se vaa ve'é uxrá vaa nana ca'mii Jesucristó a. Gaa ne dan me se xná'anj nij so' man tuvi' nij so' sese nuveé ta'nij José síi ne chiháán ní' me so', xná'anj nij so' man tuvi' nij so' a. <sup>23</sup>Che'é dan me ca'mii Jesucristó nana nihánj rihaan nij so' a:

—Ne'én 'unj se vaa cataj soj nana nihánj rihanj a: “Sese ya sij 'yaj cono'ó mé so', ne qui'yaj cono'ó so' man ma'án so' á”, cataj soj rihanj che'é se cuno soj se vaa que'ee suun sa' nocoo qui'yáj chuman' Capernaum a. Ne cataj soj rihanj se vaa qui'yáj suun sa' nocoo tuvi' yo' chuman' chiháán ní' nihánj uún a. <sup>24</sup>Tzaj ne vaa nana nihánj nana cataj ma'anj rihaan soj uún a: “Xa' síi nata' se-nana Diose, tzaj ne ne amán rá tuvi' so' ni'yaj nij so' man so' ma'”, me nana taj 'unj no soj a.

<sup>25</sup>”Dan me se cuno soj ca'mij á. Ne'en soj se vaa gaa cayáán síi cu'naj Elías síi nata' se-nana Diose gaa naá, ne cachén va'nuj yo' táá yanéé, ne ne caman', ne che'é dan guun uxrá x'naa nu' chiháán nij síi israelitá, ne yo' dan me se cayáán que'ee chana cavi' nicá chiháán nij síi israelitá a. <sup>26</sup>Tzaj ne a 'ó chana nique cayáán chiháán nij síi israelitá ro', ne ca'nej Diose man Elías rihaan no', racuíj so' man no' ma'. Maan se rihaan orún' chana nique ne chuman' Sarepta

chuman' noco' man chuman' Sidón ca'neé Diose man Elías, ne nda' se nuveé chana israelitá me no', tzaj ne racuíj Elías man no' adonj.

<sup>27</sup>”Ne ne'en soj se vaa que'ee yuvii quiran' ndo'o luj ri'yuj cayáán chiháán nij síi israelitá gaa cayáán síi cu'naj Eliseo síi nata' se-nana Diose gaa naá a. Tzaj ne a 'ó nij so' ne nahuun ma'. Maan se orún' síi cu'naj Naamán síi cavii rej yaníj cu'naj Siria nahuun, qui'yaj Eliseo adonj. —Danj cataj Jesucristó rihaan nij síi man rá ve' tucu'yón nii se-tucuanj Moisés ve' ne chiháán nij so' a.

<sup>28</sup>Cuno nij yuvii ndaa vaa cavii sa' nij síi man chuman' yaníj, ne guun xcoj ruvaa rá nij so', gaa ne ca'maan rá nij so' ni'yaj nij so' man Jesucristó a. <sup>29</sup>Naxumaan nij so' nicaj nij so' man Jesucristó ca'anj nij so' tu'va chuman' a. Ne dan me se chuman' yo' ro', naj xráá 'o tacaan ruvaa ndo'o a. Ne nicaj nij so' man Jesucristó ca'anj nij so' rej ruvaa, ne guun rá nij so' tanij nij so' man Jesucristó rej ruvaa a. <sup>30</sup>Tzaj ne cachén Jesucristó sca'núj nij yuvii, ne ca'anj so' nanj adonj.

**Nana nihánj taj xna'anj se vaa quirii Jesucristó man yo'o nana chree nimán 'o snó'o a**

<sup>31</sup>Gaa ne ca'anj Jesucristó chuman' Capernaum chuman' naj estadó Galilea, ne güii naránj rá nij yuvii israelitá ca'anj Jesucristó ve' tucu'yón nij so' se-tucuanj Moisés, ne tucu'yón so' se-nana Diose man nij yuvii a. <sup>32</sup>Ne caráya'anj nij yuvii se-nana so', che'é rej ase vaa a'mii 'o síi uun chij ndo'o ro', danj ca'mii so' rihaan nij yuvii a.

<sup>33</sup>Ne dan me se yáán 'o síi nuu nana chree nimán rá ve' yo', ne nucuaj ndo'o caguáj so', ne cataj so' se vaa:

<sup>34</sup>—Me che'é ra'yunj so' man núj, ga Jesús Nazareno'. 'Ná' so' tarí' so' man núj na'. Ne'enj mán so' se vaa síi guee cavii rihaan Diose mé so' adonj —taj síi nuu nana chree nimán rihaan Jesucristó a.

<sup>35</sup>Gaa ne canicaj Jesucristó caxrj yuvaa so' man nana chree nuu nimán snó'o yo', ne cataj so':

—Dínj tu'vá so' curihañj so' cuaj nimán síi nihánj á —taj Jesucristó rihaan nana chree yo' a.

Ndaa naxru' ma'an snó'o rej tanuu nij yuvii, qui'yaj nana chree, gaa ne curihañj nana chree nimán snó'o yo', ne nahuun sa' so', taj a doj chi'ii ran' so' a ma'. <sup>36</sup>Gaa ne ca'anj uxrá rá nij yuvii, ne xná'anj nij so' man tuvi' nij so', cataj nij so':

—Daj sij me síi a'mii nana nihánj, ne uun chij so' rihaan nana chree, ne urihañj nij nana chree nimán yuvii 'yaj síi nihánj ga —taj nij yuvii ni'yaj nij yuvii man Jesucristó a.

<sup>37</sup>Gaa ne cuchi' nana che'é Jesucristó rihaan cunudanj nij yuvii man nichrun' chuman' Capernaum yo' a.

**Nana nihánj taj xna'anj se vaa nahuun nii chej Simón Pedró, qui'yaj Jesucristó a**

<sup>38</sup>Dan me se curihañj Jesucristó rá ve' tucu'yón nii se-tucuajj Moisés, ne ca'anj so' tucua síi cu'naj Simón a. Ne ran' nii chej Simón chi'ii naca yuvaa, ne che'é dan cachín ni'yaj nii rihaan Jesucristó che'é no' a. <sup>39</sup>Gaa ne ca'anj

Jesucristó canicun' so' rej tu'va yuvéé naj no', ne ca'ne' so' suun rihaan chi'ii se vaa quix'nee chi'ii xráa no' a. Gaa ne nu' quix'néj chi'ii xráa no', qui'yaj Jesucristó a. Ne veé maan orá dan naxagaa no', ne qui'yaj chuvii no' cha nij so' nanj adonj.

**Nana nihánj taj xna'anj se vaa nahuun que'ee síi ran', qui'yaj Jesucristó a**

<sup>40</sup>Cata' güii, ne nicaj nij yuvii cunudanj tuvi' nij so' síi ran', vaj nij so' rej ne Jesucristó a. Que'ee ndo'o chi'ii ran' nij so' a. Ne ca'anj Jesucristó, cuta' so' ra'a so' raá ndaa 'o 'o nij síi ran', gaa ne nahuun taran' nij so', qui'yaj Jesucristó a.

<sup>41</sup>Ne que'ee nij síi ran' ro', curihañj nana chree nimán uún, ne caguáj nij nana chree yo', ne cataj nij so' se vaa ta'níi Diose me Jesucristó a. Tzaj ne caxrj yuvaa Jesucristó man nij nana chree, ne ne ca'vej rá Jesucristó ca'mii nij so' nana vaa danj a. 'O se quene'en nij so' se vaa sij ca'néé Diose tñanai man yuvii rihaan sayuun me Jesucristó, ne ne ca'vej rá Jesucristó guun cuentó che'é so' a.

**Nana nihánj taj xna'anj se vaa ca'anj Jesucristó nu' nij ve' tucu'yón nij yuvii israelitá se-tucuajj Moisés, ca'mii natáj so' a**

<sup>42</sup>Rej taxrej cavii Jesucristó chuman' Capernaum ca'anj so' rej tacaan a. Gaa ne nano' nij síi man Capernaum man so', ne gaa nari' nij so' man Jesucristó, gaa ne caráan nij so' chrej rihaan Jesucristó, ne: —Se ca'vee ca'anj so' rej yaníj ma' —taj nij so' rihaan Jesucristó a.

<sup>43</sup>Tzaj ne cataj Jesucristó rihaan nij so' a:

—Vaa ndo'o suun rihaan 'ujj ca'anj 'ujj yo'ó nij chuman' uún, ne nata' 'ujj nana sa' nihánj rihaan nij síf ne yo'ó chuman' se vaa guun chij Diose rihaan chumij nihánj adonj. 'O se che'é nana sa' nihánj me ca'née Diose manj ca'naj rihaan chumij nihánj ca'mii natáj 'ujj rihaan cunudanj nij yuvii adonj —taj Jesucristó rihaan nij síf man Capernaum a.

<sup>44</sup>Gaa ne ca'ne' rá nij so', ne ca'anj Jesucristó nu' nij ve' tucu'yón nij yuvii israelitá se-tucuanj Moisés ve' yanj estadó Judea, ne ca'mii natáj so' nana sa' a.

**Nana nihánj taj xna'anj se vaa quiri' uxrá nij tuvi' Simón Pedró xcuaj, qui'yaj Jesucristó a**

**5** Dan me se 'o güiii canicun' Jesucristó tu'va na lacuaná cu'naj Genesaret, ne cuchi' uxrá yuvii rej nicun' so', ne cunuu chre' ndo'o nij so' che'é se guun rá nij so' cunó nij so' se-nana Diose a. Dan me se ndaa raan ma'an mán nij so' x'núú Jesucristó a. <sup>2</sup>Dan me se quene'en Jesucristó vij rihoo naj tu'va na lacuaná, ne síf uta xcuaj me nij síf si'yaj rihoo yo', ne tanáj nij so' se-rihoó nij so' 'o orá nii, ne ca'anj na'nu' nij so' xnánj nij so' a. <sup>3</sup>Dan me se catúj Jesucristó rá 'o rihoo, ne se-rihoó síf cu'naj Simón me yo', ne cachín ni'yaj Jesucristó rihaan Simón se vaa qui'yaj so' se ndo'o cuxuun so' rihoo ca'anj rihoo yo' doj rihaan na a. Gaa ne cayáan Jesucristó rque rihoo, ne tucu'yón so' se-nana Diose man nij yuvii

man tu'va na a. <sup>4</sup>Quisíj tucu'yón Jesucristó man nij yuvii, gaa ne cataj so' rihaan Simón, ne:

—Nícaj so' rihoo ca'anj so' rej cunuú doj na, gaa ne tiguúj soj nanj rá na á —taj Jesucristó rihaan so' a.

<sup>5</sup>Tzaj ne cataj Simón rihaan Jesucristó, ne:

—Nigan' qui'yaj suun uxrá núj, tiguúj ndo'o núj nanj rá na, tzaj ne a 'ó xcuaj ne quiri' núj, man maestro. Tzaj ne maan che'é se ma'an so' cataj, ne ca'anj tiguúj uún núj nanj rá na nanj á —taj Simón rihaan Jesucristó a.

<sup>6</sup>Dan me se ca'anj tiguúj uún nij tuvi' Simón nanj rá na, ne quiri' uxrá nij so' xcuaj ndaa quisin' ma'an xnánj nij so', qui'yaj xcuaj a. <sup>7</sup>Che'é dan canacúún nij so' man tuvi' nij so' síf nuu rque yo'ó rihoo, che'é rej guun rá nij so' racuj tuvi' nij so' man nij so' a. Dan me se ca'na' nij tuvi' nij so' yan nicun' nij so', ne caraa uxrá nij so' xcuaj rque roj rihoo a. Ne uxrá caraa roj rihoo, ne daj doj se ca'anj nij roj rihoo rque na nanj á. <sup>8</sup>Dan me se quene'en Simón Pedró se vaa qui'yaj Jesucristó, gaa ne ca'anj canicun' ruj so' rihaan Jesucristó, cataj so': —Nuveé sij canicun' nichrun' rihaan so' mej a ma'. Sij atá ndo'o cacun' mej nanj á —taj Simón rihaan Jesucristó a.

<sup>9</sup>Dan me se ca'anj ndo'o rá nij tuvi' Simón se vaa quiri' uxrá nij so' xcuaj a. <sup>10</sup>Ne ca'anj rá síf cu'naj Jacobo do', síf cu'naj Juan do', che'é xcuaj a. Ne tuvi' Simón me roj so', ne ta'níí síf cu'naj Zebedeo me roj so' a. Ne dan me se cataj Jesucristó rihaan Simón, ne:



—Se cuchuví' so' ma'. 'O se rej rihaan ní' me se guún so' sí' naqui'yaj chre' yuvii canoco' yuvii manj á —taj Jesucristó rihaan Simón a.

<sup>11</sup>Gaa ne nicaj nij so' se-rihoó nij so' ca'anj nij so' ndaá tu'va na a. Gaa ne tanáj nij so' cunudanj nij rasuun yo', ne canoco' nij so' man Jesucristó, ne ca'anj nij so' ga so' a.

**Nana nihánj taj xna'anj se  
vaa nahuun sa' 'o sí' ran' luj  
ri'yuj, qui'yaj Jesucristó a**

<sup>12</sup>Dan me se 'o güii caran' Jesucristó 'o chuman', ne cuchi' 'o sí' ran' ndo'o luj ri'yuj rihaan so' a. Gaa quene'en sí' ran' yo' man Jesucristó, gaa ne canicun' ruj so' rihaan Jesucristó, ne cachíin ni'yaj so' rihaan Jesucristó, cataj so':

—Sese me rá so', ne ca'vee ca'nee so' chi'ii xráj, Señor —taj so' rihaan Jesucristó a.

<sup>13</sup>Gaa ne cuta' Jesucristó ra'a Jesucristó raa sí' ran', ne cataj Jesucristó:

—Me raj qui'yáj danj ei. Nahuún so', qui'yáj adonj —taj Jesucristó rihaan so' a.

Nu' danj cataj Jesucristó, ne nu' quinavij luj xráá sí' ran' a.

<sup>14</sup>Dan me se ca'ne' Jesucristó suun rihaan sí' nahuun yo', ne se cataj xna'anj so' rihaan a 'ó yuvii che'é se vaa quiran' so' ma'. Gaa ne cataj uún Jesucristó rihaan so' a:

—Ca'anj so' rihaan xrej, ne tihaán so' mán so' rihaan xrej se vaa nahuún so', ne rque so' rihaan Diose se vaa cataj sí' cu'naj Moisés gaa naá ndaá vaa no xcuún so' rque so' rihaan Diose che'é yan nahuún

so' adonj. Gaa ne xcaj nij xrej cuentá se vaa nahuún so' qui'yáj adonj —taj Jesucristó rihaan sí' nahuun yo' a.

<sup>15</sup>Tzaj ne cha'nuu ndo'o nana che'é se vaa quiran' sí' nahuun yo', ne che'é dan cunuu chre' ndo'o nij yuvii rej vaj Jesucristó a. Guun rá nij so' cuno nij so' se-nana Jesucristó, ne guun rá nij sí' ran' x'nee chi'ii xráá nij so' uún a.

<sup>16</sup>Tzaj ne naxuun Jesucristó man so' rihaan nij yuvii, ne ca'anj so' rej tacaan, ne cachíin ni'yaj ndo'o so' rihaan Diose a.

**Nana nihánj taj xna'anj se  
vaa nahuun sa' 'o sí' na'vee  
cachee, qui'yaj Jesucristó a**

<sup>17</sup>'O güii me se ne Jesucristó rá 'o ve', ne tucu'yón so' se-nana Diose man yuvii, ne ne doj sí' fariseo ga sí' naqui'yaj cuu se-tucuanj Moisés rá ve' yo', ne mán sí' cavii chuman' Jerusalén do', yo'ó nij chuman' naj estadó Judea do', nij chuman' naj estadó Galilea do', mán ga nij so' rá ve' yo' a. Ne Diose sí' 'nij ra'a man ní' ro', racuíj ndo'o man Jesucristó, ne nahuun ndo'o nij sí' ran', qui'yaj Jesucristó a. <sup>18</sup>Dan me se táá 'o sí' na'vee cachee rihaan yuvéé, ne táá chihá nii man so' ca'na' nii rihaan Jesucristó a. Tzaj ne man ndo'o yuvii rá ve' ne Jesucristó, ne nano' nij so' rej catuu nij so' rá ve' cuchruj nij so' man sí' ran' rihaan Jesucristó a. <sup>19</sup>Tzaj ne taj se qui'yá' ca'vee cachen nij so' sca'núj nij yuvii a. Che'é dan cavii nij so' xráá ve', ne caya' nij so' yu'uj xráá ve', che'é rej ca'vee tinanij nij so' man sí' ran' rihaan Jesucristó a.

<sup>20</sup>Gaa quene'en Jesucristó se vaa cuchumán uxrá rá nij tuvī' síí ran' yo' se vaa ca'vee nahuun so' qui'yaj Jesucristó, gaa ne cataj Jesucristó rihaan síí ran' yo', ne:

—Navij cacun' xráá so', nanj tinuj —taj Jesucristó rihaan so' a.

<sup>21</sup>Ne cuno nij síí fariseo cuno nij síí naqui'yaj cuu se-tucuanj Moisés cuno nana ca'mii Jesucristó, gaa ne nuchruj raá nij so' nana nihánj ga tuvi' nij so' a:

—Daj sij me síí nihánj, ne a'mii so' nana vaa nij rihaan Diose ga. Qrún' Diose uun nucuaj tinavij cacun' xráá yuvií nanj á —taj nij so' ga tuvi' nij so' a.

<sup>22</sup>Quene'en Jesucristó daj nuchruj raá nij so', ne che'é dan cataj so' rihaan nij so' a:

—Me che'é nuchruj raá soj nana nanj ga. <sup>23</sup>Tu'va rma'án 'unj se vaa navij cacun' xráá síí nihánj, rá soj a na'. Ca'vee cataj uun ní' navij cacun' xráá síí nihánj na'. Ase ca'vee doj cataj ní' naxagaa so', ne cachee so' cuaj, cataj ní' xa'. <sup>24</sup>Dan me se me rá 'unj xcay soj cuentá se vaa síí ca'née Diose nīcay yu'unj man yuvií mej ne no xcúún 'unj tīnavíí 'unj cacun' xráá nij yuvií man rihaan chumií nihánj adonj —taj Jesucristó rihaan nij so' a.

Dan me se cataj Jesucristó rihaan síí na'vee cachee a:

—Rihaan so' sij na'vee cachee taj 'unj, ne nacue so' tuvée so', ne nán' so' tucúa so' á —taj Jesucristó rihaan síí naj rihaan yuvéé yo' a.

<sup>25</sup>Nu' danj tu'va Jesucristó, gaa ne nu' naxagaa síí ran' yo' ni'yaj taran' nij yuvií a. Gaa ne nacué so' tuvée

so', gaa ne nan' so' tucúa so', ne ve'é uxrá ca'mii so' che'é Diose a.

<sup>26</sup>Dan me se ca'anj rá taran' nij yuvií man rá ve' yo', ne cataj nij yuvií se vaa ve'é uxrá qui'yaj Diose a. Ne cuhu'vi' ndo'o nij yuvií, ne cataj nij yuvií se vaa:

—Niha' uxrá vaa suun sa' nocoo quene'en ní' cuan' adonj —taj nij yuvií yo' a.

**Nana nihánj taj xna'anj se vaa nacúún Jesucristó man Leví, ne canoco' Leví man so' a**

<sup>27</sup>Quisij nahuun síí ran' yo', gaa ne curihanj Jesucristó xe', ne quene'en so' man 'o síí a'néj puextó cu'naj Leví a. Ne ne síí cu'naj Leví 'o ve' a'néj nii puextó man yuvií a. Gaa ne cataj Jesucristó rihaan so', ne:

—Canocó' so' manj, ca'anj ní' á —taj Jesucristó rihaan so' a.

<sup>28</sup>Gaa ne tanáj Leví man cunudanj rasuun nicaj so', ne naxumaan so', canoco' so' man Jesucristó, ca'anj so' a.

**Nana nihánj taj xna'anj se vaa me rá Jesucristó racuúj so' man nij síí tumé cacun' a**

<sup>29</sup>Gaa ne canuú ndo'o cha'anj nocoo tucúa Leví che'é Jesucristó, qui'yaj Leví a. Ne man que'ee ndo'o tuvi' so' síí a'néj puextó do', que'ee yo'ó yuvií do', man tucúa Leví, ne ne nij so' ga nij tuvī' Jesucristó a.

<sup>30</sup>Dan me se man nij síí fariseo do', síí naqui'yaj cuu se-tucuanj Moisés nocó' man nij síí fariseo do', gaa ne ca'mii chi'ii nij so' che'é Jesucristó rihaan nij síí tucuyón se-nana Jesucristó a. Dan me se cataj nij

sí fariseo gá nij sí naqui'yaj cūu se-tucuanj Moisés:

—Me che'é chá soj chraa ne 'o soj na gá nij sí a'néj puextó do', ga yo'ó nij sí tumé cacun' do', ga —taj nij so', xná'anj nij so' man nij sí tucu'yón se-nana Jesucristó a.

<sup>31</sup>Gaa ne dan me se cataj ma'an Jesucristó rihaan nij so' a:

—Sí vaa nucuaj ro', ne nano' nij so' man doctor ma'. Maan se sí ran' ro', me sí nano' man doctor adonj. Gaa ne ase vaa sí ran' ro', danj vaa nij sí nihánj adonj. <sup>32</sup>Q se ne ca'na' 'unj canacunj 'unj man sí sa' ma'. Che'e nij sí tumé cacun' ca'naj se vaa canicaj nimán nij so' ne canoco' nij so' se-nanaj adonj. Tzaj ne sese sí sa' me soj, rá soj, ne nuveé sij canacunj 'unj man me soj ma' —taj Jesucristó rihaan nij so' a.

**Nana nihánj taj xna'anj me che'é ne toco' nij sí tucu'yón se-nana Jesucristó x'naa man ma'an nij so' a**

<sup>33</sup>Gaa ne nij sí fariseo gá nij sí naqui'yaj cūu se-tucuanj Moisés me se cataj nij so' rihaan Jesucristó a:

—Me che'é, ne nij sí tucu'yón se-nana Juan sí uta' ne man yuvij me se toco' nij so' x'naa man ma'an nij so' do', na'vív nij so' do', ne veé danj 'yaj nij sí tucu'yón se-nana núj sij fariseo do', tzaj ne nij sí tucu'yón se-nana so' me se ne toco' nij so' x'naa man ma'an nij so' do', ne na'vív nij so' do', rihaan Diose ga —taj nij so' rihaan Jesucristó a.

<sup>34</sup>Ne cataj Jesucristó rihaan nij so':

—Ase vaa sí cuchruj sa'anj vaa 'unj, ne asa' ca'vee toco' nij sí man gaj x'naa man ma'an nij so', rá

soj ga. Ase vaa sí cataj xcaj man chana ne man tuvi' so' do', danj vaa nij sí man nihánj cuano, ne anuú ndo'o cha'anj man nij so', ne se ca'vee toco' nij so' x'naa man ma'an nij so' cuano ma'. <sup>35</sup>Tzaj ne vaa güii, ne guun yanj 'unj rihaan nij so', qui'yaj yuvij, gaa ne nano rá nij sí nihánj, gaa ne toco' nij so' x'naa man ma'an nij so' adonj —taj Jesucristó rihaan nij sí fariseo gá nij sí naqui'yaj cūu se-tucuanj Moisés yo' a.

<sup>36</sup>Gaa ne ca'mii Jesucristó yo'ó nana rihaan nij so', cataj so':

—Ase vaa yatzij sin' vaa tucuáan nga noco' soj, ne se guun cusin' ní yatzij naca ne na'nej ní' man yatzij nga ma'. Sese danj qui'yaj ní', gaa ne quirí' nu' yatzij naca yo', qui'yaj yatzij nga nanj adonj. Gaa ne ino uxrá gaa yatzij naca, qui'yaj yatzij nga yo' nanj adonj. <sup>37</sup>Ne dan me se ase vaa nuj nga nuj araa nii na vinó vaa uún soj a. Ne se ca'vee tucu'yón 'unj se-tucuanj 'unj man soj ma'. 'Q se ase vaa na vinó naca vaa nana tucu'yón 'unj, ne se guun caraa yuvij na vinó naca rque nuj nga ma'. Sese danj qui'yaj yuvij, ne cuyanj na vinó cunu xee na vinó, ne se cacua nuj nga ma'. Che'é dan canu yo', ne cayanj na vinó rihaan yo'ó a. <sup>38</sup>Che'é dan araa nii na vinó naca rque nuj naca, ne 'o mán sa' na vinó rque nuj yo' a. Che'é dan inanj rihaan sí naca sí ne noco' tucuáan nga tucu'yón 'unj se-nanaj nanj adonj. <sup>39</sup>Ne taj sí guun rá co'q na vinó naca, sese aj co' o so' na vinó nga ma'. 'Q se sa' doj vaa na nga, cataj so' nanj á. Ne danj vaa guee soj, inanj tucuáan nga

noco' soj, ne che'é dan na'vej soj canoco' soj tucuáan naca nanj adonj. —Danj cataj Jesucristó rihaan nij sí fariseo do', rihaan nij sí naquiyaj cuu se-tucuanj Moisés do' a.

**Nana nihánj taj xna'anj che'é güii naránj rá ní' a**

**6** 'O güii naránj rá nij yuvií israelitá cachén Jesucristó ga nij sí tucu'yón se-nana so' rque 'o naa 'núu trigó a. Ne cuta nij sí tucu'yón se-nana Jesucristó doj caa trigó, ne tuguáj ra'a nij so' caa, gaa ne chá nij so' doj trigó a. <sup>2</sup>Gaa ne xná'anj ta'aj sí fariseo man nij so', cataj nij so':

—Me che'é 'yaj soj danj ga. Ne nó xcúun ní' cuta ní' trigó güii naránj rá ma' —taj nij sí fariseo rihaan nij sí tucu'yón se-nana Jesucristó a.

<sup>3</sup>Tzaj ne cataj ma'an Jesucristó rihaan nij sí fariseo a:

—Me che'é, ne ne nayaá soj rihaan danj Diose daj quiyaj sí cu'naj David gaa naá a. Gaa quina'aaan rque nij tuvi' nij so', <sup>4</sup>gaa ne catúj so' rá nuví, ne chá so' rachrúun taj rihaan se-mesa Diose a. Ne go' uún so' chá nij tuvi' so' uún a. Ne ne nó xcúun nij so' chá nij so' rachrúun yo', maan se orún' nij xrej nó xcúun chá rachrúun yo' a. Tzaj ne maan che'é se rque nij so' na'aaan uxrá, gaa ne chá nij so' rachrúun yo' nanj adonj. Tzaj ne ne cataj Diose se vaa tumé sí cu'naj David cacun' ma' —taj Jesucristó rihaan nij sí fariseo a.

<sup>5</sup>Gaa ne canicaj so', cataj uún so' a:

—Sí ca'neé Diose nı́aj yu'unj man yuvií mej, ne no xcúnj quirı́ı

ta'ngaj daj quiyaj yuvií güii naránj rá yuvií adonj —taj Jesucristó rihaan nij sí fariseo a.

**Nana nihánj taj xna'anj se vaa nahuun sa' 'o sí nacoo ra'a, quiyaj Jesucristó a**

<sup>6</sup>Dan me se yo'ó güii naránj rá nij yuvií israelitá ro', catúj Jesucristó rque 'o ve' tucu'yón nij so' se-tucuanj Moisés, ne tucu'yón so' se-nana Diose man nij yuvií a. Ne dan me se yáan 'o snó'o rá ve' yo', ne nacoo ra'a so' rej nuva' so' a. <sup>7</sup>Ne nij sí naquiyaj cuu se-tucuanj Moisés rihaan yuvií do', nij sí fariseo do', yáan nij so' rá ve', ne tumé uxrá nij so' man Jesucristó sese nahuun yuvií quiyaj so' gaa güii naránj rá nij so' a. Danj quiyaj nij so' che'é rej guun rá nij so' cuta' nij so' cacun' xráá Jesucristó a.

<sup>8</sup>Tzaj ne quene'en Jesucristó se vaa guun rá nij so', gaa ne cataj so' rihaan sí nacoo ra'a a:

—Naxumaan so' canicun' caya so' sca'núj á —taj Jesucristó rihaan so' a.

Gaa ne naxumaan so', ne canicun' caya so' sca'núj nij yuvií a.

<sup>9</sup>Gaa ne cataj Jesucristó rihaan nij sí nanó chi'ı́ı rá a:

—Cuaño nihánj me se xná'anj 'unj man soj che'é güii naránj rá xa'. No xcúun ní' raçuíj ní' tuvi' ní' na'. Ase no xcúun ní' quiyaj chi'ı́ı ní' man tuvi' ní' xa'. Daj quiyaj ní' rá soj gaa güii naránj rá ní' ga. Ne nó xcúun ní' tınanıı ní' man tuvi' ní' rihaan sayuun gaa güii naránj rá gaa a na'. Ni'yaj uun ní' cavi' so' gaa güii naránj rá gaa a na'. —Danj taj Jesucristó rihaan nij so' a.

<sup>10</sup>Gaa ne ni'yaj Jesucristó man cunudanj nij yuvii man rque ve' yo', gaa ne cataj so' rihaan sí nacoo ra'a a: —Tucuá so' ra'á so' á —taj Jesucristó rihaan so' a.

Ne tucuá so' ra'a so', ne cunuu sa' ra'a so' adonj. <sup>11</sup>Tzaj ne ca'maan ndo'o rá nij sí naqui'yaj cuu se-tucuanj Moisés ga nij sí fariseo, ne guun rá nij so' ga tuvi' nij so' daj gaa qui'yaj chi'ii nij so' man Jesucristó a.

**Nana nihánj taj xna'anj se vaa narii Jesucristó chuvij apóstol ca'anj nata' se-nana so' a**

<sup>12</sup>Dan me se cachén doj güii, gaa ne ca'anj Jesucristó rej quij, ca'anj cachinj ni'yaj so' rihaan Diose a. Nigan' quináj so' quij cachín ni'yaj so' rihaan Diose a. <sup>13</sup>Ranga', gaa ne canacúún Jesucristó man cunudanj nij sí tucu'yón se-nana so' ca'na' nij so' rihaan so', gaa ne narii Jesucristó man chuvij nij so' guun nij so' apóstol nata' rihaan yuvii che'é so' a. <sup>14</sup>Q so' me sí cu'naj Simón, ne tucu'náj Jesucristó Pedró man so' a. Yo'ó so' me tinúú Pedró sí cu'naj Andrés a. Yo'ó nij so' me Jacobo do', Juan do', Felipé do', Bartolomé do', <sup>15</sup>Mateo do', Tomás do', Jacobo ta'níí Alfeo do' a. Yo'ó so' uún me Simón, ne tuvi' nij sí me rá cunú' ga gobiernó ne Romá me so' a. <sup>16</sup>Yo'ó so' me Judas tinúú Jacobo, ne yo'ó so' uún me Judas Iscariote sí tacuachén man Jesucristó rihaan nij sí taj ri'yunj man Jesucristó a.

**Nana nihánj taj xna'anj se vaa nago' Jesucristó chrej man 'o x'ne' nocoo yuvii a**

<sup>17</sup>Dan me se nanij Jesucristó ga chuvij nij apóstol yo' taa rque

doj, ne cuchi' nij so' 'o rej vaa taa, ne nocoo doj sí tucu'yón se-nana so' mán ga so' a. Ne ca'na' ndo'o yuvii cavii chuman' Jerusalén do', yuvii cavii yo'ó nij chuman' naj estadó Judea do', yuvii cavii rej tu'va na ya'anj rej naj chuman' Tiro ga chuman' Sidón do' a. <sup>18</sup>Ne guun rá nij yuvii cunó nij so' se-nana Jesucristó, ne guun rá nij sí ran' nahuun nij so' a. Ne vaa nij yuvii nuu nana chree nimán, ne sayuun ndo'o quiran' nij yuvii, qui'yaj nana chree, tzaj ne quirii Jesucristó nana chree nuu nimán nij so', ne cunuu sa' nij so', qui'yaj Jesucristó a.

<sup>19</sup>Gaa ne guun rá cunudanj nij yuvii cano ra'a nij so' xráá Jesucristó che'é se cavii ndo'o se nucuaj man Jesucristó, ne nahuun sa' cunudanj nij yuvii, qui'yaj Jesucristó a.

**Nana nihánj taj xna'anj me yuvii cavii sa' doj ne me yuvii quiran' sayuun a**

<sup>20</sup>Gaa ne naxcaj Jesucristó rihaan so' ni'yaj so' man nij sí tucu'yón se-nana so', gaa ne cataj so':

—Cavii sa' taran' soj sij nique, ne soj me sí cayáán ga Diose gaa güii guun chij Diose rihaan chumii nihánj adonj.

<sup>21</sup>”Cavii sa' taran' soj sij na'aan rque cuano adonj. Vaa güii quirí' soj se cha soj adonj.

”Cavii sa' taran' soj sij ta'vee cuano adonj. Vaa güii ca'nga' ndo'o soj adonj.

<sup>22</sup>”Ne cavii sa' ndo'o soj sese quitaj ri'yunj yuvii man soj do', sese quirii yanij yuvii man soj do', sese ca'mii yuvii nana nij rihaan soj do', sese nachri' yuvii ni'yaj yuvii man

soj se vaa sij chi'ii me soj do', che'é se me soj sí noco' manj sij ca'née Diose nıcaj yu'unj man yuviı adonj. Ne quene'en soj se vaa ya caviı sa' soj adonj. <sup>23</sup>Gaa ne güii quiran' soj danj me se no xcuún soj guun niha' uxrá rá soj ne güej ndo'o soj, che'é se uxrá naru'vee Diose rihaan soj asa' cuchi' soj rej xtá' adonj. 'O se ase vaa 'yaj nij yuviı man soj ro', ta'nga' danj qui'yaj xii nij yuviı man nij sí nata' se-nana Diose gaa naá uún adonj.

<sup>24</sup>"Tzaj ne nique ndo'o soj sij ru'vee nanj á. Soj sij ru'vee me se aj quiri' soj nu' se sa' nıcaj soj, ne taj vaj doj se sa' rque Diose man soj a ma'.

<sup>25</sup>"Nique soj sij vaa raan rque cuano nanj á. Vaa güii quina'an rque soj adonj.

"Nique soj sij a'nga' cuano nanj á. Vaa güii quinano ndo'o rá soj do', ta'vee soj do', adonj.

<sup>26</sup>"Ne nique soj sij ve'é inanj a'mii cunudanj yuviı che'é nanj á. 'O se ase vaa ve'é inanj a'mii nij yuviı che'é soj ro', ta'nga' danj ca'mii xii nij yuviı che'é nij sí tiha' yu'unj se vaa sij nata' se-nana Diose me nij so' gaa naá a —taj Jesucristó rihaan cunudanj nij sí tucu'yón se-nana so' a.

**Nana nihánj taj xna'anj se vaa gaa 'ee rá ní' man nij sí taj ri'yunj man ní' a**

<sup>27</sup>Canicaj Jesucristó, cataj so' a: —Tzaj ne rihaan soj sij man nanó xrej ro', cataj xna'anj 'unj se vaa gaa 'ee rá soj man nij sí taj ri'yunj ni'yaj man soj, ne qui'yaj soj se luj che'é nij sí nachri' ni'yaj man soj ei. <sup>28</sup>Ve'é ca'mii soj rihaan nij

sí a'mii quij rihaan soj, ne cachinj ni'yaj soj rihaan Diose che'é nij sí 'yaj se nij man soj a. <sup>29</sup>Sese vaa sí coxro nichrej xruú so', ne ca'ne' rá so' coxro so' nichrej xruú so' uún a. Sese vaa sí ca'néj se-roto so', ne ca'ne' rá so' ca'nee so' se-cotoó so' uún a. <sup>30</sup>Ne me ma'an yuviı achíin ni'yaj rasuun rihaan soj, ne go' soj rasuun yo' man nij so' ei. Sese vaa yuviı ca'néj si'yaj soj, ne se nachin' soj si'yaj soj ma'. <sup>31</sup>Dan me se daj se uun rá soj qui'yaj sa' yuviı rihaan soj ro', ta'nga' danj qui'yaj sa' soj rihaan yuviı á.

<sup>32</sup>"Dan me se gaa 'ee rá soj man cunudanj yuviı ei. Sese 'ee rá soj man inanj nij sí 'ee rá man soj, gaa ne me che'é naru'vee Diose rihaan soj, rá soj ga. 'O se ndaa nij sí chi'ii ro', 'ee rá nij so' man nij sí 'ee rá man nij so' nanj á. <sup>33</sup>Ne qui'yaj soj se luj rihaan cunudanj yuviı ei. 'O se sese qui'yaj soj se luj rihaan inanj sí 'yaj se luj rihaan soj, gaa ne me che'é naru'vee Diose rihaan soj, rá soj ga. 'O se ndaa nij sí chi'ii ro', 'yaj nij so' se luj rihaan tuvi' nij so' sij 'yaj se luj rihaan nij so' nanj adonj. <sup>34</sup>Me ma'an yuviı racuıj soj sa'anj, ne se guun rá soj nacaj uún soj se-sa'anj soj ma'. Sese racuıj soj sa'anj man inanj sí naru'vee rihaan soj, gaa ne me che'é naru'vee Diose rihaan soj, rá soj ga. 'O se ndaa ma'an nij sí chi'ii ro', racuıj nij so' sa'anj man nij tuvi' so' sij naru'vee rihaan so' adonj.

<sup>35</sup>"Dan me se gaa 'ee rá soj man nij sí taj ri'yunj ni'yaj man soj, ne qui'yaj soj se luj rihaan nij sí nachri' man soj, ne racuıj soj sa'anj man yuviı, ne se guun rá soj nacaj

uún soj se-sa'anj soj ma'. Ne vaa güii, ne narque uxrá Diose se sa' man soj, ne ta'níi Diose síi sa' ndo'o me soj gaa adonj. 'O se Diose me síi 'yaj se luj rihaan ndaa síi ne ne'en me se uun se luj do', rihaan ndaa síi chí'ii do', adonj. <sup>36</sup>Ase vaa 'ee rá Rej ní' Diose man daj a nij yuvii ro', danj gaa 'ee rá soj man daj a nij yuvii uún adonj. —Danj cataj Jesucristó rihaan nij síi tucu'yón se-nana so' a.

**Nana nihánj taj xna'anj daj qui'yaj ní' gaa ca'mii ní' ga tinúú ní' che'é cacun' tumé tinúú ní' a**

<sup>37</sup>Ne canicaj Jesucristó cataj so' a: —Se guun niha' rá soj cuta' soj cacun' xráa tinúú soj, gaa ne taj cacun' cuta' Diose xráa ma'an soj man adonj. Maan se caraa x'naa soj rihaan tinúú soj, ne caraa x'naa Diose rihaan ma'an soj uún adonj. <sup>38</sup>Go' soj rasuun man tuvi' soj, ne Diose me síi narque rasuun rihaan soj uún adonj. So' me síi sa' ndo'o rá, ne adi' se 'yaj síi sa' rá tu'vej 'núú ne araa navii so' rihaan tanej ro', danj qui'yaj guee Diose ga soj, ne doj a narque Diose rasuun sa' man soj adonj. Ase vaa 'yaj guee soj ga tuvi' soj ro', danj qui'yaj guee Diose ga soj uún adonj. —Danj cataj Jesucristó rihaan nij síi tucu'yón se-nana so' a.

<sup>39</sup>Gaa ne nanó Jesucristó se-cuento roj síi tuchrii rihaan nij síi tucu'yón se-nana so' a:

—Ne ca'vee tihaañ 'o síi tuchrii chrej rihaan tuvi' tuchrii so', rá soj na'. Taj ma'. Sese danj qui'yaj so', gaa ne quini roj so' rá yu'uj nanj adonj. <sup>40</sup>Danj nanj

uún, ne 'o xnii tucu'yón se guun nucuaj so' quene'en so' doj rihaan se-maestro so' ma'. Ne ca'vee se uxrá tucu'yón so', tzaj ne veé ase vaa ne'en se-maestro so' ro', veé danj quene'en ma'an so' nanj adonj. <sup>41</sup>Me che'é guun chree rá so' ni'yaj so' ni'ya nuu rihaan tinúú so' ga. Ne ne ni'yaj so' chruun manj nuu rihaan ma'an so' a. <sup>42</sup>Asa' ca'vee cataj so' rihaan tinúú so': “Rque so' rihaan so' quirii 'unj ni'ya á”. Se guun a doj cataj so' danj tihá' so' man tinúú so' ma'. Asino quirii so' chruun manj nuu rihaan so', gaa ne aj ruvi' sa' rihaan so', gaa ne ca'vee quirii so' ni'ya nuu rihaan tinúú so' adonj. Dan me se ase vaa aráan ni'ya rihaan yuvii ro', danj vaa aráan rihaan yuvii 'yaj cacun' ata yuvii ne na'vee xcaj sa' nij yuvii cuentá man adonj —taj Jesucristó rihaan nij síi tucu'yón se-nana so' a.

**Nana nihánj taj xna'anj se vaa ase vaa nimán yuvii ro', danj vaa a'mii yuvii a**

<sup>43</sup>Gaa ne canicaj Jesucristó, cataj so':

—Chruun sa' ro', se guun cumañ chruj nij raá ma'. Ne chruun nij ro', se guun cumañ chruj sa' raá ma'. Ase vaa chruun yo' ro', danj vaa nimán yuvii, ne ase vaa chruj yo' ro', danj vaa se vaa 'yaj nij yuvii adonj. <sup>44</sup>Maan chruj man raá chruun ro', 'yaj ne'en ní' daj chruun me yo' adonj. Taj rutzi' mán raá chruun tanj yangíj ma'. Ne taj rcoo mán raá chruun tanj xcuaa ma'. <sup>45</sup>Dan me se síi sa' ro', man ndo'o se sa' nimán so', ne a'mii so' inanj nana sa' adonj. Síi chí'ii ro', man

ndo'o se quij nimán so', ne a'mii so' inanj nana chi'ii adonj. 'O se ase vaa se man nimán yuvii ro', danj vaa nana a'mii yuvii nanj á —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa ase vaa sí 'yaj ve' sa' ro', danj vaa sí uno sa' rihaan Jesucristó a**

<sup>46</sup>Canicaj Jesucristó, cataj so' nana nihánj a:

—Me che'é taj soj se vaa sí 'nij ra'a man soj mej, tzaj ne ne uno soj rihanj ga. Ne chihan' 'yaj soj ma'.

<sup>47</sup>Cuano nihánj me cataj xna'anj 'unj rihaan soj daj sij me sí 'na' nanó xrej nana a'mij, ne 'yaj so' ndaa vaa taj se-nanaj a. <sup>48</sup>Ase vaa 'o sí cune' ve' tucua' rihaan 'o yuvej vaa so' a. Cunuu ndo'o váán so' rej cuchruj so' tacóo ve', ne raan ndo'o yáán ve', 'yaj so' a. Ca'vee se maan nana yuvaa curihanj go' xraá ve', ne ca'vee se cavii chráá, ne ca'na' na xee go' na xee tacóo ve', tzaj ne se naxru' ve', qui'yaj na xee ma'. Danj vaa sí uno se-nanaj a. <sup>49</sup>Tzaj ne ino vaa sí nanó xrej nana a'mij tzaj ne ne 'yaj ndaa vaa taj se-nanaj ma'. Ase vaa 'o sí 'yaj ve' nij vaa so' a. Ne váán cunuu so' rej cuchruj so' tacóo ve' rihaan yo'óo ma'. Che'é dan yáán cuan' uun tucua' so' a.

Sese curihanj maan nana yuvaa, ne go' yo' xraá ve', ne sese cavii chráá, ne ca'na' na xee go' na xee tacóo ve', gaa ne canee guee ve' nanj á. Nu' canee ve' yo', ne daj chihaa mÍj se cunuu sa' yo' a ma'. Danj vaa sí ne uno se-nanaj adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa nahuun se-mozó tanuu capitán, qui'yaj Jesucristó a**

**7** QuisÍj ca'mii Jesucristó nu' nana yo' cuno nij yuvii, gaa ne ca'anj so' chuman' Capernaum a. <sup>2</sup>Dan me se yáán 'o tanuu capitán chuman' yo', ne sí rii ta'nga' rihaan 'o cientó tanuu me so' a. Ne vaa 'o se-mozó so' sí 'ee uxrá rá so' man, ne ran' uxrá mozó yo', ne daj doj caví' so' a. <sup>3</sup>Dan me se cuno tanuu capitán se vaa ca'na' Jesucristó chuman' yo', ne ca'née so' doj sí uun chij rihaan nij yuvii israelitá cuchí' nij so' rihaan Jesucristó, ne cachinj ni'yaj nij so' rihaan Jesucristó se vaa ca'na' so' tinahuun so' se-mozó tanuu capitán yo' a. <sup>4</sup>Dan me se cuchí' nij sí uun chij yo' rihaan Jesucristó, gaa ne cachín ni'yaj uxrá nij so' rihaan Jesucristó, cataj nij so':

—Sí sa' me tanuu capitán yo', ne che'é dan vaa che'é racuíj so' man so' adonj. <sup>5</sup>Ee rá so' man ní' sij israelitá, ne ma'an so' qui'yaj ve' nuu chre' núj tucu'yón nÍj se-tucuanj Moisés adonj —taj nij so' rihaan Jesucristó a.

<sup>6</sup>Ne ca'anj Jesucristó ga nij so', ne daj doj cuchí' nij so' ve', gaa ne ca'née tanuu capitán man tuví' so' ca'anj caran' man Jesucristó, ne cataj nij so':

—Se caraya'áán so', man maestro. 'O se nuveé sij sa' me so', taj so' ma'. Ne nó xcúún so' catuu so' rá ve' tucua' so', taj so' ma'. <sup>7</sup>Che'é dan ne quisij rá ma'an so' ca'na' so' rihaan so', taj so' ma'. Maan se ca'ne' uun so' suun se vaa nahuun



se-mozó so', gaa ne nahuun ma'an se-mozó so', taj so' nanj á. <sup>8</sup>Ne cataj so' se vaa vaa síi rii ta'nga' rihaan so', ne rii ta'nga' so' rihaan tanuu, ne taj xna'anj so' rihaan tanuu se vaa ca'anj nij so', ne 'anj nij so', ne taj xna'anj so' rihaan nij tanuu se vaa ca'na' nij so', ne 'na' nij so' rihaan so', ne taj xna'anj so' daj qui'yaj nij tanuu, ne veé danj 'yaj nij tanuu adonj. Ne ne'en so' se vaa ase vaa rii ta'nga' so' rihaan nij tanuu noco' man so' ro', danj rii ta'nga' guée so' rihaan chi'ii anó man yuvii, taj so' nanj á —taj nij tuvi' tanuu capitán rihaan Jesucristó a.

<sup>9</sup>Dan me se gaa cuno Jesucristó nana ca'mii tuvi' tanuu capitán yo', ne ca'anj rá Jesucristó, ne canicaj so' cataj so' rihaan nij síi noco' rej xco so' a:

—Cuanó nihánj me cataj xna'anj 'unj rihaan soj se vaa taj vaj á 'ó rej ne narij man yo'ó síi israelitá síi cuchumán ndo'o rá nana a'mii 'unj ndaa vaa amán rá tanuu capitán nihánj a ma' —taj Jesucristó rihaan nij so' a.

<sup>10</sup>Dan me se canicaj uún nij tuvi' tanuu capitán ca'anj nij so' tucua so', ne gaa cuchi' nij so', ne aj nahuun se-mozó tanuu capitán yo', qui'yaj Jesucristó a.

**Nana nihánj taj xna'anj se vaa cunuu i'na' uún ta'níi 'o chana cavi' nica, qui'yaj Jesucristó a**

<sup>11</sup>Dan me se cachén doj güiii, gaa ne ca'anj Jesucristó chuman' cu'naj Naín ga nij síi tucu'yón se-nana so' ga 'o x'ne' noco'o yuvii a.

<sup>12</sup>Quinichrun' nij so' tu'va chuman',

gaa ne dan me se nari' tuvi' Jesucristó ga nij síi ca'anj cachin' 'o xngá a. Ne síi cavi' me se orún' so' me ta'níi chana cavi' nica, ne vaj 'o x'ne' noco'o yuvii man chuman' yo' ga nii so' rihaan santó a. <sup>13</sup>Dan me se quene'en Jesucristó man chana yo', gaa ne cunuu 'ee rá so' man no', gaa ne cataj so':

—Se ta'veé so' ma' —taj so' a.

<sup>14</sup>Gaa ne dan me se ca'anj Jesucristó canó ra'a so' man chrúun taj xngá, gaa ne canicun' nij síi taj chihá xngá a. Gaa ne cataj Jesucristó rihaan síi cavi' a:

—Cunó so' a'mij, ne naxagaa so', xnii —taj Jesucristó rihaan síi cavi' yo' a.

<sup>15</sup>Gaa ne cunuu i'na' ya uún xnii, ne naxagaa so', gaa ne guun che'e xnii ca'mii so' a. Gaa ne:

—Nihánj 'na' ta'níi so' á —taj Jesucristó rihaan nii xnii a.

<sup>16</sup>Gaa ne dan me se ca'anj rá taran' nij yuvii se vaa qui'yaj Jesucristó, gaa ne guun niha' rá nij so' se vaa ve'é qui'yaj Diose, gaa ne canicaj nij so' cataj nij so' se vaa ca'née Diose 'o síi nata' se-nana so' rihaan nij so' a. Ne cataj uún nij so' se vaa ca'na' Diose racuíj so' man nij so' sij noco' man Diose a.

<sup>17</sup>Gaa ne cuchi' nana rihaan nij yuvii man estadó Judea do', rihaan nu' nij yuvii man anicaj estadó Judea che'é se vaa qui'yaj Jesucristó a.

**Nana nihánj taj xna'anj che'é nana ca'mii Jesucristó che'é síi cu'naj Juan síi cuta' ne man yuvii a**

<sup>18</sup>Dan me se cuno nij síi tucu'yón se-nana Juan nu' se vaa qui'yaj

Jesucristó, gaa ne cataj xna'anj nij so' rihaan Juan a. Gaa ne canacúun Juan man vij sí tucuyón se-nana so' ca'na' roj so' rihaan so', gaa ne dan me se ca'née so' man roj so' cuchí' roj so' rihaan sí 'nij ra'a man ní' a. <sup>19</sup>Ne nana nihánj ro', xna'anj roj so' man Jesucristó, taj sí cu'naj Juan rihaan roj so' a: “So' me sí ca'na' tñanii man yuvii rihaan sayuun na'. Ase na'vij ní' ca'na' yo'ó so' xa'”. Dan me nana me rá sí cu'naj Juan xna'anj roj so' man Jesucristó a. <sup>20</sup>Dan me se cuchí' roj so' rihaan Jesucristó, ne cataj roj so':

—Vij ran' rój me sí ca'née Juan sí uta' ne man yuvii ca'na' rihaan so' a. Me rá Juan quene'en so' sese ma'án so' me sí ca'na' tñanii man yuvii rihaan sayuun ni', ase na'vij ní' ca'na' yo'ó so' a —taj roj so' rihaan Jesucristó a.

<sup>21</sup>Gaa ne veé maan orá ca'na' roj sí ca'née Juan man ro', nahuun que'ee ndo'o sí ran' do', curihanj nana chree nimán que'ee yuvii do', nachuguun rihaan que'ee sí tuchrii do', qui'yaj Jesucristó a. <sup>22</sup>Gaa ne cataj xna'anj Jesucristó rihaan roj so' a:

—Cavii roj soj cuchí' uún roj soj rihaan sí cu'naj Juan, ne cataj xna'anj roj soj rihaan so' nu' nana cuno roj soj do', nu' se vaa quene'en roj soj do' á. Dan me se nij sí tuchrii ro', naxra' rihaan, ne nij sí na'vee cachee ro', chée nij so', ne nij sí ran' luj ri'yuj ro', nahuun sa', ne nij sí so'o ro', nachuguun xrée nij so', ne nij sí cavi' ro', cunuu i'na' uún, ne nij sí nique ro', uno nij so' nana sa' a. Nu' nihánj cataj

xna'anj roj soj rihaan sí cu'naj Juan yo' á. <sup>23</sup>Ne cataj uún roj soj rihaan sí cu'naj Juan se vaa cavii sa' so' qui'yaj Diose, sese se guun na'aj so' ni'yaj so' manj a. Danj ca'mii roj soj rihaan sí cu'naj Juan yo' ei —taj Jesucristó rihaan roj sí tucuyón se-nana Juan yo' a.

<sup>24</sup>Dan me se gaa ca'anj roj sí ca'anj suun che'é Juan, gaa ne guun che'e Jesucristó ca'mii so' rihaan cunudanj nij yuvii che'é sí cu'naj Juan sí cuta' ne man yuvii a:

—Asij ca'anj soj rej tacaan quene'en soj man sí cu'naj Juan ro', ne daj gaa so' quene'en soj, rá soj ga. Ase vaa yo'o rcoo naan ndo'o 'yaj nana vaa so', rá soj na'. Guun vij nimán so' che'é tucuaán noco' so', rá soj na'. Taj ma'.

<sup>25</sup>Maan se daj gaa so' rá soj, asij ca'anj soj quene'en soj man so' ga. Sij nuu yatzíj laruu ndo'o me so', rá soj na'. Taj ma'. 'O se nij sí nuu yatzíj sa' ndo'o do', nij sí utun' ndo'o sa'anj do', yanj rá ve' tucua sí nicaj suun rey adonj. <sup>26</sup>Maan se daj gaa sí cu'naj Juan rá soj, asij ca'anj soj quene'en soj man so' ga. Sij nata' se-nana Diose me so', rá soj na'. Ya uxrá ei. Ne cataj xna'anj 'unj rihaan soj se vaa sa' doj vaa so' rihaan cunudanj nij sí nata' se-nana Diose adonj.

<sup>27</sup>”O se nana nihánj nana no rihaan danj Diose ro', taj xna'anj che'é sí cu'naj Juan a: “Vaa sí ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvii ve'é ca'mii nij yuvii ga so', qui'yaj so' a”. Danj taj danj Diose che'é sí cu'naj Juan se vaa nuchran' nimán yuvii

ve'é ca'miī nij yuviī ga sít ca'na' tĩnaniī man nij yuviī rihaan sayuun, qui'yaj so' a. Ne danj qui'yaj so' adonj.

<sup>28</sup>”Cuanō nihánj me se cataj xna'anj 'un̄j rihaan soj se vaa sij sa' doj rihaan cunudan̄j nij yuviī man rihaan chumiī me sít cu'naj Juan a. A 'ó yuviī ne vaa sa' doj rihaan so' ma'. Tzaj ne cuano ro', uun chij Diosē nimán yuviī man rihaan chumiī nihánj, ne naj guun yuviī guun chij Diosē nimán ro', me sít sa' doj rihaan sít cu'naj Juan a. —Danj cataj Jesucristó rihaan nij yuviī yo' a.

<sup>29</sup>Dan me se nu' nij yuviī mán ne ndaa nij sít a'néj puextó ro', gaa cuno nij so' se-nana Jesucristó, ne cataj nij so' se vaa sa' uxrá qui'yaj Diosē a. 'O se sij cata' ne qui'yaj Juan me nij so' a. <sup>30</sup>Ne nij sít naqui'yaj cuu se-tucuan̄j Moisés do', nij sít fariseo do', ne ca'vej rá nij so' cunō nij so' daj me rá Diosē qui'yaj Diosē che'é nij so' ma'. 'O se nuveé sij cata' ne qui'yaj Juan me nij sít na'vej rá ma'.

<sup>31</sup>Gaa ne cataj uún Jesucristó rihaan nij yuviī a:

—Ne daj vaa nij soj sij man rihaan chumiī nihánj cuano, rá soj ga. Dan me se cataj xna'anj 'un̄j rihaan soj ei. <sup>32</sup>Ase vaa xniī ca'an̄j rihaan yu'vee ne tico ga tuvi' ro', vaa soj sij man rihaan chumiī nihánj adonj. Dan me se yáán nij xniī yo' rihaan yo'óó, ne aguáj nij xniī rihaan tuvi' xniī, taj nij xniī: “Nicaj núj rihuu núj, go' núj chra' choco', tzaj ne me che'é ne ra'an̄j soj ga. Ne go' núj chra' xngangá, tzaj ne me che'é ne ta'vee soj ga. Me che'é ne tico soj ga

núj ga”, taj nij xniī rihaan tuvi' nij so' a. <sup>33</sup>'O se ca'na' Juan sít cuta' ne man yuviī, gaa ne ne cha so' chraa do', ne co'lo so' na vinó ga tuvi' so' do', gaa ne che'é dan taj soj se vaa nuu nana chree nimán so', taj soj a. <sup>34</sup>Ne ca'ná' 'un̄j sij ca'née Diosē nicaj yu'un̄j man yuviī, gaa ne niha' rá 'un̄j chá 'un̄j do', co'lo 'un̄j do', gaa ne che'é dan taj uún soj se vaa sít cachén chá do', sít cachén co'lo do', mé 'un̄j, taj uún soj a. Ne taj uún soj se vaa tuvi' 'un̄j me sít tiha' yu'un̄j man yuviī che'é puextó do', yo'ó nij sít tumé cacun' do', taj soj a. Danj tu'va soj, tzaj ne ne ne'en uxrá soj ma'. <sup>35</sup>Sese xcax soj cuentá daj vaa 'yaj rój, ne guun ya rá soj se vaa sij cuu raa me rój ga sít cu'naj Juan yo' adonj —taj Jesucristó rihaan nij yuviī a.

**Nana nihánj taj xna'an̄j se vaa na'nu' 'o chanā tacóó Jesucristó a**

<sup>36</sup>Dan me se canacúun 'o sít fariseo man Jesucristó chā Jesucristó chraa tucua' so', gaa ne ca'an̄j cayáán Jesucristó tucua' so' cha so' chraa a. <sup>37</sup>Ne dan me se yáán 'o chanā niha' rá ga chii chuman' yo', gaa ne cuno no' nana se vaa cuchi' Jesucristó chá so' chraa tucua' sít fariseo yo', gaa ne che'é dan nicaj no' 'o aga' catziī ve'é ndo'o vaa nuu casté gun' daj, ca'an̄j no' tucua' sít fariseo yo' a. <sup>38</sup>Gaa ne ca'an̄j canē ruj no' nichrun' tacóó Jesucristó, ne ta'vee uxrá no', ne na'nu' no' na rihaan no' tacóó Jesucristó a. Gaa ne maan̄ yuvé raa no' na've no' tacóó Jesucristó a. Cachrón tu'va no' tacóó Jesucristó, gaa ne caxrij

no' casté gun' daj tacóo so' uún a.

<sup>39</sup>Dan me se gaa quene'en síi tucua se vaa qui'yaj chana man Jesucristó, gaa ne guun rá so' nana nihánj ni'yaj so' man Jesucristó a: “Sese ya sij nata' se-nana Diose me síi nihánj, ne aj ne'en so' daj chana me chana nihánj, se vaa chana ata cacun' me no', ne ne ca'vej rá so' qui'yaj no' danj ga so' tzaj man adonj”, guun rá síi tucua yo' a. <sup>40</sup>Gaa ne cataj Jesucristó rihaan so' a:

—Vaa nana me raj cataj 'unj rihaan so', Simón —taj Jesucristó rihaan so' a.

—Ca'mii so', maestro —taj síi tucua yo' a.

<sup>41</sup>Gaa ne nanó Jesucristó se-cuento vij síi 'yaj xcúun a:

—Vij síi 'yaj xcúun sa'anj rihaan 'o ru'vee me roj so' a. 'O so' ro', 'yaj xcúun 'un' cientó sa'anj denario, ne yo'ó so' ro', 'yaj xcúun vij chihaa chi' sa'anj denario a. <sup>42</sup>Tzaj ne taj sa'anj rihaan roj so' naru'vee roj so' rihaan ru'vee, gaa ne che'é dan cunuu ee rá ru'vee man roj so', ne quinavij un xcúun xráá roj so', qui'yaj ru'vee a. Me tuvi' roj so' caran' doj rá ni'yaj man ru'vee, rá so' ga —taj Jesucristó, xná'anj so' man síi cu'naj Simón yo' a.

<sup>43</sup>—Caran' doj rá síi navij nocoo doj xcúun xráá ni'yaj so' man ru'vee, che'é rej nocoo doj se luj qui'yaj ru'vee che'é so', raj a —taj síi cu'naj Simón yo' a.

—Veé danj vaa ya —taj Jesucristó rihaan so' a.

<sup>44</sup>Gaa ne canicaj Jesucristó ni'yaj Jesucristó man chana, gaa ne cataj so' rihaan síi cu'naj Simón yo' a:

—Xcaj so' cuentá se vaa qui'yaj chana nihánj ei. Ca'ná' 'unj tucua so', tzaj ne taj na rqué so' na'nuj tacó ma'. Tzaj ne chana nihánj me níi na'nu' na rihaan no' tacó, ne maan yuvé raa no' na've no' tacó nanj á. <sup>45</sup>Ca'naj tucua so', tzaj ne ne cachron tu'vá so' ra'aj ma'. Tzaj ne chana nihánj ro', nu' catúj 'unj rá ve', ne nu' cachron tu'va no' tacó, ne veé 'o achron tu'va no' tacó nanj á. <sup>46</sup>Taj vaj casté caxrj so' raj ma'. Tzaj ne chana nihánj me níi caxrj casté gun' daj tacó adonj. <sup>47</sup>Cunó so' ca'mij á. Ase vaa síi navij un xcúun 'un' cientó sa'anj denario xráá ro', danj vaa no' a. 'O se nda' se níi tumé uxrá cacun' me no', tzaj ne che'é se caráya'anj ndo'o no' ni'yaj no' manj ro', che'é dan ne'en ní' se vaa x'néj nu' cacun' xráá no' nanj adonj. Ne xa' síi x'néj doj cacun' xráá, tzaj ne doj aráya'anj so' ni'yaj so' manj nanj adonj —taj Jesucristó rihaan síi cu'naj Simón yo' a.

<sup>48</sup>Gaa ne cataj Jesucristó rihaan chana yo' a:

—Navij cacun' tumé so' ei —taj Jesucristó rihaan no' a.

<sup>49</sup>Gaa ne guun che'e nij síi chá chraa tucua Simón ca'mii nij so' ga tuvi' nij so', cataj nij so' a:

—Daj sij me síi nihánj, ne síj rá so' cataj so' se vaa navij cacun' xráá yuvii, rá soj ga —taj nij so', xná'anj nij so' man tuvi' nij so' a.

<sup>50</sup>Tzaj ne canicaj uún Jesucristó, cataj so' rihaan chana a:

—Quinanii so' rihaan sayuun, che'é se amán rá so' ni'yaj so' manj adonj. Ve'é ca'anj so', ne dínj

gaa nimán so' á —taj Jesucristó rihaan chana yo' a.

**Nana nihánj taj xna'anj che'é nij chana racuj man Jesucristó a**

**8** Dan me se cachén doj güii, gaa ne ca'anj Jesucristó que'ee chuman', ca'mii natáj so' rihaan yuvií che'é güii guun chij Diose rihaan chumií nihánj, ne ca'anj chuvij nij sí tucu'yón se-nana so' ga so' a. <sup>2</sup>Ne ca'anj chana nahuun sa' qui'yaj Jesucristó ga nij so' a. Dan me se ta'aj no' me ní nahuun qui'yaj Jesucristó, ne yo'ó ta'aj no' me ní curihañj nana chree nimán qui'yaj Jesucristó a. Chana cu'naj Mariá Magdalena me 'o no', ne no' me ní curihañj chij nana chree nimán qui'yaj Jesucristó a. <sup>3</sup>Ne yo'ó no' ro', me ní cu'naj Juana, ne nicá no' ro', me sí cu'naj Chuza sí nicun' rihaan sí nicaj suun rey cu'naj Herodes a. Ne yo'ó chana ca'anj ga Jesucristó ro', me ní cu'naj Susana a. Ne vaa que'ee doj nij chana ca'anj ga nij so' a. Nu' nij chana nihánj ro', me ní racuj man nij tuvi' Jesucristó se vaa rqué nij no' si'yaj nij no' rasuun cachiin man nij tuvi' Jesucristó a.

**Nihánj me cuentó nanó Jesucristó che'é 'núú trigó tix'nuu yo'ó so' a**

<sup>4</sup>Dan me se cavii que'ee ndo'o nij yuvií daj a chuman', ca'anj ni'yaj nij so' man Jesucristó, ne dan me se quisj cunuu chre' nij yuvií, gaa ne guun che'e Jesucristó nanó so' se-cuento 'núú trigó rihaan nij so' a. <sup>5</sup>Cataj Jesucristó nana nihánj a: —Dan me se curihañj 'o sí me rá cuchruj naa 'núú trigó, ne tix'nuu

so' 'núú trigó rihaan yo'ó, ne cayuu doj 'núú trigó yo' rá chrej chéé yuvií, ne curu'maan che'é yuvií man yo', ne ca'na' xtáj, chá xtáj man 'núú trigó naj rá chrej yo', ne dan me se navij nu' 'núú trigó yo', qui'yaj nij xtáj nanj adonj. <sup>6</sup>Ne yo'ó ta'aj 'núú trigó yo' ro', cayuu rihaan yuvej rej taj catun' yo'ó a. Xra' 'núú, tzaj ne cuchrii naa le'ej che'é se taj nocoo 'yoo táá xráa yuvej yo' nanj adonj. <sup>7</sup>Ne yo'ó ta'aj 'núú trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naa le'ej, ne quinavij nu' naa le'ej, qui'yaj coj tanj nanj adonj. <sup>8</sup>Ne yo'ó ta'aj 'núú trigó yo' ro', cayuu rihaan yo'ó sa', ne naa yo' ro', cachij sa', ne cientó ya 'núú cavii, qui'yaj 'o 'o 'núú le'ej nii quinij rihaan yo'ó sa' yo' nanj adonj. —Danj cataj Jesucristó rihaan nij so' a.

Gaa ne guun che'e so' ca'mii nucuaj so', cataj so':

—Sese taj yu'uj xréé soj, ne cunó soj nana nihánj ei —taj Jesucristó rihaan nij so' a.

**Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvií a**

<sup>9</sup>Gaa ne xná'anj nij sí tucu'yón se-nana Jesucristó man so' me che'é nanó so' cuentó che'é 'núú trigó yo' a. <sup>10</sup>Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose gaa guun chij Diose rihaan chumií nihánj adonj. Tzaj ne rihaan yo'ó nij yuvií me se inanj cuentó che'é nij rasuun nanó 'unj rihaan nij so',

gaa ne ni'yaj nij so' do', nano xrej  
nij so' do', tzaj ne se quene'en nij so'  
do', se xcaj nij so' cuentá do', a man  
adonj —taj Jesucristó rihaan nij sí  
tuculyón se-nana so' a.

**Nana nihánj taj xna'anj me taj  
se-cuento 'núu trigó yo' a**

<sup>11</sup>Canicaj Jesucristó, cataj so':  
—Nihánj me cataj xna'anj 'unj  
che'é se-cuento 'núu trigó, ne ase  
vaa 'núu trigó yo' ro', danj vaa  
se-nana Diose adonj. <sup>12</sup>Ne ase  
vaa 'núu cayuu rá chrej ro', danj  
vaa ta'aj nij sí uno se-nana Diose,  
ne dan me se uno nij so' doj tzin',  
tzaj ne 'na' sí chree, ne a'néj sí  
chree se-nana Diose nimán nij  
so' che'é se na'vej rá sí chree  
cuchuman rá nij so' ne quinani  
nij so' rihaan sayuun qui'yaj  
Diose adonj. <sup>13</sup>Ne ase vaa ta'aj 'núu  
trigó cayuu rihaan yujej ro', danj  
vaa yo'ó ta'aj nij sí uno se-nana  
Diose, ne uun niha' rá nij so', ne doj  
orá nii gaa chumán xa' rá nij so',  
tzaj ne nu' 'na' sayuun rihaan nij so',  
ne nu' tanáj nij so' se-nana Diose,  
ne ne noco' raan nij so' se-nana  
Diose ma'. <sup>14</sup>Ne ase vaa ta'aj 'núu  
cayuu sca'núj tanj ro', danj vaa yo'ó  
ta'aj nij sí uno se-nana Diose uún,  
ne dan me se achén güii, gaa ne  
anicaj nij so' niganj nanó rá nij so'  
che'é rasuun achiin man nij so' do',  
che'é sa'anj do', che'é se niha' ndo'o  
vaa rasuun man rihaan chumi  
nihánj rá nij so' do', ne che'é dan  
me tanáj xco nij so' se-nana Diose,  
ne ne 'yaj nij so' se sa' a ma'. <sup>15</sup>Ne  
yo'ó ta'aj nij sí uno se-nana Diose  
me se ase vaa 'núu cayuu rihaan  
yo'óó sa' ne sa' uxrá cachij yo' ro',

danj vaa sí sa' uno se-nana Diose,  
ne sa' uxrá vaa nij so', ne ve'é nanó  
xrej nij so' se-nana Diose, ne noco'  
raan nij so' se-nana Diose, ne inanj  
se sa' 'yaj nij so', ne ne a'ne' rá  
nij so' ga se-nana Diose ma' —taj  
Jesucristó rihaan nij sí tuculyón  
se-nana so' a.

**Nihánj me cuento nanó  
Jesucristó che'é aga' ya'an a**

<sup>16</sup>Dan me se guun che'e Jesucristó  
cataj so':

—Nuvi' a 'ó sí achrón ya'an raa  
aga' ya'an, ne axríj yuve so' aga'  
rque xruj do', rque yuvé do' ma'.  
Tananj toco' nii aga' ya'an rej  
xta', gaa ne chuguun yo' rihaan  
cunudanj nij sí atúj rá ve' adonj.

<sup>17</sup>Dan me se a 'ó rasuun caxríj  
yuve yuvi se qui'nij yuve ma'. Ya  
nurihanj yo', vaa güii, ne cunudanj  
yuvii quene'en, vaa güii adonj.

<sup>18</sup>Che'é dan nuchruj raa soj nana  
ca'mij nihánj ei. 'O se sí nari' nana  
ro', doj a nari' so', qui'yaj Diose,  
ne sí na'vej rá nari' sa' nana ro',  
tananj doj a ca'nee Diose nana nari'  
so' man so', ne quinaj uun so' nanj  
adonj —taj Jesucristó rihaan nij  
so' a.

**Nana nihánj taj xna'anj se vaa  
ase vaa nii Jesucristó do', ase  
vaa tinúu Jesucristó do', vaa  
nij sí uno se-nana Diose a**

<sup>19</sup>Dan me se cuchi' nii Jesucristó  
cuchi' nij tinúu Jesucristó cuchi'  
ndaaj rej vaj Jesucristó, tzaj ne ne  
ca'vee quinichrun' nij so' rihaan  
Jesucristó, che'é se man ndo'o  
yuvii a. <sup>20</sup>Ne cataj 'o so' rihaan  
Jesucristó a:

—Nicun' ní so' nicun' tinúú so' nicun' xe', ne me rá nij so' quene'en nij so' mán so', Jesús —taj so', cataj xna'anj so' rihaan Jesucristó a.

<sup>21</sup>Tzaj ne cataj Jesucristó rihaan nij yuvií a:

—Ase vaa ní 'unj do', ase vaa tinúú 'unj do', vaa nij síi nihánj adonj. 'O se nanó xrej nij so' se-nana Diosé, ne 'yaj nij so' ndaa vaa taj nana yo' adonj —taj Jesucristó rihaan nij yuvií a.

**Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a**

<sup>22</sup>Dan me se 'o güii catúj Jesucristó rque 'o rihoo ga cunudanj nij síi tucu'yón se-nana so', ne cataj Jesucristó rihaan nij so' se vaa ca'anj cunudanj nij so' ndaa yo'ó níchrej tu'va na lacuaná a. Gaa ne guun che'e rihoo chéé rihoo rihaan na, qui'yaj nij so' a. <sup>23</sup>Doj ca'anj rihoo, ne cotoj Jesucristó a. Cachén 'o orá nii, gaa ne guun che'e nana yuvaa cavii uxrá yo' go' ndo'o yo' rihaan na, ne dan me se catúj ndo'o na rque rihoo, ne daj doj ca'anj nij rihoo rque na a. <sup>24</sup>Gaa ne guun che'e nij síi tucu'yón se-nana Jesucristó narii nij so' nej rihaan so', ne:

—Daj doj cavi' ní, nanj maestro —taj nij so' rihaan Jesucristó a.

Gaa ne canicun' caya so', ne caxríj yuvaa so' man nana do', man na do' a. Gaa ne canicun' nana canicun' na do', ne canicun' dínj rihaan na lacuaná yo', qui'yaj Jesucristó nanj adonj. <sup>25</sup>Gaa ne xná'anj Jesucristó man nij síi tucu'yón se-nana so', cataj so':

—Me che'é ne amán rá soj ni'yaj soj man Diosé ga —taj so' rihaan nij so' a.

Tzaj ne ca'anj rá nij so', ne cuchu'vi' nij so', ne cataj nij so' rihaan tuvi' nij so':

—Daj sij me síi nihánj ga. Ndaa rihaan nana do', ndaa rihaan na do', a'ne' so' suun, ne uno roj yo' a'mii so' ason —taj nij so' rihaan tuvi' nij so' a.

**Nana nihánj taj xna'anj se vaa quirii Jesucristó man nij nana chree nimán 'o snó'o a**

<sup>26</sup>Dan me se guun gan' rihoo nuu Jesucristó ga estadó Galilea, ne cachén yo' ca'anj yo' ndaa níchrej tu'va na lacuaná yo', ndaa rej ne nij síi man chuman' Gadara a. <sup>27</sup>Cuchi' nij so' yo'óo yo', ne nanij Jesucristó rihoo, gaa ne nari' tuvi' so' ga 'o síi chihanj chuman' yo', ne so' me síi nuu nana chree nimán, ne taj yatzíj nuu so' do', na'vej rá so' cayáán so' ve' tucua' so' do', inanj rihaan santó ne so' do' a. <sup>28-29</sup>Dan me se ca'ne' Jesucristó suun rihaan nana chree se vaa curihanj nana chree nimán so' a. 'O se quisíj que'ee canó nana chree man so' a. Dan me se ndaa aga' ne' numíj nii ra'a so' do', tacóo so' do', tzaj ne xuun so', ne x'ne' yo', qui'yaj so', gaa ne nicaj nana chree man so' ca'anj nij so' quij nanj adonj. Dan me se gaa quene'en so' man Jesucristó, ne caguáj so', ne canicun' ruj so' rihaan Jesucristó, ne nucuaj ca'mii so', cataj so':

—Veé ne'én 'unj se vaa ta'nij Diosé síi sa' ndo'o mé so', Jesús. Me che'é 'ná so' rej né 'unj ga. Cataj

xna'anj sa' 'unj rihaan so' se vaa se qui'yáa so' sayuun manj ma' —taj so' rihaan Jesucristó a.

<sup>30</sup>Gaa ne xna'anj Jesucristó man nana chree yo', cataj so':

—Daj cu'naj so' ga —taj Jesucristó, xna'anj so' man nana chree a.

Ne dan me se cataj nana chree yo':

—X'ne' nocoo me núj á —taj nij so' che'é rej aj catúj que'ee ndo'o nij so' nimán snó'o yo' a.

<sup>31</sup>Gaa ne cachín ni'yaj nij nana chree rihaan Jesucristó se gaa nanj ca'nej so' man nij so' rej cunuuj rej nuuj ya'an, ne:

—Achín ni'yaj ndo'o núj rihaan so' se ca'née so' man núj rej nuuj ya'an, man Jesús —taj nij so' rihaan Jesucristó a.

<sup>32</sup>Ne dan me se chée 'o x'ne' nocoo xcáa rej tacaan rej yo', chá nij xo' coj, ne dan me se cachín ni'yaj nij nana chree rihaan Jesucristó se vaa ca'vej rá Jesucristó catuuj nij so' nimán xcáa, ne cayáan nij so' nimán xcáa a. Ne ca'vej rá Jesucristó catuuj nij so' nimán xcáa a. <sup>33</sup>Che'é dan me curihanj nij nana chree nimán snó'o, ne catúj nij so' nimán xcáa, ne dan me se ruvaaj uxrá tacaan nicun' tu'va na lacuaná rej vaj nij xcáa yo', ne gaa catúj nij nana chree nimán xcáa yo', gaa ne cunánj ndo'o nij xo' ca'anj nij xo', ne veé danj vaj nij xo', ne quinij nij xo' rque na, ne canó xráa nij xo' nanj adonj.

<sup>34</sup>Dan me se quene'en nij síi tumé xcáa se vaa guun, gaa ne cunánj nij so' ca'anj cataj xna'anj nij so' rihaan nij yuvií man chuman' do', rihaan nij yuvií man tacaan do' a.

<sup>35</sup>Gaa ne dan me se ca'na' ni'yaj nij yuvií se vaa guun, gaa ne ca'na' nij so' rej nicun' Jesucristó, gaa ne quene'en nij so' man síi curihanj nana chree nimán a. Aj nanuú so' sagan' so', ne dínj ne so' rihaan Jesucristó a. Ne aj ti'inj se snúú so', ne nuu sa' so' a. Gaa ne cuchu'vi' ndo'o nij yuvií se vaa qui'yaj Jesucristó a. <sup>36</sup>Gaa ne cataj xna'anj nij síi quene'en rihaan nij yuvií daj qui'yaj Jesucristó ne nahuun sa' síi nuu nana chree nimán a.

<sup>37</sup>Che'é dan cuchu'vi' ndo'o nij síi man chuman' Gadara, ne che'é dan cachín ni'yaj taran' nij so' rihaan Jesucristó se vaa ca'anj yanj Jesucristó rihaan nij so' a. Gaa ne dan me se catúj Jesucristó rque rihoo, ne canicaj so' ca'anj so' a.

<sup>38</sup>Gaa ne dan me se cachín ni'yaj síi nahuun sa' rihaan Jesucristó se vaa ca'vej rá Jesucristó ca'anj so' ga Jesucristó, tzaj ne ne ca'vej rá Jesucristó ma'.

<sup>39</sup>—Canicaj so' nán' so' tucua' so', ne cataj xna'anj so' rihaan tuví' so' che'é se sa' ndo'o qui'yaj Diose che'é so' á —taj Jesucristó rihaan so' a.

Gaa ne canicaj síi nahuun sa' yo' quinan' so', ne ca'mii natáj so' rihaan taran' nij yuvií yanj chuman' yo' che'é se sa' qui'yaj Jesucristó rihaan so' a.

**Nana nihánj taj xna'anj che'é chala cunii do', che'é chana chij do', nahuun sa', qui'yaj Jesucristó a**

<sup>40</sup>Nanicaj Jesucristó, namán uún so' tu'va na lacuaná a. Gaa ne man ndo'o yuvií na'vij man so', ne guun niha' rá nij yuvií se vaa namán uún



so' a. <sup>41</sup>Gaa ne dan me se ca'na' 'o so' rihaan Jesucristó, ne Jairo cu'naj so', ne so' me síi 'nij ra'a 'o ve' tucu'yón nij yuvii israelitá se-tucuanj Moisés, ne dan me se canicun' ruj so' rihaan Jesucristó, ne cachíin ni'yaj so' rihaan Jesucristó se vaa ca'anj Jesucristó tucúá so' a. <sup>42</sup>Ne orún' raa ta'nij chana so' chala cunii vaj chujij yo', tzaj ne ran' ndo'o yo', ne daj doj cavi' yo', ne che'é dan guun rá so' ca'anj Jesucristó tucúá so' a.

Veé dan me ca'anj Jesucristó ga so', ne ca'anj ndo'o yuvii ga so', ne ndaa raan ma'an chrej vaj yuvii ga so' a.

<sup>43</sup>Dan me se sca'núj nij so' vaj 'o chana ran' ndo'o, ne quisij chujij ya yo' xra' ton man no', ne cutun' no' cunudanj sa'anj vaa rihaan no', tzaj ne taj vaj a 'o síi guun nucuj qui'yaj nahuun sa' no' ma'. <sup>44</sup>Dan me se quinichrun' no' rej xco Jesucristó, ne canó ra'a no' doj tu'va sagan' so' a. Dan me se nu' canó ra'a no' tu'va sagan' so', ne nu' canicun' se xra' ton man no' nanj adonj. <sup>45</sup>Gaa ne xná'anj Jesucristó se vaa me síi canó ra'a sagan' so', tzaj ne a 'o nij yuvii ne cano ra'a sagan' so' ma', taj nu' nij yuvii a. Gaa ne cataj Pedró rihaan Jesucristó:

—Maan che'é se raan vaj nij yuvii, ne canó rma'an ra'a 'o so' sagan' so', maestro —taj Pedró rihaan Jesucristó a.

<sup>46</sup>Tzaj ne cataj Jesucristó rihaan so' a:

—Vaa 'o yuvii canó ra'a sagan' 'unj adonj. Ne'enj se vaa nahuun yuvii qui'yáj adonj —taj Jesucristó rihaan so' a.

<sup>47</sup>Gaa ne xcaj chana cuentá se vaa quene'en Jesucristó se vaa qui'yaj no', gaa ne ri'ij man no', ne ca'na' no', ne canicun' ruj no' rihaan so', gaa ne cataj xna'anj no' rihaan nu' nij yuvii se vaa maan se canó ra'a no' sagan' Jesucristó, ne nu' maan orá dan nahuun sa' no' ne canicun' se xra' ton man no', taj no' rihaan cunudanj nij yuvii a.

<sup>48</sup>Gaa ne cataj Jesucristó rihaan no', ne:

—Nahuún so' che'é se amán rá so' ni'yaj so' manj, nocoj. Ve'é ca'anj so', ne dínj gaa nimán so' ca'anj so' á —taj Jesucristó rihaan no' a.

<sup>49</sup>Ataa navij ca'mii Jesucristó, ne ca'na' 'o síi cavi tucúá Jairo, ne cataj so' rihaan Jairo a:

—Aj cavi' ta'nii so', ne taj che'é caraa chrúú so' rihaan maestró a ma' —taj síi 'na' cataj xna'anj rihaan Jairo a.

<sup>50</sup>Dan me se cuno Jesucristó nana ca'mii síi ca'na', gaa ne cataj so' rihaan síi cu'naj Jairo a:

—Se cuchu'ví so' ma'. Maan se cuchuman ya rá so' ni'yaj so' manj, ne quinahuun ta'nii so' nanj adonj —taj Jesucristó rihaan so' a.

<sup>51</sup>Dan me se cuchi' Jesucristó tucúá Jairo, ne ne ca'vej Jesucristó catuu nij yuvii rá ve' ga so', ne maan Pedró do', Juan do', Jacobo do', roj nica Jairo do', ca'vej so' catuu rá ve' ga so' a. <sup>52</sup>Dan me se ta'vee ndo'o nij síi cunuu chre' rá ve' che'é chala cunii cavi', ne nanó uxrá rá nij so', ne go' nij so' cuxru' rucuaa nij so' a. Tzaj ne cataj Jesucristó rihaan nij so': —Se ta'vee soj ma'. 'O se ne cavi' no' ma'. Maan se otoj uun no' nanj á —taj Jesucristó rihaan nij so' a.

<sup>53</sup>Gaa ne ca'nga' nacoo nij so' ni'yaj nij so' man Jesucristó che'é se aj quene'en nij so' se vaa aj cavi' ya no' a. <sup>54</sup>Tzaj ne catúj Jesucristó rá cuartó naj no', ne quita'aa so' ra'a no', ne nacúun so' man no', cataj so':

—Naxagaa so', chala cunii —taj so' rihaan no' a.

<sup>55</sup>Ne cunuu i'na' uún no', gaa ne nu' naxagaa no', ne nu' ca'ne' Jesucristó suun rihaan roj nica Jairo se vaa go' roj so' doj se chá chá chala cunii, taj Jesucristó rihaan roj nica Jairo a.

<sup>56</sup>Dan me se ca'anj rá roj so' se vaa qui'yaj Jesucristó, gaa ne cataj Jesucristó rihaan roj so' a:

—A' ó yuvii se cataj xna'anj roj so' rihaan daj qui'yáj che'é chala cunii ma' —taj Jesucristó rihaan roj nica roj so' a.

Nana nihánj taj xna'anj se vaa ca'néé Jesucristó man chuvij nij sí tucu'yón se-nana so' ca'anj ca'mii natáj nij so' a

**9** Dan me se canacúun Jesucristó man chuvij nij sí tucu'yón se-nana so', ne cunuu chre' nij so', ne go' so' se nucuaj man nij so', gaa ne ca'vee qui'yaj canaán nij so' rihaan me ma'an nana chree do', ca'vee ca'nee nij so' chi'ii xráá sí ran' do' a. <sup>2</sup>Gaa ne ca'néé so' man nij so' ca'anj ca'mii natáj nij so' che'é güii guun chij Diose rihaan chumii nihánj, ne ca'nee nij so' chi'ii xráá nij sí ran' do' a. <sup>3</sup>Ne cataj so' rihaan nij so' a:

—A' ó rasuun se nicaj soj ca'anj soj ma'. Chruun garroté do', nanj do', se chá do', sa'anj do', se nicaj

soj ma'. Orún' niquee yatzij nuu soj ca'anj ga soj á. <sup>4</sup>Ne me ma'an ve' cuchi' soj ne ca'vej 'o so' cane soj ro', ne veé ve' yo' yo'o cane soj ne veé ve' yo' cavi' soj ca'anj soj ca'mii natáj soj se-nana Diose á. <sup>5</sup>Ne me ma'an 'o chuman' se ca'vej rá nij sí chihanj cunó nij so' se-nana soj, tanáj soj chuman' yo', ne cavi' soj tu'va chuman' yo', ne nacunan' soj tacóo soj cayuu yo'óo tachruu man chuman' yo' tacóo soj á. Ndaa dan, gaa ne xcaj nij sí chihanj yo' cuentá se vaa tumé nij so' cacun' se vaa ne ca'vej rá nij so' cunó nij so' se-nana soj man adonj —taj Jesucristó rihaan chuvij nij so' a.

<sup>6</sup>Gaa ne dan me se ca'anj nij so' nij chuman', ne ca'mii natáj nij so' se-nana Diose nana sa', ne me rej ma'an vaj nij so' ca'néj nij so' chi'ii xráá nij sí ran' a.

Nana nihánj taj xna'anj se vaa xcaj sí nicaj suun cu'naj Herodes cuentá che'é Jesucristó a

<sup>7</sup>Dan me se cuno sí nicaj suun cu'naj Herodes nu' se vaa qui'yaj Jesucristó, gaa ne guun rá Herodes quene'en so' me sí me Jesucristó a. 'O se ta'aj yuvii cataj se vaa cunuu i'na' uún Juan sí cuta' ne man yuvii, <sup>8</sup>ne yo'ó ta'aj yuvii cataj se vaa curuvi' uún sí cu'naj Elías sí cayáan gaa naá, ne yo'ó ta'aj uún yuvii cataj se vaa cunuu i'na' uún 'o sí nata' se-nana Diose gaa naá a. <sup>9</sup>Tzaj ne ma'an sí cu'naj Herodes cataj, ne:

—Aj cavi' Juan, ne x'ne' chihá Juan, qui'yáj a. Tzaj ne ne ne'enj me yuvii me sí nihánj, ne tu'va nii danj che'é so' rihanj ma' —taj Herodes a.

Gaa ne guun uxrá rá Herodes quene'en so' man Jesucristó a.

**Nana nihánj taj xna'anj se vaa ca'vee quirii Jesucristó se chá 'un' mǐj snó'o a**

<sup>10</sup>Dan me se namán chuvij nij sí tucu'yón se-nana Jesucristó rihaan Jesucristó, ne nata' nij so' rihaan Jesucristó che'é nǔ' nij suun sa' nocoo qui'yaj suun nij so' rej ca'anj nij so' a. Gaa ne nicaj Jesucristó man taran' nij so', ca'anj nij so' ndaa tu'va chuman' cu'naj Betsaida rej yanǐj a. <sup>11</sup>Tzaj ne quene'en 'o x'ne' nocoo yuvii rej ca'anj Jesucristó, gaa ne canoco' nij so' man Jesucristó, ca'anj nij so' a. Gaa ne ve'é ca'mii Jesucristó ga x'ne' nocoo yuvii canoco' man so', ne ca'mii natáj so' che'é güii guun hij Diose rihaan chumii nihánj, ne quinahuun nij sí ran', qui'yaj so' do' a. <sup>12</sup>Dan me se nichrun' cata' güii, ne dan me se quinichrun' chuvij nij sí tucu'yón se-nana Jesucristó rihaan so', ne cataj nij so':

—Qui'yáá so' se ndo'o, ne na'nej so' chrej man nij yuvii, ca'anj nij so' rej chuman' nocoo chuman' ra'a do', gaa ne man ve' caran' nij so' do', man se chá quiri' nij so' cha nij so' do' a. Tzaj ne rej man ní' nihánj me se rco' quij me nihánj, ne taj rej caran' nij so', taj se chá cha nij so' do', nihánj ma' —taj nij so' rihaan Jesucristó a.

<sup>13</sup>Tzaj ne cataj Jesucristó rihaan nij so' a:

—Go' ma'an soj se chá cha nij yuvii ei —taj Jesucristó rihaan nij so' a.

—Tzaj ne taj se chá rihaan núj ma'. Maan se orún' 'un' rachrúun ne

vij guee xcuaj ne, vaa rihaan núj nanj á. Tzaj ne ca'vee ca'anj núj, ne quiraan núj se chá cha cunudanj nij yuvii nihánj nanj á —taj nij so' rihaan Jesucristó a.

<sup>14</sup>Dan me se 'un' mǐj snó'o mán rej yo' ta' asuun, ne ino me chana ga xnii adonj. Tzaj ne cataj Jesucristó rihaan nij sí tucu'yón se-nana so' a: —Cayáan nij yuvii rihaan yo'óó, qui'yaj soj, ne dan me se cunu chre' 'o vij chihaa chi' vij chihaa chi' yuvii cane 'o 'o rej, qui'yaj soj á —taj Jesucristó rihaan nij so' a.

<sup>15</sup>Ne veé danj qui'yaj nij so', ne ca'anj cane cunudanj nij yuvii a.

<sup>16</sup>Gaa ne dan me se quita'aa Jesucristó 'un' nij rachrúun ga roj xcuaj yo', gaa ne ni'yaj so' rej xta', ne nago' so' graciá rihaan Diose che'é se chá yo', gaa ne cuxra' ta'aj so' rachrúun do', nee xcuaj do', ne caxrǐj so' ston nij sí tucu'yón se-nana so', che'é rej caxrii nij so' ston nij yuvii a. <sup>17</sup>Gaa ne chá taran' nij yuvii, ne caraa rque nij so' ne ndaa quináj ndo'o se chá a. Gaa ne naqui'yaj chre' nij so' nǔ' se quináj tu'va yuvii, ne caraa nij so' yo'ó cunu' chuvij scaa a.

**Nana nihánj taj xna'anj se vaa cataj xna'anj Pedró me sí me Jesucristó a**

<sup>18</sup>Dan me se 'o güii ca'anj Jesucristó 'o rej yanǐj cachín ni'yaj so' rihaan Diose, ne nij sí tucu'yón se-nana so' ro', mán rej yo' ga so', ne xná'anj so' man nij so', cataj so', ne:

—Me sij mé 'unj, taj nij yuvii ga —taj Jesucristó, xná'anj so' man nij so' a.

<sup>19</sup>—Vaa sí taj se vaa sí cu'naj Juan sí cuta' ne man yuvii mé

so' ei. Ne vaa síí taj uún se vaa síí cu'naj Elías síí nata' se-nanā Diose gaa naá me uún so' chuguanj. Ne vaa síí taj uún se vaa yo'ó síí nata' se-nanā Diose gaa naá me uún so' xa'. Danj taj 'o 'o ta'aj nij yuvii nanj á —taj nij so' a.

<sup>20</sup>Gaa ne cataj Jesucristó rihaan nij so':

—Ne ma'an soj, gaa ne me sij mé 'unj, rá soj uún ga —taj Jesucristó, xna'anj so' man nij síí tucu'yón se-nanā so' a.

Gaa ne cataj Pedró:

—Síí ca'néé Diose tñanii man yuvii rihaan sayuun mé so' ei —taj so' rihaan Jesucristó a.

<sup>21</sup>Gaa ne cataj xna'anj Jesucristó rihaan nij so' a:

—Se cataj nij soj nana vaa danj rihaan a 'ó nij yuvii ma' —taj Jesucristó rihaan nij so' a.

**Nanā nihánj taj xna'anj se vaa cataj xna'anj Jesucristó se vaa cavi' so' ne cunuu i'na' uún so' a**

<sup>22</sup>Gaa ne cataj uún Jesucristó rihaan nij síí tucu'yón se-nanā so' a:

—Xa' 'unj sij ca'néé Diose nicaj yu'unj man yuvii, tzaj ne no xcúún 'unj quiran' ndo'o 'unj sayuun qui'yaj nij síí uun chij do', qui'yaj nij xrej ata suun nocoo doj do', qui'yaj nij síí naqui'yaj cuu se-tucuanj Moisés rihaan yuvii do', ne nachri' ndo'o nij so' ni'yaj nij so' mán 'unj, ne ticavi' nii mán 'unj, ne cachén va'nuj güii, gaa ne cunuu i'na' uún 'unj adonj —taj Jesucristó rihaan nij so' a.

<sup>23</sup>Gaa ne dan me se cataj so' rihaan cunudanj nij yuvii a:

—Sese me rá yo'ó so' canoco' so' manj, ne se guun rá so' qui'yaj so' se

vaa me rá ma'an so' qui'yaj so' ma'. Ne ca'vee se quiran' uxrá so' sayuun do', ca'vee se ndaa cachron nii man so' rihaan rcutzé do', tzaj ne daj a 'o 'o güii me se yo'ó qui'yaj suun so' che'ej, ne yo'ó canoco' raan so' manj adonj. <sup>24</sup>Tzaj ne sese vaa 'o síí me rá tñanii man ma'an rihaan sayuun, ne vaa güii yo'ó cavi' nimán so' adonj. Tzaj ne sese cavi' yo'ó so' che'é se me so' síí nocoo' manj, ne vaa güii cunuu i'na' uún so' adonj.

<sup>25</sup>Ne a me se quirí' 'o so' sese qui'yaj canaán so' nu' rasuun man rihaan chumii nihánj, ne ca'anj ni'ya nimán ma'an so', rá soj ga. Daj chihaa mǐj se ca'vee cavi' sa' so', qui'yaj rasuun man rihaan chumii nihánj a ma'.

<sup>26</sup>Dan me se xa' síí uun na'aj ni'yaj manj ne uun na'aj ni'yaj se-nanaj, tzaj ne vaa güii guun na'aj 'unj sij ca'néé Diose nicaj yu'unj man yuvii ni'yaj 'unj man so' asa' ca'na' uún 'unj rihaan chumii nihánj adonj.

Ne güii yo' me se ve'é ndo'o guun chij 'unj, qui'yaj Réj Diose, ne cavi' sa' 'unj, qui'yaj se-mozó Diose nij síí guee adonj. <sup>27</sup>Nihánj me se cataj yá 'unj rihaan soj se vaa xa' ta'aj soj sij nicun' nihánj cuano me se gaa ataa a cavi' ta'aj soj, ne ya quene'en ta'aj soj asa' guun che'e Diose guun chij Diose rihaan chumii nihánj nanj adonj —taj Jesucristó rihaan cunudanj nij so' a.

**Nanā nihánj taj xna'anj se vaa chuguun ndo'o man Jesucristó ni'yaj nij síí tucu'yón se-nanā so' a**

<sup>28</sup>Quisíj ca'mii Jesucristó nanā vaa danj, gaa ne cachén 'o tunj güii ta' asuun, gaa ne nicaj Jesucristó man Pedró ga Juan ga Jacobo, ne

cavii so' raa 'o quij xcaan, ca'anj cachin̄j ni'yaj so' rihaan Diose a. <sup>29</sup>Gaa cachín ni'yaj so' rihaan Diose, ne yo'o cunuu ino rihaan so', ne yuun che'e cunuu catzīj sagan' so', ne ndaa raan lá ma'an sagan' so' a. <sup>30</sup>Gaa ne dan me se naqui'yaa vij snó'o rihaan nij so', ne nanó roj so' cuentó ga Jesucristó, ne Moisés do', Elías síi nata' se-nana Diose gaa naá do', me roj so' a.

<sup>31</sup>Dan me se ve'é ndo'o curuvi' roj so', ne ca'mii roj so' ga Jesucristó che'é se vaa quiran' Jesucristó chuman' Jerusalén, ne cavii so' chumii nihánj, ndaa vaa guun rá Diose qui'yaj so' a. <sup>32</sup>Dan me se ca'na' ndo'o nej rihaan nij tuvi' Pedró, tzaj ne ne cotoj nij so' ma'. Quene'en nij so' ndaa vaa chuguun sagan' Jesucristó do', ndaa vaa chuguun sagan' roj síi nicun' ga so' do' a. <sup>33</sup>Gaa ne dan me se guun che'e roj síi nicun' ga Jesucristó ca'anj yanij roj so' ga Jesucristó, gaa ne cataj Pedró rihaan Jesucristó:

—Cunaj uxrá vaa mán núj nihánj ga so', maestro. Ne qui'yaj núj va'núj ve' yacataj cane soj nanj á. 'O ve' cané so', ne yo'ó ve' cané síi cu'naj Moisés, ne yo'ó ve' cané síi cu'naj Elías ei —taj Pedró rihaan Jesucristó, tzaj ne ne quene'en uxrá so' daj me che'é ca'mii so' rihaan Jesucristó danj a ma'.

<sup>34</sup>Quisij ca'mii so' nana vaa danj, gaa ne ca'na' 'o ngaa rej xta', ne caráán ngaa xráá nij so' ne naxij nij so' rque ngaa, ne chuchuvi' va'núj nij síi tucu'yón se-nana Jesucristó yo' a. <sup>35</sup>Gaa ne Diose ro', ca'mii nana cuno nij so' rque ngaa yo' a. Ne cataj Diose:

—Síi nihánj me ta'nij síi 'ee raj adonj. Cuno soj rihaan so' ei —taj Diose cuno nij so' a.

<sup>36</sup>Quisij ca'mii Diose, gaa ne taj orún' Jesucristó nicun', quene'en nij so' a. Tzaj ne yo'ó caráán tu'va nij so' se vaa quene'en nij so', ne güii guun danj me se a 'o yuvii ne cataj xna'anj nij so' rihaan a.

**Nana nihánj taj xna'anj se vaa nahuun sa' 'o xnii nuu nana chree nimán, qui'yaj Jesucristó a**

<sup>37</sup>Dan me se cachén 'o yan', ne quisij güii, gaa ne ca'anj Jesucristó ga nij síi tucu'yón se-nana so' rej rque a. Gaa ne nari' tuvi' nij so' ga 'o x'ne' nocoo yuvii a.

<sup>38</sup>Gaa ne dan me se nucuaj ndo'o ca'mii yo'ó síi 'na' sca'núj nij yuvii rihaan Jesucristó, ne cataj so':

—Achíin ni'yaj rihaan so' se vaa cunuú 'ee rá so' ni'yaj so' ta'nij che'é se orún' raa so' me ta'nij, maestro —taj so' rihaan Jesucristó, ne— <sup>39</sup>Dan me se naruvi' nana chree nimán ta'nij, ne taj ni'yón snúú so', ne aguáj so', ne avii yatan' tu'va so', 'yaj nana chree yo', ne 'yaj chi'ii ndo'o nana chree yo' man ta'nij, ne sayuun uxrá curihanj nana chree yo' nimán ta'nij adonj. <sup>40</sup>Ne dan me se cachín ni'yaj rihaan nij síi tucu'yón se-nana so' se vaa quirii nij so' nana chree nimán ta'nij, tzaj ne ne ca'vee quirii nij so' nana chree nimán ta'nij ma'. —Danj cataj snó'o yo' rihaan Jesucristó a.

<sup>41</sup>Gaa ne cataj Jesucristó a:

—Dan me se síi ne amán rá me soj sij man rihaan chumii nihánj cuano, ne chi'ii vaa nimán soj, ne a me daj cachej ga soj, ne a me daj gaa naj

nimanj ni'yaj 'unj man soj, gaa ne ca'vee qui'yaj canaán soj ga. Ničaj so' man xnii ca'na' so' rihanj cuaj á —taj Jesucristó a.

<sup>42</sup>Dan me se gaa 'na' xnii, ne nu' snúu xnii, ne naxru' xnii, qui'yaj nana chree yo', tzaj ne ca'ne' Jesucristó suun rihaan nana chree se vaa curihanj so' nimán xnii, ne dan me se curihanj nana chree yo' nimán xnii, ne nahuun sa' xnii, qui'yaj Jesucristó, ne nago' Jesucristó man xnii rihaan rej xnii a. <sup>43</sup>Gaa ne quene'en nij yuvi se vaa nucuaj ndo'o Diose síf qui'yaj suun sa' nocoo yo', ne caráya'anj nu' nij so' a.

**Nana nihánj taj xna'anj se vaa cataj xna'anj uún Jesucristó se vaa vaa güii cavi' so' a**

Dan me se caráya'anj cunudanj yuvi se vaa qui'yaj Jesucristó a. Gaa ne cataj Jesucristó rihaan nij síf tucu'yón se-nana so' a:

<sup>44</sup>—A 'ó xco' se quini'yón soj nana nihánj nana cataj xna'anj 'unj rihaan soj cuano ma'. Dan me se 'unj sij ca'neé Diose ničaj yu'unj man yuvi me se vaa güii nago' nii mán 'unj rihaan yuvi adonj —taj Jesucristó rihaan nij síf tucu'yón se-nana so' a.

<sup>45</sup>Tzaj ne ne cunó nij so' nana ca'mii Jesucristó, ne ne ca'vej rá Diose xcaj nij so' cuentá ma'. Ne cuchu'vi' nij so' xna'anj nij so' man Jesucristó che'é nana yo' a.

**Nana nihánj taj xna'anj me síf me síf guun chij doj a**

<sup>46</sup>Dan me se guun che'e nij síf tucu'yón se-nana Jesucristó ca'mii

cunu' nij so' me nij so' guun chij doj a. <sup>47</sup>Tzaj ne xcaj Jesucristó cuentá daj vaa nimán nij so', ne che'é dan quita'aa so' ra'a 'o ne'ej, ne nicaj so' cachrón so' x'núu so', <sup>48</sup>gaa ne cataj Jesucristó rihaan nij so' a:

—Me ma'an 'o síf aráj cochroj ne a'mii sa' so' ga 'o ne'ej nihánj che'ej, ne adi' ma'anj me aráj cochroj ne a'mii sa' so' ga vaa nanj adonj. Dan me se síf a'mii sa' ga 'unj me se nuveé orún' 'unj me a'mii sa' so' ga ma'. Maan Diose ya síf ca'neé mán 'unj me aráj cochroj ya so' ne a'mii sa' ya so' ga vaa nanj adonj. 'O se síf nica' doj rihaan taran' soj ro', me síf sa' doj rihaan taran' soj a —taj Jesucristó rihaan nij síf tucu'yón se-nana so' a.

**Nana nihánj taj xna'anj se vaa cataj xna'anj Jesucristó se vaa me ma'an síf ne unu' ga so' me tuvi' so' a**

<sup>49</sup>Gaa ne cataj síf cu'naj Juan rihaan Jesucristó a:

—Quene'en núj man 'o síf ata' tu'va se-chuvií so', ne urihanj nana chree nimán yuvi, 'yaj so', nanj maestro. Tzaj ne caráan núj chrej ca'mii so' ne se qui'yaj so' danj, che'é se nuveé sij chéé ga ní me so', taj núj, nanj maestro —taj Juan rihaan Jesucristó a.

<sup>50</sup>Tzaj ne cataj Jesucristó rihaan so' a:

—Ca'ne' sa' guee rá soj qui'yaj ma'an so' danj ei. 'O se xa' síf ne unu' ga soj, tzaj ne tuvi' soj me so' adonj —taj Jesucristó rihaan Juan do', rihaan yo'ó nij síf tucu'yón se-nana so' do' a.

Nana nihánj taj xna'anj se vaa cataj xna'anj Jesucristó rihaan síí cu'naj Jacobo do', rihaan síí cu'naj Juan do', se vaa nij ca'mii roj so' a

<sup>51</sup>Dan me se gaa nichrun' güii quinan' Jesucristó xtá', gaa ne yo'lo ca'née nucuaj nimán so' ca'anj so' chuman' Jerusalén a. <sup>52</sup>Dan me se ca'ne' so' suun rihaan doj síí chée ga so' quitaj yaan nij so' nano' nij so' ve' caran' nij tuvi' nij so', gaa ne ca'anj nij síí ca'anj suun, ne cuchí' nij so' 'o chuman' yanj nij síí samaritano a. <sup>53</sup>Tzaj ne quira'aan nij síí samaritano ve' tucua' nij so' rihaan Jesucristó, che'é se guun rá so' ca'anj so' chuman' Jerusalén a.

<sup>54</sup>Dan me se gaa quene'en roj síí tucu'yón se-nana Jesucristó roj síí cu'naj Jacobo ga Juan, se vaa quira'aan nij síí samaritano ve', gaa ne xná'anj roj so' man Jesucristó, cataj roj so':

—Me rá so' cachin' ni'yaj núj rihaan Diose, ne ca'nej Diose ya'an, ne cacaa nij síí samaritano na' —taj roj so', xná'anj roj so' man Jesucristó a.

<sup>55</sup>Tzaj ne ni'yaj Jesucristó man roj so', ne caxrj yuvaa Jesucristó man roj so', ne cataj Jesucristó a:

—Ne ne'en soj daj sij me soj ne guun danj rá soj a. Xa' 'unj, tzaj ne ne ca'na' 'unj tjaví' 'unj man yuvi' ma'. Che'é yan tinanii 'unj man yuvi' rihaan sayuun ca'ná' 'unj adonj —taj Jesucristó rihaan roj so' a.

<sup>56</sup>Gaa ne ca'anj nij tuvi' Jesucristó yo'ó chuman' caran' nij so' a.

Nana nihánj taj xna'anj daj ca'mii Jesucristó rihaan va'nuj síí tihaj guun rá canoco' man so' a

<sup>57</sup>Gaa vaj nij so' chrej, gaa ne ca'na' 'o so', ca'mii so' ga Jesucristó a:

—Canocó' 'unj mán so' daj rej ma'an vaj so' ei —taj so' rihaan Jesucristó a.

<sup>58</sup>Gaa ne cataj ya Jesucristó se vaa ran' so' chée so' a:

—'O se nij chunee ro', otoj sa' nij xo' rá yu'uj taj rque yo'óo, ne nij xtáj chée xtá' ro', vaa saca' nij xo' a. Ne xa' 'unj sij ca'née Diose nicaj yu'unj man yuvi, tzaj ne taj a doj rej quinaá 'unj cotoj 'unj a ma' —taj Jesucristó rihaan so' a.

<sup>59</sup>Ne dan me se cataj Jesucristó rihaan yo'ó so' a:

—Canocó' so' manj ca'anj ní' á —taj Jesucristó rihaan so' a.

—Ca'vej so' nanj tucuaj, ne ndaa cavi' réj, gaa ne cachin' 'unj man réj, gaa ne canocó' 'unj mán so' ei —taj so' rihaan Jesucristó a.

<sup>60</sup>Tzaj ne cataj Jesucristó rihaan so' a:

—Ca'ne' rá so' cachin' ma'an nij síí cavi' nimán man tuvi' so' xngá á. Ne ca'anj so', ca'mii natáj so' che'é güii guun chij Diose rihaan chumii nihánj ei —taj Jesucristó rihaan so' a.

<sup>61</sup>Ne dan me se cataj yo'ó so' uún rihaan Jesucristó a:

—Me raj canocoj mán so', Señor. Tzaj ne asino ca'vej so' ca'anj cataj xna'anj 'unj rihaan nij tuvij, gaa ne ca'naj, ne ca'anj ní' ei —taj so' rihaan Jesucristó a.

<sup>62</sup>Tzaj ne cataj Jesucristó rihaan so' a:

—Síf oro' nee ni'yaj rej xco ro', daj chihaa mǐj se cavii nica tucuáán qui'yaj so' ma'. Ne síf me rá canoco' manj me se se guun canicaj uún so' rej xco so' ma'. Ne sese danj qui'yaj so', ne daj chihaa mǐj se ca'vee guun hij Diose nimán so' ma'. Ne ase vaa síf oro' nee rii tucuáán ro', vaa síf me rá canoco' manj adonj — taj Jesucristó rihaan so' a.

Nana nihánj taj xna'anj se vaa ca'née Jesucristó man va'núj chihaa chí' síf tucu'yón se-nana so' ca'anj ca'mii natáj nij so' a

**10** Cachén doj, gaa ne narii Jesucristó man ya'núj chihaa chí' snó'o, ne ca'née so' man vij vij nij so' quitaj yaan nij so' rihaan Jesucristó ca'anj nij so' daj a chuman' cachén Jesucristó, <sup>2</sup>ne cataj Jesucristó rihaan nij so' a:

—Ya uxrá, ne vaa ndo'o suun rihaan ní', ne nij síf 'yaj suun me se doj nij so' nanj adonj. Ne cachinj ni'yaj ní' doj nij síf qui'yaj suun rihaan Diose síf uun chij 'nij ra'a suun, gaa ne ca'nej so' doj yuvii qui'yaj suun se-suun so' adonj. <sup>3</sup>Dan me se ca'anj ca'mii natáj soj rihaan nij yuvii, tzaj ne xcaj soj cuentá se vaa ca'na' sayuun rihaan soj ei. 'O se ase vaa matzinj vaj rej man xca'yanj ca'nu' ro', danj gaa soj chuguanj. <sup>4</sup>Se nicaj soj vitó nuu sa'anj se nicaj soj nanj se nicaj soj yo'ó tacoj canj se nicaj soj ca'anj soj ma'. 'O rej ca'anj soj, ne 'o rej canicaj soj, ne se canicun' soj nano soj cuentó ga yuvii ma'.

<sup>5</sup>Asa' catúj soj rá 'o ve', ne asino cataj soj rihaan nij síf yanj rá ve'

yo' se vaa dínj gaa cuman nij so', qui'yaj Diose a. <sup>6</sup>Ne sese yanj 'o síf cayáán sa' ga Diose rá ve' yo', gaa ne ya ve'é cayáán so', qui'yaj Diose a. Tzaj ne sese nuvi' síf cayáán sa' ga Diose yáán rá ve' yo', ne canicaj uún nana sa' ca'mii soj rihaan ma'an soj, qui'yaj Diose, tzaj ne se cavii sa' nij síf tucua yo' a ma'. <sup>7</sup>Caran' soj ve' yanj síf sa' yo', ne me ma'an se rque síf yanj yo', ne cha soj co'oj soj do', ne no xcuún yuvii rque yuvii chraa cha soj che'é suun sa' 'yaj suun soj a. Se ca'anj soj caran' soj yo'ó yo'ó ve' ma'. <sup>8</sup>Asa' cuchí' soj 'o chuman', ne sese ve'é ca'mii nij síf man chuman' yo' ga soj, gaa ne cha soj me ma'an se chá rque nij so' man nij soj a. <sup>9</sup>Ca'nee soj chí'ii xráá nij síf ran' man chuman' yo', ne ca'mii natáj soj rihaan yuvii se vaa nichrun' guun hij Diose chiháán nij so' a.

<sup>10</sup>”Tzaj ne asa' cuchí' soj 'o chuman', ne sese ne ca'vej rá nij yuvii cunó nij yuvii se-nana soj, gaa ne canicun' soj tanuu rá callé chuman', gaa ne cataj soj rihaan nij yuvii man chuman' yo' a: <sup>11</sup>“Asa' curihanj núj chuman' nihánj, ne nacunan' núj tacóó núj, ne tucua yuu núj yo'óó tachruu avii chiháán soj tacóó núj cayuu yo' rihaan ma'an soj a. Gaa ne xcaj soj cuentá se vaa guun rá Diose guun hij Diose chiháán soj, tzaj ne ne ca'vej rá soj a”. Danj cataj soj rihaan nij síf na'vej rá cunó nana ca'mii soj a. <sup>12</sup>Ne cataj xna'anj 'unj rihaan soj cuano se vaa vaa güii ca'ne' 'unj cacun' che'é nij yuvii, gaa ne quiran' nij yuvii man chuman' yo' doj sayuun rihaan nij síf chí'ii



man chuman' Sodoma adonj —taj Jesucristó rihaan nij sí ca'néé so' a.

**Nana nihánj taj xna'anj se vaa cataj xna'anj Jesucristó che'é sayuun quirán' yuvií man va'núj chuman' yuvií ne ca'vej rá cunō se-nānā so' a**

<sup>13</sup>Gaa ne dan me se cataj uún Jesucristó a:

—Niquē soj sij man chuman' Corazín a. Niquē soj sij man chuman' Betsaida a. 'O se quirán' uxrá soj sayuun nanj á. Dan me se nij sí man chuman' Tiro do', me sí man chuman' Sidón do', me sí chi'ii nimán nanj á. Tzaj ne sese ca'anj 'unj chiháán nij so', ne sese qui'yáj suun sa' nocoo ni'yaj nij so', ne cuno nij so' se-nanaj ne guun ya rá nij so' se vaa tumé nij so' cacun', ne canicaj nimán nij so', ne quinano ndo'o rá nij so' che'é cacun' tumé nij so', ne ndaa yatzij ya' cunuú nij so', ne ndaa yaj chruun acaa ruvaj caraa nij so' raa nij so', che'é yan quinano rá nij so' che'é cacun' tumé nij so' asuun saj adonj. Nihánj, ne ne ca'anj 'unj ma'. Maan se inanj chiháán soj 'naj, ne qui'yáj suun sa' nocoo quene'en ma'an soj, tzaj ne ne canicaj nimán nij soj a ma'.

<sup>14</sup>Dan me se güii ca'ne' 'unj cacun' che'é nij yuvií ro', doj a gaa sayuun quirán' soj rihaan sayuun quirán' nij sí chi'ii man chuman' Tiro do', man chuman' Sidón do' adonj. <sup>15</sup>Ne vaa soj sij man chuman' Capernaum uún a. Ne sí sa' inanj me ma'an soj, rá soj na'. Nuveé sij sa' me soj ma'. Sí ca'anj rihaan ya'an guun soj adonj —taj Jesucristó a.

<sup>16</sup>Ne cataj uún Jesucristó rihaan nij sí tucu'yón se-nānā so' a:

—Sí nanó xrej se-nānā soj ro', so' me sí nanó xrej se-nānā ma'anj a. Tzaj ne sí uun nacoo rá ni'yaj man soj ro', so' me sí uun nacoo rá ni'yaj man ndaa ma'anj a. Ne sí uun nacoo rá ni'yaj man ma'anj ro', so' me sí uun nacoo rá ni'yaj man Diosé sí ca'néé manj adonj —taj Jesucristó rihaan nij sí tucu'yón se-nānā so' a.

**Nana nihánj taj xna'anj se vaa namán va'núj chihāa chi' nij sí ca'néé Jesucristó a**

<sup>17</sup>Quisij qui'yaj va'núj chihāa chi' nij so' ndaa vaa cataj Jesucristó, gaa ne namán uún nij so' a. Niha' rá nij so', ne cataj nij so' rihaan Jesucristó a:

—Ndaa nij nana chree uno rihaan núj, Señor. Che'é se se-chuvií so' táa tu'va núj, ne urihanj nij so' nimán yuvií nanj á —taj nij so' rihaan Jesucristó a.

<sup>18</sup>Ne cataj Jesucristó rihaan nij so' a:

—Ne'en yaj cayuu se nucuaj nicaj Satanás, ne ase uun raan ro', me cayuu se nucuaj nicaj Satanás adonj.

<sup>19</sup>Cunō soj ca'mij á. 'Unj ro', me sí qui'yaj guun nucuaj soj qui'yaj canaán soj rihaan daj a se chi'ii a. Ca'vee se ru'maan che'é soj 'o xcuáá do', 'o xcuun do', tzaj ne taj se qui'yaj xo' man soj ma'. Qui'yaj canaán soj rihaan nu' se nucuaj nicaj Satanás sí taj ri'yunj ni'yaj man ní', ne a 'ó xco' se qui'yaj chi'ii a 'ó rasuun man soj ma'. <sup>20</sup>Tzaj ne taj che'é guun niha' rá soj che'é se uno nij nana chree rihaan soj ma'. Guun niha' rá soj, tzaj ne che'é se aj cacrón Diosé se-chuvií soj rej xta'

ro', che'é dan guun niha' rá soj á —taj Jesucristó rihaan va'núj chihaa chi' nij so' a.

**Nana nihánj taj xna'anj se  
vaa guun niha' rá Jesucristó,  
qui'yaj Nimán Diose a**

<sup>21</sup>Maan güii yo' ro', guun niha' rá Jesucristó, qui'yaj Nimán Diose, ne cataj Jesucristó rihaan Diose a:

—Sís 'nij ra'a chumií do', sís 'nij ra'a xtá' do', mé so', Ataj Chij. Ne sa' uxrá qui'yáa so' caráan so' rihaan nij sís avii raá do', rihaan nij sís acaj cuentá do', se vaa se cuno nij so' se-nanaj ma'. Maan nij sís vaa nica' nimán ro', ve'é cuno nij so', qui'yáa so' a. Danj inanj qui'yáa so', che'é yan danj me rá so' qui'yáa so', Ataj —taj Jesucristó rihaan Rej so' Diose a.

<sup>22</sup>Canicaj Jesucristó, ca'mii so' rihaan nij yuvií, cataj so' a:

—Aj rqué Réé 'unj Diose cunudanj rasuun rihanj á. Ne a 'ó sís ne ne'en daj vaa 'unj, maan se orún' Réj ne'en a. 'O se ta'níi so' mej adonj. Ne a 'ó sís ne ne'en daj vaa Réj ma'. Maan se orún' 'unj ne'en daj vaa so' adonj. Ne sese me rá 'unj cataj xna'anj 'unj rihaan yo'ó nij yuvií daj vaa Réj, ne quene'en yo'ó nij so' uún adonj —taj Jesucristó rihaan nij yuvií a.

<sup>23</sup>Gaa ne ni'yaj Jesucristó man nij sís tucu'yón se-nana so', ne cataj so' rihaan inanj ma'an nij so' a:

—Vaa che'é gaa niha' rá soj che'é rihaan soj á. 'O se aj quene'en soj se vaa qui'yáj nanj á. <sup>24</sup>'O se cataj xna'anj 'unj rihaan soj cuano se vaa man ndo'o sís man gaa naá sís nata' se-nana Diose do', sís nicaj suun

rey do', guun rá quene'en se vaa quene'en nij soj, tzaj ne ne quene'en nij so' ma'. Ne guun rá nij so' cuno nij so' se vaa cuno nij soj, tzaj ne ne cuno nij so' a man adonj —taj Jesucristó rihaan nij sís tucu'yón se-nana so' a.

**Nana nihánj me cuentó nanó  
Jesucristó che'é sís samaritano  
racuíj man sís ran' chí'ij a**

<sup>25</sup>Gaa ne dan me se canicun' caya 'o sís naqui'yaj cuu se-tucuanj Moisés rihaan yuvií, ne xná'anj so' 'o nana man Jesucristó, che'é rej guun rá so' quirí' so' rej caraa so' cacun' xráa Jesucristó a.

—Daj qui'yáj, gaa ne ca'vee cayánj ga Diose nu' cavii nu' ca'anj, ga maestro' —taj so' rihaan Jesucristó a.

<sup>26</sup>Gaa ne cataj Jesucristó rihaan so' a:

—Ne'en so' me nana no rihaan yanj no se-tucuanj Moisés na'. Daj taj yanj yo' nayaa so' ga —taj Jesucristó, xná'anj Jesucristó man so' a.

<sup>27</sup>Gaa ne cataj so' rihaan Jesucristó a:

—“Ndaa nimán yá so' guun rá so' ni'yaj so' man Diose sís 'nij ra'a man ní', ne ndaa nu' se nucuaj yá so' caraa cochroj rihaan Diose, ne yo'ó ndaa cúu yave man so' cuchuman rá ni'yaj man Diose nanj adonj.” Ne, “Adi' se 'ee rá so' man ma'an so' ro', danj gaa 'ee rá so' man tuví' so' á”, taj se-tucuanj Moisés adonj —taj sís naqui'yaj cuu se-tucuanj Moisés yo' a.

<sup>28</sup>Gaa ne cataj Jesucristó rihaan so' a:

—Ya uxrá a'mii so' á. Daj quí'yáa so', gaa ne cayáan so' ga Diose nu' cavii nu' ca'anj nanj á —taj Jesucristó rihaan so' a.

<sup>29</sup>Tzaj ne sí sá' inanj me sí tucu'yón se-tucuanj Moisés, rá ma'an so' a. Che'é dan xná'anj so' nana nihánj man Jesucristó a:

—Me sí me tuví' 'unj ga —taj so' a.

<sup>30</sup>Gaa ne canicaj Jesucristó, nanó so' se-cuentó sí samaritano a:

—Dan me se cavii 'o sí israelitá chuman' Jerusalén, ca'anj so' chuman' Jericó a. Vaj so' chrej, gaa ne caráan sí ituu man so' chrej, ne go' uxrá nij sí ituu man so', ne quirii nij sí ituu sagan' so', ne daj doj se cavi' so', gaa ne tanáj nij sí ituu man so' a. <sup>31</sup>Gaa ne dan me se vaj 'o xrej nicun' rihaan ní' sij israelitá chrej yo' a. Quene'en so' man sí quiran' chi'ii naj tu'va chrej, tzaj ne cachén yanj so' ca'anj so' a.

<sup>32</sup>Gaa ne dan me se vaj 'o ta'ní' ta'nij si'nó Leví sí racuj man xrej uún a. Quene'en so' man sí quiran' chi'ii yo', tzaj ne cachén yanj so' ca'anj so' uún a.

<sup>33</sup>Gaa ne dan me se ca'na' 'o sí samaritano uún a. Nuveé sij israelitá me so' ma'. Sij yanj avii rej Samaria me so' a. Quene'en so' man sí quiran' chi'ii yo', gaa ne cunuu 'ee rá so' man sí quiran' chi'ii yo' a. <sup>34</sup>Ca'anj so' quí'yaj cono'ó so' man sí quiran' chi'ii yo', ne cuta' so' rmedió rej quiran' chi'ii, ne ncutáj so' mantá rej quiran' chi'ii yo' a. Gaa ne cuta' sí samaritano yo' man sí quiran' chi'ii yo' xráa daán so' xcuu vaj ga so', ne ca'anj roj so' ve' aran'

yuvii chéé chrej, ne taj ya'anj sí samaritano yo' man sí quiran' chi'ii yo' a. <sup>35</sup>Cachén 'o yan', ne yo'ó güii me se guun rá sí samaritano ca'anj so', ne quirii so' vij sa'anj denario, ne caxrij so' ston sí tucua ve' se vaa taj ya'anj so' man sí ran', gaa ne cataj so' rihaan sí tucua: “Asa' ca'na' uún 'unj, ne naru'vee 'unj me daj ma'an sa'anj me gaa tu'vee so', rá so'”, taj sí samaritano rihaan sí tucua a. —Veé daj sij cuentó nanó Jesucristó rihaan sí naqui'yaj cuu se-tucuanj Moisés yo' a.

<sup>36</sup>Gaa ne xná'anj Jesucristó nana nihánj man sí naqui'yaj cuu se-tucuanj Moisés yo' a:

—Va'nuj nij sí vaj rá chrej yo', gaa ne me so' me tuvi' sí quiran' chi'ii yo', rá so' ga —taj Jesucristó, xná'anj Jesucristó man so' a.

<sup>37</sup>—Sí cunuu 'ee rá man so' ro', me tuvi' so', raj a —taj sí naqui'yaj cuu se-tucuanj Moisés rihaan Jesucristó a.

Ne cataj uún Jesucristó rihaan so' a:

—Ase vaa qui'yaj sí cunuu 'ee rá man sí quiran' chi'ii yo' ro', veé daj qui'yaj guee so', ca'anj so' ei —taj Jesucristó rihaan sí naqui'yaj cuu se-tucuanj Moisés yo' a.

**Nana nihánj taj xna'anj se vaa ca'anj Jesucristó tucua roj chu'vij Marta a**

<sup>38</sup>Dan me se vaj Jesucristó chrej ga nij sí tucu'yón se-nana so', ne cuchi' so' 'o chuman', ne dan me se ca'vej rá 'o chana cu'naj Marta yanj chuman' yo' caran' Jesucristó tucua no', <sup>39</sup>ne yáan chu'vij no' chana cu'naj Mariá ga no', ne dan me se ca'anj cayáan chu'vij no' Mariá

tacóó Jesucristó, ne nanó xrej no' se-nanā so' a. <sup>40</sup>Tzaj ne Marta ro', daj a suun caráya'anj no' a. Dan me se quinichrun' Marta rihaan Jesucristó, ne cataj no' rihaan so' a:

—Me che'é ne rihuun rá so' se vaa dínj ne chu'vij 'unj, ne orún' ma'anj 'yaj chuvij, ga Señor'. Cataj so' rihaan no' se vaa racúij no' manj á —taj Marta rihaan Jesucristó a.

<sup>41</sup>Tzaj ne cataj Jesucristó rihaan no' a:

—Xa' che'é suun man rihaan chumii nihánj, tzaj ne taj che'é caraya'aán so' ndaa vaa 'yáá so', man Marta. Snúú rá so', 'yaj suun vaa rihaan so' á. 'O se taj che'é caraya'anj ní' rasuun man rihaan chumii nihánj ma'. <sup>42</sup>O se doj a vaa suun achiin qui'yaj ní', ne vaa orún' suun sa' ya ya achiin rihaan ní' nanj á. Ne Mariá nihánj, tzaj ne cunaj 'yaj no' se vaa me rá no' cunq no' se-nanaj, ne taj che'é cataj ní' se vaa nij 'yaj no' uno no' se-nanaj ma' —taj Jesucristó rihaan Marta a.

**Nanā nihánj taj xna'anj daj ca'mii ní' gaa achíin ni'yaj ní' rihaan Diose a**

**11** Gaa ne dan me se cachíin ni'yaj Jesucristó rihaan Diose 'o güii, ne gaa quisij cachíin ni'yaj so' rihaan Diose, gaa ne cataj 'o sí tucu'yón se-nanā so' rihaan so' a:

—Tucu'yón so' man núj daj ca'mii núj gaa cachinj ni'yaj núj rihaan Diose, Señor. 'O se xa' sí cu'naj Juan sí cuta' ne man yuvii, tzaj ne tucu'yón so' rihaan nij sí tucu'yón se-nanā so' daj ca'mii nij so' gaa cachinj ni'yaj nij so' rihaan Diose, ne danj inanj qui'yáá so' che'é núj, rá núj a —taj so' rihaan Jesucristó a.

<sup>2</sup>Gaa ne dan me se ca'mii Jesucristó nanā nihánj rihaan nij so' a:

—Nanj cataj soj gaa cachinj ni'yaj soj rihaan Diose á: “Ataj Chij, me rá núj xcáj yuvii cuentá se vaa inanj sa' 'yáá so' a. Ne me rá núj quisij güii guun chij so' rihaan chumii nihánj a. <sup>3</sup>Ne 'o 'o güii me se rque so' nu' rasuun achiin man núj cha núj á. <sup>4</sup>Ne caraa x'naa so' che'é cacun' taj xráá núj á. 'O se ma'an núj me sí aráj x'naa che'é cacun' 'yaj tuvi' núj rihaan núj nanj adonj. Dan me se caráan ra'á so' xráá núj rihaan chrej chi'ii á”. Danj cataj soj gaa cachinj ni'yaj soj rihaan Diose ei —taj Jesucristó rihaan nij sí tucu'yón se-nanā so' a.

**Nanā nihánj taj xna'anj se vaa no xcúún ní' cachinj ni'yaj ní' rihaan Diose che'é rasuun achiin man ní' a**

<sup>5</sup>Gaa ne canicaj Jesucristó, nanó so' 'o se-cuento sí cachíin rasuun rihaan tuvi' rej nii a:

—Dan me se cataj ní', ne cuchí' 'o so' tucúa tuvi' so' yan', ne cataj so' rihaan tuvi' so': “Qui'yáá so' se ndo'o, ne racúij so' va'nuj chraa manj, tinuj. <sup>6</sup>Ca'na' 'o tuvij sí achén chrej, ne caran' so' tucuj, tzaj ne taj vaj chraa rihanj goj cha so' ma'”, cataj so' rihaan tuvi' so' a. <sup>7</sup>Ne daj cataj tuvi' so' rihaan so', rá soj ga. Cataj tuvi' so': “Se narii so' nej rihanj, man tinuj. Aj naqui'yaj raan 'unj ta'yaa, ne aj otoj nij ta'nij núj, ne rmij naxagaj rquej chraa mán so' ei”, cataj tuvi' so' rihaan so', rá soj na'. Daj chihaa mój se ca'mii so' danj ma'. <sup>8</sup>Dan me se cataj xna'anj 'unj rihaan soj cuano se vaa

sí otoj yo' ro', nda' se na'vej rá so' naxagaa so' go' so' chraa man tuvi' so', tzaj ne che'é se ne uun na'aj tuvi' so' achíin achíin so' chraa, ne che'é dan guun rmií xréé sí naj otoj, gaa ne naxagaa so', ne go' so' me ma'an rasuun achiin man sí nicun' ta'yaa yo' adonj.

<sup>9</sup>Ne 'unj nihánj me sí cataj xna'anj rihaan soj se vaa cachin' soj se vaa achiin man soj rihaan Diose, ne so' me sí rque man soj, ne nano' soj rasuun achiin man soj, ne narí' soj rasuun yo', ne ase vaa 'yaj sí tica'mii ta'yaa tucá tuvi' ro', danj qui'yaj soj ga Diose, ne ca'nuu Diose ta'yaa yo', ne rque Diose rasuun achiin man soj adonj. <sup>10</sup>O se sí achíin rasuun rihaan Diose ro', quirí' so' rasuun achiin man so', ne sí nano' rasuun achiin man ro', quirí' so' rasuun yo', ne sí tica'mii ta'yaa rej yanj Diose ro', ca'nuu Diose ta'yaa, ne quirí' sí tica'mii ta'yaa rasuun achiin man so' adonj. <sup>11</sup>Xcaj soj cuentá se vaa ma'an soj, nanj yuvií me soj, tzaj ne sese achíin ta'níí yo'q tuvi' soj chraa cha yo' man soj, ne se ca'vee nano' soj yahij ne caxrií soj ston yo' ma'. Ne sese achíin ta'níí soj ne xcuaj cha yo' man soj, ne se ca'vee nano' soj xcuáa ne caxrií soj ston yo' ma'. <sup>12</sup>Ne sese achíin ta'níí soj xruú chuchee cha yo' man soj, ne se ca'vee nano' soj xcuun ne caxrií soj ston yo' ma'. <sup>13</sup>Dan me se danj nanj soj, ne sí chi'ii nimán me soj, tzaj ne ne'en soj rque soj se sa' cha ta'níí soj ei. Che'é dan táa a Rej soj sí nicun' xta', ne sij sa' inanj me so', ne so' me sí rque ya Nimán man nij sí achíin Nimán Diose rihaan so'

nanj adonj. —Danj cataj Jesucristó rihaan nij sí tucuyón se-nana so' a.

**Nana nihánj taj xna'anj se vaa cuta' nij sí fariseo cacun' rmií' xráá Jesucristó se vaa ca'mii Jesucristó ga sí chree a**

<sup>14</sup>Dan me se 'o güii quirii Jesucristó yo'q nana chree nimán 'o sí ya'mii, ne dan me se ya'mii so', qui'yaj nana chree yo', tzaj ne curihanj nana chree nimán so', ne guun che'e so' ca'mii so' adonj. Ne caráya'anj uxrá nij yuvií quene'en nij so' se vaa qui'yaj Jesucristó, <sup>15</sup>ne ta'aj nij yuvií cataj se vaa a'mii Jesucristó ga sí chree cu'naj Beelzebú sí uun chij rihaan nij nana chree, ne che'é dan rii so' man nij nana chree nimán yuvií, taj ta'aj nij yuvií, ni'yaj nij yuvií man Jesucristó a. <sup>16</sup>Ne yo'ó ta'aj nij yuvií guun rá cuta' cacun' xráá Jesucristó, ne che'é dan cachíin ni'yaj nij so' rihaan Jesucristó se vaa qui'yaj so' 'o suun sa' nocoo 'na' rej xta' ni'yaj nij so', taj nij so' a. <sup>17</sup>Dan me se quene'en ma'an Jesucristó daj vaa nimán nij yuvií, ne che'é dan cataj so':

—Ne'en soj se vaa sese vaa 'o nación, ne sese xra' ta'aj nij sí uun chij rihaan nación yo' ne cunu' ma'an nij so' ga tuvi' nij so', ne vaa güii, ne nu' nación yo' quirí' nu' nanj adonj. Ne sese cunu' ta'aj nij yuvií man 'o barrio ga tuvi' yuvií sí man ma'an barrio yo' ro', ne vaa güii, ne quirí' nu' barrio yo', qui'yaj nij so' nanj adonj. <sup>18</sup>Che'é dan me sese racuúj sí chree sí cu'naj Satanás manj rii 'unj man tuvi' so' nana chree nimán nij yuvií, gaa

ne asa' ca'vee guun chij ndo'o so' rihaan nij yuvii man rihaan chumii nihánj, rá soj ga. Nana nihánj xná'anj 'unj man soj che'é se me rá soj cataj soj se vaa síi chree cu'naj Beelzebú ro', me síi racuíj manj rij man nana chree nimán nij yuvii, rá soj vaa nanj á. <sup>19</sup>Dan me se rii 'unj man nij nana chree nimán nij yuvii, 'yaj síi chree cu'naj Beelzebú, che'é se a'mii 'unj ga so', rá soj a. Tzaj ne nij síi tuculyón se-nana soj me se veé danj rii uún nij so' man nij nana chree nimán nij yuvii uún ei. Ne asa' a'vee 'yaj nij so' danj, rá soj ga. Ne vaa nij so' vaa, veé danj a'mii nij so' ga síi chree, rá soj gaa na'. Che'é nana ca'mii soj me se ma'an nij síi tuculyón se-nana soj cuta' cacun' xráa soj se vaa ca'mii ne soj adonj. <sup>20</sup>Tzaj ne 'unj me se ya ma'an ra'a Diose racuíj manj rii 'unj man nij nana chree nimán nij yuvii adonj. Che'é dan xcaj soj cuentá se vaa aj guun che'e Diose guun chij Diose rihaan chumii nihánj adonj.

<sup>21</sup>”Dan me se sese 'o síi ru'vee yanj rá ve' me se vaa aga' sihaa do', vaa mixté do', rihaan so', ne tumé so' si'yaj so' yáan so', ne taj síi ca'nee si'yaj so' ma'. <sup>22</sup>Tzaj ne sese ca'na' yo'ó síi vaa doj fuerzá rihaan, gaa ne qui'yaj canaán so' rihaan síi yanj raan, gaa ne ca'nee so' nu' saga' so' do', nu' si'yaj so' do', ne cuxra' ta'aj so' ga tuvi' so' nanj adonj. Ta'nga' danj 'yáa 'unj ga síi chree, ne 'yaj canaán 'unj man so' adonj.

<sup>23</sup>”Naj guun síi na'vej rá qui'yaj suun ga 'unj ro', síi taj ri'yunj manj me so' a. Ne naj guun síi ne racuíj

manj naqui'yaj chre' 'unj man yuvii canoco' man Diose ro', so' me síi ticha'nuu man nij yuvii, ne aráán so' rihaan nij yuvii se canoco' nij yuvii man Diose ei —taj Jesucristó rihaan nij yuvii a.

**Nana nihánj taj xna'anj daj 'yaj  
nana chree gaa anicaj uún  
nana chree nimán yuvii a**

<sup>24-25</sup>Gaa ne cataj uún Jesucristó rihaan nij yuvii a:

—Ne gaa tihaj avii yuun yo'o nana chree nimán snó'o, ne chéé rma'an nana chree yo' nano' so' rej cayáán so', tzaj ne taj se qui'yá' quiri' nana chree yo' rej cayáán so', gaa ne me rá uún nana chree yo' canicaj so' rej cavii so' gaa naá a. Dan me se taj nana chree yo': “Canicaj uún 'unj nán' 'unj rej cavii 'unj a. Ve'é nanj vaa tucuaaj, ne naruvii rá ve' tucuaaj cuano, ne uun yâj yanj rá ve' tucuaaj cuano adonj”, taj nana chree yo' a. <sup>26</sup>Gaa ne dan me se anicaj uún nana chree yo' nimán snó'o yo', ne nano' nana chree yo' yo'ó chij tuvi' nana chree yo' síi chi'ii doj, ne 'na' nique uún so' nimán snó'o yo', gaa ne cayáán taran' nij nana chree yo' a. Dan me se gaa naá gaa cayáán orún' nana chree yo', gaa ne maan ta'nga' quij vaa nimán snó'o yo', tzaj gaa namán yo'ó chij nana chree yo', gaa ne doj a tico nana chree man so', ne doj a quij vaa nimán snó'o yo', 'yaj nana chree yo' a adonj —taj Jesucristó rihaan nij yuvii a.

**Nana nihánj taj xna'anj me síi  
me nij síi cavii sa' ga Diose a**

<sup>27</sup>Dan me se gaa ca'mii Jesucristó nana vaa danj, gaa ne nucuaj ca'mii

'o chana nicun' sca'núj nij yuvii,  
cataj no':

—Cavii sa' ní so', che'é se cuchruj  
no' mán so', ne tucutzii no' mán so'  
á —taj chana yo', caguáj no' rihaan  
Jesucristó a.

<sup>28</sup>Tzaj ne cataj Jesucristó a:

—Síi cavii sa' ya ro', me síi uno  
se-nana Diose ne 'yaj ndaa vaa taj  
nu' nana yo' adonj —taj Jesucristó  
rihaan nij yuvii yo' a.

**Nana nihánj taj xna'anj me suun  
sa' nocoo me qui'yaj Jesucristó,  
yan guun ya rá nij yuvii se vaa  
ya vaa nana ca'mii so' a**

<sup>29</sup>Dan me se cunuu chre' doj  
yuvii rihaan Jesucristó, ne che'é  
dan guun che'e so' ca'mii so' nana  
nihánj a:

—Inanj che'é se yuvii vaa chi'ii  
nimán me soj ro', che'é dan me rá  
soj qui'yáj suun sa' nocoo á. Tzaj ne  
se qui'yáj suun sa' nocoo che'é  
soj ma'. Maan se quene'en soj se  
vaa ase vaa quiran' síi cu'naj Jonás  
gaa naá ro', danj quirán' 'unj, vaa  
güii nanj á. <sup>30</sup>Dan me se qui'yaj  
Diose suun sa' nocoo ga síi cu'naj  
Jonás quene'en nij síi man chuman'  
Nínive gaa naá, ne danj inanj  
qui'yaj uún Diose ga 'unj sij ca'née  
so' nı́cay yu'unj man yuvii, quene'en  
soj adonj.

<sup>31</sup>Ne güii ca'ne' Diose cacun'  
che'é yuvii ro', cuchı́' chana nicaj  
suun reiná guun chij rihaan  
chuman' naj gan' ndo'o rej sur, ne  
canicun' no' rihaan soj, qui'yaj  
Diose, ne cuta' no' cacun' xráá  
soj adonj. 'O se gan' ndo'o cachée  
no' cuchı́' no' rihaan síi cu'naj  
Salomón, ne cuno no' nana cuu

tucu'yón Salomón man no' adonj.  
Ne xa' 'unj sij nicun' rihaan soj  
cuano, tzaj ne sa' doj vaa 'unj  
rihaan síi cu'naj Salomón yo' adonj.  
Tzaj ne na'vej rá soj cuno soj nana  
a'mii 'unj rihaan soj a man adonj.  
<sup>32</sup>Ne nij síi man chuman' Nínive  
ro', canicun' nij so' ga ma'an soj  
sij vaa i'na' rihaan chumiı́ nihánj  
cuano asa' quisı́j güii ca'ne' Diose  
cacun' che'é yuvii, ne cuta' nij síi  
man chuman' Nínive yo' cacun'  
xráá soj adonj. Cuno nij so' nana  
ca'mii natáj síi cu'naj Jonás, ne  
nuchran' nimán nij so', ne canoco'  
nij so' man Diose adonj. Ne xa' 'unj  
sij nicun' rihaan soj cuano, tzaj ne  
sa' doj vaa 'unj rihaan síi cu'naj  
Jonás yo', tzaj ne taj se qui'yá'  
naqui'yaj sa' soj nimán soj ma' —taj  
Jesucristó rihaan nij yuvii yo' a.

**Nana nihánj taj xna'anj se  
vaa no xcúún ní' xcaj ní'  
cuentá daj qui'yaj ní' a**

<sup>33</sup>Ne cataj uún Jesucristó rihaan  
nij so' a:

—Gaa rmi', ne a 'o yuvii ne uta'  
ya'an raá aga' ya'an ne axrı́j yuve  
nij so' rque 'o chrúún ma'. Sese  
rmi', ne achrón nii ya'an raá aga'  
ya'an ne uta' nii aga' yo' rej xta',  
ne daj a nij yuvii atúj rá ve' ro',  
chuguun ni'yaj nij so' adonj.

<sup>34</sup>Rlij rihaan ní' me ya'an nicaj  
yu'unj man ní' ei. Dan me se sese  
rlij rihaan ní' ro', ni'yaj yo' ne uun  
sa' rá yo', gaa ne nu' nee man ní'  
ro', sa' vaa, ne adi' se chuguun  
aga' ya'an ro', danj chuguun man  
ní' gaa sa' rihaan ní' adonj. Tzaj ne  
sese rlij rihaan ní' ro', ni'yaj yo' ne  
inanj uun chi'ii rá yo', gaa ne nu'

nee man ní' ro', uun chi'ii rá, gaa ne adi' síí nicun' yan rmi' ne cunudanj man so' ro', rmi', ne danj vaa síí uun chi'ii rá adonj. <sup>35</sup>Xcaj ndo'o soj cuentá se gaa nanj quina'aj ya'an nicaj yu'unj man soj ne guun soj 'o se rmi' a. <sup>36</sup>Dan me se sese cunudanj man ní' nuú ya'an, gaa ne taj a doj se rmi' nuu man ní', gaa ne cunudanj man ní' ro', chuguun, ne adi' gaa o' cachun' ya'an xráá nii ne chuguun nu' man nii ro', danj vaa ní' adonj —taj Jesucristó rihaan nij yuvii yo' a.

**Nana nihánj taj xna'anj che'é cacun' tumé nij síí fariseo a**

<sup>37</sup>Dan me se gaa ca'mii Jesucristó rihaan nij yuvii, ne canacúun 'o síí fariseo man so' chá so' chraa tucúa síí fariseo yo', gaa ne dan me se ca'anj cayáán roj so' rihaan mesá a. <sup>38</sup>Dan me se xcaj síí fariseo yo' cuentá se vaa ne noco' Jesucristó se-tucuanj nij síí fariseo se vaa ne na'ya' so' gaa chá so' chraa, gaa ne caráya'anj ndo'o síí fariseo yo' a. <sup>39</sup>Che'é dan cataj síí 'nij ra'a man ní' rihaan so':

—Xa' soj sij fariseo, tzaj ne ase vaa rasuun, ne sa' uxrá na'nu' nii xráá yo', tzaj ne rque yo' ro', me se vaa nacaj guee yo', ta'nga' danj vaa guee soj, ne xráá soj me se ve'é naruvii, tzaj ne nimán soj me quij vaa, ne niha' uxrá rá soj ca'nee soj si'yaj tuvi' soj, ne noco' ndo'o soj chrej chi'ii adonj. <sup>40</sup>Nuveé sij acaj cuentá me soj a ma'. Ne'en soj se vaa Diose ro', me síí qui'yaj ra'a soj, ne na'ya' ndo'o soj, ne veé so' me síí qui'yaj nimán soj uún a. <sup>41</sup>Dan me se go' soj ta'aj se chá do',

ta'aj sa'anj do', man nij síí nique, gaa ne xcaj soj cuentá se vaa síí sa' nimán me soj adonj.

<sup>42</sup>”Tzaj ne nique soj sij fariseo nanj á. 'O se quiran' uxrá soj sayuun nanj adonj. 'O se sese vaa nuu xlá do', coj ruda do', me ma'an cuêj do', rihaan soj, ne rque soj 'o nánj rasuun yo' rihaan Diose che'é 'o 'o chi' nánj rasuun vaa rihaan soj nanj á. Tzaj ne ne a'ne' nica soj cacun' che'é tuvi' soj ma'. Ne aráj cochroj soj rihaan Diose ma'. Tzaj ne me rá Diose qui'yaj soj nu' nana nocoo nihánj, ne na'vej rá Diose tanáj xco soj yo'ó nana le'ej doj yo' a ma'.

<sup>43</sup>”Nique soj sij fariseo nanj á. Quiran' uxrá nij soj sayuun adonj. 'O se niha' rá soj quitaj soj chruun xlá sa' doj nicun' rá ve' tucuyón ní' se-tucuanj Moisés, ne niha' rá soj caraya'anj yuvii man soj gaa chéé soj yu'vee a.

<sup>44</sup>”Nique soj che'é sayuun quiran' soj á. Ne ase vaa chraan naj xngará rihaan santó ro', vaa soj, ne xráá soj ro', vaa catzii, tzaj ne nimán soj me se adi' se vaa cúu ri'yuj ro', vaa nimán soj adonj. Ne vaa chraan naj xngará rihaan santó, ne xráá yo' me se sa' uxrá vaa yo', ne rque yo' me se cúu ri'yuj inanj man rque yo', ne nij yuvii me se chéé nij yuvii yo' xráá chraan, ne taj nij so' se vaa sa' ndo'o vaa chraan yo', taj nij so', tzaj ne ne ne'en nij so' se vaa inanj cúu ri'yuj man rque yo' a man adonj. Ta'nga' danj vaa guee soj adonj —taj Jesucristó rihaan nij síí fariseo yo' a.



**Nana nihánj taj xna'anj che'é cacun' tumé nij sí naqui'yaj cuu se-tucuñj Moisés rihaan yuvií a**

<sup>45</sup>Gaa ne ca'mii 'o sí naqui'yaj cuu se-tucuñj Moisés rihaan yuvií, ne cataj so' rihaan Jesucristó a:

—Tzaj ne nachrí' so' ni'yaj so' man ma'an núj gaa a'mii so' nana vaa danj á —taj so' rihaan Jesucristó a.

<sup>46</sup>Gaa ne cataj Jesucristó rihaan so' a:

—Ne nique ma'an soj sij naqui'yaj cuu se-tucuñj Moisés rihaan yuvií a. Ma'an soj uún quirán' uxrá sayuun nanj adonj. 'O se a'ne' uxrá soj suun rihaan yuvií daj qui'yaj nij yuvií canoco' nij yuvií man Diose, tzaj ne dan me se ase vaa yuvií araa ndo'o rasuun 'ee xráa tuvi' vaa nij soj, ne a doj ne racuíj soj man yuvií cata yuvií rasuun 'ee yo' a ma'. A 'ó raá ra'a nij soj ne racuíj soj man yuvií a man adonj.

<sup>47</sup>”Nique soj che'é sayuun quirán' soj a. Ve'é une' soj chraan yan naj cúu man nij sí nata' se-nana Diose gaa naá, tzaj ne ma'an xij soj ro', me sí ticavi' man nij so' adonj. <sup>48</sup>Dan me se che'é se ne'en ní' se vaa 'yaj ma'an soj, ne che'é dan xcaj ní' cuentá se vaa 'o vaa rá soj ga xij soj sí man gaa naá, ne cyaan 'yaj soj ga xij soj adonj. Dan me se nij so' ro', ticavi' man nij sí nata' se-nana Diose, ne soj ro', une' chraan yan naj cúu man nij so' adonj.

<sup>49</sup>”Che'é dan cavii 'o nana cuu raá Diose, cataj Diose: “Xa' yuvií nihánj, tzaj ne ca'nej 'unj sí nata' se-nanaj rihaan nij so' a. Dan me se ticavi' nij so' man ta'aj nij sí ca'nej 'unj, ne

yo'ó ta'aj nij so' me se me rej ma'an vaj nij so', ne quitaj ri'yunj uxrá nij so' man nij sí ca'nej a. <sup>50</sup>Ndaa síj, gaa ne nu' ton cayanj man nij sí nata' se-nana Diose asij gaa guun che'e chumii ro', nu' cacun' yo' ro', nata' xráa nij so' a. <sup>51</sup>Dan me se asij ton cayanj man sí cu'naj Abel ne ndaa ton cayanj man sí cu'naj Zacarías gaa cavi' so' rihaan nuví yan nicun' mesá altar xij ro', nu' cacun' yo' ro', nata' xráa nij so' a”, taj Diose a. Dan me se cataj xna'anj 'unj rihaan soj cuano se vaa quirán' ma'an nij tuvi' nij soj sayuun che'é nu' cacun' yo' adonj.

<sup>52</sup>”Nique soj sij naqui'yaj cuu se-tucuñj Moisés rihaan yuvií a. Quirán' uxrá soj sayuun adonj. Taj se qui'yá' xcaj yuvií cuentá, 'yaj soj ma'. Dan me se ma'an soj ro', na'vej rá catuu se-tucuñj Diose, ne nij sí me rá catuu me se aráan soj chrej rihaan nij so', ne na'vej rá soj catuu nij so' a man adonj —taj Jesucristó rihaan nij sí naqui'yaj cuu se-tucuñj Moisés rihaan yuvií a.

<sup>53</sup>Dan me se curihanj Jesucristó ve' yo', ne guun che'e nij sí naqui'yaj cuu se-tucuñj Moisés do', nij sí fariseo do', táa ri'yunj uxrá nij so' man Jesucristó, ne guun che'e nij so' xná'anj nij so' man so' che'é que'ee rasuun a. <sup>54</sup>Dan me se nanó xrej uxrá nij so' nana ca'mii Jesucristó che'é rej guun ndo'o rá nij so' cuta' nij so' cacun' xráa Jesucristó che'é nana tu'va so' a.

**Nana nihánj taj xna'anj se vaa ne ca'vej rá Jesucristó qui'yaj nij sí tucu'yón se-nana so' ndaa vaa qui'yaj nij sí fariseo a**

**12** Dan me se cunuu chre' uxrá yuvií rej vaj Jesucristó,

ne uxrá chruj nij so', ne ndaa tiguíj tuvi' ma'an nij so' a.

Gaa ne guun che'e Jesucristó ca'mii so' asino yaan ga nij síf tucuyón se-nana so', cataj so':

—Cutumé soj man soj se gaa nanj quiran' soj sayuun, qui'yaj se-levadura nij síf fariseo á. Dan me se taj nij so', ne inanj nana sa' a'mii nij so', taj nij so', tzaj ne taj ma'. Tu'va rma'an nij so' nanj adonj. Nuveé nana sa' a'mii nij so' ma'. Inanj nana nucui' rá a'mii nij so' nanj adonj. <sup>2</sup>Tzaj ne dan me se nu' nana ca'mii yuve nij so' do', nu' rasuun 'yaj yuve nij so' do', nu' yo' ro', nurihanj quene'en cunudanj yuvi man gúii adonj.

<sup>3</sup>Che'é dan nu' nana ca'mii soj rej rmi' ro', vaa gúii nurihanj yo' rej chuguun, ne nu' nana ca'mii soj xréé tuvi' soj rej rá ve', ne nurihanj yo' vaa gúii ndaa patio rihaan ve' adonj —taj Jesucristó rihaan nij so' a.

**Nana nihánj taj xna'anj se vaa se cuchu'vi' ní' quene'en ní' yuvi man**

<sup>4</sup>Gaa ne cataj uún Jesucristó a:

—Dan me se tuví' 'unj me soj, ne che'é dan cataj xna'anj 'unj rihaan soj se vaa se cuchu'vi' soj quene'en soj nij síf ticavi' man ne man soj ma'. 'Q se asa' qui'yaj nij so' danj, gaa ne taj vaj doj se chi'ii qui'yaj nij so' man soj a ma'.

<sup>5</sup>Tzaj ne nihánj me se cataj xna'anj 'unj rihaan soj me síf cuchu'vi' soj ni'yaj soj man a. Dan me se vaa che'é cuchu'vi' soj ni'yaj soj Diose adonj. Asa' quisíj ticavi' nii man soj, gaa ne so' me síf ca'nej man soj rihaan ya'an cacaa soj

sese tumé soj cacun' adonj. Che'é dan taj 'unj rihaan soj se vaa vaa che'é cuchu'vi' soj ni'yaj soj man so' adonj.

<sup>6</sup>”Ne'en soj daj vaa nij xtâj chrin' se vaa 'un' ya xo' nó chi' guee cha'aa a. Tzaj ne taj ya'anj uxrá Diose man 'o 'o nij xo' a. <sup>7</sup>Ne Diose me se vaa cuentá yuvé raá soj 'yaj so', ne ne'en so' me daj yuvé raá soj, ne che'é dan se cuchu'vi' soj che'é sayuun qui'yaj yuvi man soj ma'. 'Q se uxrá vaa yu'vee doj nó soj rihaan xtâj chrin' yo', 'yaj Diose adonj. <sup>8</sup>Ne cataj xna'anj 'unj rihaan soj cuano se vaa no xcúun soj nata' ya soj rihaan yuvi se vaa me soj síf noco' manj, ne nu' síf 'yaj danj ro', vaa gúii, ne 'unj sij ca'née Diose nicaj yu'unj man yuvi ro', nataj rihaan nij se-mozó Diose se vaa sij noco' manj me so' a. <sup>9</sup>Ne síf taj xna'anj rihaan yuvi se vaa nuveé sij noco' manj me so' ro', vaa gúii, ne cataj xna'anj ya 'unj rihaan nij se-mozó Réé 'unj se vaa nuveé sij noco' manj me so' a ma'.

<sup>10</sup>”Dan me se 'unj sij ca'née Diose nicaj yu'unj man yuvi ro', ca'vee se ca'mii yo'o so' nana chi'ii che'ej, ne ca'vee navij cacun' xráa so' qui'yaj Diose, tzaj ne sese ca'mii chi'ii yo'o so' che'é Nimán Diose, ne daj chihaa mój se tinavij Diose cacun' yo' xráa so' a ma'.

<sup>11</sup>”Dan me se asa' tucuatúj nii man soj rá ve' tucuyón ní' sij israelitá se-tucuanj Moisés ne canicun' soj rihaan nij síf uun chij, ne se nanó rá soj daj ca'mii soj che'é soj rihaan nij so' ma'. <sup>12</sup>'Q se orá yo' ro', ma'an Nimán Diose ro', tucuyón man soj daj ca'mii soj

rihaan nij so' adonj —taj Jesucristó rihaan nij sí tucu'yón se-nanā so' a.

**Nihánj me cuentó nanó Jesucristó che'é 'o sí ru'vee caraa sa' que'ee rasuun rihaan chumij nihánj a**

<sup>13</sup>Dan me se cataj yo'o tuvi' nij yuvij yo' rihaan Jesucristó a:

—Cataj so' rihaan tinúu 'unj, ne cuxra' ta'aj so' yo'óo do', rasuun do', gaj, maestro —taj so' rihaan Jesucristó a.

<sup>14</sup>Gaa ne:

—Me che'é guun rá so' se vaa guún 'unj sí a'ne' cacun' che'é soj ga. Me che'é ca'mij 'unj che'é rasuun vaa rihaan roj tinuj soj, rá so', ga tinu' —taj Jesucristó rihaan so' a.

<sup>15</sup>Gaa ne cataj Jesucristó rihaan nij yuvij a:

—Tumé uxrá soj man soj rihaan nij rasuun xcoj ruvaa rá a. Nuveé rasuun man rihaan ní' qui'yaj cavij sa' nimán ní' ma' —taj Jesucristó rihaan nij yuvij a.

<sup>16</sup>Gaa ne dan me se nanó Jesucristó 'o se-cuento 'o sí ru'vee rihaan nij yuvij a:

—'O sí ru'vee me 'o so', ne cavii ndo'o xnaa so', ne man ndo'o rasuun rihaan so', <sup>17</sup>ne dan me se taj so': “A me se qui'yáj ga rasuun man rihanj ne taj rej caraj man rasuun yo' ga”, taj so' a. <sup>18</sup>Gaa ne: “Aan a. Aj ne'enj me se qui'yáj á. Tucuanee 'unj man nij cuchruu nii, ne qui'yáj doj ve' xij, ne yo'o caraa chre' 'unj man nij rasuun, ne tinavii 'unj man nij yo' rá nij ve', <sup>19</sup>gaa ne cataj 'unj rihaan nimanj se vaa man ndo'o rasuun rihaan ní' cha ní', ne se nanó rá ní', maan se ve'é cha ní'

do', ve'é co'o ní' do', ve'é cayáan ní' do', ve'é cotoj ní' do' a. Danj cataj rihaan nimanj che'é nij rasuun cumā rihanj”, taj so' a. <sup>20</sup>Tzaj ne Diose ca'mii rihaan so', cataj Diose: “Sí nilyon mé so' á. 'O se nij corá me se cavij so', ne xa' rasuun caraa sa' so', tzaj ne me se guun yo' rihaan so', rá so' ga”, taj Diose rihaan ru'vee yo' a. <sup>21</sup>Danj quirān sí araa sa' rasuun che'é ma'an danj, ne taj vaj a doj rasuun sa' nicaj so', ni'yaj Diose a ma' —taj Jesucristó rihaan nij yuvij a.

**Nanā nihánj taj xna'anj se vaa ne nó xcúun ní' nano ndo'o rá ní' che'é se cha ní' do', che'é yatzij cunuú ní' do' a**

<sup>22</sup>Gaa ne cataj Jesucristó rihaan nij sí tucu'yón se-nanā so' a:

—Che'é dan cataj xna'anj 'unj rihaan soj se vaa taj che'é nano ndo'o rá soj che'é soj ma'. Ne che'é se cha soj do', ne che'é yan quiri' soj se caráan xráa soj se nanó rá soj ma'. <sup>23</sup>Aj ne'en soj se vaa aj vaa i'na' soj, qui'yaj Diose, ne se guun nucuaj Diose rque Diose cha soj, rá soj gaa a na'. Daj chihaa mij se guun danj rá soj ma'. Ne Diose me sí ca'vee rque se cha soj ei. Ne Diose me sí qui'yaj nee man soj, ne se guun nucuaj Diose rque Diose yatzij caráan xráa soj, rá soj gaa a na'. Daj chihaa mij se guun danj rá soj ma'. Ne Diose me sí ca'vee rque se caráan xráa soj ei.

<sup>24</sup>”Xcaj soj cuentá daj 'yaj nij xcaa, ne ne unô nij xo' 'núu, ne ne rii nij xo' naa, ne taj se-cuchruu nij xo', tzaj ne Diose ro', rque se chá nij xo' adonj. Ne sa' doj vaa soj rihaan

xcaa ni'yaj Diose adonj. Ya sa' doj vaa soj chuguanj. <sup>25</sup>Ne nda' se nanó ndo'o rá soj che'é yan chre' vaa soj, tzaj ne a 'ó xco' se guun nucaj soj cachij xcaan soj doj qui'yaj ma'an soj ma'. Maan se Diose ro', me sí ne'en daj gaa cachij soj, ne che'é dan taj che'é nano rá soj a ma'.

<sup>26</sup>Dan me se sese se ca'vee qui'yaj soj rasuun le'ej doj, ne asa' ca'vee qui'yaj soj rasuun nocoo doj, rá soj ga. Che'é dan taj che'é nano ndo'o rá soj che'é nij rasuun nocoo doj a ma'.

<sup>27</sup>O se xcaj soj cuentá ni'yaj soj nij yâj se vaa ve'é ndo'o vaa nij yâj a. Ne 'yaj suun nij yâj, tzaj ne ma'an Diose ro', me sí sa' ndo'o vaa qui'yaj man nij yâj adonj. Ne ne rii nij yâj yu'vej ma'. Tzaj ne adi' se vaa sí rii yu'vej ne sa' uxrá vaa sagan' so' ro', vaa nij yatzíj nuu nij yâj adonj. Dan me se cataj xna'anj 'unj rihaan soj se vaa sí cu'naj Salomón sí cane gaa naá, ne ve'é uxrá vaa yatzíj nuu so', qui'yaj cunudanj sa'anj vaa rihaan so', tzaj ne nij doj vaa yatzíj nuu so' rihaan nij yâj man tacaan yo', qui'yaj Diose adonj. <sup>28</sup>Dan me se danj nanj nij yâj man tacaan yo', tzaj ne sa' uxrá vaa nij yatzíj nuu nij yâj yo', 'yaj Diose, tzaj ne a'yuj ca'ne' nii man nu' coj do', yâj do', ne caraa nii man yo' rihaan ya'an, ne cacaa nu' nij yâj yo' nanj adonj. Ne a doj yu'vee taj nó yâj yo' a ma'. Táa a soj yuvii, ne se nanó rá soj ma'. Diose me sí rque sagan' soj adonj. Tzaj ne ne guun ya sa' rá soj se vaa Diose me sí racuúj ya man soj man adonj.

<sup>29</sup>Ne xa' soj, tzaj ne se nano' ndo'o soj se cha soj do', se co'o soj do' ma'. Ne se nanó ndo'o rá soj che'é nij

yo' ma'. <sup>30</sup>O se nij sí man rihaan chumii nihánj sí ne ne'en daj vaa Diose ro', inanj 'yaj suun ndo'o nij so' che'é rasuun man rihaan chumii nihánj adonj. Tzaj ne nu' rasuun achiin man soj ro', aj ne'en Rej soj Diose se vaa achiin rasuun yo' man soj adonj. <sup>31</sup>Tzaj ne nano' soj rej daj qui'yaj soj, ne guun chij Diose nimán soj, gaa ne rque Diose rasuun yo' rihaan soj adonj.

<sup>32</sup>Se cuchu'vi' soj ma'. Ase vaa daán Diose matzinj vaa soj, ne Diose tumé man soj, ne aj guun rá Rej soj Diose se vaa guun chij soj rihaan chumii nihánj ga so' vaa güii a.

<sup>33</sup>Cutu'vee soj si'yaj soj, ne go' soj sa'anj man nij sí nique á. Gaa ne vaa güii quiri' soj 'o nanj caraa nu' sa'anj rque, ne xa' nanj yo', tzaj ne daj chihaa mÍj se xtuu nanj yo', ne xa' sa'anj yo', tzaj ne daj chihaa mÍj se navij sa'anj yo' a. Yo' me se quirí' soj rej xta', ne rej xta' ro', taj vaj sí ituu ma'. Ne taj vaj xluú chá rasuun ma'. <sup>34</sup>Ne sese inanj che'é rasuun man rihaan chumii nihánj qui'yaj suun soj, gaa ne veé maan rihaan chumii nihánj quinaj nimán soj gaa nanj adonj. Ne sese inanj che'é rasuun man xta' ro', qui'yaj suun soj, gaa ne veé rej xta' ro', ca'anj nimán soj nanj adonj. Me rej ma'an araa soj rasuun, ne veé rej danj vaj nimán soj nanj adonj —taj Jesucristó rihaan nij sí tucu'yón se-nana so' a.

### Nihánj me cuentó nanó Jesucristó che'é mozó na'vij namān ru'vee a

<sup>35</sup>Ne cataj uún Jesucristó rihaan nij so' a:

—Ase vaa sí 'nij raan nuj catuun ro', danj gaa soj ei. Ase vaa sí nicaj aga' chuguun aco' ya'an ro', danj

gaa soj ei. <sup>36</sup>Dan me se qui'yaj soj ndaa vaa 'yaj mozó na'vij so' naman se-ru'vee so' gaa ca'anj se-ru'vee so' cha'anj nara'aa ei. Dan me se asa' namán ru'vee ne nu' tara'a so' ta'yaa, ne nu' ca'nuu mozó yo' ta'yaa, gaa ne guun niha' rá se-ru'vee mozó yo' adonj. <sup>37</sup>Ne cavii sa' uxrá nij mozó 'yaj danj, che'é se ne cotoj nij so' gaa namán se-ru'vee nij so' a. Dan me se quene'en ya so' se vaa ne cotoj nij so' ma'. Cataj yá 'unj rihaan soj cuano se vaa ma'an ru'vee yo' ro', naqui'yaj sa' so' man so', cayáan se-mozó so' rihaan mesá, qui'yaj so', ne qui'yaj chuvii ma'an so' cha' nij se-mozó so' adonj. <sup>38</sup>Dan me se ca'vee se rej yan' naman so' ni', ca'vee se rej taxrej naman so' ni', tzaj ne aj ne'en so' se vaa ve'é inanj na'vij nij mozó yo' man so', ne cavii sa' uxrá nij mozó yo' adonj. Che'é dan qui'yaj soj ndaa vaa 'yaj nij mozó yo' ei. <sup>39</sup>Dan me se sese 'o sís tucua ve' ro', aj ne'en so' me orá ca'na' sís ituu ne qui'yaj ituu sís ituu rasuun man tucua so', ne uxrá cutumé so' tucua so', ne se qui'yaj ituu sís ituu tucua so' tzaj ma'. Maan se ne ne'en so' me orá ca'na' sís ituu man adonj. <sup>40</sup>Dan me se ta'nga' danj vaa guee 'unj sij nicaj yu'unj man yuvii, ne ne ne'en soj me orá ca'na' uún 'unj man adonj. Che'é dan yo'o ni'yaj soj a —taj Jesucristó rihaan nij sís tucu'yón se-nana so' a.

**Nana nihánj taj xna'anj daj  
quiran' sís ve'é 'yaj suun rihaan  
Diose do', daj quiran' sís ne 'yaj  
suun sa' rihaan Diosé do' a**

<sup>41</sup>Gaa ne xná'anj sís cu'naj Pedró man Jesucristó, cataj so' a:

—Señor. Che'é ma'an núj me nanó so' cuentó yo' na'. Ase che'é cunudanj yuvii xa' —taj Pedró, xná'anj so' man Jesucristó a.

<sup>42</sup>Gaa ne cataj sís 'nij ra'a man ní' a:

—Che'é dan me sese cune' sís tucua yo'o ve' man yo'o se-mozó so' se vaa cutumé mozó yo' man tuvi' mozó rque so' se chá rihaan nij so' orá chá nij so' chraa, ne daj qui'yaj mozó yo', rá soj ga. Sese ya ya sij ve'é 'yaj suun me so' do', sese ya ya sij avii raá me so' do', ne daj qui'yaj so', rá soj ga. <sup>43</sup>Gaa ne güii naman se-ru'vee mozó ro', sese quene'en se-ru'vee mozó se vaa ve'é 'yaj suun mozó se-suun ru'vee, ne cavii sa' uxrá mozó yo', qui'yaj se-ru'vee mozó yo' adonj. <sup>44</sup>Ya ya cataj xna'anj 'unj rihaan soj cuano se vaa cune' ru'vee yo' man mozó yo' guun so' sís tumé man cunudanj si'yaj ru'vee yo' a. <sup>45</sup>Tzaj ne sese guun rá mozó yo' se vaa guun raan ndo'o se-ru'vee so', gaa ne guun che'e so' go' so' man yo'ó nij mozó do', man nij mozó chana do', ne cha so' co'o so' ne guun xno so' a. <sup>46</sup>Dan me se ne ne'en so' aman naman se-ru'vee so' a. Ne na'vij so' ca'na' ru'vee a. Tzaj ne sís güii sís orá sís, ne ca'na' ma'an se-ru'vee mozó yo', gaa ne ca'ne' nu' so' man mozó yo', ne cataj so' se vaa ca'anj mozó yo' rihaan ya'an ga yo'ó nij sís ne amán rá ni'yaj man Diosé a.

<sup>47</sup>”Dan me se xa' mozó ne'en daj me rá se-ru'vee so' qui'yaj so', tzaj ne sese se qui'yaj so' danj, ne qui'yaj so' inanj se vaa rii nimán ma'an so' qui'yaj so', ne cayuun uxrá so' vaa güii adonj. <sup>48</sup>Ne xa'

síi ne ne'en daj me rá se-ru'vee so' qui'yaj so', ne qui'yaj so' rasuun na'vej rá se-ru'vee so' qui'yaj so', tzaj ne maan che'é se ne ne'en so' ne qui'yaj so' rasuun chi'ii ro', maan che'é dan doj cayuun so' adonj.

”Ne síi ata suun nocoo doj 'yaj Diose ro', doj a guun rá Diose qui'yaj suun so' a. Ne síi tumé doj rasuun che'é Diose ro', doj a gaa rasuun nachin' Diose rihaan so' nanj adonj —taj Jesucristó rihaan nij síi tuculyón se-nana so' a.

**Nana nihánj taj xna'anj se  
vaa cunu' ndo'o yuvii ga tuvi'  
yuvii che'é Jesucristó a**

<sup>49</sup>Gaa ne cataj uún Jesucristó a:  
—Ca'ná' 'unj rihaan chumii nihánj che'é rej guun rá 'unj tacuacoj ya'an nimán yuvii, ne guun niha' rá nij yuvii canoco' nij yuvii man Diose adonj. Ne me ndo'o raj se vaa ra'yanj caco' ya'an yo' nimán nij yuvii adonj. <sup>50</sup>Tzaj ne rej rihaan ní' me se vaa uxrá sayuun quirán' 'unj, se vaa nata' nu' sayuun yo' xráj nanj á. <sup>51</sup>Dan me se ca'ná' 'unj che'é rej dínj doj cayáán nij yuvii man rihaan chumii nihánj ga tuvi' yuvii, rá soj na'. Taj ma'. Cuano nihánj me cataj 'unj rihaan soj se vaa ca'ná' 'unj che'é rej nata' 'unj se-nanaj rihaan yuvii, tzaj ne se cuno cunudanj nij yuvii rihanj ma'. Che'é dan cunu' yuvii ga tuvi' yuvii adonj. <sup>52</sup>Dan me se rej rihaan ní' me se, sese cayáán 'un' yuvii rá 'o ve', ne cunu' va'nuj nij so' ga yavíj nij so', ne cunu' vj nij so' ga ya'núj nij so' adonj. <sup>53</sup>Dan me se cunu' snó'o ga ta'nij sno'o so', ne cunu' ta'nij sno'o so' ga ma'an

so', ne cunu' chana ga ta'nij chana no', ne cunu' ta'nij chana no' ga ma'an no' adonj. Ne cunu' chana ga choco' no', ne cunu' choco' no' ga ma'an no', che'é se-nanaj adonj —taj Jesucristó rihaan nij síi tuculyón se-nana so' a.

**Nana nihánj taj xna'anj se  
vaa ne quene'en nij yuvii xcaj  
nij yuvii cuentá che'é sayuun  
quirán' nij yuvii ma'**

<sup>54</sup>Gaa ne cataj Jesucristó rihaan nij yuvii a:

—Dan me se soj me se sa' uxrá ne'en soj xcaj soj cuentá adonj. Nu' ne'en soj se vaa gaa avii ngaa rej ata' güii, ne nu' taj soj se vaa caman' uxrá maan, taj soj, ne veé danj 'yaj guee xa' maan, ne aman' ndo'o yo' nanj adonj. <sup>55</sup>Ne nu' ne'en uún soj se vaa avii nana yuvaa rej rque rej sur, ne nu' taj soj se vaa daj doj ca'na' ndo'o cachi' taj soj, ne veé danj 'yaj xa' cachi', ne maan ndo'o nanj adonj. <sup>56</sup>Dan me se xa' soj sij nucui' rá me se síi sa' me soj taj soj, tzaj ne tu'va rma'an soj nanj adonj. 'O se ne'en soj xcaj soj cuentá che'é se vaa rihaan chumii do', che'é se vaa rej xtá' do', tzaj ne ne ne'en soj xcaj soj cuentá che'é sayuun quirán' soj sij man rihaan chumii nihánj vaa güii ma'.

<sup>57</sup>”Ne me che'é na'vee xcaj ma'an soj cuentá che'é se vaa no xcúun soj qui'yaj ma'an soj ga. <sup>58</sup>Ne so' me se sese vaa síi me rá cuta' cacun' xráá so' rihaan nij síi nicaj suun, ne gaa tihaj vaj so' chrej ga so', ne ve'é ca'mii so' ga so', cataj so' rihaan so' se vaa: “Ca'ne' rá so', ne se cutá' so' cacun' xráj ma'”, cataj so', ne

ve'é ca'mii so' ga so' ei. Ne sese se qui'yáa so' danj ca'mii sa' so' ga so' gaa tihaj vaj roj soj chrej rihaan chumii nihánj, ne nicaj so' mán so' ca'anj so' rihaan cuese, ne cuese yo' ro', tacuachén mán so' ra'a síi tumé taga', ne so' me síi caxrii taga' mán so', <sup>59</sup>ne yo' me se guun raan ndo'o so', ne ndaa navij naru'vee so' nu' cacun' qui'yáa so', gaa ne curihanj so' taga' nanj adonj —taj Jesucristó rihaan nij yuvií a.

**Nana nihánj taj xna'anj se vaa quirí' nu' ní' sese se ca'vej rá ní' canicaj nimán ní' tanáj ní' chrej chi'ii a**

**13** Güii dan me se mán ta'aj nij yuvií, ne nata' nij so' rihaan Jesucristó che'é daj quiran' ta'aj nij síi man estadó Galilea gaa mán nij so' ticavi' nij so' xcuu rihaan Diose gaa ne curihanj nij tanuu 'yaj suun rihaan síi cu'naj Pilato, ne ticavi' nij tanuu man nij síi man estadó Galilea yo' a. <sup>2</sup>Gaa ne canicaj Jesucristó cataj so' rihaan nij yuvií nata' nana yo' a:

—Che'é yan quiran' nij so' danj, ne che'é dan sij tumé doj cacun' rihaan cunudanj yo'ó nij síi ne estadó Galilea me nij so', rá soj na'. <sup>3</sup>Taj ma'. Tzaj ne cataj xna'anj 'unj rihaan soj cuano se vaa sese se canicaj nimán soj tanáj soj chrej chi'ii, ne vaa güii quirí' nu' soj ne quirán' soj ndaa vaa quiran' nij so' adonj.

<sup>4</sup>Ne xa' xnu' va'núj nij síi cavi' gaa canee ve' nata' xcaan cu'naj Siloé xráa nij so', gaa ne sij tumé doj cacun' rihaan cunudanj nij síi man chuman' Jerusalén me nij so', rá soj gaa na'. <sup>5</sup>Taj ma'. Tzaj ne

cataj xna'anj 'unj rihaan soj cuano se vaa sese se canicaj nimán soj tanáj soj chrej chi'ii, ne vaa güii quirí' nu' soj ne quirán' soj ndaa vaa quiran' nij so' adonj —taj Jesucristó rihaan nij yuvií a.

**Nihánj me cuentó nanó Jesucristó se vaa sese se guun rá ní' qui'yaj ní' ndaa vaa me rá Diose, ne quirí' ní' a**

<sup>6</sup>Gaa ne nanó Jesucristó cuentó nihánj a:

—Dan me se 'o snó'o me se naj 'o xnaa so' naa chruj uvá, ne nicun' 'o chruun higó rque naa uvá yo', tzaj ne 'na' so' nano' so' chruj raá yo' cha so', tzaj ne a 'ó chruj ne quirí' so' cha so' raá chruun yo', ne che'é dan quirí' rá so' ni'yaj so' chruun yo' a. <sup>7</sup>Che'é dan cataj so' rihaan síi 'yaj suun rque xnaa so': “Ni'yaj so' ei. Sij va'núj ya yo' 'ná' 'unj nanó' 'unj chruj higó raá chruun nihánj, tzaj ne a 'ó chruj nuvi' raá chruun nihánj cha' ma'. Ca'ne' so' man yo', ne taj che'é canicun' rma'an yo' rihaan to'ój a ma'”, taj so' rihaan síi 'yaj suun rque naa uvá yo' a. <sup>8</sup>Tzaj ne síi 'yaj suun rque naa uvá yo' ro', cataj rihaan so' a: “Qui'yáa so' se ndo'o, ne daj orún' guee yo' cuano tanáj ní' man chruun nihánj, ne canaa 'unj nu' anicaj tacóo chruun yo', ne caraá 'unj ya'luj tacóo chruun yo', señor. <sup>9</sup>Xraj, ne sese yo' natuu ro', ne cumán chruj raá chruun yo', ne quínaj chruun yo', qui'yaj ní' a. Se taj, ne ca'ne' cachrij ní' man chruun yo' ei”, taj síi 'yaj suun naa uvá yo' rihaan síi si'yaj chruun yo' a. —Dan me cuentó nanó Jesucristó rihaan nij yuvií yo' a.

Nana nihánj taj xna'anj se vaa nahuun sa' 'o chana guun lacuu xráá, qui'yaj Jesucristó güii naránj rá nij yuvií israelitá a

<sup>10</sup>Dan me se 'o güii naránj rá nij yuvií israelitá me se tucu'yón Jesucristó rihaan nij yuvií cunuu chre' rá ve' tucu'yón nii se-tucuanj Moisés, <sup>11</sup>ne dan me se rá ve' yo' ro', nicun' 'o chana guun lacuu xráá, ne nana chree yanj nimán no' ro', me qui'yaj guun lacuu xráá no' a. Ne aj quisíj xnu' va'núj yo' quiran' no' danj a. Dan me se ne ca'vee canicun' caya no' a ma'. <sup>12</sup>Dan me se quene'en Jesucristó man no', ne canacúún so' man no', cataj so':

—Cuanó nihánj me x'nee chí'ii xráá so', nocoj —taj Jesucristó, <sup>13</sup>ne cuta' so' ra'a so' xráá no' a.

Nu' xcaj chana cuentá se vaa nahuun sa' no', ne nu' guun che'e no' cataj no' se vaa sa' uxrá qui'yaj Diose a.

<sup>14</sup>Tzaj ne ca'maan rá síí 'nij ra'a ve' tucu'yón nii se-tucuanj Moisés, che'é se güii naránj rá nij yuvií israelitá me güii qui'yaj cono'ó Jesucristó man chana yo' a. Che'é dan cataj síí 'nij ra'a ve' yo' rihaan nij yuvií a:

—Vatan' güii me güii no xcúún ní' qui'yaj suun ní' 'o 'o smaná a. Ca'na' soj güii yo', ne nahuun sa' soj ei. Se ca'na' soj nahuun sa' soj güii naránj rá ní' ma' —taj so' rihaan nij yuvií a.

<sup>15</sup>Gaa ne cataj síí 'nij ra'a man ní' rihaan nij tuvi' síí 'nij ra'a ve' a:

—Quij ndo'o vaa nimán soj, ne síí nucui' ndo'o rá me soj adonj. 'O se taran' soj me se ne nache soj daán

soj scúj do', daán soj burró do', rej numii xo', ne nicaj soj man xo' 'anj soj rej co'o xo' na güii naránj rá ní' gaa na'. <sup>16</sup>Ne nihánj me nicun' chana nihánj, ne ta'níí ta'nij si'no xii ní' síí cu'naj Abraham me no', ne nihánj me quisíj xnu' va'núj yo' numíj síí cu'naj Satanás man no', ne ca'vee se güii naránj rá ní' me güii cuan', tzaj ne vaa che'é ndo'o nache ní' man no' ra'a síí cu'naj Satanás adonj —taj Jesucristó rihaan síí 'nij ra'a ve' yo' a.

<sup>17</sup>Ne gaa quisíj ca'mii so' danj, gaa ne guun na'aj cunudanj nij síí guun rá cunu' ga so', gaa ne guun niha' rá cunudanj nij yuvií che'é cunudanj nij suun sa' nocoo qui'yaj so' a.

**Nihánj me cuentó nanó Jesucristó che'é caân cuêj mostazá xlá a**

<sup>18</sup>Che'é dan cataj Jesucristó a: —Daj gaa guun chij Diose rihaan chumií nihánj, rá soj ga. <sup>19</sup>Dan me se ase vaa achij caân cuêj mostazá xlá ro', danj gaa guun chij Diose rihaan chumií nihánj adonj. Dan me se nicaj yo'o so' man caân cuêj mostazá xlá ne caxríj so' caân yo' rque to'óo so', ne dan me se xra' caân yo', ne cachij yo', ne asa' cachij yo', ne ase vaa 'o chruun ro', danj vaa yo' a. Gaa ne cayuu nij xtâ vaj rej xtâ' raá cuêj yo', ne qui'yaj nij xo' saca' nij xo' raá cuêj yo' adonj. —Danj ca'mii Jesucristó rihaan nij yuvií a.

**Nihánj me cuentó nanó Jesucristó che'é levadura se 'yaj naraa nana rque rachrúún a**

<sup>20</sup>Gaa ne cataj uún Jesucristó a:



—Daj gaa 'o rasuun naqui'yaj ní rihaan soj, gaa ne quene'en soj daj gaa guun chij Diose rihaan chumií nihánj, rá soj ga. <sup>21</sup>Dan me se naqui'yaj ní 'o chana caxrj yo'óo levadura rque cunj hariná gaa 'yaj no' rachruún a. Dan me se ase vaa 'o chana, ne cuxra' ta'aj no' 'o va'nuj ya aga' yo'óo hariná, ne caxrj ndo'o no' yo'óo levadura, ne caxrj yuve no' man yo' ndaa navij naraa ndo'o nana rque yo' a. Ase vaa uun chij yo'óo levadura yo' rihaan cunj hariná ro', danj gaa guun chij Diose rihaan chumií nihánj adonj. —Danj ca'mii Jesucristó rihaan nij yuvii a.

**Nana nihánj taj xna'anj me síi ca'anj cayáan ga Diose ne me síi ca'anj rihaan ya'an a**

<sup>22</sup>Gaa ne vaj Jesucristó cachén so' nij chuman' nocoo do', nij chuman' ra'a do', ne tucu'yón so' se-nana so' rihaan nij yuvii a. Ne danj nanj nichrun' so' nichrun' so' chuman' Jerusalén a. <sup>23</sup>Ne xná'anj yo'o so' man Jesucristó, cataj so':

—Ne doj nij síi ca'vee quinanii rihaan sayuun, qui'yaj Diose a na' —taj so', xná'anj so' man Jesucristó a.

Gaa ne cataj Jesucristó rihaan nij yuvii a:

<sup>24</sup>—Ase vaa ta'yaa chruj ndo'o vaa rej cachén yuvii catuu yuvii rihaan Diose adonj. Qui'yaj nucuaj soj nimán soj che'é rej catuu soj rej yo' ei. Cataj xna'anj 'unj rihaan soj cuano se vaa guun ndo'o rá nij yuvii catuu nij so' rej yo', tzaj ne se guun nucuaj nij so' catuu nij so' ma'. <sup>25</sup>Ne asa' quisj canicun' caya síi tucua ve' yo' ne caráan so' ta'yaa, gaa ne soj ro', canicun' xe', ne guun

che'e soj tica'mii soj ta'yaa, ne cataj soj: “Na'nuu so' ta'yaa catuu núj, Señor”, cataj soj, gaa ne cataj 'unj rihaan soj: “Ne ne'en uxraj me rej cavii soj a ma'”, cataj 'unj rihaan soj gaa nanj adonj. <sup>26</sup>Gaa ne guun che'e soj cataj soj: “Chá núj chraa do', co'o núj na ga so' do', ne tucu'yón so' se-nana so' chiháan núj nanj á”, cataj soj rihanj á. <sup>27</sup>Gaa ne cataj uún 'unj rihaan soj: “Ne ne'en uxraj me rej cavii cunudanj soj sij 'yaj inanj cacun' a ma'. Naxuun soj man soj rihanj á”, cataj 'unj rihaan soj a.

<sup>28</sup>Ne rej ca'anj soj me se rej ta'vee ndo'o yuvii me yo', ne ndaa cha ruj ma'an yuvii cúu yan' yuvii, ne quene'en soj man síi cu'naj Abraham do', man síi cu'naj Isaac do', man síi cu'naj Jacob do', man cunudanj nij síi nata' se-nana Diose gaa naá do', se vaa cayáan nij so' ga Diose asa' guun chij Diose rihaan chumií nihánj, ne xa' soj, tzaj ne quene'en soj se vaa aj quiri'ij nii man soj xe' nanj adonj. <sup>29</sup>Ne güii guun chij Diose rihaan chumií nihánj ro', ca'na' ndo'o yuvii man cunu' chumií, ne cayáan nij so' rihaan se-mesa Diose, ne cha nij so' chraa adonj. <sup>30</sup>Ne nij síi ne guun chij rihaan chumií nihánj me se xta' ro', guun chij nij so' a. Ne nij síi guun chij ndo'o rihaan chumií nihánj me se rej xta' ro', guun nij so' síi noco', qui'yaj Diose nanj adonj —taj Jesucristó rihaan nij yuvii yo' a.

**Nana nihánj taj xna'anj se vaa ne cuchu'vi' Jesucristó ni'yaj so' man síi cu'naj Herodes ma'**

<sup>31</sup>Ne güii dan me se cuchu' doj nij síi fariseo rihaan Jesucristó, ne cataj nij so' a:

—Curihanj so' estadó nihánj ca'anj so', ne síf nicaj suun rey cu'naj Herodes me se me ndo'o rá so' ticavi' so' mán so' á —taj nij síf fariseo rihaan Jesucristó a.

<sup>32</sup>Gaa ne cataj Jesucristó rihaan nij so' a:

—Ase vaa chunee avii ndo'o raá qui'yaj sayuun vaa síf cu'naj Herodes yo', ne ca'anj soj, ne cataj soj rihaan so' se vaa 'unj me se rii 'unj nana chree nimán nij yuvii, ne naqui'yaj sa' 'unj man nij síf ran', ne 'o güii cuan' ne 'o güii a'yuj ne rque va'nuj guee güii qui'yaj suun 'unj se-sunj, ne veé danj quisij se-sunj, qui'yáj nanj adonj. <sup>33</sup>Tzaj ne vaa che'é qui'yaj suun 'unj cuan' ne a'yuj ne yataj, ne rque va'nuj güii qui'yaj suun 'unj che'é xrej 'unj, gaa ne curihanj 'unj estadó nihánj ei. 'O se taj che'é cavi' 'o síf nata' se-nana Diose rej yaníj yo'ó chuman', ne veé chuman' Jerusalén cavi' so' gaa ca'vee adonj —taj Jesucristó rihaan nij síf fariseo yo' a.

**Nana nihánj taj xna'anj daj quiran' nij síf ne chuman' Jerusalén a**

<sup>34</sup>Gaa ne cataj uún Jesucristó a:

—Naná uxrá raj che'é soj sij man chuman' Jerusalén nihánj nanj á. Dan me se ticavi' soj man nij síf nata' se-nana Diose, ne go' soj yahij man nij síf ca'née Diose cuchí' rihaan soj a. Guun que'ee ndo'o guun rá 'unj naqui'yaj chre' 'unj man soj cutumé 'unj man soj, tzaj ne taj se qui'yá' ca'vee ma'. Dan me se ase vaa 'yaj chuchee naqui'yaj chre' chuchee man ta'níí xo' caráán xo' xcóo xo' xráá ta'níí xo' ro', danj guun raj qui'yáj man soj, tzaj ne

ne ca'vej rá soj qui'yáj danj a ma'.

<sup>35</sup>Yaj me se cutumé ma'an soj man soj nanj adonj. 'O se cuano nihánj me se cataj xna'anj 'unj rihaan soj se vaa rej rihaan ní' ro', se quene'en uún soj manj ma'. Tzaj ne ndaa güii ca'na' uún 'unj rihaan chumii nihánj quene'en soj manj, ne cataj soj: “Ve'é uxrá 'na' síf a'née síf 'nij ra'a man ní' ei”, cataj soj a —taj Jesucristó ni'yaj so' man nij síf man Jerusalén yo' a.

**Nana nihánj taj xna'anj se vaa nahuun snó'o quixíj cu'maan man, qui'yaj Jesucristó güii naránj rá nij yuvii israelitá a**

**14** Dan me se 'o güii naránj rá nij yuvii israelitá me se catúj Jesucristó rá ve' tucúa 'o síf uun chij rihaan nij síf fariseo cha so' chraa, ne nij síf fariseo ro', tumé uxrá man so' daj qui'yaj so' a. <sup>2</sup>Ne veé danj nicun' 'o síf quixíj cu'maan man rihaan Jesucristó a. <sup>3</sup>Gaa ne xná'anj Jesucristó man nij síf naqui'yaj cuu se-tucuanj Moisés rihaan yuvii do', man nij síf fariseo do', cataj so':

—No xcúún ní' ca'nee ní' chi'ii xráá síf ran' güii naránj rá ní', rá soj na'. Ase ne nó xcúún ní' xa' —taj Jesucristó, xná'anj Jesucristó man nij so' a.

Tzaj ne guun dínj tu'va nij so' a.

<sup>4</sup>Gaa ne quita'aa Jesucristó man síf ran' yo', ne nahuun sa' so', qui'yaj Jesucristó, gaa ne na'née Jesucristó chrej man so' a. <sup>5</sup>Gaa ne ni'yaj Jesucristó rihaan nij síf fariseo yo', cataj so' a:

—Ne sese quinij ta'níí 'o tuvi' soj do', 'o daán soj scúj do', rá cuxruj

na güii naránj rá ní', ne ra'yanj quirií soj man ta'níí soj do', man daán soj do', rá 'unj ei —taj Jesucristó rihaan nij síí fariseo a.

<sup>6</sup>Veé dan me se a 'ó nana ne quirií nij so' ca'mií nij so' rihaan Jesucristó ma'.

**Nana nihánj taj xna'anj se vaa se nano' ní' rej sa' doj quitaj ní' a**

<sup>7</sup>Dan me se quene'en Jesucristó se vaa nij síí 'na' tucua' síí fariseo yo' ro', nano' ndo'o nij so' rej sa' doj quitaj nij so', gaa ne che'é dan tucu'yón Jesucristó nana nihánj man nij so', cataj so' a:

<sup>8</sup>—Asa' canacúún ta'aj nii mán so' ca'anj so' cha'anj nara'aa, ne se ca'anj quitaj so' chruun xlá sa' doj ma'. 'O se ne ne'én so' sese canacunj nii man yo'ó síí sa' doj rihaan so' ne quitaj so' chruun xlá taj so' man adonj. <sup>9</sup>Ne síí 'yaj cha'anj ro', cataj so' rihaan so': “Rque so' chruun yo' quitaj síí nihánj á”, cataj so' rihaan so', gaa ne guun na'aj so', ne chruun xlá nij doj ca'anj quitaj so', qui'yaj so' a. <sup>10</sup>Dan me se asa' canacúún nii mán so', ne asa' cuchí' so' rej canuú cha'anj, ne rej nij doj ro', quitaj so' ei. Gaa ne asa' ca'na' síí canacúún mán so', gaa ne cataj so' rihaan so': “Cavii so' quitaj so' rej sa' doj nihánj, tinuj”, cataj so' rihaan so', gaa ne caraya'anj uxrá cunudanj nij síí 'na' cha'anj yo' ni'yaj nij so' mán so' nanj adonj. <sup>11</sup>'O se xa' síí me rá tjavii sa' man ma'an, tzaj ne quiri' so', ne guun na'aj so' adonj. Ne xa' síí 'yaj nica' nimán, tzaj ne cavii sa' so' adonj —taj Jesucristó rihaan nij síí fariseo do', rihaan nij

síí naqui'yaj cuu se-tucuanj Moisés rihaan yuvii do' a.

**Nana nihánj taj xna'anj me síí canacunj ní' cha chraa ga ní' a**

<sup>12</sup>Gaa ne cataj Jesucristó rihaan síí canacúún man so' cha so' chraa a:

—Asa' guun rá so' ca'na' yuvii cha yuvii chraa ve' tucua' so', ne se canacúún so' man tuví' so' do', man tinúú so' do', man nij síí ru'vee man chiháán so' do' ma'. Dan me se sese canacunj so' man inan' ma'an nij so', gaa ne vaa güii canacunj nij so' mán so' cha so' chraa ga nij so', gaa ne dan me se aj naru'vee nij so' nu' se chá rihaan so' danj rá se vaa gaa nanj adonj. <sup>13</sup>Tzaj ne asa' canuú cha'anj qui'yáá so', ne canacunj so' man nij síí nique do', man nij síí rengo do', man nij síí tuchrii do', cha nij so' chraa ei. <sup>14</sup>Danj qui'yáá so', gaa ne nij so' me se taj rasuun rihaan nij so' naru'vee nij so' rihaan so' ma'. Gaa ne asa' cunuu i'na' uún nij síí sa' rihaan Diose, ne ma'an Diose naru'vee rihaan so', gaa ne cavii sa' uxrá so' adonj —taj Jesucristó rihaan síí canacúún man so' cha so' chraa a.

**Cuentó nihánj taj xna'anj me síí cha chraa ga Diose asa' guun chij Diose rihaan chumii nihánj a**

<sup>15</sup>Dan me se cuno yo'ó síí chá chraa ga Jesucristó nana ca'mii Jesucristó, gaa ne che'é dan cataj so' rihaan Jesucristó a:

—Cavii sa' cunudanj nij síí cha chraa ga Diose asa' guun chij Diose rihaan chumii nihánj nanj ei —taj so' rihaan Jesucristó a.

<sup>16</sup>Gaa ne cataj Jesucristó rihaan so' a:

—Síí navij rá cha'anj nocoo ndo'o me so', ne nacúún so' ca'na' que'ee yuvii a. <sup>17</sup>Gaa ne dan me se maan orá cha nij so' chraa me ca'née sí navij rá cha'anj man se-mozó so' ca'anj cataj mozó yo' rihaan nij sí ca'na' se vaa ca'na' nij so' cha'anj cha nij so' chraa a. “Aj quisij guun chuvii, ne ca'anj ní' cha nij soj chraa ei”, taj mozó yo' rihaan nij sí ca'na' cha'anj yo' a. <sup>18</sup>Gaa ne guun che'e nij so' cataj 'o 'o nij so' rihaan mozó yo' se vaa se ca'vee cuchí' nij so' cha nij so' chraa a. Dan me se yo'o so' cataj: “Tzaj ne 'unj me se tihaj quiránj 'unj 'o yo'óo, ne vaa che'é ndo'o ca'anj 'unj quene'én 'unj yo'óo yo' a. Ne qui'yáá so' se ndo'o, cataj so' se vaa se ca'vee cuchí' 'unj ma'”, taj so' rihaan mozó yo' a.

<sup>19</sup>Gaa ne yo'ó so' cataj: “Maan se 'unj me se 'un' yuntá scúj quiránj 'unj, ne cuano nihánj me se ca'anj 'unj quene'én 'unj daj vaa scúj quiránj sese scúj sa' me xo' a. Ne che'é dan qui'yáá so' se ndo'o cataj so' se vaa se ca'vee cuchí' 'unj ma'”, taj so' rihaan mozó yo' a. <sup>20</sup>Ne yo'ó so' ro', cataj uún rihaan mozó yo' a: “'Unj me se tihaj xcaj 'unj chana, ne che'é dan se ca'vee cuchí' 'unj ma'”, taj so' rihaan se-mozó síí navij rá cha'anj yo' a. Ne veé danj ca'mii cunudanj nij síí aj quiri' ni'yaj ca'anj cha'anj yo' a.

<sup>21</sup>”Dan me se namán mozó, ne nata' mozó nu' se vaa ca'mii 'o 'o nij so' rihaan se-ru'vee mozó a. Gaa ne ca'maan ndo'o rá síí navij rá cha'anj yo' gaa cuno so' se-nana se-mozó so', ne cataj so' rihaan

se-mozó so': “Ra'yanj cavii so' ca'anj so' daj a nij callé, ne nicaj so' man nij síí nique do', man nij síí chéé rengo do', man nij síí tuchrii do', ca'na' so' nihánj, ne cha nij so' chraa ga ní' ei”, taj so' rihaan se-mozó so' a. <sup>22</sup>Veé danj quilyaj se-mozó so', ne cuchí' uún mozó yo' rihaan se-ru'vee so', ne cataj so': “Aj quilyáa nu' se vaa cataj so' rihanj, señor. Tzaj ne vaa rej quisij catuu doj yuvii uún a”, taj mozó yo' rihaan se-ru'vee so' a. <sup>23</sup>Gaa ne cataj ru'vee yo' rihaan mozó a: “Cavii so' ca'anj so' nu' nij chrej ca'aan do', nu' nij chrej catuun do', ne quilyáa so' fuerzá man nij yuvii se vaa ca'na' nij so' á. Gaa ne caraa nu' ve' tucuaq ei. <sup>24</sup>O se cuano nihánj me se cataj xna'anj 'unj rihaan so' se vaa xa' nij síí canacúún ní' asino yaan, tzaj ne a 'ó nij so' se ca'vee ca'na' cha chraa ga ní' a man adonj”, taj so' rihaan se-mozó so' a. —Veé danj quisij cuentó nanó Jesucristó a.

**Nana nihánj taj xna'anj se vaa yuun che'e ca'nej nimán ní' canoco' ní' man orún' Jesucristó a**

<sup>25</sup>Dan me se que'ee uxrá yuvii vaj ga Jesucristó, ne canicaj so', cataj so' rihaan nij yuvii a:

<sup>26</sup>—Sese me rá 'o so' ca'na' so' rihanj, ne sese guun rá so' se vaa sa' doj vaa rej so' do', nii so' do', nica so' do', ta'níí so' do', tinúú so' do', ra'vij so' do', ndaa nimán ma'an so' do', rihanj, ne se ca'vee guun so' 'o síí tucu'yón se-nanaj a ma'. <sup>27</sup>Ne síí na'vej rá quiran' sayuun che'é se me so' síí nocó' manj ro', se ca'vee guun so' 'o síí tucu'yón se-nanaj a ma'.

<sup>28</sup>”Dan me se soj, tzaj ne sese guun rá yo'ò tuvi' soj cune' yo'ò soj ve' nata' xcaan, ne sí quiyaj ve' yo' me se asino nuchruj raa so' cuentá sese quisij se-sa'anj so' quisij nu' ve' yo', raj a. <sup>29</sup>Ne sese se quiyaj so' danj nuchruj so' cuentá asino yaan, gaa ne asa' cuchruj so' tacóo ve', gaa ne se guun nucuaj so' quiyaj so' nu' ve' a ma'. Ne nij sí ne'en se vaa quiyaj so' ro', ca'nga' nacoo nij so' ni'yaj nij so' man so', <sup>30</sup>ne cataj nij so': “Sí nihánj me se guun che'e so' cune' so' ve', tzaj ne ne guun nucuaj so' quisij nu' ve' quiyaj so' a ma'”, cataj nij so' ni'yaj nij so' man sí guun che'e ve' yo' a.

<sup>31</sup>”Ne dan me se sese vaa 'ò sí nicaj suun rey vaa chi' mij tanuu rihaan, ne sese ca'na' yo'ó sí nicaj suun rey vaa icò mij tanuu rihaan cunu' ga so', gaa ne asino yaan xcaj so' cuentá sese guun nucuaj so' quiyaj canaán so' rihaan sí vaa icò mij tanuu rihaan yo', ne sese guun nucuaj so' rá so', ne cavi' so' cunu' so' ga nij sí 'na' yo' a. <sup>32</sup>Tzaj ne sese se guun nucuaj so' quiyaj canaán so' rá so', gaa ne ca'nej so' sí ca'anj suun ca'mii ga sí 'na' yo' ndaa vaa se guun cunu' nij so' a. Danj cataj so' gaa tihaj 'na' sí cunu' ga so' gan' a. Gaa ne cachin ni'yaj sí ca'anj suun yo' rihaan sí 'na', ndaa vaa ca'ne' rá so' ga suun cunu' a.

<sup>33</sup>”Dan me se ase vaa xcaj sí cune' ve' do', sí cunu' ga tuvi' do', cuentá sese guun nucuaj roj so' quiyaj roj so' danj ro', veé danj quiyaj guee soj sij me rá canoco' manj ei. Ne sese se guun rá soj tanáj xcò soj nu' si'yaj soj do', nu'

tuvi' soj do', canoco' soj manj, ne se ca'vee guun soj sí tucuyón se-nanaj a ma'.

<sup>34</sup>”O se ase vaa yaan ga chraa ro', danj vaa nij sí tucuyón se-nanaj ga chumii nihánj, ne vaa se uun ndo'o yaan nanj á. Dan me se sese ne 'ne' chá yaan yo', gaa ne taj se quiyá' cunu sa' yaan gaa a ma'. <sup>35</sup>Taj se guun yaan yo' rihaan to'óo ní' cunu sa' to'óo ní' ma'. Taj se guun yaan yo' rihaan ya'luj se vaa cunu sa' doj ya'luj ma'. A doj rasuun se cavii sa', quiyaj yaan yo' ma'. Maan se ri'ij uun nii man yaan vaa danj xe' a.

”Dan me se sese taj yu'uj xrée soj, ne cunò soj nana nihánj ei —taj Jesucristó rihaan nij yuvi' yo' a.

#### Nihánj me cuentó che'é matzinj ca'anj ni'ya a

**15** Dan me se cuchi' que'ee sí a'néj puextó do', que'ee sí tumé cacun' do', rihaan Jesucristó a. 'O se guun rá nij so' cunò nij so' se-nana so' a. <sup>2</sup>Ne xa' nij sí fariseo do', nij sí naqui'yaj cuu se-tucuanj Moisés rihaan yuvi' do', tzaj ne ca'maan rá nij so' ni'yaj nij so' man Jesucristó, ne nij ca'mii nij so' che'é so', che'é rej ve'é nicaj tuvi' so' ga nij sí tumé cacun' ne chá so' chraa ga nij so' a. <sup>3</sup>Gaa ne nanó Jesucristó 'ò cuentó nihánj rihaan nij so' a:

<sup>4</sup>—Dan me se sese yo'ò tuvi' nij soj nicaj 'ò cientó matzinj, ne sese ca'anj ni'ya orún' guee daán so' matzinj, ne tanáj so' yo'ó ca'anj chihaa xnu' ca'anj daán so' matzinj rej tacaan, ne cavi' so' ca'anj nano' so' man orún' daán so' matzinj ca'anj ni'ya á. Ne se ca'ne' rá

so' ma'. Tananj ya ca'anj so' nano' so' man daán so' matzinj, gaa ne uun daj nari' so' man yo' adonj. <sup>5</sup>Ne asa' quisij nari' so' man xo', gaa ne cuta' so' man xo' tacaan xcóo so', ne guun niha' ndo'o rá so' a. <sup>6</sup>Ne asa' namán so' tucúa so', gaa ne nacunj so' man nu' tuvi' so' síi ne chiháan so', ne cataj so' rihaan nij tuvi' so': "Guun niha' rá soj gaj ei. 'O se narij danj matzinj ca'anj ni'ya ei", cataj so' rihaan tuvi' so' a. <sup>7</sup>Ne cuano nihánj me cataj xna'anj 'unj rihaan soj se vaa xta' rej ne Diose ro', guun niha' doj rá nij síi man yo' ni'yaj nij so' man orún' síi tumé cacun' gaa canicaj nimán so' canoco' so' chrej sa' a. Tzaj ne se caráya'anj nij so' man ca'anj chihaa xnu' ca'anj, ése sij sa' me nij so', rá nij so' ma', ne taj che'é canoco' nij so' tucúaán naca narqué Diose, rá nij so' ma' — taj Jesucristó rihaan nij so' a.

### Nihánj me cuentó che'é pesó xoo ca'anj ni'ya a

<sup>8</sup>Ne cataj uún Jesucristó a:  
—Ne sese nicaj 'o chana chi' pesó xoo, ne sese ca'anj ni'ya orún' pesó xoo yo', ne tucuaço' no' ya'an aga' chuguun, ne naca' no' nu' ve' tucúa no', ne uxrá nano' no' pesó xoo yo', ne se ca'ne' rá no' ma'. Tananj uxrá nano' no' man pesó xoo yo', uun daj nari' ya' no' man yo', gaa ne ca'ne' rá no' adonj. <sup>9</sup>Ne asa' quisij nari' no' pesó xoo yo', gaa ne canacunj no' man nu' tuvi' chana no' níi ne x'núu ve' tucúa no', ne cataj no' rihaan nij tuvi' chana no': "Guun niha' rá soj gaj á. 'O se narij se-sa'anj pesó xoo ca'anj ni'ya ei", cataj no' rihaan tuvi' chana no' a. <sup>10</sup>Dan me se cataj

xna'anj 'unj rihaan soj a. Ndaa rá se vaa guun rá chana gaa nari' no' se-sa'anj no' ro', danj guun niha' uxrá rá nij se-mozó Diose ni'yaj nij so' man orún' síi tumé cacun' gaa canicaj nimán so' canoco' so' chrej sa' adonj —taj Jesucristó rihaan nij so' a.

### Nihánj me cuentó che'é síi tumé cacun' canicaj rihaan rej a

<sup>11</sup>Gaa ne cataj uún Jesucristó a:  
—'O síi vaa vij ta'níi me so' a.  
<sup>12</sup>Ne cataj síi cunj rihaan rej so' a:  
"Me rá 'unj cuxra' ta'aj so' rasuun rque so' manj guun si'yáj, ataj", taj so' rihaan rej so' a. Gaa ne cuxra' ta'aj snó'o yo' nu' si'yaj so', ne rque so' ta'aj si'yaj so' rihaan 'o 'o ta'níi so' a. <sup>13</sup>Dan me se cachén doj güii, gaa ne naquiyaj chre' síi cunj yo' nu' si'yaj so', ne cavii so' ca'anj so' chuman' naj gan', ne quiyaj ndo'o so' se nij, ne cutun' rma'an so' nu' se-sa'anj so' a. <sup>14</sup>Quisij cutun' so' nu' se-sa'anj so', gaa ne cachén ndo'o x'naa chuman' yo', ne guun che'e so' quiran' ndo'o so' sayuun, ne quina'aan ndo'o rque so', ne taj vaj a doj se chá rihaan so' cha so' a. <sup>15</sup>Dan me se catúj so' rihaan 'o síi chihanj chuman' yo', ne ca'ne' síi chihanj chuman' yo' suun rihaan so' ca'anj so' se-rancho síi chihanj yo' cutumé so' xcáa a. <sup>16</sup>Tzaj ne na'aan ndo'o rque so', ne ndaa guun rá so' cha so' coj go' nii cha nij xcáa a. Tzaj ne ne rque nii coj yo' cha so' a ma'.

<sup>17</sup>"Dan me se 'o güii ne nahuun sa' raá so', ne guun che'e so' xcax so' cuentá, ne nanuj rá so' rej so' a. Ne me rá so': "Nij se-mozó réj, tzaj ne

man ndo'o se chá rihaan réj, ne man ndo'o se chá rihaan se-mozó réj a. Ne nihánj me caví' 'unj qui'yaj x'naa nanj á. <sup>18</sup>Naxumaan 'unj, ne nán' 'unj rej ne réj, cataj 'unj rihaan réj: Tumej cacun' rihaan Diose, ne tumej cacun' rihaan so', ataj. <sup>19</sup>Taj che'é cataj so' se vaa ta'níi so' mej cuano a ma'. Maan se qui'yáa so' se ndo'o, ne guún 'unj mozó rihaan so', qui'yáa so', ruguanj, cataj 'unj rihaan réj", guun rá síi cunij yo' a.

<sup>20</sup>Gaa ne cavii so' ca'anj so' rej ne rej so' a. Dan me se gan' ndo'o vaj so' chée so', ne quene'en rej so' man so', ne cunuu 'ee ndo'o rá rej so' man so', ne cunánj rej so' ndaa rej vaj so', ne na'yaan rej so' man so', ne cachrón tu'va rej so' man so' a. <sup>21</sup>Gaa ne cataj síi cunij yo' rihaan rej so' a: "Tumej cacun' rihaan Diose, ne tumej cacun' rihaan so', ataj. Taj che'é cataj so' se vaa ta'níi so' mej cuano a ma'. Maan se qui'yáa so' se ndo'o, ne guún 'unj mozó rihaan so', qui'yáa so', ruguanj", taj so' rihaan rej so' a. <sup>22</sup>Tzaj ne ca'mii rej so' rihaan nij mozó man rihaan rej so', cataj rej so': "Ra'yanj nıcaj soj yatzıj sa' ndo'o ca'na' soj cunuú ta'nıj, ne ca'na' se'ej sa' cunuú ra'a ta'nıj, ne ca'na' canj naca qui'nij tacóo so' á. <sup>23</sup>Ne ticavı' soj man scúj le'ej ramii ndo'o, ne qui'yaj chuvıi soj, ne cha ní', ne qui'yaj ní' cha'anj, ne guun niha' uxrá rá ní' ei. <sup>24</sup>Q se ta'nıj nihánj me se ase vaa síi cavı' gaa so' rıhanj, tzaj ne nihánj me se cunuu i'na' uún so' rıhanj, ne ase vaa síi ca'anj ni'ya gaa so', tzaj ne nihánj me se narij man so' nanj adonj", taj

rej so', ne guun che'e nij so' guun niha' uxrá rá nij so' a.

<sup>25</sup>"Tzaj ne vaa síi chava' uún, ne 'yaj suun so' se-ranchó rej so' a. Dan me se 'na' nique síi chava' yo', ne gaa quinichrun' so' ve', ne cuno so' se vaa go' ndo'o misca chra' do', se vaa ra'ánj ndo'o yuvıi do' a. <sup>26</sup>Gaa ne canacúun síi chava' yo' man 'o mozó, ne ca'na' yo'o mozó rihaan so', ne xná'anj so' man mozó, ne: "Me che'é 'yaj nii nu' cha'anj ga", taj so' rihaan mozó yo' a. <sup>27</sup>Gaa ne cataj mozó rihaan so' a: "Namán tinúú so', ne cavı' scúj le'ej ramii ndo'o, qui'yaj rée so', che'é se nari' uún so' ta'nıi so' ne vaa nucuaj ta'nıi so' nari' so' a", taj mozó rihaan síi chava' yo' a.

<sup>28</sup>"Dan me se ca'maan rá síi chava', ne na'vej uxrá rá so' catuu so' rá ve' a. Tzaj ne curıhanj rej so', gaa ne canacúun rej so' man so' ca'na' so' a. <sup>29</sup>Tzaj ne cataj so' rihaan rej so' a: "Unj nihánj me se aj quisıj que'ee yo' qui'yaj suun 'unj rihaan so' nihánj, ne cunudanj nij nana cataj xna'anj so' rıhanj ve'é cunoj a. Ne a 'ó güii ne rque so' a 'ó tana le'ej rıhanj ne qui'yaj chuvıi 'unj ne chaj ga nij tuvıj a ma'. <sup>30</sup>Tzaj ne nihánj me se namán ta'nıi so' síi chá nu' si'yáa so' gaa chée so' ga nij chana niha' rá, ne ticavı' so' scúj le'ej ramii che'é so' a", taj síi chava' yo' rihaan rej so' a.

<sup>31</sup>"Gaa ne cataj rej so' rihaan so' a: "Maan se so' me se 'o né so' ga 'unj nihánj, rej. Ne nu' rasuun si'yáj me si'yáa so', rej. <sup>32</sup>Tzaj ne vaa che'é guun niha' rá ní' gaa namán tinúú so', rej. 'Q se tinúú so' ro', ase vaa 'o síi cavı' gaa so' rıhanj,

tzaj ne nihánj me cunuu i'na' uún so', ne ase vaa 'o sí ca'anj ni'ya gaa so' rihanj, tzaj ne cuano nihánj me se aj narij man so' nanj adonj", taj rej so' rihaan sí chava' yo' a. —Veé danj quisj cuentó nanó Jesucristó rihaan nij so' a.

**Cuentó nihánj taj xna'anj daj qui'yaj ní' ga si'yaj ní' rihaan chumií nihánj, ne ca'vee cayáán ní' ga Diose asa' guun chij Diose rihaan chumií nihánj a**

**16** Gaa ne cataj Jesucristó rihaan nij sí tucu'yón se-nana so' a:

—Sí ru'vee me yo'o so', ne nuu 'o mayordomo rihaan so' sí tumé nu' si'yaj so' a. Dan me se cuta' nii cacun' xráá mayordomo yo' rihaan ru'vee se vaa cutun' ndo'o so' si'yaj ru'vee a. <sup>2</sup>Gaa ne canacúun ru'vee man mayordomo, ne ca'na' mayordomo rihaan so', ne cataj so' rihaan mayordomo yo' a: “Aj ca'na' nana rihanj se vaa cutun' ndo'o so' si'yáj, ne ne ne'en uxraj me che'é qui'yáá so' danj a ma'. Tzaj ne cataj xna'anj so' rihanj daj qui'yáá so' gaa cutumé so' si'yáj á. 'O se se ca'vee cunuú so' doj rihanj cutumé so' si'yáj a ma'”, taj ru'vee rihaan mayordomo yo' a.

<sup>3</sup>Dan me se curihanj mayordomo, ne guun rá so' a: “Nihánj me se daj qui'yáj, ne ca'nee se-ru'vee 'unj suun ra'aj, ne daj qui'yáj cuano, raj a. 'Unj me se se guun nucuáj qui'yaj suun 'unj suun 'ee, ne na'aj 'unj cachinj 'unj caridad, na'aj 'unj cachee rma'anj nanj á. <sup>4</sup>Aan a. Nihánj me qui'yáj nanj á. Gaa ne asa' ca'néj ru'vee suun ra'aj

gaa ne nuvi' rej ca'anj 'unj, gaa ne canacunj yo'ó nij so' manj ca'anj 'unj tucua' yo'ó nij so' cayánj a”, guun rá so' a.

<sup>5</sup>Gaa ne canacúun so' man nij sí qui'yaj xcúun rihaan se-ru'vee so', ne ca'na' 'o 'o nij so' rihaan so' a. Gaa ne rihaan sí taj yaan rihaan yo'ó nij so' cataj so': “Me daj qui'yaj xcúun so' rihaan se-ru'vee 'unj ga”, taj so', xná'anj so' man sí taj yaan yo' a. <sup>6</sup>Gaa ne so' cataj: “O cientó tambo casté qui'yaj xcúnj rihaan se-ru'vee so' a”, taj so' rihaan mayordomo yo' a. Gaa ne cataj mayordomo yo' rihaan so': “Nica'j so' dáan so' yanj cuentá nihánj, tirí' so' man yo', ne ra'yanj cayáán so', ne qui'yáá so' yo'ó yanj naca, ne cachron so' rihaan yanj naca se vaa vij chihaa chi' guee tambo qui'yaj xcúun so' á”, taj mayordomo yo' rihaan sí taj yaan yo' a. <sup>7</sup>Gaa ne xná'anj so' man yo'ó so', cataj so': “Ne so' ga. Me daj qui'yaj xcúun so' rihaan se-ru'vee 'unj ga”, taj so', xná'anj so' man yo'ó so' yo' a. “O cientó nanj 'núu trigó a”, taj yo'ó so' a. “Nica'j so' dáan so' yanj cuentá nihánj, tirí' so' man yo', ne qui'yáá so' yo'ó yanj naca, ne ca'anj chihaa guee nanj cachron so' rihaan yanj naca yo' á”, taj mayordomo rihaan yo'ó so' a.

<sup>8</sup>Dan me se xcaj se-ru'vee mayordomo yo' cuentá se vaa qui'yaj chi'ii ndo'o mayordomo yo' rihaan so', tzaj ne ca'mii sa' ru'vee che'é mayordomo cataj ru'vee se vaa sij avii ndo'o raá me mayordomo yo' adonj. Danj nanj nij sí man rihaan chumií nihánj cuano, tzaj ne gaa 'yaj suun nij



so' ga tuvi' ma'an nij so', ne doj a avii raā nij so' rihaan nij sís noco' se-nana Diose nanj á.

<sup>9</sup>”Gaa ne cuano nihánj me se cataj xna'anj 'unj rihaan soj se vaa nij rasuun man rihaan chumii nihánj, tzaj ne 'yaj ndo'o nij yuvii cacun' che'é rej qui'yaj canaán nij yuvii rasuun man rihaan chumii nihánj, ne soj ro', vaa che'é nīcay soj si'yaj soj rasuun man rihaan chumii nihánj, ne go' soj man yuvii gaa ne guun tuvi' soj ga nij yuvii, qui'yaj rasuun yo' a. Ne güii navij nu' rasuun man rihaan chumii nihánj me se aj quiri' ndo'o soj tuvi' soj sís cayáán ga soj, gaa ne ve'é ndo'o cayáán soj ga nij tuvi' soj ga Diose rej xta' nu' cavii nu' ca'anj a. <sup>10</sup>’Q se sís ve'é tumé doj tzin' rasuun ro', so' me sís guun nucuaj cutumé noco rasuun, ne sís 'yaj chi'ii ga doj rasuun ro', chi'ii doj qui'yaj so' ga noco rasuun ei. <sup>11</sup>Che'é dan sese ne guun nucuaj soj cutumé sa' soj nij rasuun chi'ii man rihaan chumii nihánj, gaa ne me sís guun rá rque nij rasuun ya rihaan soj cutumé soj, rá soj ga. Taj vaj sís guun rá qui'yaj danj a ma'. <sup>12</sup>Ne nuveé si'yaj ma'an ya soj me nij rasuun man rihaan chumii nihánj a man adonj. Ne sese ne guun nucuaj soj cutumé sa' soj nij rasuun man rihaan chumii nihánj, ne me sís guun rá rque rihaan soj rasuun guun si'yaj ma'an ya soj rej xta', rá soj ga. Taj sís guun rá qui'yaj danj ma'.

<sup>13</sup>”Taj vaj sís guun nucuaj cutumé sa' si'yaj vij ru'vee ma'. Sese qui'yaj suun ní' rihaan vij ru'vee, ne nachri' ní' ni'yaj ní' man 'o ru'vee

yo', ne caran' rá ní' ni'yaj ní' man yo'ó ru'vee yo' a. Se guun nucuaj ní' caran' rá ní' ni'yaj ní' man vij ru'vee ma'. Ne xa' soj, tzaj ne se ca'vee qui'yaj suun soj che'é Diose ne qui'yaj suun soj che'é nij rasuun man rihaan chumii nihánj a ma' — taj Jesucristó rihaan nij sís tucu'yón se-nana so' a.

**Nana nihánj taj xna'anj se vaa tumé nij sís fariseo cacun' rihaan se-tucuanj Moisés a**

<sup>14</sup>Dan me se nij sís fariseo ro', me sís aran' ndo'o rá ni'yaj sa'anj, ne gaa cuno nij so' cunudanj se-nana Jesucristó nana che'é rasuun man rihaan chumii nihánj, gaa ne ca'nga' nacoo nij so' ni'yaj nij so' man Jesucristó a. <sup>15</sup>Gaa ne cataj Jesucristó rihaan nij so' a:

—Xa' soj, tzaj ne nuvi' cacun' tumé soj ni'yaj yuvii, 'yaj soj ma'. Tzaj ne Diose ro', me sís ne'en daj vaa nimán soj adonj. 'Q se sa' uxrá vaa 'yaj yuvii, rá tuvi' yuvii, tzaj ne chi'ii ndo'o 'yaj nij yuvii, rá Diose nanj adonj.

<sup>16</sup>”’Q se gaa ataa ca'na' sís cu'naj Juan sís cuta' ne man yuvii me se cuno yuvii rihaan inanj se-tucuanj Moisés do', rihaan nij sís nata' se-nana Diose gaa naá do', tzaj ne yaj me se uno ndo'o yuvii nana sa' nana che'é güii guun chij Diose nimán yuvii man rihaan chumii nihánj, ne me inanj rá cunudanj nij yuvii cataj ma'an nij yuvii daj qui'yaj Diose asa' guun chij Diose adonj. <sup>17</sup>Tzaj ne ne nó xcúún ní' tanáj ní' a 'ó nana rque Diose rihaan ní' canoco' ní' ma'. 'Q se ca'vee a doj quinavij rej xta' do',

ca'vee a doj quinavij chumiĭ nihánj do', tzaj ne se ca'vee quinavij a doj nana rqué Diose rihaan ní' canoco' ní' ma'. <sup>18</sup>Dan me se sese quiri'ij yo'o so' man nica so', ne sese xcaj so' man yo'ó chana, ne cutumé so' cacun', ne sese xcaj yo'o so' man chana quiri'ij chii man, ne cutumé so' cacun' uún adonj —taj Jesucristó rihaan nij síí fariseo yo' a.

### Nihánj me cuentó nanó

Jesucristó che'é ru'vee ne che'é  
'o síí nique cu'naj Lázaro a

<sup>19</sup>Gaa ne nanó Jesucristó cuentó nihánj a:

—Ru'vee me yo'o so', ne yatzíj sa' inanj cunuú so', ne daj a güii uun ndo'o nihaa sa' tucua so', ne guun niha' uxrá rá so' rihaan chumiĭ nihánj a. <sup>20</sup>Ne naj 'o síí nique cu'naj Lázaro rihaan yo'óo ta'yaave' tucua ru'vee yo', ne mán ndo'o luj xráa síí nique yo', <sup>21</sup>ne guun rá síí cu'naj Lázaro cha so' se quiniĭ rihaan yo'óo rej chá ru'vee yo' chraa, tzaj ne daj doj chuvee ca'na' chavé luj xráa so' a.

<sup>22</sup>Dan me se gaa quisíj güii cavi' síí nique yo', gaa ne nicaj nij se-mozó Diose man so' ca'anj so' rej sa', ne na'yaan síí cu'naj Abraham man so' a. Ne cavi' ru'vee uún, ne cachin' nii man so' a. <sup>23</sup>Dan me se ca'anj so' rihaan ya'an, ne quiran' uxrá so' sayuun rihaan ya'an yo', gaa ne naxcaj so' rihaan so', ne quene'en so' se vaa gan' ndo'o ne síí cu'naj Abraham, ne na'yaan Abraham man síí cu'naj Lázaro yo' a. <sup>24</sup>Gaa ne canacúun so' man síí cu'naj Abraham,

cataj so': “Cunuú 'ee rá so' manj, ataj Abraham. Ne ca'nej so' man síí cu'naj Lázaro se vaa ca'na' so' ne tiguíj so' raá ra'a so' rque na, ne tucua chree so' ra'a so' daa 'unĭj, gaa ne cunuú cuij doj raj qui'yaĭ so', ataj. 'O se na'aan ndo'o manj, 'yaj ya'an nihánj nanĭj á”, taj ru'vee yo' rihaan síí cu'naj Abraham a.

<sup>25</sup>”Tzaj ne cataj Abraham rihaan so': “Tzaj ne nanuj rá so', ta'nĭj, se vaa gaa gaa i'na' so' rihaan chumiĭ ne nicaj so' inanj rasuun sa', ne Lázaro me se inanj rasuun chi'ii nicaj so' nanĭj á. Ne cuano nihánj me se uun niha' nimán so', ne ma'án so' me se ran' sayuun a. <sup>26</sup>Ne danĭj inanj uún, ne nuu 'o yu'uj cunuú ndo'o rej ne ní', ne veé danĭj se ca'vee cuchĭ' yuviĭ man nihánj ndaa rej ne nij soĭ yo', ne síí man yo' se ca'vee ca'na' rej nihánj a ma'”, taj Abraham rihaan ru'vee yo' a.

<sup>27</sup>”Ne cataj ru'vee yo' rihaan Abraham a: “Che'é dan qui'yáa so' se ndo'o, ataj, ne ca'nej so' man síí cu'naj Lázaro ca'anj so' tucua réj, <sup>28</sup>ne vaa 'un' tinúĭj, ne me rá 'unĭj cataj xna'anj so' rihaan nij so' daj rán' 'unĭj nihánj, ne se ca'na' nij so' uún rej rán' 'unĭj sayuun nihánj a ma'”, taj ru'vee rihaan Abraham a. <sup>29</sup>Gaa ne cataj Abraham rihaan so' a: “Vaa se-nana síí cu'naj Moisés do', se-nana nij síí nata' se-nana Diose gaa naá do', nicaj nij so' á. Ca'vee cunoĭ nij so' nana yo' ei”, taj Abraham rihaan ru'vee a. <sup>30</sup>”Se cunoĭ nij so', man ataj Abraham. Tzaj ne sese ca'anj 'o síí cavi' rihaan nij so', gaa ne canicaj nimán nij so' canoco' nij so' chrej sa', raj a”, taj ru'vee rihaan Abraham a.

<sup>31</sup>”Tzaj ne cataj Abraham rihaan so' a: “Sese se ca'vej rá nij so' cunõ nij so' rihaan síi cu'naj Moisés do', rihaan nij síi nata' se-nana Diose gaa naá do', ne ca'vee se cunõ i'na' uún 'o síi cavi', tzaj ne se cuchumán rá nij so' ni'yaj nij so' man so' a ma'”, taj Abraham rihaan ru'vee yo' a. —Veé danj quisíj cuentó nanõ Jesucristó a.

**Nana nihánj taj xna'anj se vaa nõ xcúun ní' racúj ní' man tinúú ní' se qui'yaj tinúú ní' cacun' a**

**17** Gaa ne cataj Jesucristó rihaan nij síi tucuyón se-nana so' a:

—Xa' chumii nihánj, tzaj ne man ndo'o chrej chi'ii canoco' yuvii, ne vaa ya'núj uxrá rihaan nij yuvii canoco' nij yuvii chrej chi'ii adonj. Tzaj ne niqúe síi 'yaj anoco' yuvii chrej chi'ii yo' adonj. <sup>2</sup>Daj chihaa mój se cavii sa' so' ma'. Ne'en soj se vaa sese toco' vaj nii yuvej xij váj 'núú trigó man chihá yo'o so', ne sese tagüéj nii man so' rque na ya'anj, ne nij uxrá vaa ran' síi 'anj nij rque na ya'anj yo' nanj adonj. Tzaj ne nij doj quiran' síi qui'yaj chi'ii nimán yo'o tuvi' soj síi nica' nimán nanj á. 'O se quiran' so' sayuun nu' cavii nu' ca'anj nanj adonj.

<sup>3</sup>”Tumé uxrá soj man soj daj qui'yaj soj á. Sese qui'yaj tinúú so' cacun', ne cataj so' rihaan so' se vaa nij ndo'o qui'yaj so', ne sese canicaj nimán so' tanáj so' chrej chi'ii, ne caraá x'naa so' che'é cacun' tumé so' ei. <sup>4</sup>Dan me se ca'vee se chij ya qui'yaj so' cacun' rihaan so' rque orún' güii, tzaj ne sese chij cuchí'

so' rihaan so' ne cataj so' se vaa canicaj nimán so' ne nij vaa cacun' qui'yaj so' rá so', ne caraá x'naa so' rihaan so' ei —taj Jesucristó rihaan nij síi tucuyón se-nana so' a.

**Nana nihánj taj xna'anj che'é rasuun guun nucuj ní' qui'yaj ní' sese cuchuman rá ní' ni'yaj ní' man Diose a**

<sup>5</sup>Gaa ne nij apóstol cune' Jesucristó man ro', cataj chuvij nij so' rihaan ma'an Jesucristó sij 'nij ra'a man ní' a:

—Cataj xna'anj so' rihaan núj daj qui'yaj núj, gaa ne doj a cuchuman rá núj ni'yaj núj Diose á —taj nij so' rihaan Jesucristó a.

<sup>6</sup>Gaa ne cataj síi 'nij ra'a man ní' rihaan nij so' a:

—Sese daj se 'o snii cuchuman rá soj ni'yaj soj man Diose, ne sese ase vaa caân cuêj mostazá xlá gaa cuchuman rá soj, ne cataj soj rihaan chruun se vaa curihanj chruun yo'óo rej nicun' chruun ne ca'anj chruun canicun' chruun rque na ya'anj, ne cunõ chruun rihaan soj ei —taj Jesucristó rihaan nij so' a.

**Nana nihánj taj xna'anj se vaa se ca'mii xta' ní' che'é suun qui'yaj suun ní' che'é Diose ma'**

<sup>7</sup>Gaa ne cataj uún Jesucristó rihaan nij apóstol cune' so' a:

—Sese vaa mozó nuu rihaan 'o tuvi' soj, ne sese 'yaj suun uxrá mozó uxa' mozó yo' yo'óo do', sese tumé mozó yo' daán soj xcuu do', ne daj cataj soj rihaan mozó nuu rihaan soj asa' namán mozó yo' ca'anj qui'yaj suun mozó tacaan ga. Ne se cataj soj rihaan mozó yo' se vaa nu'

namān mozó nē nū' cayáán mozó chā mozó chraa ma'. Daj chihāā mǐj sē tu'va soj danj a ma'. <sup>8</sup>Maān se cataj soj: “Qui'yaj chūvií so' chā 'unj chraa, nē cuta' so' chraa do', na do', rihaan mesá rej chā 'unj chraa, nē rque so' nij rasuun achiin manj, nē asa' quisíj chaj chraa gaa nē ca'vee chā so' chraa nē co'o so' na á”. Danj ca'mii soj rihaan se-mozó soj nanj á. <sup>9</sup>Nē sē caráya'anj soj man mozó sese qui'yaj suun ndo'o mozó yo' suun ca'ne' soj rihaan mozó yo' ma'. <sup>10</sup>Nē ase vaa mozó nuu rihaan Diose vaa soj, nē che'é dan asa' quisíj qui'yaj suun soj nū' suun ca'ne' Diose rihaan soj, nē cataj soj se vaa mozó rmií me soj, nē inanj do' suun ataj Diose rihaan soj qui'yaj suun soj nanj adonj —taj Jesucristó rihaan nij so' a.

**Nanā nihánj taj xna'anj  
che'é sí samaritano sí nago'  
graciá rihaan Diose a**

<sup>11</sup>Dan me se vaj Jesucristó chrej ca'anj chuman' Jerusalén, nē cachéé so' chrej uun ran' estadó Samaria ga estadó Galilea, <sup>12</sup>nē dan me se daj doj catuu so' 'o chuman', nē nari' tuvi' so' ga chi' sí ran' luj ri'yuj a. Nē gan' canicun' nij so', <sup>13</sup>nē nucuaj canacúun nij so' man Jesucristó, nē cataj nij so':

—Cunuu 'ee rá so' man núj, maestró Jesucristó —taj nij so', caguáj nij so' a.

<sup>14</sup>Gaa nē quene'en Jesucristó man nij so', gaa nē cataj Jesucristó rihaan nij so' a:

—Cavii soj ca'anj soj, nē tīhaan soj man soj rihaan nij xrej á —taj Jesucristó rihaan nij so' a.

Dan me se cuno nij so' nana ca'mii Jesucristó, nē cavii nij so', ca'anj nij so', nē gaa vaj nij so' chrej, nē nahuun sa' cunudanj nij so' ta'aj chrej a. <sup>15</sup>Nē yo'o tuvi' nij so' ro', xcaj cuentá se vaa nahuun sa' so', gaa nē canicaj so' ca'anj so' rej vaj Jesucristó, nē nucuaj ndo'o caguáj so' cataj so' se vaa sa' uxrá qui'yaj Diose ga so' a. <sup>16</sup>Nē gaa cuchi' so' rihaan Jesucristó, gaa nē canicun' ruj so' nē nago' so' graciá rihaan Jesucristó a. Nē sí samaritano sí yaníj ga nij yuvií israelitá me so' a.

<sup>17</sup>Gaa nē cataj Jesucristó rihaan nij sí chéé ga so' a:

—Chi' ya yuvií nahuun sa', qui'yáj, raj a. Nē me rej vaj yo'ó uun nij sí nahuun sa', rá soj ga. <sup>18</sup>Nē a 'ó nij so' ne canicaj cataj se vaa sa' uxrá qui'yaj Diose che'é so' a ma'. Orún' sí yaníj nihánj me sí guun rá cataj daj qui'yaj Diose ga so' na' —taj Jesucristó, xná'anj so' man nij yuvií chéé ga so' a.

<sup>19</sup>Gaa nē canicaj Jesucristó cataj Jesucristó rihaan sí samaritano yo': —Naxumaān so', nē ca'anj so' á. Che'é se amán rá so' ni'yaj so' Diose ro', che'é dan aj nahuun sa' so' ei —taj Jesucristó rihaan so' a.

**Nanā nihánj taj xna'anj che'é  
güii guun che'e Diose guun chij  
Diose rihaan chumií nihánj a**

<sup>20</sup>Dan me se xná'anj nij sí fariseo man Jesucristó me güii guun chij Diose rihaan chumií nihánj a. Gaa nē cataj so' rihaan nij sí fariseo a:

—Taj che'é ni'yaj ndo'o soj ma'. Ca'vee se guun chij Diose rihaan chumií nihánj, tzaj nē sē quene'en yuvií ma'. <sup>21</sup>Nē sē cataj nii: “Ni'yaj

so' ei. Nihánj me guun chij Diose á. Yo' me rej guun chij Diose á". Se ca'mii yuvii danj ma'. 'O se sca'núj ma'an soj vaj 'o sí 'yaj uun chij Diose adonj —taj Jesucristó rihaan nij síí fariseo a.

<sup>22</sup>Gaa ne canicaj Jesucristó cataj so' rihaan nij síí tucu'yón se-nana so' a:

—Vaa güii guun ndo'o rá soj quene'en soj güii nihánj güii vaj 'unj sij ca'née Diose nıcaj yu'unj man yuvii rihaan chumii nihánj, tzaj ne se ca'vee quene'en soj manj ma'. <sup>23</sup>Gaa ne cataj yuvii rihaan soj: “Ni'yaj so' ei. Yo' me rej vaj Jesucristó ei”. Ne cataj uún yuvii: “Ni'yaj so' ei. Nihánj me rej vaj Jesucristó ei”, cataj yuvii rihaan soj a. Tzaj ne se cavii soj nano' soj manj ma'. <sup>24</sup>Dan me se ndaa rá se uun gaa raan rihaan chumii nihánj, ne 'o chuguun nu' rihaan chumii nihánj ro', ne ne'en cunudanj yuvii se vaa raan rihaan chumii á. Ne ase uun rá soj ne'en soj gaa raan ro', danj guun rá soj asa' ca'ná' 'unj sij nıcaj yu'unj man yuvii, ne quene'en nu' yuvii man rihaan chumii nihánj se vaa ca'ná' 'unj adonj. <sup>25</sup>Tzaj ne vaa che'é quirán' 'unj que'ee sayuun asino yaan, gaa ne vaa che'é nachri' nij síí man rihaan chumii nihánj ni'yaj nij so' manj a.

<sup>26</sup>Ne ase vaa qui'yaj yuvii gaa cayáán síí cu'naj Noé rihaan chumii ro', danj gaa qui'yaj uún yuvii asa' ca'na' uún 'unj sij ca'née Diose nıcaj yu'unj man yuvii rihaan chumii nihánj adonj. <sup>27</sup>Dan me se chá yuvii do', co'o yuvii do', ne xcax tuvi' nij yuvii do', inanj danj qui'yaj nij yuvii ndaa quisíj güii catúj nij

tuvi' síí cu'naj Noé rque rihoo xij chée rihaan na a. Gaa ne taj ni'yón caman' ndo'o, ne ca'na' na ya'anj, ne caráán na ya'anj xráá cunudanj nij so', ne cavi' nij so' a. <sup>28</sup>Ne ase vaa qui'yaj nij yuvii man chuman' cu'naj Sodoma gaa cayáán síí cu'naj Lot ro', danj qui'yaj uún yuvii asa' ca'na' uún 'unj rihaan chumii nihánj adonj. Dan me se chá nij so' do', co'o nij so' do', quiránj nij so' rasuun cutu'vej nij so' do', cunô nij so' naa do', cune' nij so' ve' do', <sup>29</sup>ne nu' curihanj síí cu'naj Lot chuman' Sodoma, ne nu' cavii ya'an rej xta' ga yo'óo azufre, cayuu yo' rihaan chuman' yo', ne cacaa nu' chuman' yo', ne cavi' cunudanj nij síí man chuman' yo' a. <sup>30</sup>Ne ase vaa ne xcax nij yuvii man gaa naá cuentá se vaa quirán' nij so' sayuun ro', danj gaa uún yuvii asa' quisíj ca'na' uún 'unj sij nıcaj yu'unj man yuvii rihaan chumii nihánj adonj. 'O se ndaa síj güii quene'en nij so' manj, gaa ne xcax nij so' cuentá a.

<sup>31</sup>Ne güii guun danj me se xa' síí taj xráá ve' tucúa me se se ca'vee catuu so' rá ve' tucúa so' quirii so' si'yaj so' ma'. Ne síí nuu tacaan 'yaj suun tacaan ro', se canicaj so' nano' so' si'yaj so' ma'. Maan se yo'o cunanj nij so' á. <sup>32</sup>Vaa che'é nanuj rá soj daj quiran' nıca síí cu'naj Lot gaa canicaj no' ni'yaj no' rej xco no', ne cavi' no' a.

<sup>33</sup>Síí chu'vi' ndo'o cavi' rihaan chumii nihánj ro', cavi' nu' so', ne síí cavi' ro', so' me síí gaa i'na' nimán nu' cavii nu' ca'anj adonj.

<sup>34</sup>Cuanó nihánj me se cataj xna'anj 'unj rihaan soj a: Ne güii guun danj me se rej ni' ro', quitaj

roj nica roj so' cotoj roj so', ne nacaj se-mozó Diose man yo'ó so', ne quinaj yo'ó so' a. <sup>35</sup>Ne cunuú vij roj chana gaj roj no' 'núú trigó, ne nacaj se-mozó Diose man yo'ó no', ne quinaj yo'ó no' a. <sup>36</sup>Ne cunuú vij roj snó'o qui'yaj suun roj so' yo'óó, ne nacaj se-mozó Diose man yo'ó so', ne quinaj yo'ó so' nanj adonj —taj Jesucristó rihaan nij so' a.

<sup>37</sup>Gaa ne xná'anj nij síi tucu'yón se-nana Jesucristó man so', ne:

—Ne me rej ca'na' so', ga Señor —taj nij so', xná'anj nij so' a.

Gaa ne cataj Jesucristó rihaan nij so' a:

—Aj ne'en soj daj 'yaj yachrúú vaj rej xta', ne ne'en ma'an xo' me rej naj nee cha xo' a. Taj síi nata' rihaan xo' me rej naj nee yo' ma'. Ne ase uun rá yachrúú ro', danj guun rá ma'an soj asa' ca'na' uún 'unj rihaan chumiij nihánj adonj. Quene'en ma'an soj sij man rihaan chumiij nihánj me rej ca'na' 'unj adonj —taj Jesucristó rihaan nij so' a.

**Nihánj me cuentó che'é  
chana cavi' nica cachín ni'yaj  
ndo'o rihaan cuese a**

**18** Ne nanó Jesucristó cuentó nihánj rihaan nij síi tucu'yón se-nana so', che'é rej guun rá so' xcaj nij síi tucu'yón se-nana so' cuentá se vaa no xcúun nij so' niganj cachinj ni'yaj nij so' rihaan Diose, ne se guun rmiij nij so' ma'.

<sup>2</sup>Dan me se cataj Jesucristó a:

—'O cuese cayáan rque 'o chuman' me yo'ó so', ne nuveé sij amán rá ni'yaj man Diose do', nuveé sij aráj cochroj rihaan yuviij do', me

cuese yo' a. <sup>3</sup>Ne yáán 'o chana cavi' nica chuman' yo', ne guun che'é no' cachín ni'yaj no' rihaan so' se vaa qui'yaj so' sayuun man síi qui'yaj sayuun man no' a. <sup>4</sup>Ne a doj ne ca'vej rá so' racuíj so' man no' a. Tzaj ne 'o güiij me se guun rá ma'an cuese yo', ne: “Ca'vee se ne amán raj ni'yaj 'unj Diose do', ca'vee se ne aráj cochroj rihaan yuviij do', <sup>5</sup>tzaj ne che'é se guun rmiij ndo'oj 'yaj chana cavi' nica nihánj, ne che'é dan ca'ne' cachríf 'unj cacun' che'é síi 'yaj sayuun man no', ne ca'vee a. Se taj, ne guun rmiij xréé 'unj, qui'yaj no' vaa güiij adonj”, guun rá cuese yo' a <sup>6</sup>—taj síi 'nij ra'a man ní, ne cataj uún so'— Xcaj soj cuentá daj ca'mii cuese vaa quij nimán yo' á. <sup>7</sup>Ne dan me se táá a nij síi narii Diose, ne nuviij nigan' aguáj ndo'o nij so', achín ni'yaj nij so' rihaan Diose, ne Diose, tzaj ne se ca'ne' Diose cacun' che'é nij síi 'yaj sayuun man nij so', rá soj na'. Guun raan ndo'o Diose ca'ne' so' cacun', rá soj na'. Se guun danj rá soj ma'. <sup>8</sup>'O se cataj xna'anj 'unj rihaan soj cuano se vaa ra'yanj uxrá ca'ne' Diose cacun' che'é nij síi 'yaj sayuun man nij síi narii so' man adonj. Tzaj ne dan me se asa' ca'na' uún 'unj sij nica yu'unj man yuviij rihaan chumiij nihánj, ne me daj yuviij amán rá ni'yaj man Diose narij ga —taj Jesucristó rihaan nij síi tucu'yón se-nana so' a.

**Nihánj me cuentó nanó  
Jesucristó che'é vij síi cachín  
ni'yaj rihaan Diose a**

<sup>9</sup>Gaa ne nanó Jesucristó cuentó nihánj rihaan ta'aj yuviij guun rá se

vaa sij sa' inan̄j me ma'an̄ nij so' ne nachri' nij so' ni'yaj̄ nij so' man yo'ó yuvī a:

<sup>10</sup>—Canicun' vij snó'o rá nuví nocoo, cachíin̄ ni'yaj̄ roj so' rihaan̄ Diose a. Yo'ó so' ro', me sí fariseo, ne yo'ó so' ro', me sí tiha' yu'unj̄ man yuvī che'é puextó a.

<sup>11</sup>”Dan me se canicun' sí fariseo yo', ne cachíin̄ ni'yaj̄ so', ne cataj̄ so' naná nihánj̄ rihaan̄ Diose a. 'O se ne ca'miī nucaj̄ so' ma'. Maan̄ se rihaan̄ ma'an̄ so' ca'miī so', cataj̄ so': “Guun̄ ni'yaj̄ uxrá ní, Ataj̄ Diose. Guun̄ ni'yaj̄ uxrá ní se vaa ne 'yáá 'unj̄ ndaa vaa 'yaj̄ yo'ó nij yuvī ma'. Dan me se xa' nij so', tzaj̄ ne sij̄ tiha' yu'unj̄ do', sij̄ tumé cacun' do', sij̄ otoj̄ ga nica yo'ó yuvī do', me nij so', ne ne 'yáá 'unj̄ danj̄ ma'. Ne guun̄ ni'yaj̄ ní se vaa ne 'yáá 'unj̄ ndaa vaa 'yaj̄ sí nihánj̄ sí tiha' yu'unj̄ man yuvī che'é puextó a. <sup>12</sup>Ne vij̄ ya aráj̄ guee 'unj̄ che'é se chá 'o 'o tunj̄ güii, ne rque 'unj̄ 'o pesó rihaan̄ daj̄ a chi' pesó 'yaj̄ canaán̄ 'unj̄ rihaan̄ so' ei”, taj̄ sí fariseo yo' rihaan̄ Diose a.

<sup>13</sup>”Ne gan' doj̄ tzin' nicun' sí a'néj̄ puextó man yuvī yo', ne guun̄ na'aj̄ ndo'o so' ni'yaj̄ so' man so' rihaan̄ Diose, ne ne ca'vej̄ rá so' naxcaj̄ so' rihaan̄ so' ni'yaj̄ so' rej̄ nicun' Diose a. Tzaj̄ ne go' so' se-cuxru' so' rucuaa ma'an̄ so', ne cataj̄ so': “Cunuū 'ee rá so' ni'yaj̄ so' manj̄, Ataj̄ Diose. 'O se sij̄ tumé cacun' mej̄ adonj̄”, taj̄ so' rihaan̄ Diose a.

<sup>14</sup>”Ne cuanō nihánj̄ me se cataj̄ xna'anj̄ 'unj̄ rihaan̄ soj̄ se vaa gaa quinan' sí tiha' yu'unj̄ man yuvī che'é puextó yo' tucua' so', gaa ne aj̄ cunuū sa' so' rihaan̄ Diose nanj̄ á.

Tzaj̄ ne yo'ó so' ro', taj̄ ma'. 'O se xa' sí me rá tacaviī sa' man ma'an̄, tzaj̄ ne quirí' so', ne guun̄ na'aj̄ so' a. Ne xa' sí naqui'yaj̄ nica' nimán, tzaj̄ ne caviī sa' ndo'o so' adonj̄ — taj̄ Jesucristó rihaan̄ nij yuvī yo' a.

**Naná nihánj̄ taj̄ xna'anj̄ me che'é caran' rá Jesucristó ni'yaj̄ so' man ne'ej̄ a**

<sup>15</sup>Gaa ne nicaj̄ nij yuvī man nij ne'ej̄ ca'na' nij yuvī rihaan̄ Jesucristó a. 'O se me rá nij yuvī cuta' Jesucristó ra'a so' raaj̄ nij ne'ej̄ che'é rej̄ quirí' ne'ej̄ xna'anj̄ ni'yaj̄ ne'ej̄ a. Tzaj̄ ne quene'en̄ nij sí tucu'yón se-nanā Jesucristó daj̄ qui'yaj̄ nij yuvī, gaa ne cataj̄ xna'anj̄ nij so' rihaan̄ nij yuvī se vaa ne nó xcúun̄ nij ne'ej̄ ca'na' nij ne'ej̄ rihaan̄ Jesucristó a. <sup>16</sup>Tzaj̄ ne canacúun̄ Jesucristó man nij sí tucu'yón se-nanā so', ne cataj̄ Jesucristó rihaan̄ nij so' a:

—Ca'ne' rá soj̄ ca'na' nij ne'ej̄ rihanj̄ á. Se caráan̄ soj̄ chrej̄ rihaan̄ nij ne'ej̄ mei. 'O se tucuā nij sí vaa danj̄ ro', me rej̄ yanj̄ Diose uun̄ chij̄ Diose nanj̄ adonj̄. <sup>17</sup>Ya ya cataj̄ xna'anj̄ 'unj̄ rihaan̄ soj̄ cuanō se vaa sí na'vej̄ rá guun̄ chij̄ Diose nimán, ndaa vaa a'vej̄ rá ne'ej̄ guun̄ chij̄ Diose nimán ne'ej̄ ro', daj̄ chihaā míj̄ se cayáan̄ so' ga Diose asa' guun̄ chij̄ Diose rihaan̄ chumī nihánj̄ ma' —taj̄ Jesucristó rihaan̄ nij sí tucu'yón se-nanā so' a.

**Naná nihánj̄ taj̄ xna'anj̄ che'é 'o sí me rá cayáan̄ ga Diose nu' caviī nu' ca'anj̄ a**

<sup>18</sup>Dan me se xna'anj̄ 'o sí nicaj̄ suun̄ yo' man Jesucristó, cataj̄ so' rihaan̄ Jesucristó a:

—Maestro. Sí sá' uxrá mé so' adonj. Daj qui'yáj, ne ca'vee cayánj ga Diose nu' cavii nu' ca'anj ga —taj sí nicaj suun yo', xná'anj so' man Jesucristó a.

<sup>19</sup>Gaa ne cataj Jesucristó rihaan so' a:

—Me che'é cataj so' se vaa sí sá' uxrá mej ga. 'O se orún' Diose me sí sá' á. <sup>20</sup>Ne aj ne'én so' nij nana nocoo ya ya nana cataj xna'anj Diose se vaa canoco' ní' á. Dan me se taj nana yo': “Se cotoj so' ga chana nica yo'ó yuvii ma'. Se ticaví' so' yuvii ma'. Se qui'yaj ituu so' si'yaj yo'ó yuvii ma'. Se nanó so' cuentó ne che'é yuvii ma'. Caraa cocróo so' rihaan rée so' do', rihaan ní' so' do' á”. Yo' me nana cunó so' ei —taj Jesucristó rihaan sí' nicaj suun yo' a.

<sup>21</sup>—Asij gaa mej xnii me ve'é unó 'unj nu' nij nana yo' nanj á —taj so' rihaan Jesucristó a.

<sup>22</sup>Gaa ne cataj Jesucristó rihaan so' a:

—Daj orún' rasuun achiin ya mán so' nanj ei. Dan me se cutu'vee so' cunudanj si'yáá so', ne sa'anj quirí' so' ro', caxrii so' ston nij sí nique, ne cumán ndo'o si'yáá so' rej xta', qui'yaj Diose nanj ei. Ne dan me se ca'na' so', ne canocó' so' manj, ca'anj ní' á —taj Jesucristó rihaan so' a.

<sup>23</sup>Dan me se cuno sí' nicaj suun yo' nana nihánj, gaa ne quinanó ndo'o rá so' a. 'O se sí' ru'vee ndo'o me so' a.

<sup>24</sup>Dan me se ni'yaj Jesucristó man so', ne cataj Jesucristó:

—Sayuun uxrá vaa quisij nij sí' vaa ndo'o sa'anj rihaan cayáán nij

so' ga Diose asa' guun chij Diose rihaan chumii nihánj nanj adonj.

<sup>25</sup>Dan me se ne'en soj se vaa sayuun ndo'o vaa cachén xcuu camelló yu'uj taj tacúun cúu nuvá, tzaj ne ca'vee a doj cachén xcuu yo' yu'uj taj tacúun cúu nuvá, ndaa rá se vaa sí' ru'vee, ne se guun cachén ma'an sí' ru'vee cayáán so' ga Diose asa' guun chij Diose rihaan chumii nihánj a ma' —taj Jesucristó a.

<sup>26</sup>Gaa ne xná'anj nij sí' cuno nana nihánj man Jesucristó, cataj nij so':

—Che'é dan me se me sí' guun nucuaj quinanii rihaan sayuun ga —taj nij so', xná'anj nij so' man Jesucristó a.

<sup>27</sup>Gaa ne cataj Jesucristó rihaan nij so' a:

—Xa' rasuun na'vee qui'yaj ma'an inanj yuvii, tzaj ne Diose me sí' uun nucuaj qui'yaj nu' rasuun yo' adonj —taj Jesucristó rihaan nij so' a.

<sup>28</sup>Gaa ne cataj Pedró rihaan so' a:

—Ne núj ga. Aj tanáj núj nu' si'yaj núj, ne canoco' núj mán so' á —taj Pedró rihaan Jesucristó a.

<sup>29</sup>Gaa ne cataj Jesucristó rihaan nij so' a:

—Cuano nihánj me se cataj yá 'unj rihaan soj se vaa sí' tanáj ve' tucua tanáj nica tanáj tinúu tanáj tuvi' tanáj ta'níi tanáj, che'é rej guun chij Diose rihaan chumii nihánj ro', <sup>30</sup>uxrá doj a rasuun quirí' uún so' gaa vaa i'na' so' rihaan chumii nihánj, ne asa' guun chij Diose rihaan chumii nihánj me se yo'ó cayáán so' ga Diose nu' cavii nu' ca'anj nanj adonj —taj Jesucristó rihaan nij so' a.



**Nana nihánj taj xna'anj se vaa síj va'núj cataj xna'anj Jesucristó se vaa cavi' so' ne cunuú i'na' uún so' a**

<sup>31</sup>Dan me se nicaj Jesucristó chuvij nij síj tucu'yón se-nana so' ca'anj so', ne cataj so' rihaan nij so':

—Nihánj me ca'anj ní' chuman' Jerusalén, ne asa' cuchí' ní', ne quisij ya nu' nana cataj xna'anj nij síj nata' se-nana Diose gaa naá che'é 'unj sij ca'née Diose nicaj yu'unj man yuvij, <sup>32</sup>ne dan me se tacuachén nii manj rihaan nij síj yaníj, ne ca'nga' nacoó nij so' quene'en nij so' manj, ne qui'yaj chí'ii nij so' manj, ne quirii talúj nij so' manj, <sup>33</sup>ne go' nij so' cuartá xráj, gaa ne ticavi' nij so' manj a. Gaa ne cachén va'núj güii, gaa ne cunuú i'na' uún 'unj, qui'yaj Diose ei —taj Jesucristó rihaan nij so' a.

<sup>34</sup>Ne ne quene'en uxrá nij so' me che'é ca'mii Jesucristó danj ma'. 'O se ne ca'vee xcaj nij so' cuentá che'é nana yo' ma'.

**Nana nihánj taj xna'anj se vaa naxra' rihaan 'o síj tuchrii, qui'yaj Jesucristó a**

<sup>35</sup>Dan me se gaa quinichrun' Jesucristó chuman' Jericó, ne yaán 'o síj tuchrii tu'va chrej, ne achíin so' caridad rihaan yuvij a. <sup>36</sup>Dan me se cuno síj tuchrii yo' se vaa cachén ndo'o yuvij chrej rej ne so', ne che'é dan xná'anj so' man yuvij che'é rej vaj ndo'o yuvij chrej yo' a. <sup>37</sup>Gaa ne cataj xna'anj nii rihaan so' se vaa Jesucristó síj cavii chuman' Nazaret me síj achén rej ne nij so' a. <sup>38</sup>Gaa ne dan me se caguáj síj tuchrii yo', cataj so':

—Ya ya ta'níi ta'nij si'no síi cu'naj David síi cane gaa naá mé so', Jesús. Cunuú 'ee rá so' manj ei —taj so', caguáj so' a.

<sup>39</sup>Gaa ne cataj nij síi racuíj man so' chée so' se vaa se tu'va so' danj, maan se:

—Dínj gaa tu'vá so' á —taj nij so' rihaan síi tuchrii, tzaj ne doj a nucuaj caguáj so', cataj so':

—Ta'níi ta'nij si'no síi cu'naj David mé so' ei. Cunuú 'ee rá so' manj ei —taj so', caguáj so' rihaan Jesucristó a.

<sup>40</sup>Canicun' Jesucristó, ne canacúun Jesucristó man síi tuchrii se vaa racuíj nii man so' ca'na' so' rihaan Jesucristó a. Ne gaa quinichrun' síi tuchrii yo' rihaan Jesucristó, ne xná'anj Jesucristó man so', cataj Jesucristó rihaan so' a:

<sup>41</sup>—Daj qui'yaj man so', rá so' ga —taj Jesucristó, xná'anj Jesucristó man so' a.

—Curuvi' rihanj raj, Señor —taj so' rihaan Jesucristó a.

<sup>42</sup>Gaa ne cataj Jesucristó rihaan so':

—Ca'vee curuvi' rihaan so' á. Maan che'é se amán rá so' ni'yaj so' manj ro', che'é dan nahuun sa' so' ei —taj Jesucristó a.

<sup>43</sup>Ne nu' curuvi' rihaan so', gaa ne canoco' so' xcó Jesucristó, ne nata' so' se vaa sa' uxrá qui'yaj Diose ga so' a. Ne nu' nij yuvij quene'en daj quiran' so' cataj se vaa sa' uxrá qui'yaj Diose a.

**Nana nihánj taj xna'anj daj qui'yaj síi cu'naj Zaqueo gaa guun rá so' quene'en so' man Jesucristó a**

**19** Dan me se catúj Jesucristó chuman' Jericó, ne cachén

so' chuman' yo', <sup>2</sup>ne yáán 'o sítí cu'naj Zaqueo chuman' yo', ne so' me sítí uun chij rihaan nij sítí tiha' yu'unj man yuvií che'é puextó, ne ru'vee ndo'o so' a. <sup>3</sup>Dan me se guun rá so' quene'en so' me sítí me Jesucristó, tzaj ne ne ca'vee quene'en so', che'é se man ndo'o yuvií, ne sítí chre' nii vaa sítí cu'naj Zaqueo a. <sup>4</sup>Che'é dan yoo cunánj so' quitáa yaan so' rihaan nij yuvií, gaa ne cavii so' raá 'o chruun man chruj higó raá, che'é yan me rá so' quene'en so' man Jesucristó a. 'O se cachén Jesucristó tacóo chruun yo' a. <sup>5</sup>Dan me se gaa cuchi' Jesucristó tacóo chruun taj Zaqueo, ne ni'yaj Jesucristó raá chruun, ne cataj so' rihaan Zaqueo a:

—Nanij so' cuaj rihaan yo'óo, Zaqueo. 'O se vaa che'é ndo'o carán' 'unj ve' tucua' so' cuan' á —taj Jesucristó rihaan Zaqueo a.

<sup>6</sup>Gaa ne yoo nanij Zaqueo rihaan yo'óo, ne guun nihá' uxrá rá so' se vaa carán' Jesucristó tucua' so' a.

<sup>7</sup>Dan me se cuno nij yuvií daj cataj Jesucristó, gaa ne nij ca'mii nij yuvií ni'yaj nij so' man Jesucristó a. Ne cataj nij so' che'é Jesucristó a:

—Nihánj me se carán' so' tucua' 'o sítí tumé ndo'o cacun' adonj —taj nij yuvií ni'yaj nij so' man Jesucristó a.

<sup>8</sup>Tzaj ne canicun' ma'an Zaqueo, cataj so' rihaan sítí 'nij ra'a man ní' a:

—Cuanó nihánj me se rque 'unj yanej si'yáj rihaan nij sítí nique, ne nij sítí tiha' yu'unj 'unj man, tzaj ne naqui'yáj 'ó cunú' ca'anj narque 'unj rihaan nij so' se vaa ca'néj 'unj

man nij so', Señor —taj so' rihaan Jesucristó a.

<sup>9</sup>Gaa ne cataj Jesucristó rihaan so' a:

—Cuan' me se aj cavii sa' nij tucua sítí nihánj, ndaa rá se vaa 'o ta'níí sítí cu'naj Abraham gaa naá ro', danj vaa ma'an so' cuano a. <sup>10</sup>'O se ca'ná' 'unj sij nicaj yu'unj man yuvií che'é rej ca'vee nano' 'unj man nij sítí ca'anj ni'ya, ne cavii sa' nij so' qui'yáj adonj —taj Jesucristó rihaan nij so' a.

**Nana nihánj me cuentó nanó  
Jesucristó che'é sítí racuj  
sa'anj rihaan se-mozó so' a**

<sup>11</sup>Dan me se cuno nij sítí man chuman' Jericó se-nana Jesucristó, tzaj ne guun rá nij so' se vaa che'é se nichrun' Jesucristó chuman' Jerusalén, che'é dan ra'yanj guun chij Diose rihaan chumij nihánj adonj, rá nij so', ne che'é dan guun che'e Jesucristó naqui'yaj Jesucristó yo'o cuentó nihánj, gaa ne ca'vee xcáj nij yuvií cuentá a. <sup>12</sup>Dan me se cataj so' a:

—Yo'o sítí xna'anj ru'vee guun rá quinaj suun uun chij chiháán, ne guun rá so' ca'anj so' chuman' raá ne nata suun so' suun guun chij chiháán so', gaa ne canicaj so' naman so' chiháán so', rá so' a. <sup>13</sup>Gaa ne canacúún so' man chí' nij se-mozó so' ca'na' rihaan so', gaa ne rqué so' 'o sa'anj mina rihaan 'o 'o nij so', ne cataj xna'anj so' rihaan nij so' se vaa qui'yaj suun nij so' ga sa'anj, ne tanaca nij so' man sa'anj, ne ndaa quisij güii naman uún so', gaa ne nuchruj nij so' cuentá, taj

so' a. Danj ca'mii so', gaa ne cavii so' ca'anj so' a.

<sup>14</sup>”Tzaj ne nij síi man chiháán so' ro', quitáá ri'yunj man so', ne che'é dan ca'néé nij so' síi ca'anj suun ca'anj cataj xna'anj rihaan síi nicaj suun rej ca'anj síi xna'anj ru'vee yo' se vaa ne ca'vej rá nij so' guun chij síi xna'anj ru'vee yo' rihaan nij so' a.

<sup>15</sup>”Dan me se ya qui'yaj canaán síi xna'anj ru'vee yo' guun chij so' chiháán so', gaa ne gaa namán so', ne cataj xna'anj so' se vaa nacunj nii man chi'! nij se-mozó so' nij síi rqué so' sa'anj rihaan a. 'O se guun rá so' xcax so' cuentá me daj sa'anj qui'yaj canaán nij so' a.

<sup>16</sup>”Dan me se síi ca'na' asino yaan rihaan so' ro', cataj: “Xa' sa'anj mina rqué so' manj, tzaj ne qui'yaj canaán 'unj 'ó chi' sa'anj mina uún, qui'yaj sa'anj yo', señor”, taj so' rihaan síi xna'anj ru'vee yo' a. <sup>17</sup>Gaa ne cataj síi xna'anj ru'vee yo' rihaan mozó yo': “Cunaj uxrá qui'yáá so' á. Mozó sa' inanj mé so' ei. Che'é dan guun chij so' rihaan chi'! ya chuman', qui'yáj a”, taj síi xna'anj ru'vee rihaan mozó sa' yo' a.

<sup>18</sup>”Dan me se ca'na' uún yo'ó mozó, cataj so': “Xa' sa'anj mina rqué so' manj, tzaj ne qui'yaj canaán 'unj yu'un' sa'anj mina uún, qui'yaj sa'anj yo', señor”, taj so' rihaan síi xna'anj ru'vee yo' a. <sup>19</sup>Ne cataj síi xna'anj rihaan so': “Gaa ne guun chij so' rihaan 'un' ya chuman' nanj ei”, taj so' rihaan yo'ó mozó yo' a.

<sup>20</sup>”Dan me se ca'na' yo'ó so' uún, ne cataj so': “Nihánj me nacaj so'

se-sa'anj so', señor. 'O se caraa sa' 'unj man yo' rque 'o vitó, <sup>21</sup>ne cucu'ví! 'unj ni'yaj 'unj mán so', che'é se sij sca' ndo'o nimán mé so', ne naxcaj so' rasuun rej nuvi' rasuun cutá' so', ne yo'ó yuvii unô caân, ne so' me se, ne ma'án so', ne rii so' naa adonj”, taj mozó yo' rihaan síi xna'anj ru'vee yo' a.

<sup>22</sup>”Gaa ne cataj síi xna'anj ru'vee rihaan mozó yo': “Mozó chi'ij nimán mé so' ei. Cutá' 'unj cacun' xráá so' che'é nana tu'va ma'án so' á. 'O se quene'én so' se vaa sij sca' ndo'o nimán mej, ne quene'én so' se vaa naxcaj 'unj rasuun rej nuvi' rasuun cutaj, ne quene'én so' se vaa yo'ó yuvii unô caân ne 'unj rii naa nanj á. <sup>23</sup>Che'é dan me che'é ne tacuachén so' se-sa'anj 'unj rihaan nij síi nuta' sa'anj ga. Gaa ne gaa ca'ná' 'unj, ne nacaj 'unj se-sa'anj 'unj ga sa'anj nata' raa yo' ga”, taj síi xna'anj ru'vee yo' rihaan mozó rmi' yo' a. <sup>24</sup>Gaa ne cataj so' rihaan yo'ó nij síi nicun' ga so' a: “Ca'nee soj sa'anj nicaj mozó chi'ij nihánj, ne tacuachén soj rihaan síi nicaj chi' sa'anj mina yo' á”, taj síi xna'anj ru'vee yo' rihaan yo'ó nij so' a. <sup>25</sup>”Tzaj ne aj nicaj so' 'o chi'! vaa guéé á”, cataj nij so' rihaan síi xna'anj ru'vee yo' a. <sup>26</sup>”Taj se 'yaj ma'. Cuanó nihánj me se cataj xna'anj 'unj rihaan soj se vaa síi ne'en sa' qui'yaj suun rihanj ro', ne vaa güii, ne doj a guun nucuaj so' qui'yaj suun so' adonj. Ne síi ne ne'en qui'yaj suun rihanj ro', ca'nee 'unj suun le'ej nii atá so', ne quinaj uun so' adonj”, taj síi xna'anj ru'vee yo' rihaan nij so' a. <sup>27</sup>Gaa ne cataj uún so': “Tzaj ne xa' nij síi taj ri'yunj manj síi ne ca'vej rá guun chij 'unj

rihaan, tzaj ne nicaj soj man nij so' ca'na' soj rihanj, gaa ne ticavi' soj man nij so' rihanj nihánj ei", taj uún so' a. <sup>28</sup>—Veé danj quisíj cuentó nanó Jesucristó a.

Gaa ne cavii so' ca'anj so' chuman' Jerusalén, ne táá yaan so' rihaan nij síi tucu'yón se-nana so' a.

**Nana nihánj taj xna'anj daj  
qui'yaj Jesucristó gaa catúj  
Jesucristó chuman' Jerusalén a**

<sup>29</sup>Dan me quinichrun' Jesucristó roj chuman' cu'naj Betfagé ga Betania a. Naj roj chuman' yo' tacóo quij cu'naj Quij man Chruun Olivó a. Gaa ne ca'née Jesucristó man vij tuvi' nij síi tucu'yón se-nana so' ca'anj rque chuman' Betfagé, <sup>30</sup>ne cataj so' rihaan roj so' a:

—Cavii roj soj ca'anj soj, ne catuu roj soj chuman' nihánj chuman' naj rihaan ní, ne asa' catúj roj soj, ne nari' roj soj man yo'o burró le'ej ya'anj numji a. Dan me se nache roj soj man xo', ne nicaj roj soj ca'na' roj soj rihanj nihánj á. <sup>31</sup>Ne sese xna'anj nii man roj soj me che'é nache roj soj burró, ne cataj roj soj: “Síi 'nij ra'a man ní' achiin xcuu nihánj rihaan chuguanj”, cataj roj soj á —taj Jesucristó rihaan roj síi tucu'yón se-nana so' a.

<sup>32</sup>Dan me se ca'anj roj so', ne catúj roj so' chuman' yo', ne nari' roj so' man burró le'ej, ndaa vaa cataj xna'anj Jesucristó rihaan roj so' a. <sup>33</sup>Ne gaa nache roj so' man burró, ne xna'anj nij síi daan burró man roj so' a:

—Me che'é nache soj burró ga —taj nij so', xna'anj nij so' man roj so' a.

<sup>34</sup>Gaa ne cataj roj so' rihaan nij síi daan burró a:

—Síi 'nij ra'a man ní' achiin xcuu nihánj rihaan chuguanj —taj roj so' a.

<sup>35</sup>Gaa ne nicaj roj so' xcuu ca'na' roj so' rihaan Jesucristó, ne cuta' roj so' sagan' roj so' xráá burró, ne tacavii roj so' man Jesucristó xráá burró yo', <sup>36</sup>ne gaa vaj Jesucristó, ne cuchruj ndo'o nij yuvii yatzíj sagan' nij so' rá chrej, ne achén Jesucristó ga burró yo' rihaan yatzíj a. <sup>37</sup>Dan me se quinichrun' Jesucristó chuman' Jerusalén, ne vaj so' tacóo Quij man Chruun Olivó rej vaj nij chrej, ne guun che'e que'ee nij síi tucu'yón se-nana so' guun niha' rá nij so', ne aguáj nij so', ca'mii sa' nij so' che'é Diose che'é nu' nij suun sa' nocoo qui'yaj Jesucristó quene'len nij so' a. <sup>38</sup>Dan me se cataj nij so':

—Cunaj uxrá vaa ca'na' síi ca'née síi 'nij ra'a man ní' ei. Síi nicaj suun rey uun chij rihaan ní' me so' ei. Ve'é cayáán Diose síi nicun' xtá' á. Cunaj uxrá 'yaj so' ei —taj nij yuvii, caguáj nij so' a.

<sup>39</sup>Dan me se ta'aj nij síi chée ga Jesucristó me síi fariseo, ne ta'aj nij so' cataj rihaan Jesucristó a:

—Cataj xna'anj so' rihaan nij síi tucu'yón se-nana so' se vaa ca'ne' rá nij so' ga nana vaa danj á —taj nij so' rihaan Jesucristó a.

<sup>40</sup>Gaa ne cataj so' rihaan nij so' a: —Cataj xna'anj 'unj rihaan soj cuano se vaa sese dínj gaa tu'va nij síi aguáj nana vaa danj, ne ma'an nij yahij naj rihaan yo'óo nihánj caguaj nana vaa danj asuun nanj adonj —taj Jesucristó rihaan nij síi fariseo yo' a.

<sup>41</sup>Ne gaa quinichrun! Jesucristó chuman' Jerusalén yo', ne ta'vee Jesucristó che'é chuman' yo', <sup>42</sup>ne cataj so':

—Güii cuan' me se me inañ raj quene'en soj sij man chuman' Jerusalén daj qui'yaj soj ne ca'vee dínj cayáán soj, tzaj ne cuano nihánj me se se ca'vee xcaj soj cuentá ma'. <sup>43</sup>Dan me se quisij ya güii, ne ca'na' nij síf taj ri'yunj man soj, ne cune' nij so' chingá nu' anicaj chiháán soj, ne tucuachriin nij so' man soj, ne se ca'vee curihanj soj, qui'yaj nij so' ma'. <sup>44</sup>Ne tucuanee nij so' nu' chiháán soj, ne cavi' soj, ne a 'ó yuvej se quitáá xráá tuvi' yuvej, qui'yaj nij so' ma'. Danj quiran' soj, che'é se gaa guun rá Diose racuj Diose man soj, ne ne xcaj soj cuentá ma' —taj Jesucristó ni'yaj so' man nij síf man chuman' Jerusalén yo' a.

**Nana nihánj taj xna'anj se vaa quirii Jesucristó man nij yuvií tu'véj rasuun rá nuvíí nocoo a**

<sup>45</sup>Gaa ne catúj Jesucristó rá nuvíí nocoo, gaa ne guun che'e so' quirii so' man nu' nij yuvií tu'véj rasuun man rá nuvíí nocoo a. <sup>46</sup>Ne cataj so' rihaan nij so' a:

—Danj Diose taj se vaa tucua Diose me rej na'vúj yuvií rihaan Diose á. Tzaj ne guun tucua síf ituu man tucua Diose nihánj, qui'yaj soj nanj á —taj Jesucristó rihaan nij yuvií quirii so' a.

<sup>47</sup>Ne dan me se daj a güii nicun' Jesucristó rá nuvíí nocoo, tucu'yón Jesucristó se-nana so' rihaan yuvií, tzaj ne nij xrej atá suun nocoo doj do', nij síf naqui'yaj cuu se-tucuanj

Moisés rihaan yuvií do', nij síf uun chij rihaan nij yuvií israelitá do', nano' uxrá nij so' daj qui'yaj nij so' gaa ne ca'vee cavi' Jesucristó a. <sup>48</sup>Tzaj ne ne nari' nij so' daj qui'yaj nij so' cavi' Jesucristó ma'. 'O se guun niha' uxrá rá nij yuvií cuno nij so' se-nana Jesucristó a.

**Nana nihánj taj xna'anj se vaa xná'anj nii man Jesucristó me síf ca'ne' suun rihaan so' qui'yaj so' ndaa vaa 'yaj so' a**

**20** Dan me se 'o güii nicun' Jesucristó rá nuvíí nocoo, tucu'yón Jesucristó rihaan yuvií, ne nata' so' se-nana so' nana sa', ne nicun' xrej atá suun nocoo doj nicun' síf naqui'yaj cuu se-tucuanj Moisés nicun' síf uun chij nicun' rej tucu'yón Jesucristó a. <sup>2</sup>Gaa ne cataj nij so' rihaan Jesucristó a:

—Me síf ca'ne' suun rihaan so' qui'yáá so' ndaa vaa 'yáá so' ga —taj nij so', xná'anj nij so' man Jesucristó a.

<sup>3</sup>Gaa ne cataj Jesucristó rihaan nij so' a:

—Ne vaa yo' o nana me raj xná'anj 'unj man nij soj, ne cataj soj rihanj á. <sup>4</sup>Dan me se me síf ca'ne' suun rihaan síf cu'naj Juan cutá' ne so' man yuvií, rá soj ga. Ma'an Juan cavii raá na'. Ase Diose cataj xna'anj rihaan so' xa'. Cataj xna'anj nij soj rihanj ei —taj Jesucristó rihaan nij so' a.

<sup>5</sup>Gaa ne nuchruj raá ndo'o nij so' ga tuvi' nij so' a:

—Ne sese cataj ní' se vaa Diose ca'ne' suun rihaan síf cu'naj Juan cutá' ne so' man yuvií, ne cataj Jesucristó rihaan ní' me che'é ne

cuchumán rá ní' nana ca'mii Juan, cataj so' a. <sup>6</sup>Tzaj ne sese cataj ní' se vaa nuveé sij ca'ne' Diose suun rihaan me sí' cu'naj Juan, ne go' cunudanj nij yuvii yahij man ní' a. 'O se cuchumán rá nij yuvii se vaa sí' nata' se-nana Diose me sí' cu'naj Juan a —cataj nij so' ga tuvi' ma'an nij so' a.

<sup>7</sup>Gaa ne cataj nij so' rihaan Jesucristó se vaa ne ne'en nij so' me sí' ca'ne' suun rihaan sí' cu'naj Juan cuta' ne so' man yuvii a.

<sup>8</sup>Gaa ne cataj Jesucristó rihaan nij so' a:

—Che'é dan se cataj xna'anj 'unj rihaan nij soj me sí' ca'ne' suun rihanj qui'yáj ndaa vaa 'yáj ma' —taj Jesucristó rihaan nij so' a.

**Nana nihánj me cuentó nanó  
Jesucristó che'é yuvii chi'ii 'yaj  
suun rihaan yo'óo a**

<sup>9</sup>Gaa ne guun che'e Jesucristó nanó so' cuentó nihánj rihaan nij yuvii a.

—Dan me se cuchruj yo'o so' yo'o naa chruj uvá a. Gaa ne tanáj so' man naa yo' rihaan sí' qui'yaj suun naa yo', ne curihanj so' ca'anj so' gan' que'ee yavii a. <sup>10</sup>Ne 'o güii ca'née so' man yo'ó se-mozó so' ca'anj so' rihaan nij sí' nuu tumé xnaa so' a. 'O se me rá so' rque nij sí' nuu tumé naa doj chruj uvá rihaan yo'ó mozó yo', tzaj ne a doj chruj ne rque nij sí' nuu tumé naa rihaan yo'ó mozó yo' ma'. Maan se go' ndo'o nij so' xráa so', ne quirii nij so' man so' rque naa yo' a.

<sup>11</sup>Che'é dan ca'née sí' to'oj naa yo' man yo'ó mozó uún, tzaj ne nij sí' nuu tumé naa ro', go' uún nij so'

xráa mozó uún, ne nij uxrá qui'yaj nij so' man so', ne quirii nij so' man so' rque naa, ne a doj chruj ne rque nij so' man mozó yo' a ma'. <sup>12</sup>Gaa ne ca'née uún sí' xnaa yo' yo'ó mozó uún, tzaj ne quiran' chi'ii ndo'o so', qui'yaj nij sí' nuu tumé naa, ne quirii nij so' man so' xe' a.

<sup>13</sup>”Gaa ne guun rá sí' xnaa yo': “Daj qui'yáj yaj ga. 'O se ca'nej 'unj ma'an ta'nij sí' ee raj man á. Caraa cochroj nij so' rihaan ta'nij sese ca'anj ta'nij saj xee”, guun rá sí' xnaa, ne ca'née so' man ta'nii ma'an so' ca'anj a. <sup>14</sup>Dan me se quene'en nij sí' nuu tumé naa se vaa 'na' ta'nii sí' xnaa, gaa ne nuchruj raa nij so' ga tuvi' nij so' daj qui'yaj nij so', taj nij so' a: “Sí' nihánj me sí' guun xnaa man naa nihánj vaa güii ei. Che'é dan ticavi' ní' man so', ne vaa güii, ne guun xnaa ma'an ní' man naa nihánj chuguanj”, taj nij so' rihaan tuvi' nij so' a. <sup>15</sup>Gaa ne quirii nij so' man ta'nii sí' xnaa yo' xe', ne ticavi' nij so' man ta'nii sí' si'yaj naa nanj adonj. Che'é dan daj qui'yaj sí' si'yaj naa yo' man nij sí' nuu tumé xnaa so', rá nij soj ga. <sup>16</sup>'O se ca'na' so' vaa güii, ne ticavi' so' man nij sí' nuu tumé naa yo', ne taquachén so' xnaa so' rihaan yo'ó sí' tumé man xnaa so' nanj adonj —taj Jesucristó rihaan nij yuvii a.

Gaa cuno nij yuvii nana nihánj, ne kuchu'vi' ndo'o nij so', ne cataj nij so':

—Orún' raa Diose me sí' nacaj man núj rihaan sayuun yo' nanj chuguanj —taj nij so' rihaan Jesucristó a.

<sup>17</sup>Gaa ne ni'yaj Jesucristó man nij so', ne xna'anj Jesucristó man nij so' a:

—Che'é dan me se me che'é nó nana nihánj rihaan danj Diose, rá nij soj ga: “Yuvej quiril'ij nij sí cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj”, taj danj Diose a.

<sup>18</sup>Ne yuvej yo' me se ase vaa yuvej yo' vaa 'unj, ne ase vaa yuvii tíxé yuvej yo' vaa yuvii na'vej rá cunó rihaan 'unj, ne uxrá quiran' nij so' sayuun nanj adonj. Ne ase vaa yuvii quinij yuvej yo' xráa vaa nij yuvii qui'yáa 'unj sayuun man, ne yuun che'e quinavij nij so' nu' cavii nu' ca'anj nanj adonj —taj Jesucristó a.

<sup>19</sup>Gaa ne guun rá nij sí naqui'yaj cuu se-tucuanj Moisés rihaan yuvii guun rá nij xrej atá suun nocoo doj guun rá quita'aa ra'yanj man Jesucristó, tzaj ne chu'vi' nij so' ni'yaj nij so' man nij yuvii a. Quene'en nij so' se vaa che'e ma'an nij so' me cuentó nanó Jesucristó a. Ase vaa nij sí nuu tumé naa vaa ma'an nij so' rihaan Jesucristó, ne quene'en nij so' se vaa che'é dan nanó Jesucristó cuentó yo' a.

**Nana nihánj taj xna'anj che'é puextó go' ní' rihaan gobiernó dɔ', che'é se rque ní' rihaan Diose dɔ' a**

<sup>20</sup>Dan me se cutumé ndo'o nij sí naqui'yaj cuu se-tucuanj Moisés rihaan yuvii dɔ', nij xrej atá suun nocoo doj dɔ', man Jesucristó daj ca'mii so' a. Ne go' nij so' sa'anj rihaan doj tuvi' nij so' sí tiha' yu'unj cuchí' nij so' rihaan Jesucristó, ne qui'yaj nij so' ndaa vaa 'yaj sí vaa sa' sí me rá xna'anj nana man so' a. 'O se guun rá nij so' cuta' nij so' cacun' xráa Jesucristó che'é nana ca'mii so',

gaa ne ca'vee tacuachén nij so' man Jesucristó rihaan sí nicaj suun procurador a. <sup>21</sup>Dan me se xná'anj nij sí tiha' yu'unj yo' man Jesucristó a:

—Ne'en núj se vaa nana nica inanj a'mii so' ne tucu'yón so' dɔ', maestro. Ne 'o cuyaan vaa cunudanj yuvii rihaan so' chuguanj. Ne ya tucu'yón so' rihaan yuvii daj qui'yaj yuvii canoco' yuvii man Diose, maestro. <sup>22</sup>Dan me se nó xcúun ní' go' ní' puextó rihaan sí nicaj suun gobiernó na'. Ase se go' ní' xa' —taj nij sí tiha' yu'unj, xná'anj nij so' man Jesucristó a.

<sup>23</sup>Tzaj ne caxríj rá Jesucristó se vaa me rá nij so' tiha' yu'unj nij so' man so' a. Che'é dan cataj Jesucristó nana nihánj rihaan nij so' a:

<sup>24</sup>—Tíhaan soj sa'anj aga' ni'yaj ní' á —taj Jesucristó rihaan nij so' a.

Gaa ne gaa tihaan nij so' sa'anj aga' yo' rihaan Jesucristó, gaa ne cataj Jesucristó:

—Me sí nó rihaan sa'anj aga' nihánj ga. Ne me sí se-chuvii nó rihaan sa'anj aga' nihánj ga —taj Jesucristó, xná'anj so' man nij sí me rá tiha' yu'unj yo' a.

—Sí nicaj suun gobiernó me nó rihaan sa'anj aga' yo', ne nó se-chuvii so' rihaan sa'anj ei —taj nij so' a.

<sup>25</sup>Gaa ne cataj Jesucristó rihaan nij so' a:

—Che'é dan go' soj si'yaj sí nicaj suun gobiernó rihaan ma'an so', ne rque soj si'yaj Diose rihaan Diose á —taj Jesucristó a.

<sup>26</sup>Gaa ne ne guun nucaj nij sí tiha' yu'unj yo' cuta' nij so' cacun'

xará Jesucristó che'é se-nana so' ma'. 'O se cuno cunudanj nij yuvií daj ca'mii nij so', gaa ne ca'anj ndo'o rá nij yuvií cuno nij so' se-nana Jesucristó, ne ca'ne' rá nij so' nanj adonj.

**Nana nihánj taj xna'anj se vaa ya cunuu i'na' uún nij sí cavi' a**

<sup>27</sup>Dan me se cuchi' doj nij sí saduceo rihaan Jesucristó a. Nij sí saduceo ro', a'mii nana nihánj se vaa daj chihaa mÍj se cunuu i'na' uún yuvií asa' cavi' yuvií, taj nij so' a. <sup>28</sup>Dan me se xná'anj nij so' man Jesucristó, ne cataj nij so' nana nihánj a:

—Cachrón sí cu'naj Moisés nana nihánj rihaan yanj, che'é rej cuno ní' nana nihánj a: “Sese cavi' yo' o sí vaa nica, ne sese taj vaj ta'níí so', ne no xcúún tinúú so' xcaj tinúú so' man choco' so' chana quináj, ne cotoj tinúú sí cavi' ga choco' so', ne cuchruj no' ne'ej, ne guun ta'nij sí cavi' man ne'ej yo', ne cunuú ne'ej yo' rihaan to'óo sí cavi' yo' a”, taj sí cu'naj Moisés gaa naá, maestro. <sup>29</sup>Dan me se vaa chij nij tinuj 'o nij so' a. Sí chava' ro', xcaj man chana, tzaj ne cavi' so', ne taj vaj ne'ej cuchruj chana nica so', qui'yaj so', <sup>30</sup>ne che'é dan xcaj scue'ee sí cavi' yo' man choco' so' chana quináj, tzaj ne cavi' so' uún, ne xcaj scue'ee so' uún man chana, tzaj ne cavi' so' uún, <sup>31</sup>ne dan me se quisÍj xcaj nu' chij nij tinuj nij so' man orún' chana yo', tzaj ne taj vaj a 'ó ne'ej cuchruj chana yo', qui'yaj nij so' ma'. Ne cavi' taran' nij so' nanj adonj. <sup>32</sup>SÍj, gaa ne cavi' ma'an chana yo' uún, <sup>33</sup>ne dan me se asa'

cunuu i'na' uún nij sí cavi', gaa ne me nij tinuj nij so' nica man chana yo', rá so' ga. 'O se gaa vaa i'na' nij so', ne nica taran' nij tinuj nij so' guun orún' no' a —taj nij sí saduceo, xná'anj nij so' man Jesucristó a.

<sup>34</sup>Gaa ne cataj Jesucristó rihaan nij so' a:

—Xa' nij yuvií man rihaan chumií nihánj cuano, tzaj ne uchruj nij so' sa'anj do', xcaj tuvi' nij so' do', <sup>35</sup>tzaj ne ino qui'yaj nij yuvií cunuu i'na' uún cayáan ga Diose asa' cunuu naca uún chumií nihánj nanj á. 'O se rej yanj Diose me se taj yan vaj sí xcaj tuvi' yo' ma'. <sup>36</sup>'O se danj nanj uún, ne taj yan vaj sí cavi' uún rej yo' ma'. 'O se ase vaa nij se-mozó Diose ro', danj gaa nij so', ne cuyaan gaa nij so' ga nij se-mozó Diose, ése ta'nij Diose me nij so', ne sij aj cavi' ne cunuu i'na' uún me nij so' adonj.

<sup>37</sup>”Ne ma'an sí cu'naj Moisés me sí cataj xna'anj asino yaan se vaa ca'vee cunuu i'na' uún nij sí cavi' ndaa vaa nari' so' gaa canicun' so' rihaan yan nicun' 'o coj aco' ya'an ra a. Dan me se cataj so' se vaa sí 'nij ra'a man ní' ro', me Diose sí noco' nij sí man gaa naá sí cu'naj Abraham do', sí cu'naj Isaac do', sí cu'naj Jacobo do' a. <sup>38</sup>Dan me se nuveé se-Diose nij xngá me Diose ma'. Inanj nij sí vaa i'na' a'vee noco' man Diose nanj adonj. Che'é dan, nda' se sí cane gaa naá me va'nuj nij so', tzaj ne vaa i'na' nij so' rihaan Diose nanj ei. 'O se vaa i'na' cunudanj yuvií ni'yaj Diose nanj adonj —taj Jesucristó rihaan nij so' a.



<sup>39</sup>Gaa ne ta'aj nij síf naqui'yaj cūu se-tucuañj Moisés rihaan yuvií ro', cataj rihaan Jesucristó a:

—Cunañj uxrá ca'mii so', maestro —taj nij so' a.

<sup>40</sup>O se ne quisij rá nij so' xna'anj nij so' doj nana man Jesucristó a ma'.

**Nana nihánj taj xna'anj se vaa síf ca'nej Diose tñaniii man yuvií rihaan sayuun ro', nuveé nanj yuvií me so' ma'**

<sup>41</sup>Gaa ne cataj Jesucristó rihaan nij so' a:

—Me che'é taj nij soj se vaa nanj ta'níí ta'nij si'no síf cu'naj David síf cane gaa naá me síf ca'nej Diose tñaniii man yuvií rihaan sayuun ga.

<sup>42</sup>O se nó se-nana ma'an síf cu'naj David rihaan yanj no chra' qui'yaj so', se vaa cataj so': <sup>43</sup>“Ca'mii Diose síf 'nij ra'a man ní' rihaan síf 'nij ra'a manj, cataj so' se vaa cayáán síf 'nij ra'a manj x'núú Diose rej nuva' Diose ndaa se quisij qui'yaj canaán Diose rihaan taran' nij síf taj ri'yunj man síf 'nij ra'a manj ne quirii ta'nga' síf 'nij ra'a manj rihaan nij so' adonj”, taj síf cu'naj David yo' a. <sup>44</sup>Dan me se síf 'nij ra'a man síf cu'naj David me síf ca'nej Diose tñaniii man yuvií rihaan sayuun, taj síf cu'naj David yo' a. Sese 'nij ra'a so' man David, gaa ne me che'é taj soj se vaa nanj ta'níí ta'nij si'no David me so' ga. Taj che'é cataj soj se vaa nanj yuvií me so' ma' —taj Jesucristó rihaan nij síf naqui'yaj cūu se-tucuañj Moisés a.

**Nana nihánj taj xna'anj che'é cacun' tumé nij síf naqui'yaj cūu se-tucuañj Moisés rihaan yuvií a**

<sup>45</sup>Gaa ne ca'mii so' nana nihánj rihaan nij síf tucu'yón se-nana so',

ne cuno cunudanj nij yuvií daj ca'mii so' a:

<sup>46</sup>—Xcaj nij soj cuentá daj 'yaj nij síf naqui'yaj cūu se-tucuañj Moisés rihaan yuvií, ne tumé soj man soj se gaa nanj qui'yaj soj ndaa vaa 'yaj nij so' á. Dan me se niha' rá nij so' cunuú nij so' yatzíj sa' xcaan cachee nij so' rej quene'en yuvií man nij so', ne aran' rá nij so' se vaa ca'mii sa' yuvií ga nij so' gaa chéé nij so' rihaan yu'vee a. Ne uun rá nij so' quitaj nij so' chruun xlá sa' doj gaa 'anj nij so' ve' nuu chre' ní' tucu'yón ní' se-tucuañj Moisés do', gaa 'anj nij so' cha'anj do' a. <sup>47</sup>Ne a'néj nij so' ve' tucua' chana cavi' nica, ne yuun che'e guun tucua' nij so' man ve' yo', ne 'yaj xcaan ndo'o nij so' cuentó achíín ni'yaj nij so' rihaan Diose, che'é rej sa' doj guun nucuañj nij so' tihá' yu'unj nij so' man yuvií a. Xa' nij so', tzaj ne che'é se vaa 'yaj nij so' ro', che'é dan doj a gaa sayuun quiran' nij so' qui'yaj Diose, asa' ca'ne' Diose cacun' che'é yuvií adonj —taj Jesucristó rihaan nij síf tucu'yón se-nana so' a.

**Nana nihánj taj xna'anj che'é chana nique cavi' nica qui'yaj sa' doj rihaan nij ru'vee, ni'yaj Diose a**

**21** Dan me se ni'yaj Jesucristó, ne quene'en so' se vaa araa ndo'o nij síf ru'vee sa'anj rque chrúún taj rihaan nuvíí nocoo che'é Diose a. <sup>2</sup>Ne quene'en so' 'o chana cavi' nica chana nique se vaa caraa no' vij guee sa'anj aga' le'ej rque chrúún yo', <sup>3</sup>ne cataj so':

—Cataj xna'anj yá yá 'unj rihaan nij soj cuano se vaa xa' chana cavi' nica chana nique nihánj, tzaj ne doj

a caraa no' sa'anj rque chrúun yo' rihaan sa'anj caraa cunudañj yo'ó nij yuvii nanj adonj. <sup>4</sup>O se nij so', daj doj sa'anj quináj raá se-sa'anj nij so' ro', caraa nij so' rque chrúun, ne xa' no', tzaj ne nda' se achiin ndo'o sa'anj rihaan no', tzaj ne rque no' rihaan Diose cunudañj sa'anj nicaj no' sa'anj quiraan no' se cha no' nanj adonj —taj Jesucristó a.

**Nana nihánj taj xna'anj se  
vaa canee nu' nuví nocoo  
ne chuman' Jerusalén a**

<sup>5</sup>Dan me se cataj ta'aj yuvii se vaa xa' nuví nocoo, tzaj ne yujej sa' inanj me yujej guun nuví nocoo, ne me doj uxrá sa'anj go' nij yuvii rihaan Diose che'é rej ca'vee cune' nii nuví nocoo yo' a. <sup>6</sup>Gaa ne cataj Jesucristó rihaan nij so' a:

—Xa' nu' nuví nocoo ni'yaj soj nihánj, tzaj ne vaa güii canee nu' nuví nocoo nihánj, ne a 'ó yujej se quitáá xráa tuvi' yujej nihánj a ma' —taj Jesucristó a.

**Nana nihánj taj xna'anj  
che'é sayuun guun rihaan  
chumii nihánj vaa güii a**

<sup>7</sup>Dan me se xná'anj nii man Jesucristó, ne cataj nii rihaan so' a:

—Che'é dan cataj xna'anj so' rihaan núj aman canee nu' nuví nocoo nihánj do', a me rasuun ca'na' qui'yáa so' asa' quisíj ca'na' sayuun yo', señor —taj nii, xná'anj nii man so' a.

<sup>8</sup>Gaa ne cataj so' rihaan nii:

—Tumé ndo'o soj man soj se gaa nanj tiha' yu'unj yuvii man soj á. 'O se ca'na' uxrá yuvii cataj: “Unj me síí na'vij soj, ne Cristo mej á”, cataj

nij yuvii, ne cataj uún nij yuvii: “Aj quisíj güii ca'anj ni'ya chumii nanj á”, cataj uún nij yuvii rihaan soj a. Tzaj ne se cuchumán rá soj, ne se canoco' soj man yuvii a'mii danj ma'.

<sup>9</sup>”Dan me se ca'vee se cunoo soj nana se vaa unu' uxrá chuman' ga tuvi' chuman' do', ca'vee se cunoo soj nana se vaa tucuáá ndo'o yuvii rihaan gobiernó do', tzaj ne se chuchu'vi' soj ma'. Maan se vaa che'é guun sayuun yo' rihaan chumii nihánj asino yaan adonj. Tzaj ne asa' quisíj guun danj, gaa ne se ca'anj ni'ya chumii nihánj nu' orá ma'. 'O se quinaj chumii nihánj doj adonj —taj so' rihaan nij so' a.

<sup>10</sup>Gaa ne cataj uún Jesucristó rihaan nij so' a:

—Dan me se cunú' uxrá yuvii man chuman' nocoo ga yo'ó chuman' nocoo, ne cunú' gobiernó ga tuvi' gobiernó a. <sup>11</sup>Ne cachén ndo'o yuún nocoo, ne que'ee chuman' me se cachén ndo'o chi'ii cachén ndo'o x'naa cachén ndo'o a. Ne quene'en ndo'o yuvii rasuun nocoo nij ndo'o rej xta', ne chuchu'vi' nij yuvii, qui'yaj rasuun yo' a.

<sup>12</sup>”Tzaj ne asa' ataa guun nu' sayuun yo', ne quitaj ri'yunj nii man soj, ne quita'aa nii man soj, ne canoco' nii man soj qui'yaj nii sayuun man soj, ne taquachén nii man soj rihaan nij síí man rá ve' nuu chre' ní' tucu'yón ní' se-tucañj Moisés, ne caxrii nii taga' man soj, ne taquachén nii man soj rihaan nij síí nicaj suun, che'é se sij nocoo' manj me soj a. <sup>13</sup>Sij, gaa ne quirí' soj cataj xna'anj soj rihaan nij so' che'é unj a. <sup>14</sup>Ne asa' nicun' soj

rihaan nij so', ne yo'o ca'nej nimán soj se nanó rá soj che'é nana ca'mii ma'an soj rihaan nij so' ma'. <sup>15</sup>O se ma'anj me sí rque nana cuu cavii tu'va soj nanj á. Ne taj sí guun nucuaj qui'yaj canaán rihaan se-nana soj ma'. <sup>16</sup>Dan me se ndaa ma'an rej soj do', ndaa ma'an tuvi' soj do', ndaa ma'an tinúu soj do', ndaa ma'an nij sí man chiháan soj do', me nij sí tacuachén man soj rihaan nij sí qui'yaj sayuun man soj, gaa ne ticavi' nii man ta'aj soj, <sup>17</sup>ne nachri' cunudanj nij yuvii man rihaan chumii ni'yaj nij so' man soj, che'é se me soj sí noco' manj adonj. <sup>18</sup>Tzaj ne daj chihaa mjí se ca'anj ni'ya a doj yuvé raa soj ma'. <sup>19</sup>O se che'é se noco' raan soj manj ro', che'é dan yo'o gaa i'na' soj nu' cavii nu' ca'anj adonj.

<sup>20</sup>”Dan me se asa' quene'en soj se vaa tucuachriin tanuu nu' chuman' Jerusalén, ne xcaj soj cuentá se vaa daj doj quirí' nu' chuman' yo', ne quinavij nu' chuman' yo' nanj adonj. <sup>21</sup>Ne güii dan me se yo'o cunanj nij sí man estadó Judea ca'anj nij so' raa quij, ne nij sí vaj rque chuman' Jerusalén me se ra'yanj curihañj nij so', ne nij sí vaj rej tacaan me se se catúj nij so' chuman' yo' daj chihaa mjí ma'. <sup>22</sup>O se yo' me güii naru'vee Diose sayuun rihaan nij sí ne estadó Judea yo' che'é cacun' tumé nij so', ne ya danj guun, gaa ne quisj ya nu' nana no rihaan danj Diose che'é nij so' a. <sup>23</sup>Nique chana nuu rque do', chana vaa ta'níí ne'ej utzii do', güii ca'na' sayuun yo' a. 'O se se guun nucuaj chana yo' cunanj chana yo' ma'. 'O se guun ndo'o sayuun rej yo', ne caxrii

yuvaa Diose man yuvii yo', <sup>24</sup>ne cavi' que'ee nij so' raa neê espadá, ne quita'aa nii man que'ee nij so' ca'anj nıcaj nii rej ne nij sí yanj a. Ne cachee nij sí yanj xraá nu' chuman' Jerusalén, ndaa se quisij güii ca'nee Diose suun ra'a nij so' a —taj Jesucristó a.

**Nana nihánj taj xna'anj daj gaa ca'na' uún Jesucristó rihaan chumii nihánj a**

<sup>25</sup>Ne cataj uún Jesucristó a:  
—Gaa ne quene'en yuvii se vaa cunuun ino güii do', yavii do', nij yati' do', ne rihaan ma'an chumii me se cuchu'vi' ndo'o cunudanj nij yuvii cuno nij so' daj gaa cariin ndo'o na ya'anj do', quene'en nij so' daj gaa quinaan rihaan na ya'anj do' a. <sup>26</sup>Ne cuchu'vi' ndo'o nij yuvii, che'é yan quinao rá nij so' daj gaa quiran' nu' chumii nihánj a. Ne quinaan taran' nij rasuun nucuaj man rej xta' a. <sup>27</sup>Gaa ne quene'en nij so' man 'unj sij ca'neé Diose nıcaj yu'unj man yuvii á. Dan me se xraá ngaa quitaj 'unj ca'na' 'unj, ne guun nucuaj ndo'oj quirii ta'ngaj, ne ve'é uxrá curuvij ca'naj ei. <sup>28</sup>Dan me se asa' guun che'e nu' rasuun nihánj guun yo' danj, ne canicun' soj, ne ni'yaj soj xta', ne daj doj nacaj 'unj man soj rihaan chumii nihánj gaa nanj adonj —taj Jesucristó rihaan nij so' a.

**Nana nihánj taj xna'anj se vaa ya quene'en ní' se vaa daj doj ca'na' uún Jesucristó a**

<sup>29</sup>Gaa ne nanó Jesucristó cuentó nihánj a:  
—Xcaj soj cuentá daj 'yaj chruun man chruj hıgó raa do', daj 'yaj me

ma'an chruun do' á. <sup>30</sup>Gaa naca coj ya'lij ra'a nij chruun, ne ni'yaj soj man nij chruun, ne ne'en soj se vaa daj doj 'na' tió naman maan a. <sup>31</sup>Dan me se xcaj uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne daj doj guun che'e Diose guun chij Diose rihaan chumií nihánj nanj adonj. <sup>32</sup>Ya ya cataj xna'anj 'unj rihaan soj cuano se vaa quene'en ta'aj soj sij vaa i'na' rihaan chumií nihánj cuano quisij nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavi' soj ei. <sup>33</sup>Vaa güii ca'anj ni'ya yo'óo do', xta' do', tzaj ne se-nanaj me se daj chihaa míj se quinavij yo' ma' —taj Jesucristó rihaan nij so' a.

**Nana nihánj taj xna'anj se vaa tumé ní' man ní' daj qui'yaj ní', gaa ne ca'vee canicun' ní' rihaan Jesucristó a**

<sup>34</sup>Ne cataj uún Jesucristó a:  
—Dan me se cutumé soj man soj se gaa nanj yo'o guun rá soj rasuun man rihaan chumií nihánj, ne guun rá soj guun xno soj do', guun rá soj ca'mii sca' soj do', guun rá soj guun si'yaj soj nu' rasuun man rihaan chumií nihánj do' a. Se qui'yaj soj danj, tóse taj ni'yón ca'naj, ne se quene'en soj ca'naj a. <sup>35</sup>O se ndaa rá se vaa 'o lazo ne' ta'aa man nii ro', danj gaa ca'na' xráa cunudanj chumií nihánj adonj. <sup>36</sup>Che'é dan yo'o ni'yaj soj, ne xcaj soj cuentá nu' güii, ne inanj cachinj ni'yaj soj rihaan Diose se vaa ca'vee quinanií soj rihaan nu' sayuun nihánj asa' guun danj rihaan chumií nihánj,

gaa ne ca'vee canicun' soj rihaan 'unj sij ca'née Diose nicaj yu'unj man yuvií ei —taj Jesucristó a.

<sup>37</sup>Dan me se rej ranga' ro', ne Jesucristó rá nuvíí nocoo, ne tucu'yón so' man nij yuvií, ne rej ti'nuu me se curihanj so', ne rej cu'naj Quij man Chruun Olivó aran' so' a. <sup>38</sup>Ne taxrej uchi' cunudanj nij yuvií cunó nij so' se-nana Jesucristó a.

**Nana nihánj taj xna'anj daj qui'yaj sí' cu'naj Judas gaa cutu'vej yuve so' man Jesucristó a**

**22** Dan me se daj doj canuú cha'anj pascuá cha'anj chá nij yuvií israelitá chraa yo'óo trigó a. <sup>2</sup>Ne nano' nij xrej ata suun nocoo doj do', nij sí' naquiyaj cuu se-tucuaj Moisés rihaan yuvií do', daj qui'yaj nij so' ne cavi' Jesucristó, che'é se man ndo'o yuvií nocoo' man Jesucristó a.

<sup>3</sup>Ne catúj sí' chree cu'naj Satanás nimán sí' cu'naj Judas Iscariote, ne so' me se yo'o tuvi' ma'an chuvij nij sí' tucu'yón se-nana Jesucristó me so' a. <sup>4</sup>Dan me se cavii so' ca'anj so', ne ca'mii so' ga nij xrej ata suun nocoo doj do', ga tanuu uun chij rihaan nij tanuu tumé nuvíí do', gaa ne cataj so' daj qui'yaj so' ne taquachén so' man Jesucristó rihaan nij so' a. <sup>5</sup>Gaa ne guun niha' rá nij so' gaa cuno nij so' se-nana Judas, ne guun ya ca'mii nij so' ga Judas se vaa rque nij so' sa'anj man Judas a. <sup>6</sup>Dan me se cata' tu'va sí' cu'naj Judas se vaa taquachén so' man Jesucristó rihaan nij so', gaa ne nuchruj raa Judas aman ca'vee taquachén so' man Jesucristó

rihaan nij so', gaa ne se gaa nanj quene'en nij yuvij a.

**Nana nihánj taj xna'anj che'é rachrúún rqué Jesucristó rihaan nij sí tucu'yón se-nana so' cha nij so' do', che'é na vinó rqué so' co'o nij so' do' a**

<sup>7</sup>Dan me se quisij güii canuü cha'anj chá nii chraa yo'óo trigó, ne güii dan me güii ticavi' nij yuvij israelitá matzinj le'ej che'é Diose a.

<sup>8</sup>Dan me se ca'née Jesucristó man Pedró do', man Juan do', ne cataj so' rihaan roj so':

—Ca'anj roj soj qui'yaj chuvij roj soj cha ní' ne navij rá ní' cha'anj pascuá ei —taj so' rihaan roj so' a.

<sup>9</sup>Gaa ne xná'anj roj so' man Jesucristó a:

—Me rej qui'yaj chuvij núj cha ní' ga —taj roj so' a.

<sup>10</sup>Gaa ne cataj Jesucristó rihaan roj so' a:

—Cuno roj soj nana nihánj, se vaa asa' catúj roj soj chuman' yo', ne nari' tuvi' roj soj ga 'o sí taa chiha 'o cacuaj na, ne canoco' roj soj man so', catuu roj soj rá ve' catuu so', <sup>11</sup>ne cataj roj soj rihaan sí tucuá ve' yo': “Xná'anj maestró mán so' se vaa me rej ne ve' cha xti'nó maestró chraa ga nij sí tucu'yón se-nana so' che'é cha'anj pascuá, taj so' a”, cataj roj soj rihaan sí tucuá ve' yo' a.

<sup>12</sup>Gaa ne tijaan so' 'o ve' nata' xij rihaan roj soj, ne aj vaa chuvij rá ve' yo', ne man chruun mesá man chruun xlá man rá ve' yo' a. Yo' me rej qui'yaj chuvij roj soj á —taj Jesucristó rihaan roj so' a.

<sup>13</sup>Dan me se cavii roj so' ca'anj roj so', ne nari' roj so' nu' ndaa vaa

cataj xna'anj Jesucristó rihaan roj so', gaa ne qui'yaj chuvij roj so' cha xti'nó nij so' chraa che'é cha'anj pascuá a. <sup>14</sup>Ne quisij orá cha xti'nó nij so', ne ca'na' Jesucristó ga yo'óo nij apóstol cune' so' man nata' rihaan yuvij che'é so', gaa ne ca'anj cayáán taran' nij so' rihaan mesá a. <sup>15</sup>Gaa ne cataj Jesucristó rihaan nij so' a:

—Guun ndo'o raj cha xti'nó 'unj che'é cha'anj pascuá nihánj ga nij soj cuano nihánj gaa ataa quirán' 'unj sayuun a. <sup>16</sup>O se cataj xna'anj 'unj rihaan soj cuano se vaa se chá xti'nó uún 'unj ga soj a 'ó cha'anj nihánj ndaa se quisij güii canuü cha'anj pascuá naca asa' guun chij Diose rihaan chumiij nihánj a man adonj —taj Jesucristó rihaan nij so' a.

<sup>17</sup>Gaa ne nicaj so' 'o aga' tazá na vinó, ne nago' so' graciá rihaan Diose, gaa ne cataj so':

—Quita'aa soj na nihánj, cuxra' ta'aj soj, ne co'o cunudanj soj á.

<sup>18</sup>O se cataj xna'anj 'unj rihaan soj cuano se vaa veé doj nihánj me co'oj, ne se co'oj yaj a ma'. Tzaj ne asa' quisij güii guun chij Diose rihaan chumiij nihánj, ne co'oj adonj —taj Jesucristó rihaan nij so' a.

<sup>19</sup>Gaa ne nicaj so' rachrúún, ne nago' so' graciá rihaan Diose, gaa ne cuxra' so' rachrúún, ne rqué so' man nij so', ne cataj so':

—Nee manj me rachrúún nihánj nanj á. Ca'vej rá 'unj cavi' nee manj che'é soj, ne cha soj man nihánj, gaa ne yo'o cunuü rá soj manj ei —taj so' rihaan nij apóstol a.

<sup>20</sup>Gaa ne ase vaa qui'yaj so' ga rachrúun ro', danj qui'yaj uún so' ga aga' nuu na vinó gaa quisíj chá xti'no nij so', ne cataj so':

—Na vinó nihánj ro', me ton manj a. Che'é ton manj ro', rqué Diose 'o nana rihaan soj daj qui'yaj Diose ga soj a. Dan me se che'é se cayanj ton manj ro', che'é dan me caraa x'naa Diose ni'yaj Diose cacun' tumé yuvií nanj adonj —taj Jesucristó rihaan nij so' a.

**Nana nihánj taj xna'anj se vaa ma'an Jesucristó cataj xna'anj se vaa tacuachén yo'ó sí tucu'yón se-nana so' man so' rihaan nij sí taj ri'yunj man so' a**

<sup>21</sup>Ne cataj uún Jesucristó a:

—Tzaj ne xcaj soj cuentá se vaa vaa 'o sí tacuachén manj rihaan nij sí taj ri'yunj manj, ne táa ra'a so' rihaan chruun mesá taj ra'aj nihánj cuano ei. <sup>22</sup>'O se xa' 'unj sij ca'néé Diose nicaj yu'unj man yuvií, tzaj ne ca'anj 'unj cavi' 'unj ndaa vaa cataj xna'anj ma'an Diose a. Tzaj ne nique ndo'o sí tacuachén manj rihaan nij sí taj ri'yunj manj nanj á. Quiran' uxrá so' sayuun adonj —taj Jesucristó rihaan nij so' a.

<sup>23</sup>Gaa ne guun che'e nij sí tucu'yón se-nana Jesucristó nuchruj raa nij so' ga tuvi' nij so' me tuvi' nij so' me sí qui'yaj danj man Jesucristó, rá nij so' a.

**Nana nihánj taj xna'anj daj qui'yaj ní' sese me rá ní' guun ní' sí guun chij doj rihaan tuvi' ní' a**

<sup>24</sup>Gaa ne ca'mii cunu' cunudanj nij sí tucu'yón se-nana Jesucristó me tuvi' nij so' me sí guun chij

doj a. <sup>25</sup>Gaa ne cataj Jesucristó rihaan nij so' a:

—Nij sí nicaj suun rey uun chij rihaan nij yuvií yaníj ro', rii ta'nga' uxrá nij so' rihaan tuvi' nij so', ne tucu'náj nii “sí 'nij ra'a man ní'” man nij so' nanj á. <sup>26</sup>Tzaj ne se guun soj sí vaa danj ma'. Maan se tuvi' soj sí guun rá se vaa guun chij so' doj rihaan soj ro', vaa che'é guun so' sí nocó' doj rihaan soj, ne guun so' ase vaa 'o se-mozó soj a. <sup>27</sup>Dan me se me sí me sí uun chij doj, rá soj ga: sí anicaj co'oo rihaan mesá na', ase sí yanj rihaan mesá xa'. Veé sí yanj rihaan mesá me sí uun chij doj, rá soj a. Tzaj ne nihánj me se vaj ma'an 'unj sca'núj nij soj, ne aj guún 'unj mozó rihaan soj vaa nanj adonj.

<sup>28</sup>Ne xa' soj, tzaj ne nij soj me nij sí cachéé ga 'unj gaa quirán' 'unj sayuun, <sup>29</sup>ne ase vaa cune' Réj Diose manj se vaa guun chij 'unj ro', danj gaa cune' 'unj man soj cuano <sup>30</sup>se vaa cayáan soj rihaan xrúun 'unj chruun mesá asa' guun chij ma'anj, ne cha' soj chraa ne co'ó soj na ga 'unj adonj. Ne quitaj soj chruun xlá sa' ndo'o, ne ca'ne' soj cacun' che'é chujij nij x'ne' yuvií israelitá adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj daj ca'mii Jesucristó ga sí cu'naj Simón Pedró a**

<sup>31</sup>Gaa ne cataj Jesucristó rihaan sí cu'naj Simón Pedró a:

—Cunó so' nana nihánj ca'mij rihaan so', Simón. 'O se aj cachíin ni'yaj sí cu'naj Satanás rihaan Diose se vaa ca'vej rá Diose qui'yaj so'

sayuun man nij soj a. Dan me se ase vaa 'yaj nii man 'núú trigó gaa tixrin' nii 'núú trigó rihaan rcuaa ro', danj qui'yaj síi chree man soj, che'é se guun rá so' quirí' soj adonj. <sup>32</sup>Tzaj ne aj cachíin ni'yáa 'unj rihaan Diose che'é so', se vaa se ca'ne' rá so' ga suun amán rá ni'yaj manj a ma'. Gaa ne asa' nanicaj nimán so' canoco' uún so' manj ro', ne racuíj so' man nij tinúú so' se vaa cunuú sca' doj nimán nij so' uún á —taj Jesucristó rihaan síi cu'naj Simón Pedró yo' a.

<sup>33</sup>Gaa ne cataj so' rihaan Jesucristó a:

—Tzaj ne aj ca'née nimanj yo'o cachee 'unj ga so', Señor. Ca'vee se caxrii nii taga' mán so' ca'vee se ticavi' nii mán so' ca'vee se, tzaj ne se tanáj xcó 'unj mán so' ma' —taj so' rihaan Jesucristó a.

<sup>34</sup>Tzaj ne cataj Jesucristó rihaan Pedró a:

—Nihánj me cataj 'unj rihaan so' daj qui'yáa so', Pedró. Ne'én 'unj se vaa asa' ataa caguaj to'loo nií corá, ne va'núj cataj so' se vaa ne ne'én so' manj ma' —taj Jesucristó rihaan Pedró a.

**Nana nihánj taj xna'anj se vaa quirán' nij síi tucu'yón se-nana Jesucristó sayuun a**

<sup>35</sup>Gaa ne cataj Jesucristó rihaan nij síi tucu'yón se-nana so' a:

—Gaa ca'née 'unj man soj ca'mii natáj soj se-nanaj rihaan nij yuvií israelitá ne taj nanj taj vitó taj canj taj ca'anj nicaj soj gaa ca'anj soj, tzaj ne taj vaj rasuun cachiin man soj gaa ca'anj soj, rá 'unj a —taj Jesucristó rihaan nij so' a.

—Taj vaj a doj rasuun ne cachiin man núj ma' —taj nij so' rihaan Jesucristó a.

<sup>36</sup>Gaa ne cataj Jesucristó rihaan nij so' a:

—Yaj me se sese vaa xnánj soj do', se-vito soj do', ne nicaj soj ca'anj soj á. Ne sese taj yan vaj neê espadá rihaan soj, ne quiraan soj 'o taneê soj neê espadá á. Ne sese nuvi' sa'anj rihaan yo'o tuvi' soj, ne vaa che'é cutu'vee so' se-roto so', ne quiraan so' neê espadá ei. <sup>37</sup>'O se vaa nana no rihaan danj Diose taj: “Cataj nii se vaa sij 'yaj cacun' me so'”, taj danj Diose che'é 'unj, ne vaa che'é quisij ya nu' nana yo' che'ej a. 'O se daj doj quinavij se vaa 'yáa 'unj rihaan chumií nihánj nanj adonj —taj Jesucristó rihaan nij so' a.

<sup>38</sup>Gaa ne cataj nij so' rihaan Jesucristó a:

—Ni'yaj so' ei. Vaa vij neê espadá rihaan ní' nihánj, Señor —taj nij so' a.

—Veé danj me se danj nanj á —taj Jesucristó rihaan nij so' a.

**Nana nihánj taj xna'anj daj qui'yaj Jesucristó gaa cachíin ni'yaj Jesucristó rihaan Diose a**

<sup>39</sup>Gaa ne cavii so' ca'anj so' quij cu'naj Quij man Chruun Olivó, ndaa vaa cu'yón inanj so' qui'yaj so' a. Ne canoco' nij síi tucu'yón se-nana so' rej xcó so' a. <sup>40</sup>Ne gaa cuchi' nij so' rej yo', ne cataj Jesucristó rihaan nij so' a:

—Cachinj ni'yaj soj rihaan Diose se vaa caráan Diose chrej rihaan síi chree se gaa nanj guun rá soj qui'yaj soj cacun' qui'yaj síi chree

á —taj Jesucristó rihaan nij síí tucu'yón se-nānā so' a.

<sup>41</sup>Gaa ne naxuun so' man so' rihaan nij síí tucu'yón se-nānā so', ne ca'anj so' rej yaníj doj, ne canicun' ruj so', ne cachíin ni'yaj so' rihaan Diose, <sup>42</sup>ne cataj so' rihaan Diose a:

—Sese ca'vee, ne caráán ra'á so' xráj, se gaa nanj quirán' uxrá 'unj sayuun, tzaj ne sese ma'án so' me rá quirán' 'unj sayuun, ne qui'yáá so' ndaa vaa me rá ma'án so', ne se qui'yáá so' ndaa vaa me rá ma'anj ma' —taj Jesucristó, cachíin ni'yaj so' rihaan Diose a.

<sup>43</sup>Gaa ne curuvi' yo'o se-mozó Diose cavii rej xtá' rihaan so', ne nari' nucuj nimán so', qui'yaj se-mozó Diose yo' a. <sup>44</sup>Ne nanó ndo'o rá so', ne nucuj ndo'o cachíin ni'yaj so' rihaan Diose, ne cavii ndo'o nihaa rihaan so', ne ase vaa ton vaa nihaa cavii rihaan so' cayanj rihaan yo'óo a. <sup>45</sup>Ne canicun' caya so', ne ca'anj so' rej ne nij síí tucu'yón se-nānā so', tzaj ne quene'en so' se vaa cotoj nu' nij so', che'é se nanó ndo'o rá nij so' a. <sup>46</sup>Gaa ne cataj Jesucristó rihaan nij so' a:

—Me che'é otoj soj ga. Naxumaan soj cachinj ni'yaj soj rihaan Diose se gaa nanj guun rá soj qui'yaj soj cacun' qui'yaj síí chree á —taj so' rihaan nij síí tucu'yón se-nānā so' a.

**Nanā nihánj taj xna'anj daj qui'yaj nii gaa quita'aa nii man Jesucristó a**

<sup>47</sup>Dan me se nicun' Jesucristó ca'mii so', ne nu' ca'na' que'ee yuvij, ne síí cu'naj Judas yo'o tuvi' chuvij nij síí tucu'yón se-nānā Jesucristó

me síí táá yaan rihaan nij yuvij, ne quinichrun' síí cu'naj Judas rihaan Jesucristó, che'é rej guun rá so' cachron tu'vá so' xruu Jesucristó a. <sup>48</sup>Gaa ne cataj Jesucristó rihaan Judas a:

—Ne chihan' uxrá 'yáá so', se vaa tacuachén so' manj sij ca'née Diose nicaj yu'unj man yuvij gaa cachron tu'vá so' xruj, man Judas —taj so' rihaan Judas yo' a.

<sup>49</sup>Dan me se quene'en nij síí nicun' ga Jesucristó daj qui'yaj nij yuvij man Jesucristó, ne che'é dan xná'anj nij so' man Jesucristó a:

—Go' núj neê espadá raq nij so', rá so' na' —taj nij so' rihaan Jesucristó a.

<sup>50</sup>Ne yo'o tuvi' nij so' ro', go' taneê so' neê espadá raq se-mozó xrej ata suun nocoo doj, ne güéj nu' xrée yo' rej nuva' yo', qui'yaj so' a.

<sup>51</sup>Gaa ne cataj Jesucristó rihaan so' a:

—Ca'ne' rá soj ga suun 'yaj danj á —taj Jesucristó rihaan nij so' a.

Gaa ne cuta' Jesucristó ra'a Jesucristó rej quiran' chi'ii xrée mozó yo', ne nu' orá nahuun sa' xrée mozó yo', qui'yaj Jesucristó a.

<sup>52</sup>Gaa ne cataj Jesucristó rihaan nij xrej ata suun nocoo doj do', rihaan tanuu uun chij rihaan nij tanuu tumé nuvií do', rihaan nij síí uun chij rihaan nij yuvij israelitá do' a:

—Me che'é 'na' neê espadá 'na' chruun 'na' ga soj ga. Síí ituu mé 'unj, rá soj na'. <sup>53</sup>Q se daj a güii yáán 'unj ga nij soj rá nuvií nocoo, tzaj ne ne guun rá soj quita'aa soj mán 'unj ma'. Tzaj ne cuano nihánj me se aj quisij orá ca'vee qui'yaj soj ndaa vaa me rá soj qui'yaj soj,



ne nihánj me se ca'vee guun nucaj soj sij vaj rej rmi' a —taj Jesucristó rihaan nij so' a.

**Nana nihánj taj xna'anj daj  
qui'yaj síí cu'naj Pedró gaa  
cataj so' se vaa nuveé sij noco'  
man Jesucristó me so' a**

<sup>54</sup>Dan me se quita'aa nij so' man Jesucristó, ne ca'anj nicaj nij so' man Jesucristó rá ve' tucúa xrej atá suun nocoj doj, ne gan' gan' canoco' síí cu'naj Pedró rej xco Jesucristó, 'na' so' a. <sup>55</sup>Dan me se naran' nii ya'an rá ve', ne yáán tacuachriin taran' nii rihaan ya'an, ne yáán síí cu'naj Pedró sca'núj nij so' a. <sup>56</sup>Dan me se yáán so' rej chuguun ya'an rihaan nij tuvi' xrej, ne quene'en yo'lo mozó chana man so', ne ni'yaj uxrá chana yo' man so' a. Gaa ne cataj mozó chana yo' rihaan tuvi' no' síí man ga no' a:

<sup>57</sup>—Síí nihánj ro', me yo'lo síí cachéé ga Jesucristó a —taj chana yo', ni'yaj yo' man Pedró a.

Gaa ne cataj Pedró rihaan chana yo' a:

—Ne ne'én 'unj man so', man nocoj —taj so' a.

<sup>58</sup>Ne yo'lo orá nii me se quene'en yo'lo so' man Pedró uún a:

—Yo'lo tuvi' nij síí chéé ga so' mé so' ei —taj so' rihaan Pedró a.

—Taj ma'. Nuveé sij chéé ga so' mé 'unj, man tinuj —taj Pedró yo' a.

<sup>59</sup>Dan me se cachén yo'lo orá uún, gaa ne nucaj ca'mii yo'lo so' a:

—Ya uxrá sij cachéé ga Jesucristó me síí nihánj nanj ei. 'O se sij cavii estadó Galilea me roj so' ga Jesucristó chuguaj —taj yo'lo so' a.

<sup>60</sup>Gaa ne cataj Pedró rihaan síí tu'va danj a:

—Ne uno uxraj me taj so', man tinuj —taj so' rihaan nij so' a.

Ne dan me se nu' ca'mii so' danj, ne nu' caguáj to'loo a. <sup>61</sup>Gaa ne canicaj síí 'nij ra'a man ní', ne ni'yaj so' man Pedró, gaa ne nanuj rá Pedró se-nana síí 'nij ra'a man ní' gaa cataj síí 'nij ra'a man ní' rihaan so': “Ne'én 'unj se vaa asa' ataa caguaj to'loo ni corá, ne va'núj cataj so' se vaa ne ne'én so' manj ma'”, cataj síí 'nij ra'a man ní' rihaan so' quii a. <sup>62</sup>Dan me se gaa ni'yaj síí 'nij ra'a man ní' man Pedró, gaa ne curihanj Pedró xe', ne ta'vee ndo'o so' a.

**Nana nihánj taj xna'anj  
daj qui'yaj nii gaa cuta' nii  
cacun' xráá Jesucristó a**

<sup>63</sup>Gaa ne nij síí quita'aa man Jesucristó ro', tiha' ndo'o nij so' man so', ne go' nij so' xráá so' a.

<sup>64</sup>Ne gaa go' nij so' xráá so' me se caráán nij so' rihaan Jesucristó, ne cataj nij so' rihaan so' a:

—Cataj so' rihaan núj me síí go' mán so' á —taj nij so', <sup>65</sup>ne que'ee doj nana nij a'mii uún nij so' rihaan Jesucristó a.

<sup>66</sup>Ne gaa quisíj güii, ne cunuu chre' nij síí uun chij rihaan nij yuvii israelitá, ne dan me se nij xrej atá suun nocoj doj do', nij síí naquiyaj cuu se-tucuanj Moisés do', cunuu chre', ne ca'anj nicaj nij so' man Jesucristó rá ve' a'ne' nij so' cacun' che'é yuvii a. Gaa ne xná'anj nij so' man Jesucristó, ne cataj nij so':

<sup>67</sup>—Sese ya sij ca'née Diose tinanii man yuvii rihaan sayuun mé so', rá so', ne cataj xna'anj so' rihaan núj á —taj nij so' a.

Gaa ne cataj Jesucristó rihaan nij so' a:

—Ca'vee se cataj xna'anj 'unj rihaan soj, tzaj ne se cuchumán rá soj se-nanaj ma'. <sup>68</sup>Ne sese xna'anj 'unj 'o nana man soj, tzaj ne se cataj xna'anj soj rihanj ma'. <sup>69</sup>Tzaj ne rej rihaan ní' me se xa' 'unj sij ca'née Diose nicaj yu'unj man yuvii, tzaj ne cayáan 'unj rej nuva' Diose síi nucuaj ndo'o a —taj Jesucristó rihaan nij so' a.

<sup>70</sup>Gaa ne xná'anj cunudanj nij so' man Jesucristó, cataj nij so':

—Che'é dan me ta'nij Diose mé so', rá so' na' —taj nij so' rihaan so' a.

Gaa ne cataj Jesucristó rihaan nij so' a:

—Veé ya ndaa vaa cataj soj ro', veé danj vaa nanj á —taj so' a.

<sup>71</sup>Gaa ne cataj nij so' rihaan tuvi' nij so' a:

—Se cachiin doj síi ca'na' cataj xna'anj rihaan ní' che'é cacun' tumé síi nihánj a ma'. 'O se ma'an ní' me síi cuno daj tu'va so' nihánj nanj adonj —taj nij so' rihaan tuvi' nij so' a.

**Nana nihánj taj xna'anj daj ca'mii síi cu'naj Pilato ga Jesucristó a**

**23** Dan me se que'ee nij so', ne naxumaan taran' nij so', ne ca'anj nicaj nij so' man Jesucristó rihaan síi cu'naj Pilato a. <sup>2</sup>Gaa ne cuta' nij so' cacun' xráá so' rihaan síi cu'naj Pilato, ne cataj nij so' rihaan síi cu'naj Pilato a:

—Síi nihánj ro', me síi tucu'yón tucuáan ne rihaan tuvi' núj sij israelitá, ne cataj so' se vaa se go' yuvii puextó rihaan síi nicaj suun cu'naj César, ne taj so' se vaa sij

ca'née Diose guun síi nicaj suun rey me ma'an so', taj so' adonj —taj nij so' rihaan síi cu'naj Pilato, ni'yaj nij so' man Jesucristó a.

<sup>3</sup>Gaa ne xná'anj síi cu'naj Pilato man Jesucristó a:

—So' me síi nicaj suun rey uun chij rihaan nij yuvii israelitá na' —taj so', xná'anj so' man Jesucristó a.

—Vej á —taj Jesucristó rihaan so' a.

<sup>4</sup>Gaa ne cataj síi cu'naj Pilato rihaan nij xrej ata' suun nocoo doj do', rihaan nij yuvii do' a:

—Nuvi' cacun' tumé síi nihánj naríj ma' —taj so' a:

<sup>5</sup>Tzaj ne nucuaj doj ca'mii nij so', cataj nij so':

—Tzaj ne que'ee yuvii uno se-nana so', ne vaa güii qui'yaj nij so' sayuun nanj á. Ne vaj so' tucu'yón so' se-nana so' nu' estadó Judea nihánj, ne guun che'e so' tucu'yón so' se-nana so' estadó Galilea, ne 'na' so' ndaa nihánj tucu'yón so' nanj adonj —taj nij so' rihaan Pilato a.

<sup>6</sup>Dan me se cuno Pilato se-nana nij so', gaa ne xná'anj Pilato man nij so' sese sij cavii estadó Galilea me Jesucristó a. <sup>7</sup>Gaa ne quene'en so' se vaa ya cavii Jesucristó estadó Galilea rej uun chij síi cu'naj Herodes a. Che'é dan cataj so' se vaa ca'anj nicaj nij so' man Jesucristó rihaan síi cu'naj Herodes yo' a. 'O se güii dan me se nuú ma'an síi cu'naj Herodes chuman' Jerusalén a.

**Nana nihánj taj xna'anj daj ca'mii síi cu'naj Herodes ga Jesucristó a**

<sup>8</sup>Gaa quene'en síi cu'naj Herodes man Jesucristó, gaa ne guun niha'

uxrá rá so' a. 'O se asij rque ndo'o me se guun rá so' quene'en so' man Jesucristó, che'é se aj cuchí' nana rihaan so' daj 'yaj Jesucristó a. Ne guun rá so' se vaa qui'yaj Jesucristó 'o suun sa' nocoo ni'yaj so' a. <sup>9</sup>Dan me se xná'anj ndo'o so' nana man Jesucristó, tzaj ne a 'ó nana ne ca'mii Jesucristó rihaan so' a ma'. <sup>10</sup>Tzaj ne nicun' nij xrej atá suun nocoo doj nicun' nij síí naqui'yaj cuu se-tucuanj Moisés rihaan nij yuvií nicun', ne nucuaj ndo'o cuta' nij so' cacun' xráá Jesucristó a. <sup>11</sup>Gaa ne nachri' Herodes do', nij tanuu nuu rihaan so' do', ni'yaj nij so' man Jesucristó, ne ca'nga' nacoo nij so' ni'yaj nij so' man Jesucristó a. Gaa ne na'née nij so' yatzíj sedá man Jesucristó qui'yaj Herodes, ne veé dan na'née uún Herodes man so' rihaan Pilato a. <sup>12</sup>Ne güii dan me se guun che'e Herodes ga Pilato na'mii sa' roj so' ga tuvi' roj so' a. 'O se asij rque doj me se sij taj ri'yunj man tuvi' me roj so' a.

**Nana nihánj taj xna'anj se vaa cataj xna'anj síí cu'naj Pilato se vaa cavi' Jesucristó rihaan rcutze a**

<sup>13</sup>Dan me se canacúun síí cu'naj Pilato man nij xrej atá suun nocoo doj do', man nij síí uun chij rihaan nij yuvií israelitá do', man ma'an nij yuvií do', se vaa ca'na' nij so' cunuu chre' nij so' rihaan so' a. <sup>14</sup>Gaa ne cataj Pilato rihaan nu' nij yuvií a:

—Dan me se nicaj soj man snó'o nihánj ca'na' soj rihanj, ne cataj soj se vaa so' me síí me rá qui'yaj nij yuvií sayuun a. Ne veé xná'anj 'unj man so' cuno taran' soj daj 'yaj

so', ne xa' cacun' cuta' soj xráá so', tzaj ne taj vaj cacun' vaa danj tumé síí nihánj narij ma'. <sup>15</sup>Ne síí cu'naj Herodes ro', ne nari' so' cacun' tumé síí nihánj a ma'. Maan se na'née uun síí cu'naj Herodes man síí nihánj rihaan ní' nanj á. Ne xcaj soj cuentá se vaa taj cacun' qui'yaj síí nihánj, ne ne nó xcúun so' cavi' so' ma'. <sup>16</sup>Che'é dan qui'yáj doj sayuun man so', ne ca'anj uun so', qui'yaj ní' nanj á —taj Pilato rihaan taran' nij yuvií a.

<sup>17</sup>'O se maan güii dan me se daj a cha'anj pascuá na'née nij so' man 'o yuvií 'nij taga' a.

<sup>18</sup>Gaa ne caguáj cunudanj nij so', cataj nij so' a:

—Ticavi' soj man síí nihánj ei.

Ticavi' soj man síí nihánj ei. Ne quirii so' man síí cu'naj Barrabás taga' che'é núj á —taj nij so', caguáj nij so' rihaan Pilato a.

<sup>19</sup>Ne xa' síí cu'naj Barrabás, tzaj ne sij qui'yaj cunu' nij yuvií man chuman' Jerusalén me so', ne sij ticavi' man yuvií me so', ne che'é dan caxríj nii taga' man so' a.

<sup>20</sup>Gaa ne ca'mii uún Pilato rihaan nij yuvií a. 'O se guun rá so' quirii so' man Jesucristó ca'anj Jesucristó a.

<sup>21</sup>Gaa ne caguáj nu' nij yuvií, cataj nij so':

—Canó ya so' rihaan rcutze ei —taj nij yuvií, caguáj nij yuvií a.

<sup>22</sup>Gaa ne quisíj va'nuj cataj so' rihaan nij yuvií:

—Tzaj ne taj vaj se chi'ii qui'yaj so' ma'. Taj vaj cacun' tumé so', ne ne nó xcúun so' cavi' so' ma'. Dan me se qui'yáj doj sayuun man so', ne ca'anj uun so' qui'yáj nanj á —taj uún Pilato rihaan nij yuvií a.

<sup>23</sup>Tzaj ne caguáj ndo'o nij yuvii, ne uxrá ca'ne' nij yuvii suun rihaan Pilato se vaa ya cavi' Jesucristó rihaan rcutze qui'yaj so', ne guun nucaj doj se-nana nij yuvii yo' a. <sup>24</sup>Gaa ne guun ya rá Pilato se vaa qui'yaj so' ndaa vaa cataj nij yuvii rihaan so' a. <sup>25</sup>Dan me se sí 'nij taga' tumé cacun' se vaa cunu' yuvii qui'yaj do', se vaa ticavi' yuvii do', quirii Pilato man so' ca'anj uun so', ndaa vaa cataj nij yuvii a. Ne Jesucristó ro', ca'vej rá Pilato quiran' so' ndaa vaa guun rá nij yuvii quiran' so' nanj adonj.

**Nana nihánj taj xna'anj daj qui'yaj  
nij yuvii gaa cachrón nij yuvii  
man Jesucristó rihaan rcutze a**

<sup>26</sup>Dan me se nicaj nii man Jesucristó ca'anj nii, gaa ne quita'aa nii man yo'ó sí cu'naj Simón sí cavi chuman' Cirene gaa 'na' nique so' rej tacaan, ne cuta' nii rcutze xráá so' atá so' rcutze 'na' so' rej xco Jesucristó a. <sup>27</sup>Ne noco' que'ee yuvii man Jesucristó, ne ta'aj nij yuvii me chana, ne dan me se go' nij chana se-cuxru' nij no' rucuaa nij no', ne ta'vee ndo'o nij chana ni'yaj nij chana man Jesucristó a. <sup>28</sup>Gaa ne canicaj Jesucristó, cataj Jesucristó rihaan nij chana yo':

—Cunq soj chana ta'nij chuman' Jerusalén ca'mij á. Se ta'vee nij soj ni'yaj soj mán 'unj a ma'. Tzaj ne ta'vee soj ni'yaj soj man ma'an soj do', man ma'an ta'ní soj do' á. <sup>29</sup>'Q se vaa güii cataj nii se vaa aj cavi sa' doj nij chana ituun do', nij chana ne nari' ne'ej do', nij chana ne tucutzii ne'ej do' a. <sup>30</sup>'Q se güii dan me se guun che'e yuvii nacunj

yuvii nij quij se vaa canee nij quij caráán nij quij xráá ma'an nij so' a. <sup>31</sup>'Q se ase vaa chruun maree vaa i'na' vaa 'unj nihánj, tzaj ne danj nanj ticavi' nii manj a. Táa a nij sí ne chuman' Jerusalén, ne ase vaa chruun naco cavi' vaa nij sí tumé cacun' ne chuman' Jerusalén, ne che'é dan chi'ii uxrá doj quiran' nij so' nanj adonj —taj Jesucristó rihaan nij chana a.

<sup>32</sup>Ne nicaj nii man yavij roj sí tumé cacun', ca'anj nii rej cavi' roj so' ga Jesucristó a. <sup>33</sup>Ne gaa cuchi' taran' nij so' rej cu'naj Tacaan Cúú Yave Xnangá, ne cachrón nii man Jesucristó ga roj sí tumé cacun' rihaan va'naj rcutze, ne dan me se yo'ó so' ro', cachrón nii rej nuva' Jesucristó, ne yo'ó so' ro', cachrón nii rej nichruun Jesucristó a. <sup>34</sup>Gaa ne cachíin ni'yaj Jesucristó rihaan Diose, cataj so':

—Caraa x'naa so', ne se qui'yáá so' sayuun man nij so', man Ataj Chij. 'Q se ne ne'en nij so' daj 'yaj nij so' ma' —taj so', cachíin ni'yaj so' rihaan Rej so' Diose a.

Gaa ne tico tixaj nij tanuu che'é sagan' Jesucristó a.

<sup>35</sup>Ne canicun' que'ee yuvii ni'yaj daj quiran' Jesucristó a. Dan me se ca'nga' nacoo nij sí uun chij, cataj nij so':

—Aj tinanii so' man yo'ó yuvii rihaan sayuun, rá so' á. Ca'vee tñanii so' man ma'an so' yaj ei. Sese sij narii Diose me so' do', sese sij ca'née Diose tñanii man yuvii rihaan sayuun me so' do', ne ca'vee tñanii ma'an so' man so' a —taj nij sí uun chij ni'yaj nij so' man Jesucristó a.

<sup>36</sup>Ne nij tanuu, tzaj ne ca'nga' nacoꝝ uún nij tanuu ni'yaj nij tanuu man Jesucristó, ne ru'maan nij tanuu na vinó yuu tu'va Jesucristó, <sup>37</sup>ne cataj nij so':

—Sese so' me sí nicaj suun rey uun chij rihaan nij yuvii israelitá, ne tinanii so' man ma'án so' rihaan sayuun yaj vij —taj nij tanuu rihaan Jesucristó a.

<sup>38</sup>Ne vaa rcuchra' nó rihaan rcutze yo', ne nó nana rihaan rcuchra' yo' se vaa: “Sij nicaj suun rey uun chij rihaan nij yuvii israelitá me sí nihánj a”, taj nana yo' a.

<sup>39</sup>Ne yo'o tuvi' roj sí tumé cacun' noco' rihaan rcutze rej x'nuj Jesucristó ro', nij ca'mii so' rihaan Jesucristó, cataj so':

—Sij ca'née Diose tinanii man yuvii rihaan sayuun mé so', rá so' na'. Me che'é ne tinanii so' man taran' ní ga —taj so' rihaan Jesucristó a.

<sup>40</sup>Tzaj ne yo'ó sí tumé cacun' ro', cataj so' rihaan tuvi' so':

—Nihánj me se cuyaꝝ vaa sayuun ran' ní ga sayuun ran' sí nihánj nanj á. Ne me che'é ne chu'ví so' a doj ni'yaj so' Diose ga. <sup>41</sup>Dan me se xa' ní, tzaj ne vaa che'é cavi' ní, ne ran' ní sayuun che'é cacun' tumé ní, tzaj ne xa' sí nihánj, tzaj ne taj vaj a doj se chi'ii ne qui'yaj sí nihánj a ma' —taj yo'ó sí tumé cacun' yo' rihaan tuvi' so' a.

<sup>42</sup>Gaa ne cataj so' rihaan Jesucristó a:

—Se quini'yón so' racúj so' manj, asa' guun che'e so' guun chij so' a ma' —taj so' rihaan Jesucristó a.

<sup>43</sup>Gaa ne cataj Jesucristó rihaan so' a:

—Ya ya cataj xna'anj 'unj rihaan so' cuano se vaa güii cuan' me se cayáan so' ga 'unj rej sa' ndo'o rej ne nij sí sa' rihaan Diose ei —taj Jesucristó rihaan so' a.

<sup>44</sup>Veé dan, ne caxuj me yo', ne guun rmi' rihaan nu' chumii, ne yo'o guun rmi' rihaan chumii ndaa quisíj aga' va'nuj rej anoco' güii a.

<sup>45</sup>Ne guun rmi' rihaan güii, ne sin' nu' yatzíj cortiná noco' rá nuví nocoꝝ a. <sup>46</sup>Gaa ne nucuaj ndo'o caguáj Jesucristó, cataj so':

—Nacaj so' nimanj, Ataj Chij —taj so', ne veé dan cavi' so' a.

<sup>47</sup>Dan me se quene'en tanuu capitán se vaa guun, gaa ne ve'é uxrá ca'mii so' che'é Diose, ne cataj so':

—Xa' sí nihánj, tzaj ne ya ya sí sa' me so' nanj á —taj tanuu yo' ni'yaj so' man Jesucristó a.

<sup>48</sup>Dan me se quene'en taran' nij yuvii cunuu chre' rej yo' se vaa guun, gaa ne go' nij so' se-cuxru' nij so' rucuaꝝ nij so' che'é se nanó ndo'o rá nij so', gaa ne canicaj nij so' ca'anj nij so' chuman' a.

<sup>49</sup>Ne canicun' cunudanj nij tuvi' Jesucristó rej gan' doj, ne ta'aj nij so' me chana cuno se-nana Jesucristó asij cavii Jesucristó estadó Galilea a. Ne ni'yaj taran' nij so' man Jesucristó a.

**Nana nihánj taj xna'anj se vaa  
cachin' nii man Jesucristó  
rque yu'uj yuvej a**

<sup>50</sup>Ne vaa 'o sí cu'naj José, ne yo'o tuvi' nij sí uun chij rihaan nij yuvii israelitá me so' a. Ne sí sa' me so', ne sí nica nimán me so', <sup>51</sup>ne ne vaa rá so' daj se vaa rá

yo'ó nij síi uun chij rihaan nij yuvií israelitá ma'. Ne guun rá so' qui'yaj so' ndaa vaa qui'yaj yo'ó nij so' ma'. Ne síi cavii chuman' Arimatea yo'ó chuman' naj estadó Judea me so' a. Ne so' me síi me ndo'o rá guun chij Diose rihaan chumii nihánj a.

<sup>52</sup>Dan me se ca'anj so' rihaan síi cu'naj Pilato, ne cachíin ni'yaj so' rihaan síi cu'naj Pilato se vaa ca'vej rá síi cu'naj Pilato cachin' so' man Jesucristó a. Dan me se ca'vej síi cu'naj Pilato, <sup>53</sup>gaa ne ca'anj síi cu'naj José, tinanij so' man Jesucristó, ne nacutáj so' yatzíj mantá xráá Jesucristó, ne caxríj so' man Jesucristó rque yu'uj yuvej rej nuvi' a 'ó xngá naj a.

<sup>54</sup>Veé danj qui'yaj nij so' güii 'yaj chuvii nij yuvií israelitá che'é güii naraan rá nij so', ne veé danj quisíj güii naránj rá nij so' a. <sup>55</sup>Ne canoco' nij chana cavii estadó Galilea ga Jesucristó rej xco síi cu'naj José, ne quene'en nij chana yu'uj rej caxríj síi cu'naj José man Jesucristó, <sup>56</sup>gaa ne canicaj nij chana chuman' Jerusalén, ne qui'yaj chuvii nij chana yo'óo gun' daj do', squíi xlá mirra do', caxrii nij chana man Jesucristó rá nij chana a.

#### Nana nihánj taj xna'anj se vaa cunuu i'na' uún Jesucristó a

Dan me se ma'an güii naránj rá nij yuvií israelitá me se naránj rá nij chana a.

**24** Ne taxrej güii cotungó, gaa ataa doj quisíj güii, me se ca'anj nij chana rej taj yu'uj, ne nicaj nij chana nij rasuun gun' daj se vaa aj qui'yaj chuvii nij no' a. <sup>2</sup>Gaa ne quene'en nij chana se vaa

naj yaníj yuvej aráán tu'va yu'uj naj Jesucristó a. <sup>3</sup>Ne gaa catúj nij chana rá yu'uj, ne ne nari' nij chana man Jesucristó sij 'nij ra'a man ní' a ma'. <sup>4</sup>Dan me se caráya'anj ndo'o nij chana, ne nicun' víj snó'o rihaan nij chana, ne roj snó'o yo' me se yatzíj chuguun uxrá nuú roj so' a. <sup>5</sup>Dan me se chuchu'vi' uxrá nij chana, ne ca'anj cayáán ruj nij chana, ne cuchruj nij chana rihaan nij chana rihaan yo'óo a. Gaa ne cataj roj snó'o rihaan nij no':

—Taj che'é nana' soj man síi vaa i'na' rej naj nij síi cavi' ma'. <sup>6</sup>O se nuvi' so' naj nihánj a ma'. 'O se cunuu i'na' uún so' nanj á. Dan me se nanuj rá soj se vaa cataj so' gaa vaj nij soj estadó Galilea, ne cataj xna'anj so' rihaan soj se vaa <sup>7</sup>xa' so' sij ca'née Diose nicaj yu'unj man yuvií, tzaj ne vaa che'é tacuachén nii man so' rihaan síi tumé cacun', ne cachron nij so' man so' rihaan rcutze, ne cachén va'núj güii, gaa ne cunuu i'na' uún so', taj so' a —taj roj snó'o yo' rihaan nij chana a.

<sup>8</sup>Dan me se nanuj rá nij chana nana ca'mii Jesucristó a. <sup>9</sup>Gaa ne curihanj nij chana yu'uj yuvej, ne canicaj nij chana yo' chuman' Jerusalén, ne cataj xna'anj nij chana nu' se vaa quene'en nij no' rihaan xaan nij apóstol cune' Jesucristó man do', rihaan yo'óo nij síi tucu'yón se-nana Jesucristó uún do' a. <sup>10</sup>Dan me se va'núj nij chana me níi cu'naj Mariá Magdalena do', níi cu'naj Juana do', níi cu'naj María nii Jacobo do', ne va'núj nij no' ga yo'óo nij chana ro', cataj xna'anj rihaan nij apóstol che'é nu' se vaa quene'en nij no' a. <sup>11</sup>Ne gaa cuno

nij apóstol cune' Jesucristó man se-nana nij chana, gaa ne nana snúu rma'an me nana yo', rá nij apóstol cune' Jesucristó man, ne ne cuchuman rá nij so' se-nana nij chana a. <sup>12</sup>Tzaj ne naxumaan síi cu'naj Pedró, ne cavii so' cunánj so' ca'anj so' ndaa yu'uj yo', ni'yaj so' a. Dan me se canicun' nituu so', ni'yaj so' rque yu'uj, tzaj ne nuvi' Jesucristó naj rque yu'uj quene'en so' a. Maan yatzij mantá uun naj, ni'yaj so' a. Gaa ne cavii so' quinan' so', ne caráya'anj so' che'é nu' se vaa guun a.

**Nana nihánj taj xna'anj se vaa ca'mii Jesucristó ga vij tuvi' nij síi tucu'yón se-nana so' gaa vaj roj so' chrej ndaa chuman' cu'naj Emaús a**

<sup>13</sup>Dan me se vij tuvi' nij síi tucu'yón se-nana Jesucristó ro', vaj roj so' chrej veé maan güii cotungó yo', ca'anj roj so' ndaa 'o chuman' naj xaan kilómetro ga chuman' Jerusalén, ne Emaús cu'naj chuman' yo' a. <sup>14</sup>Ne nanó roj so' cuentó che'é nu' se vaa quiran' nij tuvi' Jesucristó a. <sup>15</sup>Dan me se nanó roj so' cuentó, ne nuchruj raa roj so' daj quiran' Jesucristó, gaa ne ma'an Jesucristó quinichrun' rihaan roj so', ne chéé Jesucristó ga roj so' a. <sup>16</sup>Tzaj ne ne ca'vee cunuu yaan roj so' man Jesucristó ma'. <sup>17</sup>Gaa ne cataj Jesucristó rihaan roj so' a:

—Chéé roj soj nanó roj soj cuentó, ne me che'é nanó roj soj cuentó ga tuvi' roj soj, ne me che'é nanó ndo'o rá roj soj ga —taj so', xná'anj so' man roj so' a.

Ne dan me se canicun' roj so', ne nanó ndo'o rá roj so' a. <sup>18</sup>Dan me

se yo'o so' me síi cu'naj Cleofas, ne cataj so' rihaan Jesucristó a:

—Cunudanj nij síi aran' chuman' Jerusalén ne'en daj vaa guun chuman' Jerusalén güii cachén nihánj ei. Ne me che'é daj 'o ruún so' me síi ne ne'en daj vaa guun güii cachén nihánj ga —taj so', xná'anj so' man Jesucristó a.

<sup>19</sup>Gaa ne:

—Daj guun chuman' Jerusalén ga —taj Jesucristó, xná'anj so' man roj so' a.

Gaa ne cataj roj so' rihaan Jesucristó a:

—Nu' se vaa quiran' Jesucristó síi cavii chuman' Nazaret a. Ne so' me síi guun síi nata' se-nana Diose rihaan nij yuvii, ne síi uun nucuaj ndo'o qui'yaj suun me so', ne síi cavii ndo'o nana sa' che'é Diose tu'va me so' rihaan cunudanj nij yuvii a. <sup>20</sup>Ne dan me se ca'ne' nij xrej ata suun nocoo doj ca'ne' nij síi nicaj suun ca'ne' suun se vaa cavi' so', gaa ne cachrón nii man so' rihaan rcutze, <sup>21</sup>ne dan me se guun rá núj se vaa so' me síi tinanii man ní' sij israelitá rihaan sayuun, tzaj ne quiran' so' cunudanj, ne nihánj me se síj va'núj güii cavi' so' adonj. <sup>22</sup>Tzaj ne caráya'anj ndo'o núj, qui'yaj chana tuvi' núj a. 'O se taxrej cuan' me se ca'anj ni'yaj nij chana yu'uj cachin' nii man so', <sup>23</sup>tzaj ne dan me se ne nari' nij chana man so' a ma'. Che'é dan ca'na' uún nij chana rihaan núj, ne cataj nij chana se vaa ndaa vij se-mozó Diose naqui'yaa rihaan nij no', ne cataj roj se-mozó Diose se vaa vaa i'na' Jesucristó, taj nij chana rihaan núj nanj adonj. <sup>24</sup>Dan me se

cavii 'o vij tuvi' núj ca'anj ni'yaj roj so' yu'uj yo', tzaj ne quene'en roj so' nu' ndaa vaa cataj xna'anj nij chana rihaan núj, tzaj ne ne nari' roj so' man ma'an Jesucristó a ma' —taj roj so' rihaan Jesucristó a.

<sup>25</sup>Gaa ne ma'an Jesucristó cataj rihaan roj so' a:

—Dan me se síi ne acaj cuentá me soj, ne síi ne niha' rá cuchuman rá nu' se-nana nij síi nata' se-nana Diose gaa naá me soj nanj á. <sup>26</sup>O se ne ne'en soj se vaa xa' síi ca'née Diose tinanii man yuvi' rihaan sayuun, tzaj ne vaa che'é ndo'o quiran' so' sayuun ne catuu so' rej guun chij ndo'o so' a —taj Jesucristó rihaan roj so' a.

<sup>27</sup>Gaa ne dan me se guun che'e so' ca'mii so' che'é se-nana síi cu'naj Moisés do', che'é se-nana cunudanj nij síi nata' se-nana Diose do', gaa ne cataj xna'anj so' rihaan roj so' daj taj nu' danj Diose che'é ma'an so' a.

<sup>28</sup>Dan me se quinichrun' nij so' tu'va chuman' rej ca'anj roj so', gaa ne Jesucristó me se ndaa rá se 'yaj síi ca'anj chuman' naj gan' doj ro', qui'yaj so' a. <sup>29</sup>Gaa ne terquee roj so' man Jesucristó a:

—Quinaj cahríi so' ga rój, ne aj ca'anj güii, ne vaj so' chrej, ne guun rmi' nanj á —taj roj so' rihaan Jesucristó a.

Gaa ne quináj so' ga roj so', ne catúj so' chuman' caran' so' ga roj so' a.

<sup>30</sup>Dan me se yáan nij so' cha xti'no nij so', ne nicaj Jesucristó rachrúun, ne nago' so' graciá rihaan Diose che'é rachrúun, gaa ne cuxra' ta'aj so' rachrúun, rqué so' cha roj so' a. <sup>31</sup>Dan me se caxrj rá

roj so', ne cunuu yaan roj so' man Jesucristó, ne veé dan nu' ca'anj ni'ya Jesucristó rihaan roj so', ne ne ca'vee quene'en roj so' man so' a ma'. <sup>32</sup>Gaa ne cataj roj so' rihaan tuvi' roj so' a:

—Veé ya ma'an Jesucristó me yo' asan. 'O se gaa ca'mii so' ga ní' gaa vaj ní' chrej do', gaa cataj xna'anj so' che'é danj Diose do', gaa ne guun niha' uxrá nimán ní', ne ndaa tiquisii ma'an nimán ní', qui'yaj so' a —taj roj so' rihaan tuvi' roj so' a.

<sup>33</sup>Gaa ne maan orá dan naxumaan roj so', ne canicaj roj so' ca'anj uún roj so' chuman' Jerusalén, gaa ne cuchi' roj so' yo', gaa ne aj cunuu chre' xaan nij síi tucu'yón se-nana Jesucristó ga yo'ó tuvi' nij so', <sup>34</sup>ne nij so' ro', cataj rihaan roj so' se vaa ya aj cunuu i'na' uún síi 'nij ra'a man ní', ne síi cu'naj Simón me síi quene'en man so', taj nij so' rihaan roj so' a. <sup>35</sup>Gaa ne roj so' ro', cataj xna'anj daj guun gaa quene'en roj so' man Jesucristó gaa vaj roj so' chrej, ne cataj xna'anj roj so' se vaa ndaa cuxra' ta'aj so' rachrúun gaa cunuu yaan roj so' man Jesucristó, taj roj so' a.

**Nana nihánj taj xna'anj se vaa curuvi' Jesucristó rihaan xaan nij síi tucu'yón se-nana so' ga tuvi' nij so' a**

<sup>36</sup>Dan me se gaa nanó nij so' cuentó che'é nu' rasuun dan, ne nu' curuvi' Jesucristó tanuu sca'núj nij so', ne:

—Dínj gaa nimán soj á —taj so' rihaan nij so' a.

<sup>37</sup>Gaa ne cuchu'vi' ndo'o nij so', ne ta'naj me síi nicun' rihaan nij so', rá



nij so' a. <sup>38</sup>Gaa ne cataj Jesucristó rihaan nij so' a:

—Me che'é nanó ndo'o rá soj, ne me che'é uun vij rá soj ga. <sup>39</sup>Ni'yaj soj ra'aj ni'yaj soj tacój ni'yaj soj, ne xcaj soj cuentá se vaa ma'anj me á. Xa' ta'naj, tzaj ne taj nee man so' do', taj cúu man so' do' ma' —taj Jesucristó rihaan nij so', <sup>40</sup>ne tihaan so' ra'a so' do', tacóo so' do', rihaan nij so' a.

<sup>41</sup>Dan me se ne ca'vee cuchuman rá nij so' se vaa ma'an Jesucristó me a. 'O se guun niha' uxrá rá nij so', ne ca'anj uxrá rá nij so' a. Che'é dan cataj Jesucristó rihaan nij so' a:

—Vaa doj se chá rihaan soj na' —taj so', xná'anj so' man nij so' a.

<sup>42</sup>Gaa ne rque nij so' 'o xco' nee xcuaj ri'ya do', doj scuuj xtaan do', man so', <sup>43</sup>gaa ne nicaj so', ne chá so' ni'yaj nij so' a. <sup>44</sup>Gaa ne cataj so' rihaan nij so' a:

—Nihánj me nana ca'mii 'unj rihaan nij soj gaa vaj 'unj ga soj, se vaa cataj 'unj vaa che'é quisij ya 'unj nu' nana a'mii che'é 'unj nana no rihaan yanj no se-tucuanj Moisés do', yanj no se-nana nij sí nata' se-nana Diose gaa naá do', yanj no nij chra' salmo do' a —taj so' rihaan nij so' a.

<sup>45</sup>Gaa ne guun nucaj nij so' xcaj nij so' cuentá che'é nu' danj Diose, qui'yaj so', <sup>46</sup>ne cataj so' rihaan nij so':

—Veé danj taj danj Diose se vaa xa' 'unj sij ca'née Diose tinanii man yuvi rihaan sayuun, tzaj ne quiran'

ma'anj sayuun, ne cavi' 'unj, ne cachén va'nuj güii, gaa ne cunuuj i'na' uún 'unj a. <sup>47</sup>Gaa ne ca'mii natáj nii rihaan cunudanj nij yuvi man rihaan chumii se vaa che'é se vaa ca'ná' 'unj ro', che'é dan sese canicaj nimán nij yuvi canoco' nij yuvi chrej sa', gaa ne tinavij Diose cacun' tumé nij so' a. Dan me se asino ca'mii natáj nii nana dan chuman' Jerusalén, gaa ne ca'mii natáj nii nu' rihaan chumii adonj. <sup>48</sup>Ne nij soj ro', me nij sí quene'en nu' rasuun qui'yaj ne testigó guun soj, <sup>49</sup>ne nihánj me se rque 'unj Nimán Diose rihaan soj ndaa vaa cata' tu'va ma'an Diose gaa naá a. Dan me se yo'o cayáan soj chuman' Jerusalén nihánj ndaa se nari' nucaj nimán soj qui'yaj Diose á —taj Jesucristó rihaan nij so' a.

**Nana nihánj taj xna'anj se vaa cavii Jesucristó xtá' a**

<sup>50</sup>Gaa ne nicaj Jesucristó man nij so', ca'anj so' ndaa tu'va chuman' Betania, gaa ne naxcaj so' ra'a so', ne cachín ni'yaj so' rihaan Diose se vaa ve'é racuuj Diose man nij so', ne cavi sa' nij so' a. <sup>51</sup>Ne nu' ca'mii so' danj che'é nij so', ne nu' cavii so' xtá' ca'anj so' a. <sup>52</sup>Dan me se na'víj nij so' rihaan so', gaa ne canicaj nij so' ca'anj uún nij so' ndaa chuman' Jerusalén, ne guun niha' uxrá rá nij so', <sup>53</sup>ne yo'o ca'anj nij so' nuví nocoo, ne nata' nij so' rihaan nij yuvi se vaa sa' uxrá qui'yaj Diose a. Veé danj gaa ya ei.